


Séréel Ndút: Unni Koope



Ndut: Séréel Ndút: Unni Koope (New Testament+)

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

PDF generated using Haiola and XeLaTeX on 21 Feb 2024 from source files dated 29 Jan 2022

a3a1238b-9393-5875-a4c5-1d3f38537bfe

Contents

Lúkkë	1
Saŋ	60
Fílíp	102
1 Tesalonik	108
2 Tesalonik	114
2 Timoote	118
Tít	124
Filemoo	128
Saak	130
1 Peer	137
1 Saŋ	145
2 Saŋ	152
3 Saŋ	153
Yúđ	154
Feeñiyoh	157

Uni Neba bíní Lúkkë rë Kúnsëe

Di baahi jaŋaa Lúkkë daa bíní téeríi Uni Nebi beh, ndaa bití daa ri bíní rí wonuy filíḅ. Di fi Lúkkë nék húmú payoh, te ri húmú yëwúḁ neh. Di bíníté téeré kay, daa ri bee won sun fi tilédí apootarra ra. Di húmúy apootari Yéésú dé', ḅani Pool daa na húmú ñéerúu (Saame Kolos 4.14). Di meelsa' meelsoo níi dí lahte yíi lante ri sun fi pesi Yéésú, dí na anti bíní unni yeh. Di bíní unna ḅëyí hínú Tewofil.

Lúkkë bíníté iñi lahte solo pesadi Yéésú : Koope wolte Yéésú èldúnë nda ḅëyí gém díi na ḅééḅ múc. Di teeḅa'te bití ḅal Yéésú daa Yíkëe.

Filíḅ téeríi beh, dí wonte sun fi :

- yíi lenke dee aya' Saŋ Batis èldúnë rë (1.5-25 ; 56-80),
- yíi lenke dee aya' Yéésú èldúnë rë (1.26-55 ; 2.1-20),
- yíi lenke payi Yéésú jéríḁḁ (4.38-41 ; 5.12-26),
- yíi lenke kimtaanni caakka paŋ ri ra (7.11-17 ; 8.22-25 ; 9.10-17),
- yíi lenke anili ḅëe' naa'-keeñ dék Samari ra (10.29-37),
- yíi lenke bee paya' Yéésú faam i Martaa a Mari ra (10.38-42),
- yíi lenke kolohi Yéésú Galile dí na saañ

Yerusalem (13.22-30 ; 18.31-34),

- yíi lenke anili kúkëyë múuy níi olute ra (15.11-32),
- yíi lenke húlí Yéésú (23.13-56),
- a yíi lenke kolohi ḅúudé (24.1-49).

ḅëyí fi jaŋi téeríi bee ḅééḅ ay yúh bití Yéésú daa Sëmlëhi ḅëewë gémú díi na ra ḅééḅ.

Yee tah Lúkkë bíní unna ra

¹ Bah Tewofil, ow caak bíníyúté di oluu wa ri, di yíi lenke iña lah filíḅ fi fun dee bín fë rë, ² ti di ḅíllúu wë ḅëewë maasuu iñyaaha dalaani wa ra, te daa wa ḅëewë na waariyu Unni Koope ra. ³ So' ḅal, mi nampee meelsa' yíi lante sun fi iñyaaha ḅééḅ, mi na tééḅíḁ, dala'te dalaani wa, mantee ot bití ette mi bíníyíḁ ḁë wë. ⁴ Hen ḁaaha raa, fay yúh bití iña teeḅu fu ra ḅééḅ kaah.

Woni ban fi límí Saŋ Batis

⁵ Jamanaa hena' Erot bu- uri Yúdéé rë, húmú lahte seeyohi hínú Sakari, dí non goomali seeyoh yi Abiyaa koon. Beḅëfi hínú Ilsabet, dí sédí Aaron seeyohi gaana. ⁶ Wa ḅééḅ ana húmú júḅúté íllí Koope, wa na hélih yin túuyë' yë, wa na pagu iña naha' Koo-Yíkëe rë ḅééḅ. ⁷ Wa húmú lahuy koy, af bití Ilsabet húmú mínéh pok loo, te wa ḅééḅ ana bahayute.

⁸ Lahte bis, Sakari hompe waaji seeyoha yulíḁ Koope

na ra, ndah goomali daa eyuu pañi. ⁹ Di baahuu wa ri, seeyoh ya húmú tansuu ow, këdrí Koope cuuraay tígè lukki sela filiḅ Faam fi gaani Koo-Yíkëe rë. Bee yínee tansa keen sun fi.

¹⁰ Wahtaa na kara' cuuraaya ra, bëewë bëeḅ húmú èssë na dagu. ¹¹ Sakari hom filiḅ nú ri otte malaakii Koo-Yíkëe hatna paa' tígè na tamuu cuuraay ra ya' ñamaa. ¹² Di títté, afa kúnèhté. ¹³ Ndaa malaakaa won ri tih : « Ngana tíit Sakari ! Koope tahte ðañu : beḅebu Ilsabet ay roo límíḁ koy yaal, lah dëekée rí Sañ. ¹⁴ Keeñu ay naa sos nú sos te límí ay neba' ow caak. ¹⁵ Di ac ow gaan illí Koo-Yíkëe. Di ii han bëeñ mbée hani mín maniyil bëeḅ. Balaa ri límú, ði ay líif a Ruuh-Peseñ. ¹⁶ Di ay nimilid ow caak di bëy Israyel Koope na, Yíkii wë. ¹⁷ Di ay këllëh Yíkëe, ñéerë' a doolii Ruuhi Koope húmú yonente Éelí në rë, yugusa' hanndal ki baappa a koyya, nimilid bëewë súugúu Koope ra, wa ñéerë' a bëewë júbú rë. Di ay saam dúukëli bëewí ay homḁ Koo-Yíkëe. » ¹⁸ Sakari meelte malaakaa won ri tih : « May yúhee biti yii baa ay lah ðíh ? So' mi bahate te beḅḅ so' bitiffe. » ¹⁹ Malaakaa tahte won ri tih : « Daa mi Gaburyel, mi homa' hëbís Koo. Daa ri wol so' doo na, komu uni nebi bah. ²⁰ Yee won mi ro baa ra

ay lahee ðaaha biti wahtaa lah. Ndaa gémë gémëy fu so' ra tahte fii míníl won nú yiin nay lahe iñyaaha ra. »

²¹ Yaaha bëeḅ bëewë húmú èssë na sehu, wa éemúté maaña maañ Sakari filiḅ tígí selaa ra. ²² Dúhë' rí rë, ði mínëh won waa na, ði wona' a wa wonaḁ likid. Tígí daaha, bëewë anutee yúh biti ri ot yin tígè.

²³ Dúmlë' Sakari waalla eyuu ri Faam Koope ra, ði nimilte faam. ²⁴ Gétë' iñyaa bëeḅ rë, hompe nú Ilsabet beḅebi pokke loo, hompe yii mitte céyín iip faam dúhëy. Di won nufi tih : ²⁵ « Élí yee pagid so' Koo-Yíkëe rë kan ! Nufa payte soo na, ði nissé gacaa húmú homa' mi leelii bëewë rë. »

Woni ban fi límí Yéesú

²⁶⁻²⁷ Céyín pëenë filoon fi heni Ilsabet loo, Koope wolte malaaka Gaburyel kúkëy cafay na, hínú Maryaama ; ði dék Nasaret di Galile. Di húmú onute yaal ; yaala Suseef sédí Dawit. ²⁸ Laha' malaakaa faam Maryaama ra, ði won ri tih : « Coleere Maryaama, ðo fa Koo-Yíkëe on ðo mal ra. Di ee doo na, » ²⁹ Woni malaakaa kúnté af Maryaama ; ði na níḅ yee wadti fahaa won wodohi baa ra. ³⁰ Malaakaa won ri tígí daaha tih : « Ngana tíit Maryaama, Koope daa on ðo mal. ³¹ Síkirée ! Fay pok loo te fay lahee koy yaal, lah dëekée rí Yéesú*. ³² Di ac ow gaan te ri ay dëekúu Koy

* **1:31** 1.31 Tii Yéesú di ébrë daa Yosuwe. Yosuwe daa ri : Yahwee daa Sëmlëhë.

Koope fa sunaa-sun. Koo-Yíkëe ay rii yef ñaani nguur ki Dawit ciffi. ³³ Di ay hen buuri bëy Israyel faraah, Nguur ki ii mëssí dúm. » ³⁴ Maryaama won malaakaa tih : « Yii baa ay mínée lah dñh te mi yéeh yaal ? » ³⁵ Malaakaa won ri tih : « Ruuh-Peseñ ay cép sun fu, Koope fa sunaa-sun ay teeḃa' doolii dōo na. Daa tah kúkëyí selaa nay fuu lahee ra ay dëekúu Koy Koope. ³⁶ 'Bitifa' mboko mu Ilsabet níi, dñ pokke loo ; dñ fa húmú wonu biti mínéh lah koy ra, dñ hom céyín fí pëenë fí woteh. ³⁷ Lahay yii wooñ Koo. » ³⁸ Maryaama won tígí daaha tih : « Mi sùrgíi Koo-Yíkëe ; yee won fu ra lahaan daaha. » Tígí daaha, malaakaa takohte, saañce.

Yéri Maryaama Ilsabet

³⁹ Tíkëh i waal, Maryaama kolohte yíppée saañ gini hom danñi deyi Yúdee. ⁴⁰ Laha' ri ra, dñ haalte faam Sakari, wodohte Ilsabet. ⁴¹ Ilsabet na keloh wodohi Maryaama, koy ka lowa hégíyëhté, Ruuh-Peseñ yíppée rii haal. ⁴² Tígí daaha, dñ béyídté uni sun won tih : « Koope lukki barkel ro beleḃḃa feey fa bééḃ te koy ka lowu barkelte bal. ⁴³ Daa mi wa níi, yaafi Yíkíi sè' na ac yéri sè' ? ⁴⁴ Ole ! Mi na keloh wodohu rek, keeñ koy ka loo so' sosse níi sos, tahte ri na hégíyëh. ⁴⁵ Fu lahte sos-keeñ, géme géme fu biti iña wonu fu te kola' Koo-Yíkëe në rë ay

lah. » ⁴⁶ Maryaama won tígí daaha tih :
 « Mee kañ dëe gaana' Koo-Yíkëe rë,
⁴⁷ dñ fa na sèmlë' sè' rë tahte keeñ so' sosse níi sos,
⁴⁸ di yee hela' ri nuf soo na ra, so' mi sùrgë dñi na kut ra.
 Daa tah dala'te woteh níi kiri fi kirih,
 bëewë ay soo dëekée sos-keeñ fe.
⁴⁹ Koope fa mín bééḃ rë pagidte so' yii gaante tiyi selate.
⁵⁰ Dee níi kiri fi kirih, dñ ay teeḃ bëewë neehu ri ra naa'-keeñ.
⁵¹ Di teeḃa'te doolii, pañke i yin gaan ; dñ tasaara'te bëewë në gaan-gaanluu ra.
⁵² Di cépídté buurra ñaanni nguur ki wa, béyídté bëewë lahuy doole ra.
⁵³ Di onte bëewë yaabu ra njél, líkké bëewë caaku yin ra wa suute a ya' holon.
⁵⁴ Di sèmlë'té bëy Israyel sùrgë yí, teeḃpe wa naa'-keeñ,
⁵⁵ ti di húmú gapa' ri caacci yen nen, Abraham a séttí níi kiri fi kirih. »

Lími Sañ Batis

⁵⁶ Maryaama hompe Ilsabet na yii mitte céyín éeyë antee nimil faam. ⁵⁷ Laha' loo Ilsabet ra, dñ lahte koy yaal. ⁵⁸ Keluu bëewë dékú a ri ra a mboko yi biti Koo-Yíkëe teeḃpe ri naa'-keeñ níi rë, bani wa

béeb bokute lahute na sos-
keeñ. ⁵⁹ Nimila' bisa límú
kúkëyë rë, bëewë ayute leji.
Wa fahuu yeri tii Sakari
koon, boffa ; ⁶⁰ ndaa yaafa
tahte won tih : « Ëe-ëe',
dî hínú Saṅ. » ⁶¹ Wa wonu
ri tih : « Lahay bëyí hínú
daaha mboko yu na. » ⁶² Wa
anutee won a boffa wonaf
likid, meelute ri tiya nay
yeru koohi ra. ⁶³ Tígí daaha,
Sakari meela'te arduwaas,
bínité nē unni yeh : «
Di ay hínú Saṅ. » Bëewë
béeb éemuté nē. ⁶⁴ Pereem
Sakari yíppée pëkísëh, dî
dalaatte won, dî yampe na
sím Koope. ⁶⁵ Bëewë bani
wa dékú rë béeb títúté.
Wona hente lëyëṅ deyí
daṅṅi Yúdée béeb. ⁶⁶ Bëewë
keluu iñyaa ra béeb na níbú
yii leṅ na, wa na meelu affi
wa yee nay míllée kúkëyë
rë, ndée lante bití Koo-Yíkëe
ñéerë'té a ri.

Kaṅi Sakari Koope

⁶⁷ Ruuh-Peseṅ haalte
Sakari boffi kúkëyë, dî na
léhín unni kola' Koope na
won tih :

⁶⁸ « Bëewë béeb símún
Yíkëe, Koope fi bëy
Israyel, di yee yeela' ri
bëewí, sëmlë'té wë rë.

⁶⁹ Di kompe yen bëyí
gaani nay yen sëmlée,
bi dúhë' tali Dawit
súrgii.

⁷⁰ Daa ri yee maañ rii gapa',
ñeya'te ri yonente yi
sela yi ra.

⁷¹ Di hímú wonte yen bití
ri ay yen sëmlë' ya' yi
haa'oh yi yen a kaa'oh
yi yen.

⁷² Di teebpe caacci yen
naa'-keeñ, hampe yee
hímú pok ri hanndal
ki wa ra.

⁷³ Koope añohte ciffi yen
Abraham bití

⁷⁴ dî ay yen sëmlë' ya' yi
kaa'oh yi yen, nda yen
néekiñiñih jaamiyohi ;

⁷⁵ nda pesi yen béeb, yen
hen bëewí selayute te
júbúté íllí.

⁷⁶ Te dō fi koy so', fay dëekúu
yonentii Koope fa
sunaa-sun, ndée fay
këllëh Yíkëe, fu darid
ri waali,

⁷⁷ fu teebe bëewí bití ri ay
waa sëmlë', baal wa
bakaad'di wa.

⁷⁸ Koope fi yen baahte te ri
naa'te keeñ, daa tah
dî ay yen hawaan a
niññi dúhë' sun ti na'a
na púl rë nen,

⁷⁹ niññi yen fa homu ñúus
te tasuu seh kúl kē
rë, dî tik yen waali
jaammaa. »

⁸⁰ Saṅ na ood, afa na baatti
kúnsëh. Di hímú pesa' lu-
ufa níi yiin teekiroh ri bëy
Israyel ra.

2

Límí Yéesú

(*Saame Maccëe 1.18-25*)

¹ Jamani baaha, buura
hínú Ègís rë túuyë'té kíní
bëewë dékú ginna Rom ílíf
wë rë béeb. ² Lahí kínë
déb baa ra, deef Kiriñus daa
kélffi gini Síri, ³ te ow fi
ow béeb saya' biníyëh gina
coosaana' ri ra. ⁴ Di fi Suseef
bal nampee koloh Nasaret
di Galile, saañce Betle'em

di Yúdée, gina coosaana' Dawit ra, ndée ri non tali Dawit. ⁵ Na saañ Suseef bíníyèh rë, bani Maryaama ñéerúu. Deef Maryaama húmú pokke loo. ⁶ Homi wa Betle'em daaha, lowa hampe ; ⁷ di saawohte koy yaal. Di lëmëssé baakera ndíimú, fëndíté rí mbalka ñamaa júr, bi deef wa húmú dëmíh lasa na hanluu ayoh ya ra*.

⁸ Húmú lahte níirèh yí na nee'u wohi yuppi wa luufi baaha. ⁹ Malaaka yínè di malaaka yi Koo-Yíkèe púlèhté waa na, niiñi ndami Yíkèe hawaante wa. Tígí daaha, wa títúté ní tít. ¹⁰ Malaakaa won wa tih : « Ngënë títí ! Mi ac wonon yii nebpe keloh, yii ay sosil keeñi bëewë béeb níi sosil. ¹¹ Elgee woteh beh, di gin Dawit, lahte Sëmléhi límíúté rën, daa ri Kiristaa, daa ri Yíkèe. ¹² Te don ay rii yúhsée deh : don ay ot baakeri lëmésú ndíimú, fëndú mbalka ñamaa júr. » ¹³ Malaakaa na woc wona, malaaka caak yípútée rii deefid, wa na njoobru Koope wonu tih : ¹⁴ « Koo laha ndam di sunaa-sun, te bëewë ri faha' wa ra béeb lah jaamma feey fa. »

¹⁵ Nimiluu malaaka ya sun-Koo ra, níirèh yë na wnantuu hanndal ki wa tih : « Yen yíppi koloh yen saañ

Betle'em, yen ole yee lah ra, yee teeb yen Koo-Yíkèe rë. » ¹⁶ Wa yípútée koloh suute na saamu. Lahuu wa ra, wa olute Maryaama a Suseef, wa deefute baakera fëndúté mbalka ñamaa júr. ¹⁷ Oluu wa kúkëyë rë, wa bílluté yee won wa malaakaa sun fi ra. ¹⁸ Bëewë keluu bíllí níirèh yë rë béeb éemuté woni wa níi éem. ¹⁹ Di fi Maryaama hampe iñyaa béeb afi, na níb në. ²⁰ Níirèh yë anutee koloh na nimilu yuppi wa, na kañu Koope, na njoobru ri di iña keluu wa te olute wa ra. Iña béeb lahte ti dee húmú wona' wa malaakaa ra nen.

²¹ Nimila' bisa límú kúkëyë rë, wahtaa nay rii lecu ra lahte ; di yerute tii Yéesú ti di húmú naha' ri malaakaa deef yaafa pokay loo doom ra.

Kúri Yéesú Faam fi gaani Koope

²² Hompe níi wahtaa wad waa púusúun rë lahte ti dee túuyë' rí kootii Mëyíis rë nen. Tígí daaha, Suseef a Maryaama koluute kúrúte Yéesú Yerusalem, jébéluté rí Koo-Yíkèe, ²³ ndée bíníyúté di kootii Koo-Yíkèe bitih : « *Koy ki saawi yaali límú béeb ay jébélú Koo-Yíkèe.* » ²⁴ Wa yeruute hawra na naha' kootii Koo-Yíkèe rë bal

* **2:7** 2.7 Jamanii baaha, bëewë ginna luufa deyi baaha a júrè húmú mínú nee' lasa yínè. Deefuu wa lasa na hanluu ra liiffé rë, Suseef a Maryaama húmú lasa na hom júrè rë. ✨ **2:23** 2.23 Saame Kolohi koyyi Israyel Ésip 13.2, 12, 15 ; Kíni bëy Israyel 18.15-16 † **2:24** 2.24 Kootaa húmú naha' hawid har a hëtè mbée har a bédú teem-teem, ndaa bëyí húmú lahay cadum har raa, di mín yera' hëtè ana mbée bédú teem-teem ana. Saame Tali Léwí 12.8.

: hētè ana mbée bédú teem-teem ana†.

²⁵ Húmú lahte bëyí dék Yerusalem, dī hínú Simewonj. Di júbpé, gémpé Koope níu gém, te lahte yaakaar ayi bée' nay sēmlée bëy Israyel ra. Ruuh-Peseñ húmú haalte ri, ²⁶ te teebpe ri biti dī ay ot Buura Koo-Yíkée fal ri ra, balaa ri húl. ²⁷ Daaha, Ruuh-Peseñ yeñce ri Faam fi gaani Koope. Kúrúu Suseef a Maryaama koy wa Yéésú pañi yee naha' kootii Mëyíis rē, ²⁸ Simewonj bebpe kúkëyë boppe ri, símpé Koope na won tih : ²⁹ « Koo-Yíkée, yee gap fu so' ra lahte woteh. Fu mín sēe yeris so' mi súrúu mi húl, mi saañ a jaamma, ³⁰ ndée mi tíkké íllí sē' ngēey sun fi Sēmléhē wol fu ra, ³¹ te bëy ëldúnē bééβ ay rii ot. ³² Daa ri niiña nay tahe heetta feey fa bééβ yúh rē rē ; dī ay on bëewú, bëy tali Israyel ndam. » ³³ Boffa a yaafa éemuté yee won Simewonj sun fi kúkëyë rē. ³⁴ Simewonj dāgídte wa antee won Maryaama yaafi Yéésú tih : « Koope daa wol kúkëyí beh, kéendí a béyri ow caak Israyel. Di ay hen tīnndēe te bëewë ay rii kaa'. ³⁵ Di ay tah ow caak teeba' yee hom nuffi wa ra ; te dō fi yaafa, fay lah yii ay roo misik keeñu níu misik. »

³⁶ Húmú lahte yonentii bitiffe níu bitif hínú Aane ; dī koy Penuwel fa tali Aseer. Bani yaala húmú kood ri hena' ri cafay ra pesute

kíil paana, yaala antee húl. ³⁷ Kola'te baaha, dī pesse níu ri lahte kíil sabay peeye a kíil iniil (84) te ri lahaatay yaal kay. Di homa' Faam fi gaani Koope na' a elek oore, dāge. ³⁸ Di laha' daaha deeffe wa na, dī yampe na sím Koope, na won bëewë nē sehaaluu biti Koope ay sēmlē' Yerusalem ra bééβ yii lenke kúkëyë nē.

³⁹ Wocuu boffi Yéésú a yaafa pañi yee naha' kootii Koo-Yíkée rē, wa nimilute gin wa Nasaret di Galile. ⁴⁰ Yéésú na ood, afa na baatti kúnsēh na won wonad baha. Di húmú nebpe nuf te Koope yedday ri.

Laha' Yéésú kíil sabboo a kíil ana ra

⁴¹ Húmú lahaa kíil bééβ, boffi Yéésú a yaafa pay feedi PaagaYerusalem. ⁴² Laha' Yéésú kíil sabboo a kíil ana ra, wa ñéerúuté a ri suute feedin, di baahuu wa ri. ⁴³ Dúmë' feeda ra, bëewë nē nimilu, ndaa Yéésú tasse Yerusalem te boffa a yaafa yiih yin na. ⁴⁴ Wa habuu biti koon bani kooyya ñéerúu rē daa homu, níu wa tíluté bis múlgús. Kanuu wa ri ra, wa na anuu rii saam mboko ya a kooyya na. ⁴⁵ Oluy wa ri ra, wa nimilute Yerusalem na saamu ri. ⁴⁶ Waali éeyë fë, wa deefu ri filiβ Faam fi gaani Koope tookke yëddëh yë nē, na síkírèh wë, na meel wa. ⁴⁷ Bëewë nē síkírúu rí rē bééβ, éemuté dee ñaaña' ri ra a dee na lofa' ri won ra. ⁴⁸ Boffa a yaafa éemuté níu éem oluu

wa ri ra. Yaafa won ri daaha tih : « Do fu paga' fun yii bee díh ? Funí boffu moku moko saamu níi mok. » ⁴⁹ Di won wa tih : « Don saamuu so' yih ? Don yíih biti mi wadti homa faam Baaso' a ? » ⁵⁰ Ndaa wa yíih yee faha' ri waa won baa ra.

⁵¹ Yéésú kolohte bani wa nimilute Nasaret. Di tassi ñeya' woni wa. Yaafa hampe iña lah yaa ra béeb afi. ⁵² Yéésú na ood, nufa na baatti neb ; di baattee neba' Koope a bëewë.

3

Warii Saŋ Batis

(Saame Maccëe 3.1-12 ; Marka 1.1-8 ; Saŋ 1.19-28)

¹ Kíilí sabboo a iip fa homa' buura hínú Tibeer nguur ka ra, deef Poos Pilaat daa húmú gëernëerí Yúdée, Erot kúdté Galile, Fílíp bahii kúdté Ítúré a Tarakonit, Lisañas kúdté Abilen ; ² Haan a Kayif daa húmú seeyoh yi gaanna. Kíilí baaha, Saŋ fi Sakari hom luufa, liilte Una kola' Koope na ra, bee nay rii waareye ra. ³ Daaha, dí wérté deyi Yurdeŋ béeb, na won bëewë biti wa warutee lof pesad, wa bëtsú, Koope baal wa bakaadfi wa ⁴ ti dee húmú biníyúu rí téeríi yonente Isayii ra bitih :

« Lahte un bëyí dofohte luufa na won tih :
 “Dëdfi Yíkëe waal,
 don yugusid fi waalla nay rii ñeye ra níi júb.

⁵ Húlúbbë béeb píubún,

daŋŋa a dúŋŋë béeb deelu ;
 waalla lúgúyëh rë yugusuu,
 waalla lah ngas ra leeñu.

⁶ Hen daaha raa, bëewë béeb ay ot biti Koope ay sëmle.” »^{*}

⁷ Ow caak ayute bëtsëh Saŋ na, dí won wa tih : « Tisoh yi hiliññi yeh ! Daa won don biti don mínú hegoh daanee ke Koope na ac ra ? ⁸ Hena biti kaah don lofute pesad raa, lah téebíi rí pagadon. Ngënë hëbí affon biti don séttí Abraham rek doyte. Mee ron won ra ee biti Koope mín yídís la' yi yeh wa hen séttí Abraham ! ⁹ Wëettíyíi affon ! Yíinë caŋke leca'i kilikka tal-tal ka ; kilki límëy koy ki lahte njiriñ béeb ay lecu, betu kíi. »

¹⁰ Bëy mboolo ma na meelu Saŋ wonu ri tih : « Koope faha' biti fun pagun yih ? » ¹¹ Di tahte won wa tih : « Bëyí lah búub ana, ona bëyí lahay búubí yínëe ; te bëyí lah yii ñama ri, wora' a bëyí lahay ñam. » ¹² I yeekoh túm ayute bëtsëh bal, meelute ri wonu tih : « A fun nék bahaa, fun wadti pagun yih ? » ¹³ Di tahte won wa tih : « Ngënë méelí yii luk yee nahu ron meela' túm rë. » ¹⁴ I soldaar ayute bal, meelute Saŋ wonu ri tih : « A fun ! Fun wadti henun díh ? » Di won wa tih : « Ngënë nëefí héliis ow, te ngënë félí ow ron ñeb hélsí. Lah téyí iña na yínlú ron ra. »

¹⁵ Bëewë lahute yaakaar níi wa béeb na wonu nuffi

wa nda Saŋ daa Buura Koo fal ri ra neh. ¹⁶ Saŋ won wa béeb tih : « So' mi beh, mi bëtsë' ron a muluβ, ndaa lahte bëyí ee ac ra, dī luk soo gaan fap, mi haayayti liil kotti*. Di ay ron bëtsée a Ruuh-Peseŋ a kii. ¹⁷ Di hampe ifi ya'i : dī ay faad too ka, soɔ peba misahi, tam fikid fa filiβ kii kí yíméeh. »

¹⁸ Saŋ ñeya' yéeddë' yí yaaha a i won kay caak waareye bëewë Uni Neba. ¹⁹ Di wonte af gëernëer Erot bal, naafa naaf ri Erojat beleβ bahii ra a iñi bossi caakki kayya paŋ ri ra. ²⁰ Erot pagilte bi luk yaa bos, dī bekrohte Saŋ kasu.

Bëtsí Yéésú
(*Saame Maccëe 3.13-17 ;*
Marka 1.9-11)

²¹ Saŋ húmú bëtissé bëewë húmú daaha ra béeb, dī bëtsëelëhté Yéésú nē bal. Na húmú daŋ Yéésú bee na bëtsú rí rē, sun-Koo kúnsëhté, ²² Ruuh-Peseŋ céppé sun fi man bēdú nen, antee lah uni dūhē'té sun won tih : « Daa fu Koy so' ! Mi faha'te ro nii faha' ! Keeñ so' sosse dōo na nii sos ! »

Coosaani Yéésú
(*Saame Maccëe 1.1-17*)

²³ Na dal Yéésú légéyí rē, deef ri waɔti lahaa kiil sabay éeyë (30). Bëewë húmú habuu biti dī koy Suseef fi Héelí. ²⁴ Héelí koy Matat fi Léwí ; Léwí koy Melki fi Yanay ; Yanay koy Suseef ²⁵ fi Matacaas ; Matacaas koy

Amos fi Nahum ; Nahum koy Esli fi Nagaay ; ²⁶ Nagaay koy Maat fi Matacaas ; Matacaas koy Séméyín fi Yoseh ; Yoseh koy Yoda ²⁷ fi Yowanan ; Yowanan koy Resaa fi Sorobabel ; Sorobabel koy Salasiyel fi Néri ; ²⁸ Néri koy Melki fi Adi ; Adi koy Kosam fi Elmadam ; Elmadam koy Er ²⁹ fi Yéésú ; Yéésú koy Eliyeseer fi Yorim ; Yorim koy Matat fi Léwí ; ³⁰ Léwí koy Simewoŋ fi Yudaa ; Yudaa koy Suseef fi Yonam ; Yonam koy Eliyakim ³¹ fi Meleyaa ; Meleyaa koy Menna fi Matataa ; Matataa koy Natan fi Dawit ; ³² Dawit koy Yéssée fi Obet ; Obet koy Búus fi Sala ; Sala koy Nahson ³³ fi Aminadap ; Aminadap koy Atmin fi Arni ; Arni koy Hesron fi Peres ; Peres koy Yudaa ³⁴ fi Yakop ; Yakop koy Isaak fi Abraham ; Abraham koy Terah fi Nahoor ; ³⁵ Nahoor koy Sérúk fi Réwú ; Réwú koy Pelek fi Ebeer ; Ebeer koy Selaa ³⁶ fi Kenan ; Kenan koy Arpaksat fi Sem ; Sem koy Nowe fi Lemek ; ³⁷ Lemek koy Matusalem fi Henok ; Henok koy Yeret fi Mahaleyel ; Mahaleyel koy Kenan ³⁸ fi Enos ; Enos koy Set fi Aadama ; Aadama koy Koope.

4

Saami Seytaane fiiri
Yéésú
(*Saame Maccëe 4.1-11 ;*

* **3:16** 3.16 mi haayayti liil kotti :Di gerek, bíníyú dëh : te mi yinte sah pëkísi nih yí ñafadfi.

Marka 1.12-13)

1 Yéésú líffé a Ruuh-Pesen, kolohte laahi Yurden, Ruuha kúdté rí na ben ri luufa. 2 Di hompe dín fë waal sabay iniil (40) Seytaane na saam fiiri. Waalli yaaha béeb, dī tùmëy yin loyi nū yaabi misikke mill'eté rii ham.

3 Seytaanaa won dī tígí daaha tih : « Hena biti fu Koy Koope kaah raa, túuyé la'i bee yíssëh ñam. » 4 Yéésú won dī tih : « Bíníyúté Téerëe bitih : "Ow pesa' ñam neh kut." »

5 Seytaanaa kúdté rí sun fi danj utte, yíppée rii teef ginna feey fa béeb, 6 antee rii won tih : « May roo yed nguur ka a alal ma ginni yee béeb ; wa béeb ee ya' so', te mi mín wëe on bëyí neba' so'. 7 Kon fu jaamiyoh so' raa, fu laha' wa béeb. » 8 Yéésú won dī tih : « Bíníyúté Téerëe bitih : "Fay yekre Koo-Yíkëe daa Koope fu ra te fay jaamiyee ri kut." »

9 Filoon fi baaha, Seytaane kúdté rí Yerusalem, cëgídté rí jibi Faam fi gaani Koope, antee rii won tih : « Hena biti fu Koy Koope kaah raa, yeddee feey. 10 Bíníyúy Téerëe biti Koope ay nah malaaka yi níidú woo ? 11 Bíníyúté biti bal : "Wa ay roo meeb tenel, toñeh fay kabinee la'." » 12 Yéésú won dī tih : « Bíníyúté Téerëe

bitih : "Koo-Yíkëe daa Koope fu, ngana saam olsohi." »

13 Filoon fi bee ñeya' ri pagadfa ra béeb na saam fiiri Yéésú rë, Seytaane saañce na séhídf waal kay.

Nimili Yéésú Galile

(Saame Maccëe 4.12-17 ; 13.53-58 ; Marka 1.14-15 ; 6.1-6)

14 Yéésú kola' daaha, ñéerë'té a doolii Ruuh-Pesen nimilte Galile. Tiyi hente lëyëñ deyi baa béeb. 15 Di húmú yëeddë' filib ílïyyë na daguu yëwúddë Koope ra, bëewë béeb kañe ri.

16 Lahte bis, Yéésú kolohte saañce Nasaret fa kora' ri ra. Laha' bisa na hílsúu yëwúddë rë, dī payte haalte tígë na daguu Koope ra ti di na húmú paga' ri merees nen ; dī kolohte janjii Unni Koope. 17 Di yerute téerëe bíní yonente Isayii ra. Kúnsë' rí téerëe rë, dī otte tígë bíníyú unna na húmú saam ri yee ra :

18 « Ruuhi Koo-Yíkëe ee soo na,

dī falte so' waarii ñëkíddë Uni Neba,

dī wolte so' woni bëewë téyú kasu ra biti wa ay yeddu,

woni búumíddë biti wa ay ot a sëmlë'í bëewë moklu ra.

19 Di wolte so' woni bëewë biti kílë nay waa teebe Koo-Yíkëe naa'-keëñ ra ee ac ra. »

20 Janjia' ri unna níu wocce ra, Yéésú kúnté

☆ 4:4 4.4 Saame Nérσί Kootaa 8.3 ☆ 4:8 4.8 Saame Nérσί Kootaa 6.13 ☆ 4:11 4.11 Saame Kañaa ya 91.11-12 ☆ 4:12 4.12 Saame Nérσί Kootaa 6.16 ☆ 4:19 4.19 Saame Isayii 61.1-2

téerëe, nimilidte ri bée' nē tooppitoh yii lenke tīgē na daguu Koope ra, tookke ay yēeddée. Bēewē hūmú daaha ra béeb na yeelu ri. ²¹ Di won wa tígí daaha tih : « Woteh fee Koo beh, Unnee téerëe keluu ron yaa ra, lahte kah-kah ! »

²² Keeññi bēewē béeb sosse Yéésú nē te wa éemuté unni nebba won ri ra, na wonu tih : « Añcañ yaa koy Suseef kep ee ! » ²³ Di won wa tih : « Mi yúhté biti don ay soo won léehí beh : "Do fi naahee, paye afu !" Don ay soo won biti bal : "Fun keltuute iña pañ fu Kafarnawum ra béeb ; page mani wa filib ginu noo, fun ot !" » ²⁴ Di baatte won tih : « Mee ron won kaaf ka ra ee : yonente na sikiriñh gina dék rí rē. ²⁵ Cēe mi won ron : lante biti belebbi yaalli wa húluté hūmú caakute Israyel na pesa' yonente Éelí rē. Bín fē, Koo hūmú tobay nūi hente kiil éeyē a caan, tahte yaabi misikke labpe gina béeb. ²⁶ Añcañ, Koope hūmú wolay Éelí ow yínē sah belebbi yaa na ; di wol ri bi dék Sareptaa di deyi Sidon, te ri yēwúf neh.* ²⁷ Guuñid caak bal hūmú Israyel na pesa' yonente Élísée rē ; añcañ, ow yínē sah waa na guuña laday faana ; faan Naamaan fa dék Síri rē kut daa lan guuña, te ri yēwúf neh.* »

²⁸ Keluu bēewē hūmú tīgē

na daguu Koope ra unni yah, keeññi wa béeb haayte nūi haay. ²⁹ Wa koluute, dúhruté Yéésú gina, kúruté rí af daña yípúu gin wa ra, na fahuu yeñi feey. ³⁰ Ndaa ri húussé leelii wa saañce.

Payi bëyí yébitèh na ham ri

(Saame Marka 1.21-28)

³¹ Yéésú lahte Kafarnawum di Galile. Bisa na hílsúu yēwúdfē rē, di na yēedídf bēewē yee won Téerëe rē. ³² Wa éemuté dee na yēeddē' rí rē, bi na yēeddē' rí a sañ-sañ. ³³ Deef bëyí laha' yébitèh hūmú waa na, di tīgē na daguu yēwúdfē Koope ra, di fonke sun won tih : ³⁴ « Yéésú fí bëy Nasaret, fu faha' pañi fun yih ? Fu ac múklí fun a ? Mi yúh rē ! Daa fu Bëyí selaa dühē' Koope na ra. » ³⁵ Tígí daaha, Yéésú digidte uní won afa tih : « Héddée te fu yeris bëyí beh ! » Yébitèh fē kéenídté bēe' feey fii bēewē béeb, yerisse ri te yin misikay ri. ³⁶ Bēewē béeb éemuté, wa na wonantuu hanndal ki wa tih : « Bee wonad mèn dí kan ? Bëyí bee túuyé' yébitèh yē a sañ-sañ a doole : dí túuy wē yeris ow raa, wa yeris ri. » ³⁷ Tii Yéésú yíppée hen lèyèñ deyi baa béeb.

Bēewí caakka pay Yéésú rē

(Saame Maccëe 8.14-17 ; Marka 1.29-34)

* 4:26 4.26 Saame 1 Buurra 17.8-16

* 4:27 4.27 2 Buurra 5.1-14

* 4:38

4.38 Simon f na wonuu tígí dee ra, daa ri bee Yéésú yef dí tii Peer ra.

38 Yéésú dúhté tígë na daguu yëwúddë Koope ra, saañce faam Simon*. Laha' ri ra, deef jér fënídté pacool Simon beleb, faana tampe ní ti paloß nen. Yéésú dagute payi. 39 Tígí daaha, dí sígimpé sun fi jérdë, digidte uni túuycé tami faana yeris dí. Tami faana yerisse belaa, dí yíppée koloh na tooppitoh wa.

40 Haala' na' ra, bëewë lahu jéríd rë béeb, a di míntí man jéré, komute wa Yéésú. Di tíkké wë béeb ya' payce wa. 41 I yébitëh yedfdute jéríd caak bal, na fogu wone tih : « Daa fu Koy Koope ! » Ndaa Yéésú digidte uni sun fi wa, kadda'te waa won, ndah wa fi yaa yúhúte bití daa ri Buura Koo fal ri ra, te dí fahaay bití daa wa wonun yii baaha.

*Kolohi Yéésú Kafar-
nawum saañce na waare
Yúdée*
(Saame Marka 1.35-39)

42 Lada' Koo ra, Yéésú dúhté gina, saañce tígí ðaayte. Ow caak koluute saami. Oluu wa ri ra, wa na fahuu hami, kaa' ri saañ hel wa. 43 Ndaa ri won wa tih : « Mi wadtee pay ginni kayya bal, mi waare wa Uni Nebi Nguur ki Koope, ndée yii baaha daa tah Koope wol so'. » 44 Daaha, dí kolohte na waare ílíyyë na daguu yëwúddë Koope Yúdée rë.

5

*Taalibe ya débpi dëek
Yéésú rë*
(Saame Maccëe 4.18-22 ;
Marka 1.16-20)

1 Lahte bis, Yéésú húmú búk laahi Senesaret*, ow caak ayute na yejantuu hëbísí, na fahuu síkírëhí Unni Koope. 2 Di otte gaal ana búk laaha, deef seeboh ya cépúté na hosu mbaalli wa. 3 Tígí daaha, dí haalte gaali yínëe, bi Simon daa laha' ri, nahte ri yeñi gaala filíß mulaa, dí hécëh yutuud búk laaha. Di tookke filíß na yëedíd bëewë.

4 Woca' ri wona ra, dí won Simon tih : « Kúré gaala tígí noodte, ðon anti bac mbaallon, ðon seeb. » 5 Simon won dí tih : « Bahaa, yee mínú fun ra fun pagute rí elga béeb, fun habuy yin. Ndaa hém daa fu nah so' pañi raa, fun ay bac mbaalla. »

6 Wa yeeluutee bac mbaalla. Jennë habu wa ra caak caako ní mbaalla dalte pas. 7 Tígí daaha, wa heegute bëewë húmú gaali yínëe rë ya', wa ac habra'i wa. Ayuu wa ra, wa líífruté gaalli ana ya jén ní gaalla talla' honoh.

8 Ola' Simon Peer yii bah, dí yedfohte yekke fíi Yéésú, won dí tih : « Damaay mi lebee ro Yíkëe, ndée mi bakaaroh. » 9 Simon a bëewë ðani húmú rë béeb tíitúté, bi caak jennë habu wa ra ní caak. 10 Saak a Sañ koyyi Sebede, yee wani Simon boku légéy rë tíitúté

* 5:1 5.1 Senesaret :Tii yíníi laahi Galile.

bal. Ndaa Yéésú won Simon tih : « Ngana tíit ! Dala'te woteh, fay soo tasee saamid ow. » ¹¹ Tígí daaha, wa teerute, helute iña lahuu wa ra béeb ñeyute tal Yéésú.

Payi guuñda

(Saame Maccëe 8.1-4 ; Marka 1.40-45)

¹² Lahte bis, Yéésú húmú gin-taah deyi baaha, bëyi faana yahte a guuñ púlèhté dñi na. Ola' bëe' Yéésú, dñi yedfohte kotti lñèhté feey, na ñan ri won tih : « Bahaa, mi yúhté biti fu mín sée pay mi haalaat bëewë në†. Fii soo rii pagid a ? » ¹³ Yéésú yedte ya'i tíkké sun fi, won dñi tih : « Mi tahte ñan. Yípée wah ! » Guuña yíppée lan faan bëe'. ¹⁴ Yéésú kadda'te ri bílid won dñi tih : « Ngana won ow yii beh. Paye seeyoha na dñi olsoh ro, te fu yera' saraha naha' Mëyiis rë fu púsëh, teebi bëewë béeb biti fu lante. » ¹⁵ Filiñ fi baaha béeb, tii Yéésú baattee hen lëyëñ ; ow caak na ayu síkírëhí, jéríddë filiñ fi wa nahee pay. ¹⁶ Ndaa hom nú rëe Yéésú saañ tígí ñaayte, dñi hom dín fë dage Koope.

Payi lëfëñidë

(Saame Maccëe 9.1-8 ; Marka 2.1-12)

¹⁷ Lahte bis, Yéésú hom yëeddë', i fariseñ a i yëeddëh yí kootii Mëyiis maasuute ; wa dúhúu ginna luufa di Galile a Yúdée, lahte yi dúhúu Yerusalem

bal. Doolii Koo-Yíkëe húmú Yéésú në, tahte ri na pay jéríddë. ¹⁸ Lahte bëewí kúrú lëfëñid sun dil ayute, na fahuu haal faam fa, komi ri Yéésú. ¹⁹ Ndaa wa yiih tígë nay wa rii ñeyré rë af caagi bëewë. Wa millúu rii lëwid sun fi lasa, saamute buut anutee yëellid lëfëñidë hom sun fi dila ra fii Yéésú leelii bëewë. ²⁰ Ola' Yéésú dee gémúu wë rí rë, dñi won lëfëñidë tih : « Yaal kowa, fu baalute bakaadfu. » ²¹ Yëeddëh yí kootii Mëyiis a fariseñna na wonu nuffi wa tih : « Bëyéé na sol Koope bee ra wa ? Daa mín baala' bakaad henay Koope ? » ²² Bi yuh Yéésú yee nuffi wa, dñi won wa tih : « Don níbúu yii baa dñi ? » ²³ Yi daa lukki yoob biti mi won bëyi beh : fu baalute bakaadfu, mbée kolee fu tñl ? ²⁴ Woteh ñon ay yuh biti so' mi Koy-bëe', mi lahte sañ-sañ baalaa mi bakaad feey fi beh. » Di won lëfëñidë tígí daaha tih : « Kolee fu pon dilu, fu saañ faam. Daa mi túuy ñë rí. » ²⁵ Lëfëñidë yíppée koloh fii bëewë béeb, ponte dila húmú fëndú rí rë, na saañ faam, na kañ Koope. ²⁶ Bëewë béeb éemuté nú éem, na kañu Koope ñéerë'té a tíit na wonu tih : « Bee woteh bee lëhírey. »

Dëegí Yéésú Léwí

(Saame Maccëe 9.9-13 ; Marka 2.13-17)

† 5:12 5.12 Mi yúhté biti fu mín sée pay mi haalaat bëewë në :Di gerek, bíníyú deh : Mi yúhté biti fu mín sée bukut mi lan.

27 Filoon fi baaha, Yéésú dúhté, otte yeekoh túm tookke tígë nē légyé' rí rē ; dī hínú Léwí. Yéésú won dī tih : « Kolee fu ñee tal so' . » 28 Léwí yíppée koloh, yerisse béeeḅ, wa ñéerúuté. 29 Léwí antee cégíḅ ndaje faami, teeriyohi Yéésú. Wani i yeekoh túm caak a i ow kay daa boku ñama. 30 Farisenḅa a yéeddēh yí kootii Méyiis, yee nonu waa na ra, bi nebaay wa yaa, wa wonu taalibe yí Yéésú tih : « Yi tah ḁon na boku ñam a yeekoh yí túmē a bakaaroh ya ? » 31 Yéésú won wa tih : « Jéridḁē daa sohluu payoh ndaa béewē wahu ra neh. 32 Bakaaroh ya daa tahu mi koloh nda wa lof pesaḁ, ndaa béewē júbú rē neh. »

Yéésú a oora
(Saame Maccēe 9.14-17 ; Marka 2.18-22)

33 I farisenḅ wonu Yéésú tih : « Taalibe yí Saḅ na caakuu oor, ḁage ; yí farisenḅa henuu ḁaaha bal, ndaa taalibe yu dékúu ñam a han. » 34 Yéésú won wa tih : « Bee kíléek lahte ra, ḁon habuu biti ḁon mínú oorloh kooyya, te ḁeeḁa béee' kooḁ ḁa lísé leelii wa a ? Don ha-laatur yí ri maan ? Funi taalibe yí so' nék madu a béee' kooḁ baa ra hom a kooyyi ra nen. 35 Bis ay lah, mi kéllú leelii wa. Tígí ḁaaha, wa ay oor. »

36 Yéésú wonte wa léehí bee bal : « Ow na leceh nuf búub has ḁaafa' ri búub kíilíḁ. Henun ḁaaha raa, búubí hasa ay lah ḁaḁ, te nuf píisí hasa ii ñéerē' a búubí kíildē. 37 Te ow na soreh béeeñí hasi anti dal poosa' filíḅ mbúus hunḁ kíilíḁ. Henun ḁaaha raa, béeeñē ay poo mbúusē, wa yúfēh, mbúusē yah. 38 Béeeñ has kay, soruu mbúus has. 39 Bēyí meedte hani poosa'te na faheeh han has ; dī haba' biti hana poosa' ra daa lukki neḁ. »

6

Yéésú a bisa na hílsúu rē
(Saame Maccēe 12.1-8 ; Marka 2.23-28)

1 Bisa na hílsúu yēwúḁḁē rē ín, Yéésú a taalibe yí ñeyu waali húus filíḅ i meey bele. Taalibe ya homu waala, yabute na kodu yaanḅa yí belaa, na buluñu na húñú. 2 Lahte farisenḅi wonu wa tih : « Haala' yí níi ḁon na pagu yíi Kootaa kadda'te ri bisa na hílsúu rē ? » 3 Yéésú won wa tih : « Don yúhú yee húmú paḅ Dawit bee yaabuu bani béewí rē maan ? 4 Di húmú haal Faam Koope*, ñampe na mbúurēe yefu fíi Koope ra, yee seeyoh ya kut daa waruu naa ñam ra, yedte na béewí, wa ñamute bal. »

ḁ 5:37 5.37 mbúus hun :Bēy gini bín fē túmúu han mbúusí yugusuu a hun. Hani túmú mbúus hun home poosa' raa, mbúusē ḁaaysa' ḁaaysoo. Ndaa mbúusē ḁaha raa, na mínlíléh ḁaaysoh. * 6:4 6.4 Faam Koope :Tígë seeyoh yí ḁey Israyel húmú hawruu Koope na ra. Na húmú tabahay Salomoo Faam fi gaani Koope Yerusalem ra, Méyiis húmú yugusa' Faam Koope a taanta gaan ti di húmú naha' ri Koope ra nen, na homu wa luufa ra.

⁵ Yéésú baatte won wa tih : « So' mi Koy-bëe', daa mi lah sañ-sañ sun fi bisa na hílsúu rë. »

Yéésú a bëe' ya'a beedoh ra

(Saame Maccëe 12.9-14 ; Marka 3.1-6)

⁶ Lahte bis hílsëe kay, Yéésú haalte tígë na daguu yëwúdfë Koope ra, yampe na yëeddë'. Bëyí ya'i ñamaa fa beedohte húmú në. ⁷ Yëeddëh yí kootii Mëyíis a farisenña na olsuu Yéésú nda ri ay pay ow bisa na hílsúu rë, nda wa lah yii yabun wa ri. ⁸ Ndaa bi yúh rí yee nuffi wa, tígí daaha dī won bëe' tih : « Kolee fu cañ fii bëewë béeb deh. » Bëe' kolohte canke daaha. ⁹ Yéésú antee waa won tih : « Cëe mi meel ron : Kootaa naha' yi bisa na hílsúu rë ? Pañ yin wun mbée pañ yin bos ? Sëmlë' ow mbée yeris bëe' húl ? » ¹⁰ Di yeelte bëewë béeb ní, antee won bëe' ya'a beedoh ra tih : « Yere ya'u ! » Bëe' yedte ya'i, ya'a yíppée wah koloñ. ¹¹ Ndaa keeññi bëewë ñéerúuy a Yéésú rë haayte ní wa na peenu yee nay wa rii mínée pañ ra.

Tansi apootarra

(Saame Maccëe 10.1-4 ; Marka 3.13-19)

¹² Lahte bis, Yéésú lappe sun dañ dañi Koope, dī dañke elga béeb. ¹³ Lada' Koo ra, dī dëekké taalibe yi, tanisse na ow sabboo a ow

ana, falte wa apootar. ¹⁴ Tii yi wa daa wa yeh : Simonj fa Yéésú yed ri tii Peer ra a Andere koy-yaafi, Saak a Sañ, Fílíp, Bartalemi, ¹⁵ Maccëe, Toomaa, Saak fi Alfe, Simonj fi jambaara†, ¹⁶ Yudaas fi Saak a Yudaas Iskariyot fa millë'tée yaay Yéésú rë.

Yëeddë'i Yéésú a payi bëewë

(Saame Maccëe 4.23-25)

¹⁷ Yéésú kolohte bani apootarri na cépú daña. Laha' ri tígí yëeddë'té di araal daña ra, dī canke daaha deef taalibe caak húmú në. I ow caak kay húmú në bal : yee dūhúu Yerusalem a ginni kayya Yúdée béeb, yee i gin-taah búk kısı fë : Tíir a Sidon. ¹⁸ Wa húmú ayu síkírëhí Yéésú a payohi jérrí wë. Yee yébitëh na ham wa ra wahute bal. ¹⁹ Bëewë béeb na saamu lebi faan Yéésú af biti lahte yii na dūhë' dīi na paye wa béeb.

Bëewë lahu sos-keñ a yee torohu ra

(Saame Maccëe 5.1-12)

²⁰ Yéésú yeelte taalibe yi tígí daaha, won wa tih :

« Don lahute sos-keñ don fi ñëkíddë : daa ron lahuu Nguur ki Koope.

²¹ Don lahute sos-keñ don fa yaabu ra :

don ay lah njélí doyte.

Don lahute sos-keñ don fa na looyu ra :

don ay lah nef.

† 6:15 6.15 jambaara :Mín hen bëyí far-farlohte kootii Mëyíis, mbée bëyí non bëewë na haa'uu nguur ki bëy Rom ra.

22 Don lahute sos-keeñ biti
bëewë kaa' ron, tík
don dín,
sol ron te wa haba' biti don
ow bos
af so' mi Koy-bëe'.

23 Dëmü don bec ndah sos-
keeñ biti iñyaaha lah
:
waafi mitte ín don seh sun-
Koo ra.

Yúhí biti caacci wa húmú
mokluu yonente ya
daaha.

24 Ndaa mas don fi yikëe yí
alalla :
don pesute nebi ron níi
wocce !

25 Mas don fa lahu njéli
doyte ra :
don ay yaab.

Mas don fa nebluu ra :
don ay lah dígëem don looy.

26 Mas biti bëewë béeb wone
wun sun fon.
Caacci wa húmú henuu
yonente yi padfah ya
daaha. »

Yii lenke kaa'oh yon

(Saame Maccëe 5.38-48 ;
7.1-5, 12, 16-20 ; 12.33-35)

27 Yéésú baatte won tih
: « Don fa síkirúu sè'
yee ra, mi won don tee
: lah fëhíi kaa'oh yon don
pagid haa'oh yon yin wun
; 28 yéenyíi bëewë në cuju
ron ra yin wun, don dagid
bëewë na moklu ron ra.

29 Ow laß ro mbey, lah yere
ri kakaabi yínee. Ow naaf
sabidooru, ngana kadda' ri
beyi búubi jíitlëe bal. 30 Bëyí
dañ ro one ri. Bëyí beß
yii daa fu laha' ri, ngana
meel dí ri. 31 Iña fahuu ron
biti bëewë pagid don wa ra,
lah pëgiríi wë bëewí kayya
daaha.

32 « Don fahuun bëewí
fahuute ron kut raa, don
séentúu në waafi mën díh
? Bakaaroh ya sah fahuute
bëewë daa fahuu wa ra.

33 Don pagrun yin wun
bëewë në pagiru ron yin
wun kut raa, don séentúu në
waafi mën díh ? Bakaaroh
ya sah henuu ri daaha. 34 Te

don wëtdún bëewë habuu
ron biti kut wa ay ron yíníl
rëe, don séentúu në waafi
mën díh ? Bakaaroh bal na
wëtid bakaaroh, séentëe biti
ri ay yínílú teemi yee wëtdë'

rí rë. 35 Daa neh ! Lah
fëhíi kaa'oh yon, don pagid
wa yin wun te ngënë séentíi
yíníl biti ron wëtdë'. Hen
daaha raa, waafon ay gaan.

Don ay teebee biti don koyyi
Koope fa sunaa-sun daaha,
ndée keeña naa'te bëewë në
gërmih a yee bosu ra na.

36 Di naa'a' Boffon keeñ níi
naa', lah mëdí daaha nen
naa'-keeñ. 37 Don heefuy ow
raa, Koope ii ron heef bal

; don habruy ow yin raa,
Koope ii ron habid yin bal
; lah bëelíi, Koope ay ron
baal. 38 Ëní bëewí kayya,

Koope ay ron on : boon-
non ay túmú níi líif, degu
níi yúfee. Dee na natduu
don bëewë rë, Koope ay ron
natfee daaha. »

39 Yéésú ñeyaatte wa léeh
won wa tih : « Búumíd
mínéh nook búumíd neh a
? Lahaa daaha raa, wa
béeb ana ay keen ngas.

40 Yoodoh lukeh yëeddëhí
mín ; ndaa yoodohi yoon
níi dúmël béeb ay mín ti
yëeddëhí nen.

41 « Fu olsoh yi losa íl koy-

yaafu te fu kénsëey dúuñë ílú ? ⁴² Do fa olay sah dúuñë ílú rë, fu mínë' won koy-yaafu biti fay rii nísíd losa ílí díh ? Wonu teem búkú ! Nísé dúuñë ílú níi íllú lan paay, fanti mín nís losa íl koy-yaafu.

⁴³ « Tal kilki lahte njiriñ na líméh koy kilki lahay njiriñ, te tal kilki lahay njiriñ na líméh koy ki lahte njiriñ. ⁴⁴ Tal kilik yúhsúu koy ka : ñoltok na líméh koy sún te tal hak na líméh koy ba'. ⁴⁵ Bëyí naa'te keeñ hom wona' yii wunte ndah keeñi naa'a laha' ri ra ; bëyí bosse keeñ nék hom wona' yii bosse ndah bosí keeña homa' ri ra. Yii won ow béëb dúhë' rí keeñi kaah.

Bëyí hoffë

(Saame Maccëe 7.24-27)

⁴⁶ « Yi tah don dékéé deekë'í së' Yíkëe te don na pëgíh íña na won mi ron ra ? ⁴⁷ Cëe mi teeñ ron dee na man bëyí na ac soo na béëb, na síkirëh unna na won mi ra te paga' wa daaha : ⁴⁸ dí mada' a bëyí saañ tabahe faam, hacce feey fa níi dabpe ngaña, yíppé tabaha sun. Aya' mbënë më rë, mulaa na húp na laboh faam fa, ndaa mínéh ríi bëp bi híin tabaha. ⁴⁹ Ndaa bëyí síkirëh së' te anti ñeyay woni so', dí mada' a bëe' tabah faami te hacay dalaa ra. Aya' mulaa labohte faam fa ra, dí yíppée bëp, poysa'te béëb. »

7

*Ngémí kélfií soldaara
(Saame Maccëe 8.5-13)*

¹ Woca' Yéésú woni bëewë íña ri faha' waa won ra béëb, dí kolohte saañce Kafarnawum. ² Daaha, lahte kélfë soldaari lahte súrgíi ri fonkote ri níi fonko. Súrgëe antee jér níi na ñaatoh. ³ Kela' kélfëe ban fi Yéésú rë, dí wolte i baha yëwúf díi na, woni biti dí ac sëmlë' súrgíi kúl kë. ⁴ Lahuu wa Yéésú në rë, wa caguute ri na dāgu wonu tih : « Bëe' wol fun doo na ra cal habra', ⁵ ndée dí faha'te yen fi yëwúfdë, te daa ri tabahroh tígë na dāguu bëy gina Koope ra. »

⁶ Yéésú kolohte ñéerë'té a wa. Lebuu wa faam fa ra, kélfií soldaara wolte i kooy díi na, lah wa wonid ri unni yeh : « Bahaa, ngana mokil afu, mi caleh fu haale faam so' ; ⁷ daa tah mi haba' biti mi yinte canj fiyú. Wone un yínë kut, súrgíi së' ay wah. ⁸ Fu ot mi won do ri, biti so' mi bee mi lahte kélfë yí daa paa'uu so' sun, te mi kélfë i soldaar bal. Mi won ow yínë waa na gété rëe, dí saañ. Mi won ow kay aye raa, dí ac. Te mi won súrgíi së' page yii bee raa bal, dí pañ yaa. » ⁹ Kela' Yéésú unni kélfií soldaara ra, dí éempé woni. Di yíssëhté dúukëlí bëewë ñeyu tali ra na, won wa tih : « Mee ron won ra ee : mi ëllëy bëyí gémë'té deh ! Tali Israyel sah, mi ëllëy mani na. » ¹⁰ Nimiluu kooyya wolu ra faam kélfëe rë, wa deefu súrgëe wahte.

*Belaa koohi këllú búudé
rë*

11 Filoon fi baaha, Yéésú kolohte na saañ gin-taaha na wonuu Nayin ra, taalibe yi a i ow caak ñéerúuté a ri. 12 Leba' ri haalaani gina ra, lahte búudé fí na kúrú haca yin. Húldè húmú koy yínè yaafi na ; dī fi yaafa yaala húlté. I ow caak di bēy gina na bedu yaafa. 13 Ola' dī fi Yíkèe belaa ra, keeña d'umpé dīi na, dī won dī tih : « Yedde looya. » 14 Di antee leboh, tíkké ya' yi jaada, bēewē kúrú búudé fē rē cagute. Di won búudé fē tih : « Kolee yaal kowa ! Daa mi túuy dē rí ! » 15 Húldè yíppée koloh, tookke na won. Yéésú won yaafa tih : « Koohu abeh ! » 16 Bēewē béeb títúté ní tít, wa na kañu Koope wonu tih : « Yonente gaan acce yen na ; Koope acce sēmlè'í bēewí. » 17 Bēy Yúdée a bēy deyi baa béeb keluute yee pañ Yéésú rē.

Yee won Yéésú sun fi Sañ Batis ra
(Saame Maccèe 11.2-19)

18 Taalibe yi Sañ bíllúte kélfii wē iña na pañ Yéésú rē béeb. Tígí daaha, Sañ dēekké ow ana waa na, 19 wolte wa dī fi Yíkèe nē, meeli nda daa ri Sēmlèhè nē séentúu rē mbée bēewē wadti sehun ow kay. 20 Lahuu taalibe yi Sañ Yéésú nē rē, wa wonu ri tih : « Sañ Batis daa wol fun meelu nda daa fu Sēmlèhè nē séentúu rē mbée bēewē wadti sehun ow kay ? »

21 Guutaa baaha, Yéésú payce na ow caak : i jérídf, i misikídf, bēewí lahuu yébitèh, a i búumídf. 22 Di antee won taalibe yi Sañ tih : « Nímíli Sañ na don bílíd rí iña olu ron a yee keluu ron ra. Wēní rí bití búumídfdē yeelute, lēfēñídfdē koluute, guuñídfda wahute*, líkídfda ee keluu ra, bēewē húlú rē kèllúte búudé, ñēkídfdē keluute Uni Neba. 23 Bēyí af iñi so' taheh dī yeris ngémí, bēyí baa lahte sos-keñ. »

24 Bi na suu bēewē húmú wolu dīi na ra, Yéésú yampe na goneel a dúukéli bēewē yii lenke Sañ Batis na, meelte wa won tih : « Don húmú payu olsoh yi luufa ? Tal bēhēerí ngilaaw ma na jaay ri neh maan ? 25 Kon don húmú payu olsoh yih ? Bēyí bekoh búubbí wunte neh maan ? Yíkèe yí búubbí wunna na pesu pesi neŋpe ra oluu faam buur. 26 Mantee, don húmú payu olsoh yi luufa ? Yonente neh a ? Mee ron won ra bití dī yonente kaah ; dī luk sah yonente gaan ! 27 Daa ri bēe' nē wona' Koope Téerèe rē bitih : "Olsee ! May wol ow kèllèh dad'dí ro waal."* » 28 Yéésú baatte won tih : « Mee ron won ra ee : lahay bēyí límúte feey fi beh te luk Sañ Batis gaan. Añcañ bēe' lukki yin Nguur ki Koope ra luk dīi gaan. »

29 Bēewē béeb níi luka' yeekoh yi tùmè húmú síkírúu Sañ níi rí bētíssé wē

* 7:22 7.22 guuñídfda wahute :Di gerek, biníyú deh : guuñídfda ladute. ☆ 7:27 7.27 Saame Malasi 3.1

rë tahute biti Koope júbpé.
³⁰ Ndaa farisenja a yeeddëh
 yí kootii Mëyíis tahuy yee
 faha' Koope ra, wa húmú
 kaa'uute biti Saŋ bëtís wë.

³¹ Yéésú baatilte won tih :
 « May mínée mëlde' bëy ja-
 manii bee a yih ? Wa maduu
 a yih ? ³² Wa maduu a tunŋi
 tooku këem, yee na wonu
 affi yee tih : "Fun poosute,
 don becuy ! Fun fogute,
 don hílípúy fun !" ³³ Húmú
 aya' Saŋ Batis kaa'a'te ñam
 a han ra, don wonu dí laha'
 yébitëh. ³⁴ Aya' so' mi Koy-
 bëe', mi na ñam maa han ra,
 don wonu tih : "Élí ! Bëyí
 bee ñam a han kut daa afa,
 te dí kooya' yeekoh yi túmé
 a i bakaaroh kay." ³⁵ Añcaŋ
 bëewë ñeyu Unni Koope ra
 bëeb olute biti waalli júbpé.
 »

Yéésú a belii bakaaroha

³⁶ Húmú lahte farisenji
 hínú Simoŋ dëkké Yéésú
 ñam faami. Yéésú saañce
 faam fin, lahte wa na
 ñamu. ³⁷ Gini baaha, húmú
 lahte belii bosse pesad.
 Kela' ri biti Yéésú ín ñam
 faam farisenja ra, dí kúdté
 bútlí yotuu la'a na wonuu
 albataar ra, bi líiffé a
 laakkoloñi neŋpe, ³⁸ hompe
 kotti Yéésú na looy, muun mi
 na hilsid kotta. Di antee beŋ
 fen fi moosse wa, fëenté† wë,
 túmpé wë laakkoloña.

³⁹ Ola' farisenja dëek Yéésú
 faami ra yii bah, dí won
 nufi tih : « Bëyí bee hena
 yonente koon, tin ri ay yúh
 belaa leŋ díi na bee ra a

pesadi bosa homa' dí ra. »
⁴⁰ Yéésú won farisenja tígí
 daaha tih : « Simoŋ, mi
 lahte yii nay mi roo wone.
 » Simoŋ won dí tih : «

Wone mi keloh bahaa. »
⁴¹ Yéésú won dí tih : « Lahte
 bëewí ana yi húmú lahrute
 bëyí në wëtdë' kabut. Bëyí
 yínë lahidte ri kabut caak,
 yi yínë luk yaaha sabboo.
⁴² Bi ow yínë waa na sah
 mínéh rii yíníl kabut ka, dí
 baalte wa bëeb ana. Tígí
 daaha, fu haba' biti bëyí bi di
 wa fi yaaha nay lukee faha'
 bëe' wëtdë' rë ? » ⁴³ Simoŋ
 won ri tih : « Mi haba' ri
 bëe' kabut ki lukki caak ra.
 » Yéésú won dí tih : « Fu
 won kaah. »

⁴⁴ Di antee yíssëh belaa
 na, won Simoŋ tih : « Ole
 yee paŋ belii bee ra ! Haala'
 mi faamu, fu onay so' mulub
 hosaa kot ; ndaa belaa hosse
 kotti so' a muun mi, moosse
 wa a fen fi. ⁴⁵ Fu fëenëy sè'
 na wodoh fu so' ra ; ndaa
 haala' mi dee níinén, belaa
 yedday fëení kotti so'. ⁴⁶ Fu
 túmëy díw af so' sah ; ndaa
 belaa baabpe laakkoloñ kotti
 so'. ⁴⁷ Daa tah mi won don
 tih : dee faha' so' ri níi faha'
 ra daa teeŋa' biti ri baalute
 bakaadfi caakki ; ndaa bëe'
 baalu bakaad yutuud da,
 faha' i na gaaneh. »

⁴⁸ Yéésú antee won belaa
 tih : « Fu baalute bakaadfu.
 » ⁴⁹ Bëewë bani wa húmú
 loona ra wonantuu hanndal
 ki wa tih : « Bëyéé daa wa
 níi na kaañ baala' bakaad ? »
⁵⁰ Ndaa Yéésú won belaa tih

† 7:38 7.38 Fëenë fëen belaa kotti Yéésú rë teeŋa' biti ri yedte Yéésú cér.

: « Ngémú sèmlë'té rë ; kolee fu saañ a jaamma. »

8

Bëewë në hómú ñéerúu a Yéésú rë

¹ Filoon fi baaha, Yéésú saañce na wër filib ginna béeb, na waare Uni Nebi Nguur ki Koope. Bani taalibe yi sabboo a ana ya daa hómú ñéerúu ² a belebfi dí hómú líkídté wë yébitëh, yee ri payce jérrí wë. Tii yi wa daa wa yeh : Mari fi bëy Makdalaa bee líkídu yébitëh paana ra, ³ Saan beleb Kusaa fa iña faam Erot tíkú ya'a ra, Susaan a i beleb caak kay. Belebfi yaa béeb beyu alalli wa, na habruu Yéésú a taalibe yi.

Anili feeyya maduy ra

(Saame Maccëe 13.1-9 ; Marka 4.1-9)

⁴ Bëewë hómú dúhúu gin-taah ya béeb na ayu Yéésú në. Bëewë na baatuu caak, dí yampe na won wa léehí beh : ⁵ « Lahte bëyí hómú koloh sohi meeyi. Dí hom hasli tisooh ka, lahte peppi keente búk waala, kotta ñeete sun, yakka ayute, tanute wa béeb. ⁶ Lahte yi keen feey fi laha' la'. Paala' wa ra, bi sùit feey fa, wa yíppée tam. ⁷ Lahte yi keen tígí paala' ñobitaan, wa pëeltuté, ñobitaan fa hampe wa, wa tampe. ⁸ Lahte yi keen feey fi loobpe. Wa paalte, talla kolohte, dúhídté il, laabpe

nii laab* . » Yéésú baatte won wa tih : « Bëyí lah nuf kelaa, kelaan na ! »

Yi tah Yéésú na ñeya' léeh ?

(Saame Maccëe 13.10-17 ; Marka 4.10-12)

⁹ Filoon fi baaha, taalibe yi meelute ri yee faha' won léehë rë. ¹⁰ Di won wa tih : « Don, kumpë yí Nguur ki Koope teeβu don, ndaa yii won mi bëewí kayya béeb teya' léeh, nda wa yeele raa, wa élih në, te wa kelee raa, wa yíh yee na wonu ra.*

Iti fi anili feeyya maduy ra
(Saame Maccëe 13.18-23 ; Marka 4.13-20)

¹¹ « Léehí baa faha' woni yii beh : tisooh ka daa Unni Koope. ¹² Búk waala keen tisooh ka ra daa wa bëewë yéñké biti keluu wa Unni Koope ra, Seytaane yíppée ac pahte wa keeñni wa, toñeh wa ay gémé Koope, wa múc. ¹³ Feey fa laha' la' ra daa bëewë yéñké biti keluu wa Unna ra, wa yípútée wëe tah a sos-keeñ ; ndaa Unna yípëy níil keeñni wa. Wa topuun waa ham guttii baaha : misike waa na rek, wa koluun daaha yeris ngémë. ¹⁴ Feey fa na paal ñobitaan ra daa bëewë yéñké biti keluu wa Unna ra, tíl tílë níi sohle yi éldúnë, alal a neβ pes hampe wa tahte níi kaah púlëy waa na. ¹⁵ Feey fi looba daa bëewë yéñké biti keluu wa Unna ra, wa tahuute wa ya'

* **8:8** 8.8 laabpe níi laab :Di gerek, biníyú deh : tal fi tal béeb límpé pep tíméer (100). * **8:10** 8.10 Saame Isayii 6.9

ana, habuute wa a keeñi naa'te, wa pokuute na nii wa dúhruté njiriñ ra. »

Léehi lampaa

(Saame Marka 4.21-25)

¹⁶ Yéésú baatte won tih : « Ow na kédédéh lampa lih if sun, mbée bek ri fégèrèh tugal. Daaha neh ! Lampa líkúu líkèe, bëyí haal, ot kotti na. ¹⁷ Yii dāpu béeb ay yúhú, yii laku béeb ay olu. ¹⁸ Yúhí dee na síkírúu ron Unni Koope ra ! Bëyí ham yee yeru ri ra a ya' ana ay baatu. Bëyí pagay yii baaha raa nék, yii yutuuda haba' ri biti dī lahte ri ra sah ay naafu†. »

Bëy faam i Yéésú

(Saame Maccëe 12.46-50 ; Marka 3.31-35)

¹⁹ Koy-yaayyi Yéésú a yaafi wa ayu dīi na koon, ndaa caagi bëewë tahte wa mínih lah dīi na. ²⁰ Tígí daaha, lahte bëyí won dī tih : « Yaafu a koy-yaayyu ínú èssín, na meeluu ro. » ²¹ Ndaa Yéésú won bëewë béeb tih : « Yaaso' a koy-yaayyi so' daa bëewë në síkírúu Unni Koope, te ñeye na ra. »

Yéésú luk ngilaaw doole

(Saame Maccëe 8.23-27 ; Marka 4.35-41)

²² Lahte bis, Yéésú a taalibe yi haalute gaal, dī won wa tih : « Yen saañ búk laaha hatni bín. » Wa koluute na suu. ²³ Wa homu húusí laaha, Yéésú

fanohte na nee'. Hom homo nii ngilaaw gaan yíppée laf laaha ; mulaa na maannda' líifrí gaala, lool daŕpe wa. ²⁴ Taalibe ya lahute Yéésú në tígí daaha, na fogu yúunuté rí wonu ri tih : « Yen ee suu húlè rë Bahaa ! » Yéésú kolohte, digidte uni túuycé ngilaaw ma a mboowaanna héddèh. Deyi baa béeb hente tid. ²⁵ Di won taalibe ya tígí daaha tih : « Ngémèn tasha'te ee ! » Wa tíitú tíitè nii ñéerè'té a éem, wa na meelantuu hanndal ki wa tih : « Bëyí bee mèn dī ow bal nii dī túuy ngilaaw ma a mulii laaha héddèh rëe sah, wa ñee woni ? »

Yéésú luk yébitèh doole

(Saame Maccëe 8.28-34 ; Marka 5.1-20)

²⁶ Húusúu wë laaha ra, Yéésú a taalibe yi teeruu deyi Gerasaa, búgí yíni laaha jaannda' Galile ra. ²⁷ Kot Yéésú na lah feey, ow yaal di bëy gina, bi yébitèh caak na ham ri, téebiléhté rí. Hente yii maañce, dī na bekeeh búub, na homeh faam. Di dék hacaayin.

²⁸ Ola' bëe' Yéésú rë, dī yeddohte kotta dāañjohte won tih : « Do fi Yéésú Koy Koope fa sunaa-sun, fu faha' pañi so' yih ? Daa mi na dāñ do ri, ngana torohal so' ! » ²⁹ Biti Yéésú ee lík yébitèh fë dīi na ra daa tah ri won yii bah. Yébitèh fë haba'te bëe' waal caak. Ya' ya a kotta pokalsuu tiinj kaa' ri

† 8:18 8.18 Bëyí pagay yii baaha raa nék, yii yutuuda haba' ri biti dī lahte ri ra sah ay naafu : Bëe' pagay yii baaha ra, daa ri bëe' habay unna keloh ri ra, dī húl fayy raa, dī ay ñak béeb.

fús koon raa, faraah ri korsa' wa, yébitèh fë yeñ ri luufin. ³⁰ Yéésú meelte ri won dī tih : « Daa fu hínú dīh ? » Di tahte won tih : « Mi hínú Dúukël. » Biti yébitèh caak daa hómú dīi na daa tah ri won yii bah. ³¹ Yébitèh yë na anuu ðañ Yéésú bitī ri ðan waa bet ngaara mi nuña.

³² Deef lahte yubi mbaam-túgëllí caakute na písúu ñam araal ðañ hatni baaha. Yébitèh yë na ðagu Yéésú nda wa mínú haal mbaamma yaaha na raa. Yéésú onte wa ri. ³³ Yébitèh yë yípútée yeris ðëe', haalute mbaamma na. Yuba yíppée yedðoh yëellëen kí ðañ, mbaamma béëb soruute laaha, húlúté.

³⁴ Oluu níirèh yí mbaamma yee lah ra, wa heguute suute gin-taahin a ginna luufa, na ðillú yee lah ra. ³⁵ Bëewë koluute olsohi yee na wonuu ra. Lahuu wa hëbís Yéésú rë, wa ðeefu ðëe' yébitèh yë hómú habu ri ra ðekohte búub, tookke hëbís Yéésú ñéeré'té a sago fi. Wa yípútée tíit. ³⁶ Bëewë maasuu ra ðillúté wë ðee payuu ðëe' yébitèh yë hómú habu ri ra.

³⁷ Tíidí misiga tahte ðëy Gerasaa béëb ðagute Yéésú dūh gin wa saañ. Di yeeltee haalaat gaala tígí daaha na faha' saañ.

³⁸ Bëe' yébitèh yë yeris ri ra ðañke Yéésú nda wa mínú ñéeré' rëe. Yéésú tahray ri, ndaa won ri tih : ³⁹ « Nimile faam, fu ðílid' iña pagid' ro Koope ra béëb. » Tígí daaha, ðëe' ñeete filib

gina na ðílid' iña pagid' dī Yéésú rë béëb.

*Yéésú luk jér a húl doole
(Saame Maccëe 9.18-26 ;
Marka 5.21-43)*

⁴⁰ Nimila' Yéésú rë, dúukëlí bëewë téebiléhté ri. Wa béëb hómú sehu ri. ⁴¹ Lahte ðëyí hínú Yayrus, njíidí tígë na ðaguu yëwúðfë Koope ra, acce wahtii baaha, yedðohte kotti Yéésú, na ðañ ri ac faami, ⁴² ndah ri hela' koy ki belii na ñaatoh. Di laha' koy ki yíníi baa kut, bi waðti lahaa kíil sabboo a kíil ana. Yéésú hom saaña, dúukëlí bëewë ðarute ri.

⁴³ Deef lahte belii hómú në, hente kíil sabboo a kíil ana yi ri yúfë' ñif. Di túmpé iña laha' ri ra béëb faamma payoh ya, ndaa ri píyëy yoofaa. ⁴⁴ Di ñeya'te Yéésú filoon, leþpe nuf búubí, yíppée wah kotta-kotta. ⁴⁵ Yéésú meela'te won tih : « Daa leþ soo na ? » Taasuu bëewë béëb rë, Peer won ri tih : « Bahaa ! Fu olay bitī bëewë béëb ee yejantuu ra, na babuu ðoo na hatinna béëb ë ? »

⁴⁶ Ndaa Yéésú won tih : « Ow leþpe soo na : mi yëñké bitī lahte yii kolohte faan so'. » ⁴⁷ Ola' belaa bitī yee pañ ri ra yúhúté rë, dī acce, yedðohte kotti Yéésú faana béëb na saak. Di ðílid'té fii bëewë béëb yee tah ri leþ Yéésú në rë a ðee waha' ri kotta-kotta ra. ⁴⁸ Yéésú won dī tih : « Yaa ow, ngémú tahte fu wahte. Fu mín saañ a jaamma. »

49 Yéésú hom wona, lahte bëyí kola' faam Yayrus acce, won kélfii tih : « Sohlaay fu mokle Yëeddëhë ; koohu húlté ! » 50 Kela' Yéésú wona ra, dī won Yayrus tih : « Ngana néekiñë'. Fu laakira' gém kut, koohu ay koloh. »

51 Laha' Yéésú faam fa ra, dī tahay biti ow kay haal a ri, henay Peer, Sañ, Saak, boffi kúkëyë a yaafa. 52 Húli kúkëyë tahte bëewë béeb na fogu na hawuu. Yéésú won tígí daaha tih : « Ngënë fëgí : kúkëyë húlëy, dī nee' nee'o rek. » 53 Bëewë yabute na yenu ri, ndah wa yúhúté biti kúkëyë húlté kaah. 54 Ndaa Yéésú hampe ya' kúkëyë, béyídté uni won dī tih : « Kolee, kúkëyë beleb ! » 55 Kúkëyë yíppée koloh. Yéésú nahte wa yeri ñam. 56 Boffi kúkëyë a yaafa éemúté ní éem, ndaa Yéésú kadda'te wa bílíd' yee lah ra.

9

Woli Yéésú taalibe yi sabboo a ana ya

(Saame Maccëe 10.5-15 ; 14.1-12 ; Marka 6.7-29)

1 Lahte bis, Yéésú dëekké taalibe yi sabboo a ana ya, onte wa ham-ham a sañ-sañ líkëe yébitëh béeb a payaa jérídf. 2 Di antee waa wol waarii Nguur ki Koope a payi jérídfë. 3 Di won wa tih : « Ngënë kúrëelí yin waalon : duud' neh, nafa neh, yii ñamun neh, hélíis neh, te ow banan kúrëelëh búub lofaa. 4 Tígí habuun ron haneel béeb, lah hëmí

faam fa ní bín koluun ron gini baaha ra. 5 Te don pay ílý bëewë kaa' hamon haneel raa, lah dúhí daaha, don paan pënë mí kotton, teebi wa biti wa homuy kaah. » 6 Daaha, taalibe ya koluute suute, haalute ginna luufa béeb na waariyu Uni Neba, na payu jérídfë.

7 Kela' Erot gëernëerí Galile iña na pagu Yéésú a taalibe yi ra, afa kúnëhté, ndah lahte bëewí wonu ti Sañ Batis daa wafti kállú búudé. 8 I ow kay wonu ti yonente Éelí daa feeñiyoh. Lahte yi wonu ti ow kay di yonente ya déb rë daa kállú búudé. 9 Ndaa Erot won nufi tih : « Mí lecdóhte lúum Sañ Batis. Kon bëe' na pañ iñi éemíle' yí yaa béeb rë, wafti henan wa ? » Erot na anti faha' oli Yéésú.

Mbúurú yí iippa a jënni ana ya

(Saame Maccëe 14.13-21 ; Marka 6.30-44 ; Sañ 6.1-14)

10 Koluu apootarra waala húmú wol wa Yéésú rë, wa bíllúté rí iña pagu wa ra béeb. Wa béeb ñëerúuté, hécuuté waal gin-taaha na wonuu Betsaydaa ra. 11 Keluu dúukéli bëewë biti Yéésú saañce ra, wa koluute téebídí. Lahuu wa dīi na ra, dī teeriyoh te wa, wonte wa yii lenke Nguur ki Koope, payce jérídfë.

12 Bi na yëellëh na'a, taalibe yi sabboo a ana ya lebuute ri, wonu ri tih : « Wone bëewí yee saañ ginna leboh dee ra, wa saame yii túmún wë búkkí wë a tígí

homun wa, tígè homu yen dee ra lahay yin. » ¹³ Ndaa dí won wa tih : « Don fi yah, yérí wè yii nay waa ñame. » Wa wonu ri tih : « Fun lahuu mbúurú iip a jén ana kut. Fu wonay bití fun nay lomre bēewí yee bēeb ñam maan ? » ¹⁴ Bēewí yaalla húmú nè rē warutee mit ow júnní iip (5.000). Yéésú won taalibe yi tih : « Wēní wē tooka' goomal-goomal, bina-bina bēeb wadtee hen ow sabay iip (50). » ¹⁵ Taalibe ya pagute yee nahu wa ra, tēekrúuté bēewē bēeb daaha. ¹⁶ Yéésú bebpe mbúurú yí iippa a jénní ana ya, bēyídté afi yeelte sun, simpé Koope, antee waa lecsa', yedte wa taalibe ya, nahte wa woralsa' wa bēewē. ¹⁷ Bēewē bēeb ñamute níi laalute. Négírúu wooñjiida ra, wa líffé dama sabboo a dama ana.

Woni Peer bití Yéésú daa Kiristaa
(Saame Maccēe 16.13-21 ; Marka 8.27-31)

¹⁸ Lahte bis, Yéésú hécēhté na daŋ Koope ; taalibe ya homute hēbísí. Di meelte wa won tih : « Bēewē wonuu bití daa mi wah ? » ¹⁹ Wa wonu ri tih : « Lahte bēewí wonu bití fu Saŋ Batis, lahte yi wonu yonente Éelí, i ow kay bal wonu ti fu ow kay di yonente yee merees bi koloh búudé. » ²⁰ Yéésú meelte wa won tih : « A don, don wonu bití daa mi wah ? » Peer tahte won tih : « Daa fu Buura Koo fal ri ra. » ²¹ Tígí daaha, Yéésú kadda'te wa won tih : « Ngèné wēní

ow kay yin na. » ²² Di antee baat won tih : « So' mi Koy-bēe', mi wadtee mok níi mok : baha ya, kélfē yí seeyoh ya a yēeddēh yí kootii Mēyíis ii soo faha' tík íl ; may hawu húl, te waali éeyē fē filoon fi húlí sē', may kēllú búudé. »

Dee wadti ñéerúun a Yéésú rē
(Saame Maccēe 16.24-28 ; Marka 8.34 níi 9.1)

²³ Yéésú antee won bēewē bēeb tih : « Bēyí faha' ñéerē' a so', dí helan íñi afi, faraah ri enee kurwahi, anti ñee tal so'. ²⁴ Bēyí núp húl ay ñak ñíiní ; ndaa bēyí tah ñagi ñíiní af so', ay lah pesa na dúméh rē. ²⁵ Kaah neh bití alal mi éldúné caleh ow yaay ñíiní, saŋku afi a ? ²⁶ Bēyí íñi so' a wonni so' tah ri sopoh fíi bēewē, so' mi Koy-bēe' may rii súugèh yiin nay mii aye filib ndami so', daa ndami Baaso' a malaaka yi sela ya ra. ²⁷ Mee ron won kaaf ka ra ee : lahte bēewí ewu don na deh, balaa wa húl, wa ay ot Nguur ki Koope. »

Teeba'i Yéésú ndami
(Saame Maccēe 17.1-8 ; Marka 9.2-8)

²⁸ Yii wadtee hen waal pe-eye filoon fi bee wona' ri íñyaa ra, Yéésú dēekké Peer, Saŋ a Saak, wa lawute sun daŋ, dí na daŋ Koope. ²⁹ Di hom daŋa, kanama lofisohte, búubí na' naa'o níi na hap íl. ³⁰ Dee a deh, ow ana feeñiyuute na gonlu a ri : wa húmú Mēyíis a yonente Éelí. ³¹ Wa fi yaa bal, búubbí wē

naa' naa'o ní na hap íl. Wa gonlu sun fi húlè wafti húl Yéésú Yerusalem ra. ³² Peer a kooyi húmú nee'ute nee'i misikke. Yúunúu wè rē, wa olute ndami Yéésú a bēewí ana ya homu a ri ra. ³³ Tígè nē takuu bēewē a Yéésú rē, Peer won dī tih : « Bahaa, nebpe biti yen homun tígí deh, fun yíp dút éeyē : fu lah yínē, Mēyíis yínē, Éelí yínē. » Peer húmú yéeh íña na won dī ra. ³⁴ Di hom wona, lahte nérí acce húunté wē. Taalibe ya títúté húuné húun wē néré rē. ³⁵ Lahte uni dfohte filíβ néré won tih : « Bee daa Koy so'. Daa ri bee fal mi ra. Síkiríí rí ! » ³⁶ Wona' una níi wocce ra, taalibe ya olute biti Yéésú a afi kut daa tasu tígè. Wa habute yíi baa waa na, te bín fē, wa bíllúy ow yee olu wa ra.

Payi kúkèyè yin na ham ri ra

(Saame Maccèe 17.14-18 ; Marka 9.14-27)

³⁷ Kéy fín fē, cépúu Yéésú a taalibe yi daŋa ra, lahte dúukèlí bēewí ayute téebílehí. ³⁸ Ow di bēewē béyídté uni won tih : « Bahaa, mi daŋ ro biti fu olsid so' koy so'. Mi laha' ri koy kut. ³⁹ Yébitèh daa na ham ri. Te ri ham ri raa yíp ríi beka' liik, hégíy faana hégíyí misikke, púmíl búgè ; balaa yébitèh fē yeris ri raa, hom rii mokla' mokloo ní ! ⁴⁰ Mi daŋke taalibe yu lígí yébitèh fē, ndaa wa míníh yin na. » ⁴¹ Yéésú tahte won bēewē tígí daaha

tih : « Don fi bēy jamanii beh, don fi bossi yee gémúy Koope yee ra, may home don na mi mújdé rēn ní kirih ? » Di antee won bēe' tih : « Kom so' koohu deh ! » ⁴² Kúkèyè na ac Yéésú nē, yébitèh fē kéenídté rí feey, hégíycé faana hégíyí misikke. Ndaa Yéésú digidte uni túuycé yébitèh fē dúh líkké rí, yedte kúkèyè boffi. ⁴³ Bēewē bēeb éemuté níi éem di dee gaana' Koope doole ra.

Woni Yéésú biti ri ay yaayu

(Saame Maccèe 17.22-23 ; Marka 9.30-32)

Bi homu bēewē bēeb éemí wē dī íña paŋ Yéésú rē, dī won taalibe yi tih : ⁴⁴ « Hēbí yee nay mi ron wone bee ra affon : so' mi Koy-bēe', may yaayu bēewē. » ⁴⁵ Ndaa taalibe ya húmú yíih yee faha' ri waa won da. Koo onay wa nufi yúhúun wē wona bín fē, te wa kaañuy meel Yéésú yin na.

Bēe' lukki gaan da

(Saame Maccèe 18.1-5 ; Marka 9.33-40)

⁴⁶ Filoon fe, taalibe ya na taasantuu bēe' lukki gaan waa na ra. ⁴⁷ Bi yúh Yéésú yee nuffi wa, dī beβ kúkèy yutuud cégidté hēbísí, ⁴⁸ antee waa won tih : « Bēyí af so' tah dī ham kúkèy ti bee nen a ya' ana, deef dī ham so' ; te bēyí ham so', deef dī ham bēe' wol so' ra. Bēe' haba' afi biti daa ri lukki yin don na ra, daa ri lukki gaan. » ⁴⁹ Saŋ won tígí daaha tih : « Bahaa, fun

olute bëyí líkë' yébitëh tiyu. Biti ri noneh yen na tahte fun kadduute ri. » ⁵⁰ Yéésú won tih : « Ngënë keddíi rí ! Yúhí bití bëyí kaa'aay ron, ñéerë' a ron. »

Bëy Samari ya kaa'uu teeriyohi Yéésú rë

⁵¹ Leḅa' wahtaa waḁ rii bëyrëe Koope sun ra, Yéésú cañke lok bití ay saañ Yerusalem. ⁵² Di wolte i ow kèllëh rí. Wa suute, haalute gin di Samari, saamdí tígë nay rii home ra. ⁵³ Ndaa bití ri hom saañ Yerusalem tahte bëy gina kaa'uute. ⁵⁴ Keluu Saak a Sañ yii baa ra, wa wonu Yéésú tih : « Bahaa, fu fahaay bití fun kéeníd' pilliña sun fi wa, múkíl wë woo ? » ⁵⁵ Di yíssëhté waa na, wonte affi wa. ⁵⁶ Wa anutee koloh na suu gin kay.

Bëwë fahuu ñéerë' a Yéésú rë

(Saame Maccëe 8.19-22)

⁵⁷ Homuu wa waala ra, lahte bëyí won Yéésú tih : « Tígí mín fúu saañ béëḅ, may ñee talu. » ⁵⁸ Yéésú won dī tih : « Tílé yë lahute faam, yakka lahute túf, ndaa so' mi Koy-bëe', mi lahay dék. » ⁵⁹ Yéésú won ow kay tih : « Aye fu ñee tal so'. » Ndaa bëe' won dī tih : « Bahaa, on so' paay mi pay mi haçe baaso'. » ⁶⁰ Yéésú won dī tih : « Légéyú hac búudé neh* ; kolee fu waareye Nguur ki Koope. » ⁶¹ Ow kay wonil Yéésú tih : « Bahaa, may ñéerë' a

ro, ndaa on so' paay, mi pay takohi bëyí faam so'. » ⁶² Yéésú won dī tih : « Bëyí tílë' tílëe heelte, mínéh non Nguur ki Koope. »

10

Woli Yéésú taalibe yi sabay paana a ana (72) ya (Saame Maccëe 11.20-24)

¹ Filoon fi baaha, Yéésú-Yíkëe tanisse i ow kay. Wa ow sabay paana a ow ana (72), faha' woli wa ana-ana, wa kèllëh rí gin-taah ya a ílýyyë waḁ rii ñeya ra béëḅ. ² Di won wa tih : « Meeya laabpe te lecoh ya mítih yin ; kon dëgí yíkíi meeya baat i lecoh, wa ac leja. ³ Kélii mi wol ron ti ndeññi suu filib i gúmú nen. ⁴ Ngënë kúrëelíi héliis, mbée nafa, mbée ñafad' lofaa ; ngënë cëgëelíi wodoh ow waala. ⁵ Don haal faam, dëbíi dagid' bëy faam fa jaamma. ⁶ Bëyí sosse hom na raa, jaammaa dagu don ra ay cép sun fi. Bëyí sosse homay na raa nék, jaammaa nimil don na. ⁷ Lah hëmí faam fi baaha, don ñam te ron han yii yeru ron na. Bëyí légéy wadtee yínlú opa'i. Ngënë jëebëntíi faamma. ⁸ Don haal gin, don habu na haneel raa, yii yeru ron lah ñëmí. ⁹ Lah pëyí jérídfë gini baaha, te ron won bëwë dékú në rë béëḅ bití Nguur ki Koope lebohte wa. ¹⁰ Ndaa ron haal gin, don habuy na haneel raa, lah dúhí këemë, don

* **9:60** 9.60 Légéyú hac búudé neh :Di gerek, bíníyú deh : yédfíi húlídëfë hac húlídëfë.

won bëewë tih : ¹¹ “Pëndè mée ginon ñaak kotti fun ra, fun ee waa paagu ra, teebi ron biti don homuy kaah. Añcañ, yúhí biti Nguur ki Koope lebohte ron na.” ¹² Mi won don tee : yiin nay aattiyee Koope bëewë rë, daani bëy gini baaha ay luk bi bëy Sodom misik. »

¹³ Yéésú baatte won tih : « Mas don fi bëy Korasin ! Don torohute, don fi bëy Betsaydaa ! Kimtaanna pagu gin don da, paguun Tíir a Sidon koon, tin bëy ginni yaaha maañutee lamboh saaku, wa leefoh yet, teeba'i biti wa lofute pesad. ¹⁴ Daa tah yiin nay aattiyee Koope bëewë rë, daanon nay luke bi bëy Tíir a bi bëy Sidon misik. ¹⁵ A don fi bëy Kafarnawum, mbaa don habuu biti don ay béyrú ní sun-Koo neh ? Èe-èe' ! Añcañ, don ay cépirú ní safara. »

¹⁶ Yéésú baatte won taalibe yi tih : « Bëyí síkirèh rën, deef dī síkirèh sè' ; bëyí kaa' síkirèhí rën, deef dī kaa' síkirèhí sè' ; te bëyí kaa' síkirèhí sè', deef dī kaa' síkirèhí bëe' wol so' ra. »

Nimili taalibe yi sabay paana a ana (72) ya

¹⁷ Ayuun taalibe yi sabay paana a ana (72) ya waala koluu wa ra, keeñni wa sosse ní sos. Wa wonu Yéésú tih : « Yíkèe, fun ñeya' tiyu fun túuy yébitèh yë pañ yin raa sah, wa ñee na. »

¹⁸ Yéésú won wa tih : « Mi otte Seytaane hélkisé'té sun, keente ti héléy nen.

¹⁹ Síkiríí : mi onte ron sañ-sañi tilúun don sun gonj a sun dagal a dakaya'i Seytaane a dee gaana' ri doole ra bëeb, te yin ii ron míníl dara. ²⁰ Ndaa biti yébitèh yë ñeyute wonon banan hen damaa don na ; dëmíi biti kay, tii yon ín sun-Koo. »

Kúmpèe teebu bëewë bëy èldúnè heefu wa ra

(Saame Maccèe 11.25-27 ; 13.16-17)

²¹ Wahtii baaha, Ruuh-Peseñ sosilte keeñ Yéésú ní sosil. Yéésú yíppée won tih : « Baap, Yíkíi sun a feey ! Mee roo sím rë, di yee teeba' fu bëewë bëy èldúnè heefu wa ra iña dap fu baha ya a bëewë janiyu ra. Baap, yii baa daa neba' ro, daa tah ri laha' daaha ! »

²² Yéésú baatte won bëewë tih : « Baaso' tíkké iña bëeb ya' so'. Ow yéeh so' mi Koy ka hém henay Baaso' ; te ow yéeh Baaso' hém henay so' mi Koy ka a bëewë mi faha' wa rii teeb ra. » ²³ Di antee yíssèh taalibe yi na, won wa fi yaaha tih : « Lahute sos-keeñ bëewë olu yee olu ron ra. ²⁴ Mee ron won da ee : caakke yonente a buurri húmú fahuute ot yee olu ron ra, wa oluy ri ; te wa húmú fahuute keloh yee keluu don da, wa keluuy ri. »

Aníli bëe' naa'-keeñ dék Samari ra

²⁵ Tígí daaha, ow di yéeddèh yí kootii Mëyíis kolohte na saam olsohi Yéésú, meelte ri won tih : « Bahaa, mi wadti paga yi

nii mi lah pesa na dúméh rē ? » ²⁶ Yéésú won dī tih : « Kootaa won yi na ? Fu yoon yi na ? » ²⁷ Bēe' tahte won tih : « Kootaa won tih : *“Lah fēhūi Koo-Yíkēe di keeññon béeb, di peson béeb, di dooloon béeb a nuffon béeb. Di fahuu ron affon, lah fēhūi moroommon daaha.”* » ²⁸ Yéésú won dī tígí daaha tih : « Yee won fu ra kaah. Fu paŋ yii baa raa, fay lah pesa na dúméh rē. »

²⁹ Ndaa bēe' na saam layaa, meelte Yéésú won dī tih : « A wa daa moroomi so' ? » ³⁰ Yéésú won dī tih : « Lahte bēyí hómú kola' Yerusalem na saañ Yérikēe. Di hom waali, i banndi geesuute ri, naafute búubbi, labute ri labbi misikke, anutee saañ, helute ri hanndal ki húl a pes. ³¹ Deef lahte seeyohi ñee waali baaha. Ola' ri bēe' rē, dī ñeete búk waala hatni yínēe saañce. ³² Ow di bēewē na habruu seeyoh ya ra* ñeete daaha bal, otte bēe', ñeete búk waala hatni yínēe bal saañce. ³³ Ow di bēy Samari saañ baab ñeete waali baaha bal. Laha' dī fi baa daaha otte bēe' rē, keeña dúmpé ces. ³⁴ Di lebohte bēe', bebpe bēeñ a díw payce gaañña†, ñaawte wa, antee rii tík sun fi mbaam fi, kúdté rí tígí dī mín nēe payu, tooppitohte ri. ³⁵ Kéy fín fē, dī yedte yíkú faam fa hélíis caak, antee rii

won tih : *“Tooppitee bēyí beh ; mi ñeyaatee dee raa, yii tíkēh sun fi hēlsē yed mi ro yee ra béeb, may roo waa yíníl.”* »

³⁶ Yéésú meelte ri won tih : « Di bēewí éeyē yí yah, fu haba' biti bēyí bi waa na daa pagid bēe' hawu ra, ti di wadti pagraa ow moroomi nen ? » ³⁷ Yēeddēhí Kootaa won dī tih : « Bēe' teeb ri naa'-keeñ, payce ri ra. » Yéésú won dī tígí daaha tih : « Tílé fu hen daaha. »

Hanliri Yéésú Martaa a Mari

³⁸ Yéésú hom waali a taalibe yí, dī lahte gin, ow beleb di bēy gina hampe ri haneel faami. Bēyí belaa hínú Martaa. ³⁹ Di lahte koy-yaafi hínú Mari. Koy-yaafa acce, tookke hēbís dī fi Yíkēe, na síkírēh iña na won dī ra. ⁴⁰ Martaa nék, légéyí caaga faam fa hampe ri. Hompe ní ri lahte Yéésú nē, won dī tih : « Yíkēe, fu olay biti koy-yaaso' helte légéyí faam fa béeb ya' so' a ? Wone ri habra' so' book. » ⁴¹ Di fi Yíkēe won dī tih : « Do fi Martaa, iña mokil do ra caakke, ⁴² ndaa yínē kut daa lah na solo. Mari tanis bee gén dē, te ow mínéh ríi kaa' síkírēhí sē'. »

11

*Dee na daguu Koope ra
(Saame Maccēe 6.9-13 ;
7.7-11)*

* **10:27** 10.27 Saame Tali Léwí 19.18 ; Nērsí Kootaa 6.5 * **10:32** 10.32 Ow di bēewē na habruu seeyoh ya ra :Di gerek, bíníyú dēh : ow di bēy tali Léwí.

† **10:34** 10.34 Bēeñē hosii gaañña, díwē ēylíi misiga.

¹ Lahte bis, Yéésú húmú íláy na ðaŋ Koope. Woca' ri ra, ow di taalibe yi won ði tih : « Yíkëe, yéedíð fun di na daguu Koope, ti dee húmú yéeddë' Saŋ taalibe yi ra nen. » ² Yéésú won wa tih : « Don yahti ðaŋ Koope raa, lah wëní tih :

Baap,
bëewë yúhún biti tiyu selate.
Nguur ku lahan bëewë në.

³ Bisi yíilëe Koo bééß, lah on fun njél.

⁴ Baal fun bakaadfi fun ;
ndée bëyí tooñ fun bééß, fun baal ri bal.

Ngana yeris nuf bos haal fun. Démíin ! »

⁵ Yéésú wonaat wa tih : « Ow di ðon na pay faam kooyi leelu elek koon, won ði bitih : "Wëtíð së' bookaa kiid éeyë daa noo, yaal kowa ; ⁶ mi laha' haneel faam so', te mi lahay yii yera mi ri." ⁷ Te kooji baa won ði biti raa : "Ngana ñogol so' ! Mi wonte íl las so' níi wocce, te funi kooyi so' fanuute. Mi mínéh koloh yeru yin !" ⁸ Daa mi won ðon ði ee biti ði ay koloh yeri ñam. Di ii kola' yeri ñam biti ði kooji dé' ; ði ay rii yed' íña sohla' ði ra bééß, ndah bëe' na meela' ra bekay na sopoh, ñaakke meela'a rek*.

⁹ « Mi won ðon tee bal : ðëgí ðon ay onu, sëemí ðon ay ot, lëbí ilë ðon ay kúnsírú. ¹⁰ Ahaŋkay ! Bëyí ðaŋ ay onu, bëyí saam ay

ot, te bëyí laß íl ay kúnsírú. ¹¹ Boffi koy ki bi ðon na, nay yere koohi goŋ biti ri ðaga ri jén, ¹² mbée yera ri dagal biti ri ðaga ri wah ? ¹³ Bosuu ðon níi, ðon mínú pagid koyyon yin wun. Kon ðon mínú yii baaha raa, ðeef luka' Boffa sunaa-sun neh : bëyí ðaŋ ði Ruuh-Pesen, ði ay ri rii on. »

Sañ-sañi Yéésú kola' waa na ?

(Saame Maccëe 12.22-30, 43-45 ; Marka 3.22-27)

¹⁴ Lahte bis, Yéésú hom payi bëyí laha' yébitëh fi kadda' ri won. Yedda' yébitëh fë bëe' rë, bëe' dalaatte won. Bëewë húmú daaha ra bééß éemuté. ¹⁵ Ndaa i ow waa na wonu ði ñéerë' a Belsebul buuri yébitëh yë, daa tah ði mín wëe lík. ¹⁶ I ow kay na saamu olsohi, nahute ri paŋ kimtaani nay teebee biti Koope daa wol ri. ¹⁷ Ndaa bi yúh Yéésú yee nuffi wa, ði won wa tígí daaha tih : « Bëewí daa boku nguur haa'ee filið fi wa raa, nguur ki baa ii míllë' keen a ? Bëewí daa boku faam haa'ee filið fi wa raa, faam fi baa ay míllëe poo. ¹⁸ Kon hena biti Seytaane haa' afi koon, nguur ki ay mínée caŋ díh ? Don wonu neh Belsebul daa yed' so' sañ-sañi líkëe mí yébitëh ë ? ¹⁹ Hena biti Belsebul daa yed' so' sañ-sañi na líkë' mí yébitëh rëe,

* **11:8** 11.8 ði ay rii yed' íña sohla' ði ra bééß, ndah bëe' na meela' ra bekay na sopoh, ñaakke meela'a rek :Lahte bëewí habuu ri ðeh : ndaa bëe' ay kaa' lah gace yed' ri íña sohla' ði ra bééß.

kon daa yed' bëewën sañ-sañ na líkúu wë yébitëh rë ? Wa fi yaa teefute ron biti don homuy kaah ! ²⁰ Yee lah ra biti kay, mi ñéerë' a Koope daa tah mi mín lík yébitëh. Baa daa teeḅa' biti Nguur ki Koope lahte níi don na.

²¹ « Bëyí mitte ow ham ngodi, cañ wohi faami raa, ow ii leḅ alal mi. ²² Ndaa bëyí luk dī doole ac, yejoh ri haa' ḅañ dī raa, dī ay naaf ngoda húmú yaakaar ri ra, anti wora' iña ḅeb ri dīi na ra ḅéeb.

²³ « Bëyí ñéerëey a so', kaa'a'te so' ; te bëyí habraay so' négírë' í yubi so', bëyí baa hasla' hasloo.

²⁴ « Yébitëh dūh ow na raa, saya' mbale luufin saame tígí hílsëe rí. Di olay raa, wona' nufi tih : "May nimil tígë húmú kola' mi ra."

²⁵ Di nimil deef bëe' man ti faam fi parute, yugusute níi wunte raa, ²⁶ tígí daaha, dī ay pay saam yébitëh paana kay, yi luku rii sohoor, wa ac dék bëe' në. Hen daaha raa, dee nay míllée bëe' rë ay luk dee man dī débëenë rë bos. »

²⁷ Yéésú hom wona, un ḅeḅ dfofhte filiḅ fi bëewë won dī tih : « Belaa kúf dë éldúnë ḅépídté rë rë lahte sos-keeñ. » ²⁸ Ndaa Yéésú won dī tih : « Bëewë në sikírúu Unni Koope te na ñeyu na ra kay, daa lahu sos-keeñ. »

Kimtaani yee húmú kat Sonaas ra
(Saame Maccëe 12.38-42)

²⁹ Bi na baatuu bëewë caak hëbís Yéésú, dī won wa tih : « Don fi bëy jamanii bee don bosute ; don meeluu kimtaani kola' Koope na a ? Añcañ don ii teeḅu kimtaan hém henay yee húmú kat yonente Sonaas ra. » ³⁰ Di húmú ñeya' Koope Sonaas na teeḅpe bëy Níníif doolii, dī ay ñeyee so' mi Koy-ḅëe' në daaha ḅal, teeḅ bëy jamanii bee doolii. ³¹ Yiin nay aattiyeey Koope bëewë rë, buuri belaa húmú ílf deyí Sabaa ra ay koloh, cañ fii don fi bëy jamanii beh, teeḅ don biti don homuy kaah. Di húmú kola' ginna lukuu wuloh ra neh, acce síkírëhí wonnee ke Salomoo neḅ keloh níi rë ë ? Añcañ, bëyí luk Salomoo gaan daa deh. ³² Yiin nay aattiyeey Koope bëewë rë, bëy Níníif ḅal ay koloh cañ fii don fi bëy jamanii beh, teeḅ don biti don homuy kaah. Keluu bëy Níníif waarii Sonaas ra, wa lofute pesad neh a ? Añcañ, bëyí luk Sonaas gaan daa deh. »

Léehí lampaa

(Saame Maccëe 5.15 ; 6.22-23)

³³ Yéésú baatte won tih : « Ow na keddëh lampa ḅap ri, mbée líh if sun fi. Daaha neh ! Lampa líkúu líkëe, bëyí haal, ot kotti na.

³⁴ Íllú daa lampii faanu : íllú wah raa, fu homa' leelii niiña ; ndaa íllú nebay raa, fu homa' ñúusë. ³⁵ Kon lah olsee afu nda niiña dōo na

ñúus neh. ³⁶ Hena biti fu homa niñ nii cér yinè sah homay ñúus rée, fay home niñ ti dee na hawaana' ro lampii niñce ra nen. »

Yee na seh farisenja a yeeddëh yí Kootaa ra
(Saame Maccëe 23.1-36 ; Marka 12.38-40)

³⁷ Woca' Yéésú wona ra, lahte farisenji dëkké ri ñam faami. Laha' ri faam fa ra, dī haalte wa na ñamu. ³⁸ Farisenja éempé, ola' ri biti Yéésú booñjaay booñjohi ñeete waal na dal ri ñam ra. ³⁹ Di fi Yíkëe won dī tígí daaha tih : « Ëlí don fi farisenja di madu don : don hom hosuu fëel fi gulunja a loonna don hel filib. Don hosuu faannon don hel keññon : don caakute nuf lohaa te don bosute nuf. ⁴⁰ Don daa luhú nuf ! Bëe' sak fëel rë, daa sak filib bal neh a ? ⁴¹ Ëní ñëkíddë kay iña lahuu don ra. Hen daaha raa, don ay lan ces. ⁴² Mas don fi farisenja ! Yii lín don béeb, don wod na Koope ní luka' yee lukki ñak solo ra, ndaa don sarganuute pañ yii júbpé a faha'i Koope. Añcañ, yaa daa iña wadti pagun koon da, yee tas da banti halu. ⁴³ Mas don fi farisenja ! Don fahuu took ñaanna këllëh di íllyyë na daguu Koope ra, te don fahuu biti don woduun a ya' ana këemmë. ⁴⁴ Mas don fa madu a luuyyi tinnduuy, bëewë ñeyuu sun, te wa yih biti wa ñeyuu sun luuy ra. »

⁴⁵ Ow di yeeddëh yí kootii Mëyíis won dī tih : « Bahaa, fu wonaa daaha raa, deef fee fun sol ra bal. » ⁴⁶ Yéésú won dī tih : « Íí ! Mas don fi yeeddëh yí Kootaa ! Don tikúu bëewë eni bitté te don na hëbiriñ wë dalaah sah. ⁴⁷ Mas don fa tabahuu luuyyi yonente ya caaccon húmú bëemú wë rë tabah yi wunte ra. ⁴⁸ Daaha, don tee buute biti don ñéerúuté a yee húmú pagu caaccon ra : wa bëemúte yonente ya, don ayute don na tabahu luuyyi wa. ⁴⁹ Yii baa daa tah Koope fa yuh béeb dë won tih : “May wol i yonente a i apootar waa na, ay lah yi wa bëem wë, yee wa mokil wa ní mokil.” ⁵⁰ Daa tah ñif mi yonente ya bëemú dala'te sagi ëldúnë ní a woteh ra, ay keen sun fi bëy jamanii beh : ⁵¹ dala'te bëemí Abeel* ní bi Sakari fa bëemú baylii Faam fi gaani Koope, hanndal ki tígë na hawruu ra a tígí selaa. Mee ron won da ee : kaah biti bëy jamanii bee ay yinil ñinnë kéendú yaa ra béeb. ⁵² Mas don fi yeeddëh yí Kootaa ! Don wodute ilë në yuhúu yee won Koope ra ; don fi yah, don kaa'uute haal, don anutee kaa' bëewë fahuu ra haal. »

⁵³ Kola' Yéésú tígí daaha ra, yeeddëh yí kootii Mëyíis a farisenja haayluute sun fi, na anuu rii meel yin fi yin béeb. ⁵⁴ Wa na olsuu ri, nda ri ay won yii ñeyay waal raa.

* 11:51 11.51 Saame Dalaana 4.1-8

12

Líkíní Yéésú taalibe yi

(Saame Maccëe 10.19-20, 26-33 ; 12.32)

¹ Wahtaa na wona' Yéésú farisenḡa na a yéeddëh yi kootii Mëyiis rë, i ow júnni-júnni na baatuu ac ; caagi wa tahte wa na togantuu hanndal ki wa. Yéésú débë' taalibe yi na won wa tih : « Lah mëytíi lëwíiri farisenḡa*, daa ri wonnee ke wa teem búkki wë rë. ² Yii laku béeb ay olu, yii ḡapu béeb ay yúhú. ³ Yii ḡon won ḡi filiḡ nūus béeb ay keluu na' këtëḡ, te yii ḡon mëddë' rí filiḡ las béeb ay daaḡnjuu këem.

⁴ « Mi won ḡon na, ḡon fi kooyi so' : ngënë néehí bëewë na hawu ow húl rë, wa mínih yii luk baaha. ⁵ Cëe mi teeḡ ḡon bëe' warun ḡon neeh ra : néehí Koope, ndah ri hap húl rëe mín bek safara. Mi won ḡon tee bal, ḡon wadti neehun ḡi.

⁶ « Ndiit iip na yëeyih fittíj ana woo ? Añcaḡ, yínë sah na múuyéh në Koope. ⁷ Baatte biti fen fi affon sah kíduté ! Kon ngënë sídíi yin, ḡon gënú líir ndiit fap !

⁸ « Mi won ḡon tee : bëyi won fii bëewë biti ḡi non bëewí so' mi Koy-bëe', may won fii malaaka yi Koope biti bëyi baa non bëewí së'. ⁹ Bëyi won fii bëewë biti ḡi yéeh së' nék, may won fii malaaka yi Koope biti mi yéeh bëyi baaha bal. ¹⁰ Bëyi

won yin bos sun fi so' mi Koy-bëe' béeb, ḡi mín baalu. Yaha sun fi Ruuh-Peseḡ raa nék, bëyi baa ii baalu.

¹¹⁻¹² « ḡon tēekrú këem filiḡ ilíyyë na ḡaguu yëwúḡḡë Koope ra mbée fii njúitti gina a bëewë homru nguur ka ra, ngënë sídíi : yee nay ron layee wahtii baaha teme ra ii kola' ḡon na, ay kolee Ruuh-Peseḡ na. »

Léehí yíkú alal ma lúh nuf ra

¹³ Tígí daaha, ow di bëewë won Yéésú tih : « Bahaa, wone bahii so' wod so' na alal ma heliḡ fun boffi fun ra. » ¹⁴ Yéésú won ḡi tih : « Kooja, daa fal so' aattiya'i iñon mbée wora'i alal mon ? » ¹⁵ ḡi antee baat won bëewë béeb tih : « Lah héní wun, ngënë fëhíi alal níi lukus, ndée caagi ow alal taheh ri laha' níini. »

¹⁶ Tígí daaha, Yéésú ñeya'te wa léeh won wa tih : « Lahte yíkú alal mi húmú laha' meeyi laabpe níi laab. ¹⁷ ḡi won nufi tih : “May hene ḡi ḡeh, bee lahay mi tígí túmë mí pebi so' bee ra ? ¹⁸ Mi ot na ! May hene ḡeh : may baate misah yi so', mi túm pebi so' a iña laha' mi ra béeb filiḡ. ¹⁹ Mi anti won af so' tih : mi lahte alal mi ay soo mín kúḡ kíil caak ; mi talla' hílsëh, mi ñame, mi hane níi keeñ so' sos siib.” ²⁰ Ndaa Koo won ḡi tih : “Lúh nuf fe ! Fay húl elgee woteh beh. Daa nay lahee iña yefiḡ fu afu ra béeb leegi ?” » ²¹ Yéésú baatte won tih

* 12:1 12.1 lëwíiri farisenḡa :Lëwíir daa na tah mún më na yugusuu mbúuru rë poosa'.

: « Bëyí homa' négirè' alal mi saañ afi na kut, saamay Koope, hom millè' daaha. »

Koo daa na ona'
(*Saame Maccëe 6.19-21, 25-34*)

²² Yéésú antee won taalibe yi tih : « Yii baa daa tah mi won don tee : ngënë sídíi yii ñamun don, mbée yii bekuun don. ²³ Pes luk ñam lah solo, te faan luk yéré lah solo bal.

²⁴ « Èlsíi ñaakka : wa na sehíh níi púlè lec, wa lahuy misah, lahuy túmëe, ndaa Koope ee waa ñëmídf rë ! Don nék, don lúkíh yakka lah solo a ? ²⁵ Wa don na, sídè'è nè sídè' rí rë, mín fehe níi baat yin yutuud pesi ? ²⁶ Hém don daa míníh yii yutuudi baa raa, don sídúu yi yin kay ?

²⁷ « Èlsíi dee man capussi gaaw fa luufa ra : wa na légéyih te wa na mékíh díis búub. Añcañ, mee ron won ra ee : dí fi buura hínú Salomoo ra sah, húmú laha' ri alal níi, dí lahay búubbí mada' a capussi gaaw fi yaa wun ! ²⁸ Ngémën tasa'te ee ! Koope posil gaaw fa luufa woteh níi wa man daaha wun, te teem key wa ay luuhu tamu raa, dí ay lukee bek don fi yaa búub neh a ? ²⁹ Kon ngënë mèklí affon saami yii ñamun don mbée yii hanun don ; ngënë sídíi. ³⁰ Bëewë nëníh bëewí Koope feey fi bee ra daa na moklu affi wa saami iñyaaha béeb. Ndaa don fi yah, Boffon yúhté bití don

sohluute wa béeb. ³¹ Nguur ki Koope daa mit saam ; bee tas da ín ya' Koo ! ³² Don fa yubi yutuudi beh, ngënë néekíñíi, ndée Boffon daa faha' bití don haal Nguur ki. ³³ Yëeyí alal mon don sarah ñëkídfë cadum fa. Sëemí tígí wëerté, négiríi alal mí mínéh dúm sun-Koo, tígí lohoh liileh na te lahay maa-soh. ³⁴ Yúhí bití tígí hom alal mon, nuffon homa' na bal.

Dee wađti sehuun ayi Yéésú rë

(*Saame Maccëe 24.45-51*)

³⁵ « Pëkíi, don këríd lampa yon. ³⁶ Mëdíi a súrgë yí sehu kélfií saañ kíléek, nda ri ac lab ílë rëe, wa yíp ríi kúnsídf. ³⁷ Lahute sos-keeñ, súrgë yí yaa yéñké bití aya' kélfií wë rë, deef wa na sehu ra. Mee ron won kaaf ka ra ee bitih : dí fi kélfëe ay pokoh, tëekídf súrgë yë, yed wa ñam. ³⁸ Wuti kélfëe elka' níi elka' raa sah, te deef wa sehe ri, wa ay lah sos-keeñ.

³⁹ « Don yúhúté bití yíkëe faam yúh wahtaa nay aye lohoha faami ra koon, tin dí ii ríi yeris poo faam fa. ⁴⁰ Kon kélíi affon don bal, ndée so' mí Koy-bëe', may nimile wahtii nuffon paay na. »

⁴¹ Peer won Yéésú tígí daaha tih : « Yíkëe, fu wonídf fun kut léehí bah, mbée fu bekke bëewë béeb nè ? » ⁴² Dí fi Yíkëe won dí tih : « Mëdíi a súrgíi ñeya' woni kélfií te ñaance, bí kélfií tík súrgë yí kayya faam fa ya'i, yeri wa ñam bití wahtaa lah ra. ⁴³ Lahte

sos-keeñ, súrgíi baa yéjke bití yíin nay nimile kélfií faam fa ra, deefa ri page yee nahu ri ra. ⁴⁴ Mee ron won kaaf ka ra ee, kélfií ay tík iña laha' ri ra béeb ya'i. ⁴⁵ Ndaa hena bití koon súrgíi baaha won nufi tih : "Kélfií sè' aay doom", níi tah dí yam sun fi súrgé yí kayya hawsee wa, dí ñame ñami nebpe, hane maniye, ⁴⁶ kélfií ay nimil wahtii dí yéeh rí te deefa ri seheh ri. Tígí daaha, kélfií ay rii bēkdē' bēewē gémúy Koope ra, mokil ri mokli misikke. ⁴⁷ Súrgíi yúh yee faha' kélfií rē, antee cagay afi te pagay yii baaha, ay laβu laβbi misikke. ⁴⁸ Ndaa súrgíi yéeh yee faha' kélfií rē, anti pañ yii cal hap, ii laβu laβ caak. Bēyí onu yin caak ay meelu caak ; bēyí déjéénú yin caak ay meelu yi luk yi bēyí déjéénú yutuud. »

Yéésú kúf jaamma mbée daralsa' ?

(Saame Maccëe 10.34-36)

⁴⁹ Yéésú baatte won tih : « Mi ac yíin kíi feey fa, a dee faha' mi bití dí yíppí kad haat da ! ⁵⁰ Mi wadtee ñee coono†, keeñ so' antee tookay níi lēhín kí. ⁵¹ Don habuu bití mi ac kúf jaamma feey fa a ? Ee-ee', mi won don tee : mi ac daralsa'. ⁵² Dala'te woteh, faam fi laha' ow iip ay daralsa' : bēewí éeyē yē múuyē' a bēewí ana ya, bēewí ana ya múuyē' a

bēewí éeyē yē. ⁵³ Baap ay múuyē' a koy ki yaali, koy ka múuyē' a boffi. Yaay ay múuyē' a koy ki belii, koy ka múuyē' a yaafi. Pacool ay múuyē' a beleβ koohi, beleβ koy ka múuyē' a pacooli. »

Tíinnde' yí jamanaa

(Saame Maccëe 5.25-26 ; 16.2-3)

⁵⁴ Yéésú baatte won bēewē tih : « Don ot Koo húuh rēe, don yíppí yúh bití dí ay toβ ; te yii baa daa na lah. ⁵⁵ Te ngilaaw ma kúlēe rēn waal tagu raa, don yúh bití dí ay mbēeyē ; te yi baa daa na lah. ⁵⁶ Wonnon teem búkkēn ! Don fa mínú tíinnde' iña na teeβa' yii nay lahe feey fa a sun ra, haala' yi níi don míníh tíinnde' iña na teeβa' Koo woteh yee ra ?

⁵⁷ « Yi tah don míníh yúh yee wadti pagun ra ? ⁵⁸ Ow yam do yin níi doni saye faam buur raa, don lah waala, lah saame bití doni júbē', toñeh doni lah dín fē dí ey ro, buur tík rē ya' yi alkaati ya, fu téyú. ⁵⁹ Daa mi won don dí ee : fií dúh kasaa níi bín yínlēe fu kabut ka béeb rē. »

13

Lof pesad mbée húl

¹ Wahtii baaha, i ow ayute woni Yéésú bití Pilaat hawrohte i ow di bēy Galile húl, deef wa na hawru Koope sarah. ² Yéésú won wa tih : « Don habuu bití bēemēdē bēemú bēy Galile

† 12:50 12.50 Mi wadtee ñee coono :Di gerek, bíníyú deh : Mi wadtee bētsú.

yi yaa ra teeḅa' biti wa luku bēewí kayya Galile bos aa yih ? ³ Mi won ḁon ti ēe-ēe' ! Te ḁon lofuy pesad, ḁon bēeḅ ay sanju bal. ⁴ A bēewí sabboo a peeye yi yaa ḁakaya' taahi uda Silowe na bēp ḁí rē, ḁon habuu biti daa wa luku bēewí kayya Yerusalem bos aa yih ? ⁵ Mi won ḁon ti ēe-ēe' ! Te ḁon lofuy pesad, ḁon bēeḅ ay sanju bal. »

Léehí tal eena na líméh rē

⁶ Yéésú antee waa ñeya' léeh won wa tih : « Lahte bēyí húmú laha' tal een meeyi. Di acce na saam koy een ndaa ri olay. ⁷ Tígí daaha, ḁi won sǔrgēe nē lín meeya ra tih : “Ole ! Kíil éeyē ayee bēeḅ, mi ac saam koy een tal eeni beh, te mi na oleh. Di ay homee naafi feey fa te ri lahay njiriñ a ? Hawe ri !”

⁸ « Ndaa sǔrgēe won ḁi tih : “Bahaa, yedḁe ri kíilí beh, may júkēt tala mi toh ri. ⁹ Henu ḁaaha raa, heeyce ḁi lím kíirkí ; ḁi límēy rēe fu hawroh ri.” »

Belaa goḅ ra payu bisa na hílsúu rē

¹⁰ Bisa na hílsúu yēwúḁḁē rē ín, Yéésú hompe na yēeddē' filib tígē na ḁaguu yēwúḁḁē Koope ra. ¹¹ Ow beleḅ misikid' húmú nē : ḁi laha' yébitēh fí daa gogil ri ; hente kíil sabboo a kíil peeye (18), ḁi na mínéh caḅ ní júḅ dalaah sah. ¹² Ola' Yéésú

belaa, ḁi dēekké rí, won ḁi tih : « Yaa ow ! Misigu wocce ! » ¹³ Di tikké ya' yi sun fi belaa, belaa yíppēe júḅ, yampe na kañ Koope.

¹⁴ Ndaa paya pay Yéésú belaa bisa na hílsúu rē nebaay njíidi tígē na ḁaguu Koope ra. Tígí daaha, ḁi won bēewē tih : « Lahte waalli pēenē yí bēewē waḁti légéyún nē ; lah éyí payoh na, ndaa bisa na hílsúu rē neh ! » ¹⁵ Di fi Yíkēe loffe ri unni yeh won ḁi tih : « Wonnon teem búkkēn ! Bisa na hílsúu rē, ow fi ow ḁon na bēeḅ na pay yugiin, pēkís fanfi mbēe mbaam fi, pay hēndí neh a ? ¹⁶ A belii bee sédí Abraham bee ra, Seytaane antee rii pokalsa' yii hente kíil sabboo a kíil peeye (18) bee ra, ḁi waruyti sēmlúu pokki bisa na hílsúu rē ē ? » ¹⁷ Yee won Yéésú baa ra sēpíḁté kaa'oh yi bēeḅ ; ndaa keeññi bēewí kayya bēeḅ sosse di íñi wunna na paḅ ri ra.

Léehí pebi tisoḅ ki yutuuda a bi lēwúirē

(Saame Maccēe 13.31-32 ; Marka 4.30-32)

¹⁸ Yéésú baatte won tih : « Nguur ki Koope mada' a yih ? May rii mēllée a yih ? ¹⁹ Di mada' a pebi yutuudi baa* beḅ ow, sohte ri meeyi ra nen : ḁi paalte, oodte níi hente tal kilik ; yakka ayute tífúté ya' ya. »

²⁰ Yéésú wonil tih : « May mēllée Nguur ki Koope

* **13:19** 13.19 pebi yutuudi baa :Di gerek, bíníyú ḁeh : tisoḅ mutarda. Pep mutarda non peppa lukki yin ra, ndaa tala non tal gañcah ya lukki gaan di meeyya ra.

a yih ? ²¹ Di mada' a lëwíirë beë ow beleb, boolla'te wa a mún caak, iyídté wë níi wa béeb fuudte ra nen. »

Ílí yutuuda

(Saame Maccëe 7.13-14, 21-23)

²² Yéésú hom waali Yerusalem fa, ñeete ginna na yeeddë'. ²³ Lahte bëyí meelte ri won tih : « Bahaa, bëewë nay múcé rë ac yutuud a ? » Yéésú won bëewë maasuu ra tih : ²⁴ « Pëgí béeb níi ñon haala' ílí yutuuda ; daa mi won ñon ñi ee : ow caak ay étídf haal te wa ii rii mín. ²⁵ Yiin kolaa yíkú faam fa níi won ílë ñeefa ñon hëelíh rë, ñon ay home ëssë, ñon labe ílë, ñon wone tih : "Bahaa, kúnsídf fun !" Di ay ron lofe tih : "Mi yéeh rën !" ²⁶ Don ay rii wone tígí daaha tih : "Yen bokuy ñam a han, te fu yeeddë'té këemmë gin fun a ?" ²⁷ Di ay baat won ñon tih : "Mi yéeh rën ! Wúlí së', ñon fa paguu yin bos ra béeb !" ²⁸ Don ot Abraham, Isaak, Yakop a yonente ya béeb filië Nguur ki Koope, ñon anti líkú ñon saañ ëssín rëe, ñon ay looyee daaha, ñon ñafoh níi tíññën lec. ²⁹ Bín fë, ay lah bëewí kola' tígí hom ow feey fa béeb, ac ñami ndaje ma cëgídf Koope Nguur ki ra. ³⁰ Di bëewë míllúu woteh yee ra, lahte na yi ay këllëh yiin fa, te di yee këllúu woteh yee ra,

lahte na yi ay míllë' yiin fa. »

Yéésú a bëy Yerusalem

(Saame Maccëe 23.37-39)

³¹ I farisenj lebuute Yéésú wahtii baaha, wonu ri tih : « Kolee dee fu saañ ílíy kay ! Erot ee saam hawrohu húl rë. » ³² Yéésú won wa tih : « Pëyí ñon wonídf so' tisooh ki gúmfí baa bitiwoteh a key mí lík yébitëh mi na pay jérídf, nah mi ñúmël légéyí së'. ³³ Woteh, key a nah béeb mi wahti homa waali Yerusalem fi so', ndée yonente waruy hawuu húl ílíy kay henay ñin fë.

³⁴ « Don fi bëy Yerusalem daal, ñon fa na bëemú yonente ya ra, ñon fa na tawu bëewë Koope wol wa ñon na la' níi wa húl rë, hente waal díh ma na faha' négíré'í rën hëbís së' ti ñi na négíré' paan yiilli pabbi nen ? Ndaa ñon fahuuy ! ³⁵ Kon Koope yeddfa'te ron ginon† ! Mee ron won ra ee : ñon ii soo olil níi wahtaa nay ron wonee bitih : "Koo-Yíkëe barkela bëe' ñi wol ri ra !"☆ »

14

Payi Yéésú bëyí laha' jér hufil bisa na hílsúu rë

¹ Bisa na hílsúu yëwúddë rë ín, Yéésú ñeekuté ñam faam ow di kélfë yí farisenja. Bëewë húmú në rë yíputé íllí wë sun fi na olsuu ri. ² Bëyí laha' jér hufil húmú në. ³ Yéésú won

† 13:35 13.35 Koope yeddfa'te ron ginon : Di gerek, bíníyú ñeuh : Koope yeddfa'te ron faamon. Mín hen Faam Koope bal. ☆ 13:35 13.35 Saame Kañaaya ya 118.26

yëddèh yí kootii Mëyíis a farisenja tih : « Kootii yen ona'te ow pay jéríd bisa na hílsúu rē èe onaay ? » ⁴ Ndaa wa kaa'uute lofi. Tígí daaha, dí tíkkè jérdè ya' payce ri, wonte ri saañ faam. ⁵ Di antee won bëewè tih ; « Ow di don na lah koy mbée fanfi keen filiḅ yéem koon, wuti hena bisa na hílsúu rēe, dí ii rii yíppí nís è ? » ⁶ Wa lahuy yii wonun wa di yee meel ri wa baa ra.

Líkín'í yulid ndaje

⁷ Yéésú otte biti haneella tansuu tíkkè kèllèh rē, dí na líkín wè won wa tih : ⁸ « Ow gap ro ndaje raa, ngana pay fu tooke tíkkè kèllèh rē. Mín lah bëyí luk roo gaan dëekúté, ⁹ yíkii ndaje ma anti ac won ro tih : “Kolee fu on bëyí bee took.” Fay sopoh tígí daaha fu koloh, fu saañ tooke níi tíkkè millé' rē. ¹⁰ Ngana hen dah ! Fu gapu ndaje raa, lah tooke tíkkè millé' rē ; daaha, yíkii ndaje ma ac raa mín rēe won tih : “Lebee dee kooja, fu took tíkkè kèllèh rē.” Hen daaha raa, bëewè doni wa tooku ra béeb ay roo haba' ow gaan. ¹¹ Yúhí biti bëyí béyíd afi béeb ay cépirú, te bëyí cépíd afi béeb ay béyrú. »

¹² Yéésú antee won yíkii ndaje ma tih : « Fu yahti gapa' ndaje raa, ngana gap kooyu, mbée koy-yaayyu, mbée mboko yu, mbée yíkèe yí alalla doni wa dékú rē ; ndée wa fi yaaha mínú rēe dëek ñam bal, te bín fè rēe, deef wa yínlú rē yee pagid fu wa ra. ¹³ Fu yahti gapa'

ndaje raa, lah dëeké manti ñëkíddè nen, bëewè cérrí wè mitay ra, lëfëñíddè mbée búumíddè. ¹⁴ Fu pañ yii baa raa, keeñu ay naa sos ; wa mínih rēe yíníl, Koope nay roo yínlé yiin nay rii kèllè bëewè júbú rē búudé. »

Anili bëewè gapu ndaje ma ra

(Saame Maccèe 22.1-10)

¹⁵ Ow di haneella kela' ri unni yaa ra, won Yéésú tih : « 'Bëe' nay maasee ñam Nguur ki Koope ra, keeña ay sos. » ¹⁶ Yéésú ñeya'te ri léehí beh won dí tih : « Lahte bëyí cëgídté ndaje, gappe ow caak ñama. ¹⁷ Tígè nè waaya' ñama woc ra, dí wolte súrgíi woni bëewè gapu ra biti ñama nonte. ¹⁸ Ndaa bëyí rí pay díi na béeb, bëe' won dí biti dí ii mín ac. 'Bëe' déb dè won dí tih : “Lah wone ri baal so' ! Mi liiltee lom meey te mi wadtee pay kénsèhí.” ¹⁹ Ow kay won dí tih : “Lah wone ri baal so' ! Mi lom fana lo' sabboo te mi saañ étdí wè lín dëe koon.” ²⁰ Ow kay woníl tih : “Lah wone ri manti d'uhé' kood daa tah mii mín ac.”

²¹ « Súrgèe nimilte kélfèe nè, léhinté rí iña wonu ri ra. Keeñ kélfèe haayte, dí won súrgèe tih : “Yípee pay kèemmè a waalla gina, fu kúd ñëkíddè deh, bëewè cérrí wè mitay ra, búumíddè a lëfëñíddè.”

²² « Hompe níi súrgèe acce, won tih : “Bahaa, mi pañke yee nah fu so' ra ndaa tíkkè líssí tas.” ²³ Kélfèe won súrgíi tígí daaha tih

: "Tawee waalla luufa, fu cagoh bëewë ðoni wa nay tee'ee ra, wa ac haal nda faam so' líif. ²⁴ Mee ron won ra ee : ya' ow yínë sah di bëewë ðébuu gapu ra ii haal looni so'." »

Dee wadti ñéerúun a Yéésú rë

(Saame Maccëe 5.13 ; 10.37-38 ; Marka 9.50)

²⁵ Lahte bis, Yéésú na saañ, ow caak ñéerúuté a ri. Di yissëhté waa na, won wa tih : ²⁶ « Bëyí ac soo na te ri lukki pokoh boffi na, yaafi, belebi, koyyi, koyyaayi, mbée ði fi afi na raa sah, ði mínéh hen taalibeyi so'. ²⁷ Bëyí enaay kurwahi ñee tal so', mínéh hen taalibeyi so'.

²⁸ « Ow faha' tabah taahi utte raa, ði ii took paay olsoh iña wad naa haal ra, ði yúh nda ði ay lah hélsí ay mín lúsíð taaha a ? ²⁹ Henay bah, ði dal tabah anti mínéh lúsíð rëe, bëewë nay ole yii baaha ra béeb ay rii ñaawal ³⁰ wone tih : "Élí bëyéé dal tabah bee te mínéh lúsíð rë !"

³¹ « Te buur koloh haa' a buur kay raa, ði waray took paay olsoh nda bëewí júnní sabboo (10.000) ya laha' ri ra, ði ay naa mín haa' a buura na yejoh ðii na a bëewí lecsuu yii ana ra a ? ³² Hena biti ði mínéh rí rëe, ði ay wol i ow buuri yínë në balaa ri koloh, wa ðañ ri nda wa mín júbë'. ³³ Ti ðaaha nen, ow yínë di ðon na mínéh hen taalibeyi so',

hém ri takaay a iña laha' ri ra béeb.

³⁴ « Don yúhuté biti miraa yin wun, ndaa wa lahlilay cafrika raa, wa ay nimiliruu cafkii wa ðíh ? ³⁵ Di lahay njiriñ tígí daaha, ði wuneh sah tohaa ; ði ay yúfú sénín. Bëyí lah nuf kelaa, kelaan na ! »

15

Léehí har fa múuy ðë a bi hélsë múuy ðë

(Saame Maccëe 18.12-14)

¹ Yeekoh yi túmë a i bakaaroh kay lebuute síkírëhí Yéésú. ² Yaa nebaay farisenja a yëeddëh yí kootii Mëyíis, tahte wa na wonaaluu hanndal ki wa tih : « Bëyí bee taha' bakaaroh ya a ya' ana na bok a wa ñam bee raa ! »

³ Tígí daaha, Yéésú ñeya'te wa léehí beh won wa tih : ⁴ « Ow di ðon na lah har tíméer (100), an naa múuylë' yínë rëe, ði ii hel harri sabay payniil a payniilla (99) níirëe yë, ði saañ saame bee múuy ðë nú ði ot ði a ? ⁵ Te ði ot ði raa, keeña ay sos níi sos, ði beb har fa tégúm rí, ⁶ ði saañ faam, anti ðëek kooyyi a bëewë bani wa dékú rë, won wa tih : "Yen bokun yen lah sos-keeñ, ndée mi otte har fee ke so' húmú múuy ðë !" ⁷ Mee ron won ða ee : ti ðaaha nen, bakaaroh yínë kut lof pesað raa, Koope laha' sos-keeñ ðaaha. Sosi keeña laha' ri bëe' lof pesað baa ra, daa lukki gaan sosi keeña laha' ri bëewí sabay

payniil a payniilla (99) júbú te sohluuy lof pesad̄ da. »

⁸ « Mbée lah belii lahaa hanjar úris sabboo, an naa múuyd̄é' úris yínë rëe, d̄i ii këríd lampa, saak faam fa saame níi ot ri a ? ⁹ Te ri ot d̄i raa, d̄i ay d̄ëek kooyyi a b̄ëewë bani wa d̄ékú rë, won wa tih : "Mi otte hanjari úrisë múuyd̄é' mí rë ; ëyi yen bok yen lah sos-keñ !" ¹⁰ Mee ron won da ee biti ti daaha nen : malaaka yi Koope ay lah sos-keñ biti bakaaroh yínë kut lof pesad̄. »

Anili koy ka múuy d̄ë

¹¹ Yéésú baatte ñeya'te wa anili bee na léeh wë won tih : « Lahte b̄ëyi húmú laha' koy yaal ana. ¹² Lahte bis, bee paa' kúkëy rë won boffi tih : "Baap, mi faha' biti koon fu yed̄ so' wodi so' di alal ma lahuu yen ra." Tígí daaha, boffa wora'te wa alal ma.

¹³ « Tíkëh i waal, koy ka paa' kúkëy rë yaayte yee laha' ri ra, bebpe hélsë saañce gini wulte, hompe dín fë na pañ yii neba' ri níi ri yahte alal mi daaha.

¹⁴ Yaaya' ri hélsë béeb rë, yaabi misikke haalte gina, d̄i lahlay yii ñama ri. ¹⁵ Di yeel-tee saañ, haalte légéy ow di b̄ëy gina na ; b̄ëe' yeñce ri meeyyin níiri mbaamtúgëllí. ¹⁶ Yaaba' ri níi yaab da, nufa tasse ñam di ñami mbaamma, ndaa ow na oneh ri na.

¹⁷ « Tígí daaha, afa kúnsëhté, d̄i yíppée won nufi tih : "B̄ëewë në

légéyíru baaso' ra caakute ñam níi mínih yin na, mi anti home dee mi húlé a yaab a ? ¹⁸ May kolee koloo mi nimil faam baaso', mi won d̄i tih : Baap, mi bakaadte fii Koope te mi tooñce ro bal. ¹⁹ Mi caleh fu habee so' koohu ; beb so' mi légéyíd̄ d̄ë ti b̄ëewí kayya nen."

²⁰ « Di yíppée koloh na nimil boffi na. Di teem hanndal boffa séenté rí, keeña d̄úmpé d̄ii na ces ; d̄i múkëtë téebílehí, yabaalohte faana, wodohte ri níi wodoh. ²¹ Koy ka won d̄i tígí daaha tih : "Baap, mi bakaadte fii Koope te mi tooñce ro bal, mi caleh fu habee so' koohu." ²² Ndaa boffa yíppée lec woni, yíssëhté súrgë yí në won wa tih : "Yípii kali búubë lukki wun da, don bek ri koy so' ; b̄ékí rí supi kuna, don bek ri ñafad̄. ²³ Kéli fanfa lukki wun faan da, don hap ri, yen cëgíd̄ ndaje. ²⁴ Koy kee ke so' húmú haba' mi biti húlté rë nimilte yéelíd̄ ; d̄i húmú sooyce te mi otte ri !" Ndaje ma yíppée dal.

²⁵ « Wahtii baaha, deef koy ki saawi b̄ëe' húmú meey. Na nimil ri níi rí lebohte faam fa ra, d̄i kelohte típpë a becca. ²⁶ Di d̄ëekké ow yínë súrgë yë në, meelte ri yee lah ra. ²⁷ Súrgëe won d̄i tih : "Ñéedú daa nimil, boffu antee hawroh fanfa lukki wun faan da, af biti ri otte koohi te yin katay ri." ²⁸ Koy ki saawa yíppée neeb, kaa'a'te

haal faam fa. Boffa dúhté dīi na, ðanke ri haal filiḃ. ²⁹ Ndaa ri won boffa tih : “Síkírèh sè' baap ! Hente kíil caak mi na hap faan so' légyírú, te yii túuy fú sè' béeb mi paṅ ri. Añcaṅ, fu èndèy sè' wuti yaha ndeṅ sah mi hap ri, funi kooyyi so' cègíd ndaje. ³⁰ Ndaa aya' koohu ra, dī fa yah alal mu a beleḃba na tílú rē, fu hawidte ri fanfa lukki wun faan ða.” ³¹ Boffa won dī tih : “Koy so', fu mēssi hom soo na, te iña laha' mi ra béeb daa fu laha' wa bal. ³² Ndaa yen warutee cègíd ndaje nam, yen lah sos-keeñ ! Néedée ke ro bee húmú haba' mi biti húlté rē nimilte yéelíd ; dī húmú sooyce mi otte ri.” »

16

Anili daga lah nuf ra

¹ Yéesú ñeyaatte taalibe yi anil na léeh wē won tih : « Bèyí caakke yin húmú laha' dagi daa na tooppitoh alal mi ; dī antee keloh biti daga yaha' alal mi yahoo. ² Bèe' dèekké daga, won dī tih : “Yee keloh mi ðoo na ra nebaay so' ! Teeḃ so' ðee légyè' fú rē ; woc raa fu yeris légyè.” ³ Daga won nufi tih : “Bee nay mii líkúu légy bee ra, may hene díh ? Mi lahay doole línèe te mi sopohte saraatoh. ⁴ Mi otte yee nay mii page ra, hen ðaaha mi líkú légyí sè' rēe, lah bëewí mín sēe yef faam wa.” ⁵ Tígí ðaaha, dī dèekké bëewè lahrú kélfií kabut ra béeb yínè-yínè. Di won bee

ðéḃ ðè tih : “Fu lahid kélfií sè' yih ?” ⁶ Bèe' won dī tih : “Mi lahid dī bèrgú dúuléen tíméer (100).” Daga won dī tih : “Kéedí kabut ku abeh ; yípée took fu bíní bèrgú sabay iip (50).” ⁷ Di antee dèek ow kay, won dī tih : “Fu lahid kélfií sè' yih ?” Bèe' won dī tih : “Mi lahid dī saaku pep tíméer (100).” Daga won dī tih : “Kéedí kabut ku abeh ; bíníyé saaku sabay peeye (80).” ⁸ Kélfèe laasse ðee laha' daga júbèy rē nuf. Kaah biti bëewè fahuu èldúnè rē luku bëewè homu niña ra lah nuf pagaa yin hanndal ki wa. »

⁹ Yéesú baatte won tih : « Mantee ron won tee : sèemi kooy a alal ma lahuu ron feey fi bee ra, nda tíl níi ðon lahluy wa raa, Koope tah ðon faami níi kiri fi kirih. ¹⁰ Bèyí júḃ di yin yutuud, ay júḃ di yin gaan bal ; bëyí júbèy di yin yutuud, ii júḃ di yin gaan. ¹¹ Kon hena biti ðon júbúy di na kúrúu ron alal ma feey fi bee raa, ðon habuu biti ðon ay ðeṅéenu alal ma lukki lah solo ra a ? ¹² Te hena biti ðon júbúy di yii lenke alal ow kay raa, ðon yaakaaru biti ðon ay liil alal ma waf ðon lahuun faraaḥ ra a ? ¹³ Lahay súrgíi mín légyííd kélfè ana : dī ay kaa' ow yínè waa na, pokoh bëyí yínè nē ; dī ay ñee won ow yínè waa na, kaa' síkírèhí bëyí yínè. Ti ðaaha nen, ðon míníh boolla' foṅko Koope a foṅko hélíis. »

Kootaa a Nguur ki Koope
(*Saame Maccëe 11.12-13 ;*
5.31-32 ; Marka 10.11-12)

¹⁴ Farisenja tiku hélis kep affi wa ra, keluu wa unnee ke Yéesú yaa ra, wa béeb na kEEKKÉliYú rí. ¹⁵ Yéesú won wa tih : « Don fahuu biti bÉEWÍ kayya haba' ron bÉEWÍ júbúté, ndaa Koope yúh yee keeññon. Yee na habuu bÉEWÉ biti daa lukki lah solo ra, di yii bosse níi bos Koope na. ¹⁶ Balaa Sañ Batis, Koope húmú ñeya' Kootaa a tééré yí yonente ya yéeddée. Aya' Sañ nínén Uni Nebi Nguur ki Koope daa na waariyu te bÉYÍ faha' naa haal béeb fay naa cagoh. ¹⁷ Biti sun a feey muuy daa lukki yooB biti koy una lukki yin di Kootaa ra múuy. ¹⁸ Yaali yes belebi, kood beleb kay, njaaliyohte. Te bÉYÍ kood belii yesute, njaaliyohte bal.

Anili yíkú alal ma a
Lasaar

¹⁹ « Húmú laha' bÉYÍ caakke alal, di beka' búubbí wunte te kofeelte, faraah di ñama' neB. ²⁰ Bín fë, húmú lahte ñÉKÍDÍ hínú Lasaar, faana béeb líiffé puul, fÉNDÚTÉ helute ílí faam bÉE'. ²¹ Nufa tasse wooñjiidi ñami bÉE', ndaa ri liileh na. Baatte biti buh ya na ayu deewe puulla faana.

²² « Hompe níi ñÉKÍDÉ húlté, malaaka ya kúrúTÉ rí hÉBÍs Abraham. Yíkú alal ma húlté bal, hacute, ²³ saañce safara, na mok dín fë. Béyré' rí afi ra,

di séenté Abraham, Lasaar tookke hÉBÍs. ²⁴ Di won Abraham tígí daaha tih : “Caac Abraham yÉrém sè', fu wol Lasaar soop kuni muluB kom so', mi hilsid gol-gol so', ndée mi mokke filib kii kí yee níi mok.” ²⁵ Ndaa Abraham won di tih : “Koy so', nérsée biti fu liilte nebu na húmú pesa' fu ra, te Lasaar húmú pesa' coono. Di liilte nebi leegi, fu hompe coono. ²⁶ Baatte biti nuñ gaan ee hanndal ki yen, tahte ow mínéh koloh fun na ac don na, te ow mínéh koloh don na ac fun na.” ²⁷ Yíkú alal ma won Abraham tih : “Kon mi na dañ dó Caac, fu wol Lasaar faam fun ; ²⁸ mi lahte na ñÉYÍD iip, lah raa di líkín wë, toñeh wa ay soo deefre coono fi beh.” ²⁹ Abraham won di tih : “Wa lahute kootii MéYÍs a tééré yí yonente ya waa na níi wocce, wa ñeyun iña wonu na ra.” ³⁰ Yíkú alal ma won di tih : “Èe-èe' caac Abraham, yaa doyyay ; ndaa ow koloh búudé pay waa na raa, tígí daaha wa ay lof pesad.” ³¹ Abraham won di tih : “Wa kaa' keloh woni MéYÍs a yonente ya raa, wuti ow koloh búudé deefid wa raa, wa ii rii síkírèh.” »

17

Líkíní Yéesú taalibe yi
(*Saame Maccëe 18.6-7, 21-*
22 ; Marka 9.42)

¹ Yéesú won taalibe yi tih : « Faraah ay lah iñi ay beke ow bakaad. Ndaa mas bÉE' nay waa komee ra ! ² Di poku la' gaan lúum betu kÍsÍ,

daa nay géné dñi na, balaa ri bek wuti yaha ow yínè di tunji yee bakaad, wa fi taalibe yi so' ! ³ Kon cègí affon !

« Koy-yaafu tooñ do, tēekdé rí fu won dñi na. Di réecciyèh rí níi ri won do baaha raa, lah baale ri. ⁴ Wuti dñi tooña' ro waal paana bisa raa sah, te faraah dñi ac wonu biti dñi réecciyèhté rēe, lah baale ri. »

Yee mín ngém rē

⁵ Apootarra wonu Yéésú-Yíkèe tih : « Baate ngémí fun ! » ⁶ Di won wa tih : « Don lah ngém wuti yaha yutuud koon sah, don nah tal kilki bee saañ yípée kísí, dñi ay ñee wonon. »

Yee wad súrgē nē rē

⁷ Yéésú wonil tih : « Ow di don na lah súrgíi línè' línèe mbée níirè' níirèe koon, dñi ot dñi ac meey fa raa, dñi ay rii yíppí dèek ñam a ? ⁸ Èe-èe' ! Di ay rii wone ti kay : "Lofee búub, fu pagid so' ñam, fu tíkíd sè' loona mi ñam. Mi woc daa, fu anti mín ñam." ⁹ Kon dñi lahay yii nay rii gémée súrgíi ; súrgēe pañ yee wad dñi na ra ! ¹⁰ Ti daaha nen, don pañ iña nahu ron ra béeb rēe, lah hēbii biti don i súrgē kut, don pagu yee wad don na ra. »

Guuñidñi sabboo ya pay Yéésú rē

¹¹ Yéésú hom waali Yerusalem, ñeete hanndal ki Samari a Galile. ¹² Tílé' rí níi lebohte gin ra, guuñid sabboo téebíluuté rí, gáute

hanndal, ¹³ anutee daañnjoh na wonu ri tih : « Bahaa yérém fun, hém neba' ro ! »

¹⁴ Ola' wa Yéésú rē, dñi won wa tih : « Pèyí seeyoh ya na, wa olsoh ron. » Wa homu saaña, wa wahute.

¹⁵ Ow yínè waa na ola' ri biti wahte ra, ñeyaatte kotti na nimil, béyídté uni sun na kañ Koope. ¹⁶ Laha' ri Yéésú nē rē, dñi yeddohte kotta, yíppé púkí feey na sím rí. Di fi baa bëy Samari. ¹⁷ Yéésú won tígí daaha tih : « Bèewí sabboo ya béeb daa wahu neh a ? A bëewí payniilla dih ? ¹⁸ Ow níbèy nimil kañi Koope sah henay bëyéé yèwúf neh bee ra. » ¹⁹ Yéésú antee rii won tih : « Kolee fu saañ ! Ngémú tahte fu wahte. »

Dee nay aye Nguur ki Koope ra

(Saame Maccèe 24.23-28, 37-41)

²⁰ Lahte bis, i farisenj meelute Yéésú wahtaa nay aye Nguur ki Koope ra. Di won wa tih : « Ayi Nguur ki Koope yii nay olu a íl neh. ²¹ Ow mínèh won bitih : "Èlí, dñi abeh !" mbée "Di abin !" Yúhí biti dñi ee leeloon ee. »

²² Di antee won taalibe yi tih : « Ay lah jamanu, don ay faha' hom a so' mi Koy-bèe', wuti hena bis yínè kut, te don ii rii lah. ²³ Don ay wonu biti Koy-bèe' abeh, mbée ri abin ; ndaa ngènè tíkí nē nuffon, ngènè pèyí nē. ²⁴ Di na hélyè' Koo hawaan feey fa béeb, ayi so' mi Koy-bèe' ay made daaha nen. ²⁵ Ndaa balaa baaha,

bëy jamanii bee ii soo faha' tik il te mi wadtee mok nii mok.

26 « Jamanii nimili so' mi Koy-bëe' ay madee a yee húmú lah jamanii Nowe ra nen. 27 Jamanii Nowe, bëewë húmú feey fa na ñamu na hanu, yee na koorantuu, nii yiin haal Nowe gaala ra. Mbënë më aya' tígí daaha kúdté wë béeb.

28 « Di ay madee a jamanii Lot* nen bal : bëewë homute na ñamu na hanu, yee na lomu, yee na yaayu, yee na sohu, yee na tabahu ; 29 ndaa yiin koloh Lot Sodom ra, Koo tof kii a la' yi na kad, nii muuyilte wa béeb. 30 Jamanii nimili so' mi Koy-bëe' ay made daaha nen ; daa mi won don di.

31 « Yiin fa, bëyí dúh këem, banan haal kali yin faam ; bëyí liilti saañ meey, banan nimil faam. 32 Nérsii yee húmú kat beleb Lot da.* 33 Bëyí núp húl ay ñak ñiini ; ndaa bëyí tah ñagi ñiini ay lah pesa na dúméh rë. 34 Mee ron won da ee bitih : elgi baaha, ow ana ay bok tugal ka yinë : ow yinë waa na ay kúru, bëyí yinë helu. 35 Beleb ana bal ay hom hod : ow yinë waa na ay kúru, bëyí yinë helu. [36 Yaal ana ay hom meey : ow yinë waa na ay kúru, bëyí yinë helu.] »

37 Taalibe ya meelute Yéésú wonu tih : « Yíkëe, yii baa ay lahee tígí dih ? » Di won wa tih : « Tígí eta' médë, suulla tee'uu na. »

18

Anili belaa yaali húl rë a aattiyoha

1 Filoon fe, Yéésú na teeb taalibe yi biti ow wadti daga Koope dago faraaah banti jëbël. Di ñeya'te wa anili beh na léeh wë won tih : 2 « Lahte aattiyohi húmú gina kílë ; di neehay Koope te di yeray ow cér. 3 Lahte belii húmú gina bal yaala húlté, hom paya' payoo faraaah deefre aattiyoha, wone ri tih : "Aattiya' funi kaa'ohi so'." 4 Hente yii maañce, aattiyoha kaa'a'te sikiñhé belaa. Hompe nii lahte bis, di won nufi tih : "Kaah biti mi neehay Koo te mi yeray ow cér ; 5 ndaa may pañ yee wad belii bee na ñogol so' faraaah bee ra. Henay baa di ay dékéé ac, te di ay soo millé' mokil nii mi tallee húl." » 6 Di fi Yíkëe antee baat won tih : « Kélii yee won aattiyohi bosi baa ra ! 7 Don habuuy tígí daaha biti di fi Koope ii yed bëewë ri tanis wa ra kaah, wa fa na fogu dii na na' a elek ra a ? Di ay waa yeris daa wa sehe a ? 8 Mee ron won ra ee bitih : di ay waa yippi yed kaah. Ndaa so' mi Koy-bëe'

* 17:28 17.28 Lot :Di koy ñeedí Abraham. Na húmú muuyil Koope gini Sodom bani bëy faami na heguu ra, belaa daa húmú heeltoh yíssëhté deey miraa. Saame Dalaana 13.1 nii 14.16 ; 19.1-38. ✱ 17:32 17.32 Saame Dalaana 19.26

mi ac raa, mbaa may deef ngém feey fa ? »

Anili farisenja a yeekohi túmè

⁹ Yéésú antee ñeya' anili beh na léeh bëewë habuu affi wa biti júbúté illí Koope te wonuy yin bëewí kayya ra, won tih : ¹⁰ « Húmú lahte bëewí ana yi haalu daf Faam fi gaani Koope : bëyí yínèe farisen, yínèe yeekohi túm. ¹¹ Farisenja hom a afi na daf Koope won tih : "Koope, mi na sím rë di yee maday mi a bëewí kayya ra : yee na lohu, yee na njaaliyuu a bëewí bossi kayya. Mi na sím rë di yee maday mi a yeekohi túmí bee ra. ¹² Bis níi nimil ki bis, mi na oor na waal ana, te yii lah mi béeb, woruun sabboo raa, mi yef dfo wodi yínèe." ¹³ Di fi yeekohi túmè hompe filoon, kaañay sah béyíd afi, yampe na lab araali won tih : "Koope yérém sè', so' mi bakaarohi beh." » ¹⁴ Yéésú baatte won tih : « Mee ron won da ee bitih : nimila' yeekohi túmè faam ra, Koope haba'te dī fi baa bëyí júbpé, ndaa habaay ri farisenja. Yúhí biti bëyí béyíd afi béeb ay cépirú, te bëyí cépíd afi béeb ay béyrú. »

Yéésú a tunja

(Saame Maccëe 19.13-15 ; Marka 10.13-16)

¹⁵ Filoon fi baaha, lahte bëewí homu komi Yéésú i kúkëy, fahuu biti dī tík ya' yi

sun fi wa, barkel wa. Oluu taalibe ya yii baa ra, wa na wonu affi wa. ¹⁶ Ndaa Yéésú dëekrëhté tunja, won tih : « Yéddí tunja ac soo na, ngënë këddí wë ! Yúhí biti Nguur ki Koope saamdu mani wa. ¹⁷ Mee ron won kaaf ka ra ee : bëyí habaay Koope buur ti dee haba' kúkëy Koope ra nen, ii hëelídf Nguur ki. »

Bëewë caaku alal ra a Nguur ki Koope

(Saame Maccëe 19.16-30 ; Marka 10.17-31)

¹⁸ Ow di kélfë yí yëwúddë meelte Yéésú won tih : « Yéeddéhi baahi beh, mi wadti paga yi níi mi lah pesa na dúméh rë ? » ¹⁹ Yéésú won dī tih : « Fu dëekë' sè' baah a ? Yi daa baah ? Henay Koope, lahay bëyí baahte. ²⁰ Yen nimil yee meela' fu koon ra ; fu yúh iña túuyë' Koope ra maan ? "Ngënë mësú njaaliyoh ; ngënë mësú bëem ow ; ngënë mësú loh ; ngënë mësú felídf ow ; lah tēppítii baappon a yaayyon." » ²¹ Bëe' won dī tih : « Bahaa, yii wad so' iñyaa béeb mi ñee na kúkëy kí sè' níi a deh. » ²² Kela' Yéésú unni yaa ra, dī won bëe' tih : « Fu talla' yin yínè : paye fu yaay iña laha' fu ra béeb, fu wora' cadum fa ñëkíddë. Hen daaha raa, fay lah alal sun-Koo. Fu woc raa, fu ac fu ñee tal so'. » ²³ Kela' bëe' unni yah, bi caak ri alal níi caak, yaa misikke ri keeñi níi misik.

24 Ola' Yéésú biti yaa misikke bée' rë, dī won tih : « Haal Nguur ki Koope kofeelte yíkëe yí alalla na ! 25 Géleem haal gúl kúuc daa lukki yoob biti yíkëe alal haal Nguur ki Koope. » 26 Bëewë nê hómú síkírúu rí rë wonu tih : « Kon daa míntí múc ? » 27 Yéésú won tih : « Yii wooñ ow wooñeh Koope. »

28 Peer won tígí daaha tih : « Bahaa ole ! Fun helute ina hómú lahuu fun ra béeb, fun ñeyute talu. » 29 Yéésú won wa tih : « Mee ron won kaaf ka ra ee : bëyí af Nguur ki Koope tah ri hel faami, belebi, koyyaayi, boffi, yaafi mbée koyyi, 30 dī ay lah yi luk yaa caak fap di jamanee woteh beh, te fayu dī ay lah pesa na dúméh rë. »

Waalí éeyë fë wona' Yéésú biti dī ay húl, dī koloh búudé rë

(Saame Maccëe 20.17-19 ; Marka 10.32-34)

31 Filoon fi baaha, Yéésú hécéhté yutuud a taalibe yi sabboo a ana ya, won wa tih : « Síkírúú ! Yen ee suu Yerusalem ra ee, te ina bíníyú yonente ya sun fi so' mi Koy-bée' rë béeb ay lah. 32 May tíkú ya' yi bëewë yëwúf neh ra, te wa fi yaa ay soo ñaawal, solsa' so', tuulsa' so', 33 labisa' so' laraw, an soo hap húl. Te waali éeyë fë filoon fi húlí sè', may koloh búudé. » 34 Ndaa taalibe ya hómú yíih yee faha' ri waa won ra ; wona kúnté affi wa.

Payi búumndé

(Saame Maccëe 20.29-34 ; Marka 10.46-52)

35 Na leboh Yéésú Yéríkëe rë, deef lahte búumndí hómú took búk waala na saraatoh. 36 Kela' ri dúukéli bëewë nê gétú rë, dī meela'te yee lah ra. 37 Bëewë wonute ri biti Yéésú fi bëy Nasaret daa na ñee daaha. 38 Di fonke tígí daaha won tih : « Yéésú, sédí Dawit, yérém sè' ! » 39 Bëewë kèllúu rë na wonu afa, fahuu biti dī héddëh, ndaa ri lukki fon na, na won tih : « Sédí Dawit, yérém sè' ! » 40 Tígí daaha, Yéésú cañke, kallirohte ri. Aya' ri ra, Yéésú meelte ri won tih : 41 « Fu faha' biti mi pagira ro yih ? » Di won tih : « Yíkëe, page ní illí sè' wërsëh, mi mín ot ! » 42 Yéésú won dī tih : « Yeele, ngémú tahte fu wahte. » 43 Íllë yíppée wërsëh, dī na ot. Di ñeete tal Yéésú na kañ Koope. Oluu bëewë yee lah ra, wa béeb na kañu Koope.

19

Haali Yéésú faam Sase

1 Yéésú haalte Yéríkëe na hús gina. 2 Daaha, hómú lahte bëyí hínú Sase ; daa ri kélfi yee koh yi túmë, dī hómú yíkëe alal. 3 Di hómú faha' oli Yéésú, ndaa bi lúh rí, dī mínéh ríi ot af caagi bëewë. 4 Di yíppée múkë, kèlléhté, lappe tal kili, faha'i oli Yéésú fë ay ñeye daaha ra. 5 Laha' Yéésú tígí daaha ra, dī bëyídté affi won Sase tih : «

Yípée cép Sase ; mi wadti hanlire ro woteh. » ⁶ Sase yíppée cép, kúdté rí faami, hampe ri haneel a sos-keñ. ⁷ Bëewë maasuu ra béeb, yaa nebaay wa, tahte wa na wonu tih : « Bëyéé ay hanlire bakaaroh a ? » ⁸ Sase kolohte, won Yéésú tih : « Síkirée noo Yíkëe, may on ñékíddë hatni yíní alal mi so' béeb, te bëyí mi liiltee rii nofa' mi bebpe hélsí béeb, may rii nimilid teemi wa iniil. » ⁹ Yéésú won dī tih : « Bëy faam fi bee múcúte woteh. Íi, bëyí bee bal non séttí Abraham. ¹⁰ Yúhí bití so' mi Koy-bëe', mi ac saami bëe' múuy dë, mi sëmlë' rí. »

Anili kélfëe déjéén súrgë yí hélíis rë

(Saame Maccëe 25.14-30)

¹¹ Bëewë homute na síkirúu rí. Bì lebbuu wa Yerusalem, te bëewë habuu bití Nguur ki Koope lej cép, dī ñeya'te wa anili beh na léeh wë ¹² won tih : « Húmú lahte bëyí non tal kélfë, dī hom koloh saañi gini wulte nda ri lah dín fë falu buuri gin wa raa, dī nimil. ¹³ Balaa ri saañ, dī dëekrëhté ow sabboo di súrgë yí, yedte ow di waa na béeb hanjar úris yínë, antee waa won tih : “Bëyí hélsí yeh, don légéyë' wë nú bín nimilaa mi ra.”

¹⁴ « Bëyí bah, bëy gin wa húmú fahuuy ri, daa tah saya' ri ra, wa yejute i ow filooni nda bëewí yaa lah raa, won bití wa fahuuy bëyí baa buur. ¹⁵ Kaa'eeh bëe' falute buur, nimilte gin

wa. Aya' ri ra, dī dëekrëhté súrgë yë dī húmú déjéén wë úrisë rë, yúhí ñña tikëh sun ra. ¹⁶ Bëe' débpi ac da won tih : “Bahaa, mi lahte hanjar úris sabboo sun fi bee déjéén fú sè' rë.” ¹⁷ Buura won dī tih : “Eera ! Fu súrgíi wunte ! Hém daa fu ñee woni so', fu panke yii yutuudi baa raa, mi yedte ro fu kúf gin sabboo.” ¹⁸ Súrgíi ana fa acce, won tih : “Bahaa, mi lahte hanjar úris iip sun fi bee déjéén fú sè' rë.” ¹⁹ Buura won dī fi baaha tih : “Do bal, mi yedte ro fu kúf gin iip.” ²⁰ Súrgë kay acce won tih : “Bahaa, úrsë déjéén fú sè' rë abeh ; mi húmú jok ri líil, mi dappe ri. ²¹ Sühë süh fú keñ ra daa tah mi kaañay ro. Fu beya' yii fu yefay ri, te fu leca' yii fu sohay ri.” ²² Buura won dī tih : “Fu súrgíi bosse ! May roo aattiyee unna won fu ra. Fu won neh mi bëyí súhté keñ, mi beya' yii mi yefay ri, te mi leca' yii mi sohay ri a ? ²³ Kon haala' yi ní fu wëtdëey hélsí sè' ? Tin bee nimila' mi bee ra mi laheh na yii tikëh sun a ?”

²⁴ « Di antee won súrgë yë húmú daaha ra tih : “Nëefi bee dīi na, don yed dī bëe' laha' sabboo ra.” ²⁵ Wa wonu ri tih : “Bahaa, bëyí baa liiltee lah úris sabboo níi wocce !” ²⁶ Di won wa tih : “Mee ron won da ee bitih : bëyí ham yee yeru ri ra a ya' ana ay baatu. Bëyí pagay yii baaha nék, yii yutuuda laha' ri ra sah ay naafu. ²⁷ Di

yii lenke kaa'oh yee ke so' fahuuy biti mi hen buuri wa ra, kéli wè deh, don hap wa húl fii sè'." »

*Haali Yéésú Yerusalem
(Saame Maccèe 21.1-11 ;
Marka 11.1-11 ; Sañ 12.12-19)*

²⁸ Wona' Yéésú ní wocce ra, dí kèllèhté bēewē, wa ñéerúuté, dí na saañ Yerusalem. ²⁹ Tílé' rí ní lebohte Betfase a Betani, hēbís daji Èlíiffè rē, dí wolte ow ana di taalibe yi ³⁰ won wa tih : « Pēyí gina fii bín. Don haale na raa, don ay naa deef cúmbúr mbaam poku, bi ow yēegírēy rí. Lah pēkísí rí, don kom so' ri deh. ³¹ Ow meel don yee tah don na pēkísú rí rēe, lah wēní rí biti Yíkēe daa sohla' ri. »

³² Taalibe ya kolu daaha suute. Lahuu wa ra, wa deefu iña ti dee wona' wa Yéésú rē nen. ³³ Wa homu pēkísí cúmbúré, yíkēe yē wonu wa tih : « Yi tah don na pēkísú cúmbúré ? »

³⁴ Wa wonu tih : « Yíkēe daa sohla' ri. »

³⁵ Wa anutee kom Yéésú cúmbúré, larute sabidoorri wa sun, habruute Yéésú yaagohte. ³⁶ Di na saañ, bēewē beyute sabidoorri wa larute waala.

³⁷ Leba' rí Yerusalem, na cép daji Èlíiffè rē, keeñni mboolo mi taalibe ya bēeb sosse ní sos, wa béyrúté unni wa sun na njoobu Koope di kimtaanna olu wa ra bēeb ³⁸ na wonu tih : « *Koo-Yíkēe barkela buura dí wol ri ra ! Jaamma laha sun,*

*Koo laha ndam di sunaa-sun ! »*³⁹ Lahte farisenñi húmú bēewē nē, na wonu Yéésú tih : « Bahaa, wone taalibe yu héddeh ! » ⁴⁰ Yéésú won wa tih : « Mee ron won da biti wa héddeh rēe, la' ya ay waa tah ! »

Yee nay kate Yerusalem ra

⁴¹ Baata' Yéésú leboh Yerusalem ní rí otte ri ra, dí na looy af yee nay kate gina a bēewē filiḅ ra, ⁴² na won tih : « Don fi bēy Yerusalem, don yúh yee nay ron one jaamma bisee woteh bee ra koon ! Ndaa mas, don mínih ríi ot. ⁴³ Ay lah jamanii yēnké biti kaa'oh yon ay ron geel, hac jul míirē, yégítēh rí, an don yejoh haa'. ⁴⁴ Wa ay hap bēewē bēeb húl, dakaya' gina ní la' ii tíkēh sun la'. Yaa bēeb biti don yúhsúuy wahtaa ac Koope sēmlē'en rē. »

Yēeddē'í Yéésú filiḅ Faam fi gaani Koope

*(Saame Maccèe 21.12-17 ;
Marka 11.15-19 ; Sañ 2.13-22)*

⁴⁵ Laha' Yéésú gina ní dí haalte baylii Faam fi gaani Koope ra, dí yampe na lík yaayoh ya homu na ra, ⁴⁶ na won wa tih : « Koo wonay Téerēe bitih : *"Faam so' ac faam dagaa"* a ? Ndaa don yíssúté rí *"faam lohoh"* ! »

⁴⁷ Yéésú homa' Faam fi gaana faraaah yēeddēe. Kélfē yí seeyoh ya, yēeddēh yí kootii Mēyíis a baha ya gina na saamu hawi húl, ⁴⁸ ndaa wa húmú yíih dee

☆ 19:38 19.38 Saame Kañaa ya 118.26

☆ 19:46 19.46 Saame Isayii 56.7

☆ 19:46 19.46 Saame Yérémi 7.11

nay wa rii pagee ra, af biti bëy gina béeb húmú síkírúu rí nuffi wa.

20

Tígè d'úhè' sañ-sañi Yéésú rë
(Saame Maccëe 21.23-27 ; Marka 11.27-33)

¹ Lahte bis, ðeef Yéésú na yeeddè' fliib Faam fi gaani Koope, na waare Uni Neba, kélfè yí seeyoh ya, yeeddèh yí kootii Mëyis a baha ya ðeefute ri daaha, ² wonu ri tih : « Won fun sañ-sañ na paga' fu iña na pañ fu ra. Daa nah ro pañi wa ? » ³ Di won wa tih : « So' bal may ron meel yin yinè. Wëní sè' : ⁴ bëtsè nè húmú bëtis Sañ bëewè rë, Koope daa húmú nah ri mbée bëewè ? » ⁵ Tígí daaha, wa na wonantu hanndal ki wa tih : « Yen won biti Koope daa nah ri raa, ði ay yen meel yee tah ní yen gémúy iña won Sañ ða. ⁶ Te yen won biti bëewè daa nahu ri raa, bëewè ay yen tap la' ní yen húl, ndée wa béeb gémúté biti Sañ yonente. » ⁷ Wa wonu Yéésú tígí daaha tih : « Fun yíih bëe' nah ri bëtis rë. » ⁸ Di nampee waa won tih : « Kon so' bal, mii ron won bëe' yed' so' sañ-sañ na paga' mi wa ra. »

Anili línèh yí reseñña sohooru ra

(Saame Maccëe 21.33-46 ; Marka 12.1-12)

⁹ Filoon fi baaha, Yéésú ñeya'te bëewè anil na léeh wè won tih : « Laha'

bëyí húmú yíp meey re-señ, yera'te ri ndalu, antee saañ baabi ði ay naa maañ. ¹⁰ Nona' reseña ra, ði wolte súrgè línèh yè nè, nda wa yed' ði wodi. Ndaa laha' ri ra, línèh yè habute ri, labute ri labbi misikke, anutee rii yeris ði nimila'te ya' holoñ. ¹¹ Yíkii meeya wolaatte súrgè kay. Laha' ri ra, wa labute ri labbi misikke, solute ri solli misikke, anutee rii yeris nimila'te ya' holoñ. ¹² Di wolaatte súrgè kay. Laha' ði fi baa ra bal, wa gaañute ri gaañni misikke anutee rii d'úhíð meeya.

¹³ « Yíkii meeya won tígí daaha tih : “May page yih ? Mi ot na ! May wole koy kee ke so' faha' mi ní faha' ra ; mín hen wa yed' ði cér.” ¹⁴ Ndaa séenúu línèh yè koy ka, wa wonu hanndal ki wa tih : “Lamoha abee kan ! Èyí yen hap ði húl, meeya hen bi yen.” ¹⁵ Laha' ri ra, wa yípútée rii ham, d'úhrúté ri meeya, hawute ri húl. »

Tígí daaha, Yéésú won bëewè tih : « Yíkii meeya ay page línèh yí yaa yih ? ¹⁶ Di ay aye ayo, hap wa béeb húl, anti saam i línèh kay, yed' wa meeya. » Keluu bëewè unni yaa ra, wa wonu tih : « Yii baa ðamaayti lah ! »

¹⁷ Yéésú yeelte wa ní antee won tih : « Bíníyúté Téerée bitih : “La'a habuu tabahoh ya biti lahay njiriñ ra daa millé' ham lasa.” ☆

« Unee ke Téerëe baa faha' won yih ? » ¹⁸ Yéésú baatte won tih : « Bëyi baboh la'i baa béeb ay korsa', te la'a keen sun ow ay rii dakaya' . »

Túmí buur
(Saame Maccëe 22.15-22 ;
Marka 12.13-17)

¹⁹ Yúhúu yéeddëh yí kootii Mëyiis a kélfë yí seeyoh ya biti Yéésú yulid' anili baa sun fi wa ra, wa na saamu dee nay wa rii habee wahtii baaha ra, ndaa wa kaañuy bëewë. ²⁰ Tígí daaha, wa koluute olsohi Yéésú, yejute i ow tala. Bëewë nê bën bëndúu, ayuute ti bëewí júbúté nen, na fahuu fiirí Yéésú di won. Wa húmú saamu yii ay mín tah géernëer keen sun fi Yéésú. ²¹ Wa wonu ri tih : « Bahaa, fun yúhúté biti fu wona' kaah : fu yéeddë' yee naha' Koope ra kah-kah. Fu na yeeleeh ow jëmmíi. ²² Kon won fun nda kootii yen ona'te biti Sesaar* yeru túm mbée onaay. » ²³ Ndaa bi yúh Yéésú yee nuffi wa, dí won wa tih : ²⁴ « Téebí sê' héliis hanjar noo. » Yeruu ri hanjara, dí meelte wa won tih : « Netli wa a tii wa daa na ? » Wa wonu ri tih : « Yi Sesaar. » ²⁵ Yéésú won wa tígí daaha tih : « Kon yérí Sesaar yee laha' ri ra, don yed' Koope yee laha' ri ra ! » ²⁶ Wa míníh ríi ham di ñña won dí fii bëewë rë. Yee won dí ra kay éemíl wë

éemílë níi tahte wa lahluy yii wonun wa.

Yii lenke koloh búudé
(Saame Maccëe 22.23-33 ;
Marka 12.18-27)

²⁷ Filoon fi baaha, i sadusen, wa fa wonu biti koloh búudé lahay ra, ayute Yéésú nê, ²⁸ wonu ri tih : « Bahaa, Mëyiis húmú túuycé yen bitih, bëyi húl hel beleb te deef bani belaa liiluyti lahay koy, ñéedë wadtee lam belaa, saamid' bahii tal. ²⁹ Te kíilë, húmú lahte koy-yaay paana : bee baha waa na ra koodte, bani belaa liiluyti lahay koy, dí húlté. ³⁰ Bee ñee na ra koodte belaa, yee kat bahaa ra katte ri. ³¹ Bëyi éeyë fë ñeyilte kotta húlté. Na hen daaha níi wa fi paana ya béeb ñeyute kooda, húlúté te ow lahay na koy. ³² Filoon fe, dí fi belaa tahte bal húlté. ³³ Kon leegi, yiin nay kolee bëewë búudé rë, daa nay lahee belaa waa na te wa béeb koorute ri ? » ³⁴ Yéésú won wa tih : « Bëewë feey fi bee na koorantuu ; ³⁵ ndaa bëewë yénké biti Koope otte biti wa waruttee koloh búudé, wa haal pesa na ac ra, bín fë rëe, wa ii kooranta'. ³⁶ Wa ii míní húl, wa ay madee a malaaka ya. Wa ay hene koyyi Koope, bi nay ri waa kèllé búudé. ³⁷ Biti bëewë húlú rë ay kèllú búudé, Mëyiis tee ba'te na yii lante fili b Téerëe na won dí Koo-Yíkëe fili b dúufë na njaaroh ra biti daa ri

* **20:22** 20.22 Sesaar : Bín fë, bëyi húmú hen buur di Rom béeb dëekúu daaha.

✧ **20:37** 20.37 Saame Kolohi koyyi Israyel Ésip 3.6

“Koope fi Abraham, Koope fi Isaak, Koope fi Yakop” ra. »[☆] ³⁸ Yéésú baatte won tih : « Kon Koope, di Koope fi bëewë húlú rë neh, di Koope fi bëewë na pesu ra ; ndée di dñi na, wa fi éeyë yí yaa béeb lísúu pes. »

³⁹ I ow di yëeddëh yí kootii Mëyíis beyute una tígí daaha wonu ri tih : « Bahaa, wonu ñeete waal. »
⁴⁰ Ow kaañlay rii meelil yin kay.

Buura Koo fal ri ra yi Dawit na ?
(Saame Maccëe 22.41-46 ; 23.1-36 ; Marka 12.35-40)

⁴¹ Yéésú baatte won bëewë tih : « Ow minë' won biti Buura Koo fal ri ra sédí Dawit dñi ? »⁴² Di fi Dawit won filiḅ téerëe laha' yeekaa yi kañaaya ra tih : “Koo-Yíkëe won Yíkú sè' tih : Tooke hëbís sè', ya'i ñamaa fi so' deh, ⁴³ nù bín nëy mú yíssée kaa'oh yu hen tikëe yí kottu ra.”[☆] ⁴⁴ Di fi Dawit dëekë' rí Yíkëe rëe, kon Buura Koo fal ri ra minë' hen sédí dñi ? »

⁴⁵ Bi na síkírúu rí bëewë béeb, Yéésú won taalibe yi tih : ⁴⁶ « Lah mëytii yëeddëh yí kootii Mëyíis, wa fa tilëesúu a búuḅ gaan, te wa fahuu biti wa woduun a ya' ana këemmë rë. Wa tookuu ñaanna këllëh di ilíyyë na daguu yëwúḁḁë Koope ra, te daa wa na dëbúu ñam biti ndaje lah. ⁴⁷ Daa wa lukuu maañ ñañ ndah teeḅa'i affi wa, te añañ, daa wa na beyu alalli

beleḅḅa yaalli wa húlú rë. Daani wa nay lukee misik. »

21

Sarahi belaa yaali húl rë
(Saame Marka 12.41-44)

¹ Filoon fi baaha, Yéésú béyíḁḁé afi, otte i yíkëe alal na beku hélíis ifi saraha filiḅ Faam fi gaani Koope. ² Di otte belii yaala húlḁḁé ḅal, bi ñakke nù ñak, ḅekke na hanjar yutuud ana. ³ Di won tígí daaha tih : « Mee ron won kaaf ka ra ee bitih : saraha yera' ñëkídí bee lahay yaal bee ra, luk yi bëewí kayya béeb lah solo. ⁴ Bëewí kayya béeb yeruu yee lukus alal mi wa ra, ndaa di filiḅ ñagi, belaa yera' iña laha' ri ra béeb, yee waḁ dñi pesaa koon ra. »

Poyi Faam fi gaani Koope a loola na ac fii rë
(Saame Maccëe 24.1-21 ; Marka 13.1-19)

⁵ Lahte bëewí na húmú wonu dee ḁama' Faam fi gaani Koope ra a la' yi wanna tabahuu ri ra, a iñi wunlaa ya hom na, yee jébélú bëewë Koope ra. Yéésú won wa tígí daaha tih : ⁶ « Bis ay lah, iña olu ḁon yee ra béeb ay bëp nù la' ii tikëh sun la' kay. » ⁷ Bëewë meelute ri wonu tih : « Bahaa, yii baaha ay lahe kirih ? Yi nay teeḅee biti yii baa ee saañ lahe ra ? »⁸ Yéésú won wa tih : « Mëytii ! Ow banay ron nofa'. Ow caak ay aya' tii so' won biti daa

☆ 20:43 20.43 Saame Kañaaya 110.1

wa Kiristaa, mbée wahtaa lahte. Ndaa ngënë síkíríi wë. ⁹ Don keloh ban haa' gin a gin a ban tikënté' af raa, ngënë tíítí : iñyaa wadti laha laho paay, ndaa deefa túkkíi éldúnë laheh doom. » ¹⁰ Di baatte won tih : « Gin ay jejoh gin haa', nguur haa' a nguur ; ¹¹ feey fa ay hégiyéh hégiyéh yí misikke, yaab a jérrí na kara' ay haal i ílíy feey fa ; kimtaanni tíitdë'té bal ay olu sun-Koo. ¹² Ndaa balaa yaaha béeb rëe, af so' ay tah don habu don moklu. Don ay kúru, don tēekdú kēem fliβ ílíyyē na dāguu yēwúdfē Koope ra, wa aattiya' ron, don beku kasu. Don ay kúru fíi i buur a fíi i gēernēer. ¹³ Iñyaa ay tah don seede yee yúhú don soo na ra. ¹⁴ Kon yúhí bití don lahuy yíi sídúun don di yee nay ron layee ra, ¹⁵ ndée bín fē rëe, daa mi nay ron teebe yee nay ron wonee ra, a nufa nay ron rii wonee ra, níi ow yínë sah di kaa'oh yon ii naa mín yin te wa ii ron mín lof. ¹⁶ Baappon sah a yaayyon, koy-yaayyon, mboko yon a kooyyon ay ron yaay ; i ow don na ay hawu húl. ¹⁷ Af so' ay tah bëewë béeb kaa' don. ¹⁸ Ndaa karal fen yínë sah ii kanoh affon. ¹⁹ Lah hēbí híin, don ay múcée daaha. ²⁰ Tíl níi don ot i soldaar giw Yerusalem raa, lah yúhí bití poyi gina lebohte.

²¹ « Tígí daaha, bëewë nay home Yúdee rë heguun danjin, bëewë nay home

Yerusalem ra wuloh, te bëewë nay home luufin ra banti haal gina. ²² Waalli yaaha, Koope ay keen sun fi bëewë, ti dee bíníyúu iña fliβ Téerëe rë béeb nen. ²³ Mas belebba nay poke loo bín fē rë a yee nay bëpiré rë ! Ndee bëy gina béeb ay mok níi mok, ndah Koope ay teeβa' neebi. ²⁴ Wa ay hawu húl a jépíl, wa habu ñaam hasлуу fliβ ginni kayya béeb, te bëewë yēwúdf neh ra ay togisa' Yerusalem níi wahtii wa lah. »

Nimili Koy-bëe'

(Saame Maccëe 24.29-35 ; Marka 13.24-31)

²⁵ Yéésú baatilte won tih : « Ay lah iñi ay tíinnúu na'a, céyín fē a hulla na. Húní mboowaanna kási fē ay tah affi bëewë feey fa béeb kúnëh pak ; ²⁶ doole ya sun béeb ay bēlkísēh. Ay lah bëewí tíit níi maanndee húl ndah níbí yee nay lahe feey fa ra. ²⁷ Tígí daaha, bëewë ay ot so' mi Koy-bëe' mi aye fliβ nér, mi ñéerë' a doole a ndam gaan. ²⁸ Don ot iñyaaha dale lah rek, lah kēlíi don seh, don yúh bití leŋ ron múc. »

²⁹ Filoon fi baaha, Yéésú ñeyaatte wa léeh won tih : « Èlsíi tal kilik : ³⁰ don ot dī capuse rek, don yúh bití lee ri lah koy. ³¹ Ti daaha nen, don ot iñyaaha lahe raa, lah yúhí bití Nguur ki Koope lebohte. ³² Mee ron won kaaf ka ra ee bití bëy jamanii bee ii múk te

iñyaaha béeb laheh* . ³³ Sun a feey ay múk, ndaa unni so' ii mēssí múk. »

³⁴ Yéésú baatte won tih : « Cégí affon ! Keeññon banay dérkís ñammi nebba, hani misiga a iñi feey fi beh, toñeh bisí baa ay ron beet-tiye. ³⁵ Di na haba' mbëp yak nen, yii baa ay beet-tiye bēewē feey fa béeb daaha. ³⁶ Cégí affon, don dage Koope faraah, nda don mín lah doolii múcúun don iña nay lahe yaa ra béeb, te don mín cañ fii so' mi Koy-bēe' . »

³⁷ Yéésú enda' yēeddē' filif Faam fi gaani Koope ; ndaa fíniin lah raa, dī saya' sun fi dañi Ēlíiffē dī nee' na. ³⁸ Te Koo yíil baab cúb rēe, bēewē béeb ayuu Faam fi gaani Koope síkirée rí.

22

Cañi Yudaas yaayi Yéésú
(Saame Maccēe 26.1-5, 14-16 ; Marka 14.1-2, 10-11)

¹ Feedi mbúurú njeñe ya na wonuu Paak ra ee sañ lahe ra. ² Kélfē yí seeyoh ya a yēeddēh yí kootii Mēyíis na saamu nufa nay waa hawee Yéésú húl rē, ndaa wa kaañuy bēy gina.

³ Tígí daaha, Seytaane haalte Yudaas fa na wonuu Iskariyot te non taalibe yi sabboo a ana ya ra. ⁴ Daaha, Yudaas yíppée pay kélfē yí seeyoh ya na a kélfē yí wohoh yi Faam fi gaani Koope, wa peenute dee nay ri waa yaayee Yéésú rē.

⁵ Keeññi wa sosse níi sos, wa gapute ri héliis. ⁶ Yudaas tahte yee wonu wa ra, na anti saam wahtaa nay rii damaalee Yéésú níi ri yaay wa ri, te ow yégéh rē.

Millēeni Yéésú reer a taalibe yi

(Saame Maccēe 26.17-30 ; Marka 14.12-26 ; Sañ 13.21-30 ; 1 Korente 11.23-25)

⁷ Filif feedi mbúurú njeñe ya, bisa na hawuu har fi Paaga ra lahte. ⁸ Yéésú wolte Peer a Sañ won wa tih : « Tíli don waaye reeri Paaga. » ⁹ Wa wonu ri tih : « Fu faha' bití fun waayuun dī tígí dih ? » ¹⁰ Di won wa tih : « Síkiríi ! Don haale gina raa, don ay tee'a' a ow yaal kúf pen muluḅ. Lah ñéyí tala níi faam fa nay rii haale ra. ¹¹ Don lah na raa, wēní yíkii faam fa tih : “Yēeddēhē daa nah fun meel ro lasa nay ñamee bani taalibe yi reeri Paaga ra.” ¹² Hen daaha raa, dī ay ron teeḅ lasi gaani paa' sun, bi yugusute níi wocce : yii nay yen sohlee béeb ín nē. Don ay waayee reeri Paaga daaha. » ¹³ Peer a Sañ suute, wa deefute iña béeb ti dee húmú wona' wa Yéésú rē nen. Daaha, wa waayute reeri Paaga.

¹⁴ Laha' wahtaa ra, Yéésú a apootarri goorute na reeru. ¹⁵ Di won wa tih : « A dee faha' mi bití yen bok reeri Paagi bee ra, balaa wahtaa nay mii mokluu ra lah ! ¹⁶ Mee ron won da ee bitih : mii ñamil reeri

* 21:32 21.32 Yerusalem poo kíil sabay iniil (40) filoon fe.

Paaga ní iti fi teebuu Nguur ki Koope. » ¹⁷ Di bebpe kaas bééñ tígí daaha, símpé Koope won tih : « Béyí bééñí yeh, don wora' wa hanndal kon ; ¹⁸ te mee ron won ra ee : dala'te woteh, mii hanil bééñ ní bín nay ayee Nguur ki Koope ra. » ¹⁹ Filoon fi baaha, dí bebpe mbúurú, símpé Koope, lecsa'te ri, yedte taalibe yi won wa tih : « Mbúuríi bee faan so', af ron tah mi yera' ri. Lah pégí yii beh, nérséhí sè'. » ²⁰ Reeruu wa níi wocce ra, dí yedte wa kaasi bééñé bal, won tih : « Kaasi bééñí bee daa yii hasa pokalsa' Koope a béewë ñeya'te ri ñif mi so' ra. Wa ay keen ndah don. ²¹ Yúhí biti bée' nay soo yaaye ra, funi daa boku loon ee. ²² Kaah biti so' mi Koy-bée' mi wadtee húl ti di faha' ri Koope ra nen ; ndaa mas bée' nay soo yaaye ra ! » ²³ Tígí daaha, taalibe ya na meelantuu bée' nay page yii baa filiḅ fi wa ra.

Bée' lukki gaan ra

²⁴ Filoon fi baaha, taalibe ya yefuute taasanta'i misikke hanndal ki wa, fahuu yúh bée' wadti habuun biti daa ri lukki gaan waa na ra. ²⁵ Yéésú won wa tih : « Buurri ginna daa na nootu béewí kayya, kélfé yë saame tii sun fi béewë. ²⁶ Ndaa don waruy hena' daaha. Bée' lukki gaan don na ra kay, wadti habaa afi bée' lukki yin da ; bée' nè túuyë' rë wadti habaa afi súrgíi béewë bééḅ. ²⁷ Daa

lukki gaan hanndal ki bée' took na ñam ra a súrgëe tíkíd dí loona ra ? Di bee na ñam ra neh a ? Añcañ, mi man súrgë don na nen ! ²⁸ Don fi yeh, don mësúy sëe hel na moklu so' béewë rë. ²⁹ Di yera' so' Baaso' Nguur ka, mi yera' ron ri daaha bal : ³⁰ yen ay bok ñam a han Nguur ki so', te don ay took ñaani Nguur ka, don ílíf talli sabboo a ana yi Israyel. »

Woni Yéésú biti Peer ay taasa' yúhí

(Saame Maccëe 26.31-35 ; Marka 14.27-31 ; Sanj 13.36-38)

³¹ Filoon fi baaha, Yéésú won Peer tih : « Simon, síkírëh sè' ! Seytaane danke nda ri mín rën hégíy ti di na níikë' beleḅ nen. ³² Ndaa mi dagidte ro nda fu ban soo súugëh. Te fu nimil soo na raa, lah one koy-yaayyu ya'. » ³³ Peer won dí tih : « Yíkëe, tígë nay fuu bekuu kasu ra, may naa beku ; fu hawun húl, may naa hawu. » ³⁴ Yéésú won dí tih : « Mee roo won da ee Peer : fiisiin ki paan, fay taasa' biti fu yúh sè' níi hen waal éeyë. »

Woni Yéésú taalibe yi biti wa koloh affi wa

³⁵ Yéésú antee waa won bééḅ tih : « Wola' mi ron, don suute, don kúrúy hélíis, don kúrúy nafa a ñafad ra, don ñakute yin a ? » Wa wonu ri tih : « Fun ñakuy yin. » ³⁶ Di won wa tígí daaha tih : « Iña lofisohte ! Dala'te woteh, béyí lah hélíis kúrë, béyí lah nafa

kúrë ; te bëyí lahay ganaay wadtee yaay sabidoori lom yínë. ³⁷ Yúhí bití Téerëe won sun fi so' tih : “*Di kídëelúuté bëewí bossa na.*”^{*} Mee ron won ða ee bití yíi baa wadfi laha laho, te ri lahte níi wocce. » ³⁸ Taalibe ya wonu tih : « Yíkëe, jépíl ana ayee ee ! » Yéésú won wa tih : « Wona d'úmpé ! »

Danji Yéésú sun fi danji Èlúffë
(*Saame Maccëe 26.36-46 ; Marka 14.32-42*)

³⁹ Yéésú antee koloh saañce danji Èlúffë ti merees nen, taalibe yi ñeyute tali. ⁴⁰ Lahuu wa dín fë rë, ðí won wa tih : « Dëgí Koope toñeh ðon ay keene fíirí Seytaane ! » ⁴¹ Di helte wa daaha hécëhté yutuud, yekke na ðañ Koope ⁴² won tih : « Baap, hém neba' ro, éccíré gulií coono fi bee wuloh so' ! Ndaa di mín ðíi man béëb, yee nay lahe ra ðanan hen yee faha' mi ra, ndaa bee faha' fu ra. » ⁴³ [Tígí daaha, malaaka di malaaka yi Koope céppé hílíbí. ⁴⁴ Keeña d'úmpé ces, ðí na ðaatti ðañ. Di opa' opoo níi opa'a man ñif nen, na síit feey.] ⁴⁵ Woca' ri ðaña ra, ðí kolohte, nimilte taalibe yi na. Di deef wa súfúnú súfúñë níi wa na nee'u, ⁴⁶ ðí won wa tih : « Don nee'u yih ? Kélíi ðon ðañ toñeh ðon ay keene fíirí Seytaane ! »

Hami Yéésú
(*Saame Maccëe 26.47-56 ; Marka 14.43-50 ; Sañ 18.3-11*)

⁴⁷ Yéésú hom wona, lahte dúukélí bëewí ayute, ñéerúuté a Yudaas fa non taalibe yi sabboo a ana ya ra. Yudaas lebohte Yéésú, na faha' fëení. ⁴⁸ Yéésú won ðí tih : « Yudaas, fu yahti ac yaayi so' mi Koy-bëe' rëe, fay soo fëené fëené è ? » ⁴⁹ Bëewë ñéerúu a Yéésú rë, oluu wa yee na saañ lahe ra, wonu ri tih : « Yíkëe, fun bëb jépíllí fun, fun yejoh wa haa' a ? » ⁵⁰ Tígí daaha, ow yínë waa na paanke súrgíi seeyohi gaana jépíl, lecce nufi ñamaa fa. ⁵¹ Yéésú won wa tih : « Yéðdí ! Topaa baaha ! » Di lebbe nuf bëe', nufa wahte. ⁵² Di na anti won a kélfë yí seeyoh ya, kélfë yí wohoh yi Faam fi gaani Koope, a baha ya gina ayu hami ra tih : « Don ayuu yi deeha a jépíl a i duud hami so' man mi banndi nen ? » ⁵³ Mi húmú homa' ðon na faraah filíð Faam fi gaani Koope, te ðon kaañuy soo ham. Ndaa wahtoon daa lah, elga onuu Seytaane doole sun fi so' ra. »

Taasa'i Peer yúhí Yéésú
(*Saame Maccëe 26.57-58, 69-75 ; Marka 14.53-54, 66-72 ; Sañ 18.12-18, 25-27*)

⁵⁴ Wa habute Yéésú, kúrúté rí faam seeyohi gaana. Peer húmú filoonaa filoon, ñeete talli wa. ⁵⁵ Lahte bëewí kéd'úuté kíi filíð faam fa, tookute na yoonnduu. Peer acce,

* 22:37 22.37 Saame Isayii 53.12

tookke waa na. ⁵⁶ Lahte belii légéyë' faam fa otte Peer niñni kii kë, yíidté rí ní won tih : « Bëyí bee bal non bëewí. » ⁵⁷ Ndaa Peer taasa'te won tih : « Mi yéeh bëe' na wona' fu ra yaa ow ! » ⁵⁸ Tíkëh yutuud, ow kay otte ri, won tih : « Do bal fu non bëewí. » Peer won dī tih : « Mi noneh na dé' ! » ⁵⁹ Hente kiis, ow kay ayilte, digidte uni won tih : « Lahte il bal ! Bëyí bee non bëewí ; ndah dī bëy Galile. » ⁶⁰ Ndaa Peer won dī tih : « Mi yéeh yee na won fu ra do ! » Di hom wona, na mín rii lúsííd dē paan fiisohte. ⁶¹ Yíkëe yíssëhté Peer na, yeelte ri. Tígí daaha, Peer nérsëhté yee húmú won dī Yíkëe rē bití fiisiin ki paan, dī ay taasa' bití dī yúh rí ní hen waal éeyë. ⁶² Di antee dūh éssín na looy looyi misikke.

Dalaani mogi Yéésú

(Saame Maccëe 26.67-68 ; Marka 14.65)

⁶³⁻⁶⁴ Bëewë në húmú wuhu Yéésú rē pokute illë, na labisuu ri, na ñaawlu ri, meelute ri wonu tih : « Fu yonente saa bal ? Wone bëe' lab do ra ! » ⁶⁵ Wa wonute ri i won bos kay caak.

Tëekrí Yéésú këemí yëwúddë

(Saame Maccëe 26.59-66 ; Marka 14.55-64 ; Sañ 18.19-24)

⁶⁶ Yíilë' Koo ra, baha yi yëwúddë, kélfë yí seeyoh ya a yëeddëh yí kootii Mëyiis tee'uute, tëekrúté Yéésú këem, ⁶⁷ meelute ri wonu tih : « Won fun nda daa fu

Buura Koo fal ri ra raa. » Di won wa tih : « Mí won don bití daa mí, don ii soo gém, ⁶⁸ te mi meel don, don ii soo tiil. ⁶⁹ Ndaa, kola'te woteh, so' mi Koy-bëe', may took hëbís Koope fa mín bëeb rë, mi hom ya'i ñamaa fi. » ⁷⁰ Wa bëeb wonu tih : « Kon fu Koy Koope a ? » Di won wa tih : « Don wonute ri, daa mí ! » ⁷¹ Wa wonu tígí daaha tih : « Yen ay pagilee seede yih ? Di dūhídté rí búkí ní wocce ! »

23

Kurí Yéésú fii Pilaat

(Saame Maccëe 27.1-2, 11-14 ; Marka 15.1-5 ; Sañ 18.28-38)

¹ Bëewë bëeb koluute, kúrúté Yéésú Pilaat gëernëerë në, ² na yabu ri iñyee wonu tih : « Di homa' daaha beke bëy gina nuf, kaddee wa yera' túm, te ri tík afi Buura Koo fal ri ra. » ³ Pilaat meelte Yéésú won dī tih : « Daa fu buuri yëwúddë è ? » Yéésú won dī tih : « Fu wonte ri, daa mí ! » ⁴ Pilaat won kélfë yí seeyoh ya a bëewí kayya húmú në rē bëeb tih : « Mi olay yii mín tah ow keen sun fi bëyí beh. » ⁵ Ndaa bëewë baatutee bëyííd unni wa sun na wonu tih : « Di ñeya' yëeddë' yí, yahe nuffi bëewë. Di dala' Galile, ñeete Yúdée bëeb ní rí lahte dee woteh. »

⁶ Kela' Pilaat unni yaa ra, dī meela'te won tih : « Di bëy Galile woo ? » ⁷ Bëewë wonu ri tih : « Di dék në kay ! » Pilaat yúhté bití Erot daa

ílíf Galile fi baaha, te dī fi Erot húmú Yerusalem waalli yaaha, dī yeelte yeñ bēewē kúd Yéésú dīi na.

⁸ Ola' Erot Yéésú rē, keeña sosse níi sos, ndah ri húmú kelohte ban fi, te ri maañcee faha' oli. Di faha'te rii ot page kimtaan. ⁹ Di meelte ri yin caak, ndaa Yéésú tahay búkí dīi na. ¹⁰ Kélfē yí seeyoh ya a yēeddēh yí kootii Mēyúis digirute unni wa na yabu Yéésú yin caak. ¹¹ Erot a soldaarri bal na ñaawlu Yéésú, bēkute ri búubí wunte na kēekkēllyú rí. Filoon fi baaha, Erot yejaatte ri Pilaat na. ¹² Erot a Pilaat na húmú tēfrēntíih kíi, ndaa dala'te yiin fin fa wa henute kooy.

Tígí Yéésú húl

(Saame Maccēe 27.15-26 ; Marka 15.6-15 ; Saŋ 18.39 níi 19.16)

¹³ Pilaat dēekrēhté kēlfē yí seeyoh ya, baha ya a bēy gina, ¹⁴ won wa tih : « Don wonu ti bēe' komu ron so' bee ra yaha' nuffi bēy gina yahoo. Mi meela' ri fiyēn, ndaa mi olay yin di iña yabu ron dī ra. ¹⁵ Erot bal daaha, daa tah dī yeñ ri soo na. Bēyí bee pagay yii cal dī hawu húl. ¹⁶ Cēe mi labiroh ri laraw, mi yeris ri. » [¹⁷ *] ¹⁸ Ndaa wa bēeb na dāañjuu wonu tih : « Hawe ri húl, fu dúhrícf fun Barabaas. » ¹⁹ Di fi Barabaas húmú non bēewē na haa'uu njíttí gina ra, te ri húmú

happe ow húl bal, daa tah ri téyú kasu.

²⁰ Bi faha' Pilaat yedfí Yéésú, dī beyaatte una, woni biti Yéésú pagay yin bos. ²¹ Ndaa bēewē baatutee dāañjoh na wonu tih : « Daaye ri kurwah bal ! Daaye ri kurwah ! » ²² Pilaat beyaatte una waali éeyē fē won wa tih : « A ri paŋ yii bosí bih ? Mi ollay ri yii cal hawaa húl. Cēe mi labiroh ri laraw, mi yeris ri. » ²³ Ndaa wa na baatuu dāañjoh na wonu tih : « Daaye ri kurwah bal ! Daaye ri kurwah ! » Dāañjohi misiga kúreelēhté Pilaat ²⁴ níi ri tahte pagri wa yee fahuu wa ra. ²⁵ Tígí daaha, Pilaat dúhídfé Barabaas fa fahuu wa biti daa yedfūn ra, dī fa yahi nuffi bēewē a hap ow húl daa húmú tah ri téyú rē, yedfá'te wa Yéésú.

Kúrí Yéésú tígē nay rii hawuu húl rē

(Saame Maccēe 27.32 ; Marka 15.21)

²⁶ Na kúru soldaarra Yéésú tígē nay rii hawuu húl rē, wa tee'uute a bēyí dék Siren, hínú Simoŋ, deef dī kola' meey. Wa habute ri, enute ri kurwaha, ñeyrúte rí filoon Yéésú. ²⁷ Ow caak ñeyute filoon Yéésú. Beleb caak húmú filib fi wa, na fogu ri na hawuu. ²⁸ Yéésú yíssēhté waa na, won wa tih : « Don fi belebfi bēy Yerusalem, ngēnē lēeyí

* **23:17** 23.17 Bēewē húmú ñeyaatu unni yee bín fē wora'i wa bēewē rē, lahte na yi húmú bíníyú yii beh : Lahaa feedi Paak bēeb, Pilaat wadtee dúhrícf bēy gina ow yínē kasu, yeris ri.

sè', lëeyí affon a koyyon !
²⁹ Jamanu ay lah, bëewë won tih : "Lahute sos-keen, belebba mínih pok loo ra, yee mësúy lah koy, yee mësúy kúu rë !" ³⁰ Tígí daaha, bëewë ay nah danja keen sun fi wa, won dúññë súuy wë.* ³¹ Kilik hilsid daa míntí henu dee raa, mas kilik sùhíd ! »

³² Soldaarra kúrëelúuté banndi ana bal, yi ay hawu húl a Yéésú.

Daayi Yéésú kurwah

(Saame Maccëe 27.33-44 ; Marka 15.22-32)

³³ Lahuu wa tígë në wonuu Këeñ-af ra, wa daayute Yéésú kurwah. Wa daayaaluute banndi yi ana ya bal : bëyí yínëe paa'te Yéésú ya' ñamaa, yínëe paa'te ri ya' sugu. ³⁴ Yéésú won tígí daaha tih : « Baap, baale wa, ndée wa yíih yee na pagu wa bee ra. » Soldaarra púlúfuté búubbí Yéésú, woruute wa hanndal ki wa. ³⁵ Bëewë cagute na olsuu. Kélfë yí yëwúddë na ñaawlu Yéésú wonu tih : «

Di sëmlëey i ow kay woo ? Di sëmlëe afi bal hena biti daa ri Buura Koo fal ri ra kaah ! » ³⁶ Soldaarra na ñaawlu ri bal. Wa beyute bineegar, lebuute ri na fahuu hënní, ³⁷ wonu ri tih : « Hena biti daa fu buuri yëwúddë rëe, sëmlëe afu ! » ³⁸ Wa biníyuté unni yee yeedda' ki afa sun : « Bëyí bee daa buuri yëwúddë. »

³⁹ Banndii yínëe hom sun fi kurwahi, na sol Yéésú won

dí tih : « Fu won neh daa fu Buura Koo fal ri ra a ? Sëmlëe afu, fu sëmlë' fun na bal ! » ⁴⁰ Ndaa banndii yínëe na won afa tih : «

Do fu kaañce Koope dé' ! Doni bëyí bee daa boku daan ee. ⁴¹ Bi yen wadte : yen yínlu ñna pagu yen ña kat ! Ndaa dí fi bee pagay yin bos. » ⁴² Di antee won tih : « Yéésú, lah hele nuf soo na biti fu took Nguur ku. » ⁴³ Yéésú won dí tih : « Mee roo won kaaf ka ra ee : woteh fee Koo beh, fay home soo na Aljana. »

Húlí Yéésú

(Saame Maccëe 27.45-56 ; Marka 15.33-41 ; Sañ 19.28-30)

⁴⁴⁻⁴⁵ Laha' na' leelu af ra, gina béeb ñúussé túd níi mitte wahtu éeyë. Rídií bídí Faam fi gaani Koope ñap tígí selaa níi sela ra, ñadte dala'te sun níi feey, bíselé'té ana. ⁴⁶ Yéésú ñaasse fon tígí daaha won tih : « Baap, mi tíkké coonaa fi so' ya'u. » Wona' ri unni yaa níi wocce ra, dí yeddohte lússé. ⁴⁷ Ola' kélfíi soldaara yee lah ra, dí kañce Koope won tih : « Bëyí bee bëyí júbpé kaah ! » ⁴⁸ Oluu bëewë maasuu ra yee lah ra, wa tikuté ya' yi wa affi wa na looyu na nimilu faam. ⁴⁹ Kooyi Yéésú béeb cagu hanndal na olsuu yee lah ra. Belebba húmú ñéerúu a Yéésú dala'te Galile ra húmú filib fi wa.

* 23:30 23.30 Saame Oose 10.8

Haji Yéésú

(*Saame Maccëe 27.57-61 ; Marka 15.42-47 ; Sanj 19.38-42*)

⁵⁰⁻⁵¹ Lahte bëyi dék Ari-mate di Yúdée, hínú Suseef, di non baha yi bëy këemí gaani yëwúddë. Di bëyi baahte te júbpé, te ri na húmú sehaaloh ayi Nguur ki Koope. Húlë tíkú baha ya Yéésú rë, di ñéerëey në. ⁵² Di payte Pilaat na meelte ri búudé fi Yéésú. ⁵³ Tahra' ri Pilaat ra, di nuulidte búudé fë kurwaha, líwté rí perkal, kúdté rí dappe ri kolom ki yotu loo la', bi yéjké bití búudé hëcđúy në. ⁵⁴ Wahtu ya tas balaa bisa na hílsúu yëwúddë rë lah caaklilay. ⁵⁵ Belebba na húmú ñéerúu a Yéésú dala'te Galile ra, ñeyute tal Suseef, wa olsuute nuḡa, olute dee fëndúu búudé fi Yéésú rë. ⁵⁶ Wa nimilute faam, waayute i yin heeñlaa a laakkoloñ, yugusii búudé fë. Laha' bisi hílsëe rë, wa hílsúuté ti di túuyúu rí nen.

24*Kolohi Yéésú búudé*

(*Saame Maccëe 28.1-10 ; Marka 16.1-8 ; Sanj 20.1-10*)

¹ Dímeesë, belebba koluute miir-miirin, kúrëelúuté iñi heeñlaa ya húmú waayu wa ra, suute tígë hacuu Yéésú rë. ² Lahuu wa ra, wa olute bití la'a húmú kúnúu búk luuya ra pínjúté hatin. ³ Wa haalute, wa deefuy na búudé fi Yéésú-Yíkëe, ⁴ affi wa kúnëhté. Ow ana

yi bekuu búuubbí na tak feeñiyuute wa tígí daaha. ⁵ Belebba tíitúté, líhúté púkkí wë feey. Bëewë wonu wa tígí daaha tih : « Bëyi ee pes da saamu dí filib bëewë húlú rë ? ⁶ Yéésú iníh në, di këllúté búudé. Nérsii yee húmú won dí ron homa' ri Galile ra bití ⁷ di fi Koy-bëe' wadtee yaayu bakaaroh ya, di daayu kurwah, waali éeyë fë filoon fi húlí dí koloh búudé. » ⁸ Tígí daaha, wa nérsúuté unna húmú won Yéésú rë.

⁹ Belebba koluute lu-uya daaha suute, bíllúté iñyaaha béeb apootarri sabboo a yínë yë a bëewí kayya na húmú ñéerúu a Yéésú rë béeb. ¹⁰ Belebba yaa húmú Mari fi bëy Makdalaa, Saan, Mari yaafi Saak a i beleb kay. Bíllúu wë apootarra ra, ¹¹ wa habuu bití belebba yíih iña na wonu wa ra, tahte wa gémúy wë. ¹² Filiḡ fi baaha, Peer nampee múkë luuyin. Laha' ri yérëntëhté rë, di deef na boyya kut. Di nimilte faam éempé ní éem di yee lah ra.

Feeñiyohi Yéésú taalibe ana di waali Emayus

(*Saame Marka 16.12-13*)

¹³ Yiin fi baaha, lahte taalibe ana yi na suu gina na wonuu Emayus ra, bi hécëhté a Yerusalem yii mitte tíl wahtu ana, ¹⁴ na gonlu sun fi iña lah ra béeb. ¹⁵ Wa homu gonla unni wa na béyrëh sun, Yéésú dabpe wa waala ñéerë'té a wa. ¹⁶ Wa olute ri, ndaa lahte

yii úmpé wë níi wa yúhsúuy rí. ¹⁷ Di won wa tih : « Don gonlu yi waala ? » Wa yípútée caṅ, kanammi wa sáfúñcé níi sáfúñ. ¹⁸ Ow di waa na hinú Kelewofaas won dī tih : « Doni afu kut di Yerusalem daa yíih yee lah waalli yee ra maan ? » ¹⁹ Yéésú won wa tih : « Baaha yi daaha ? » Wa tahute wonu tih : « Fu kelaay yee kat Yéésú fí bēy Nasaret ra a ? Di hómú yonentii lahte sañ-sañ di pagad a wonad fii Koope a fii bēewē bēeb. ²⁰ Kélfē yí seeyoh yi yen a njiitti yen kúrúte rí faam buur, dī aattiyuute húl, daayute kurwah. ²¹ Fun lahute yaakaar biti koon daa ri nay sémlee Israyel ; ndaa see' ! Di filib fi baaha, iñyaaha lahte hente waal éeyē woteh te ow olay yin. ²² Añcaṅ, i beleb di fun na éemiluté fun. Wa payu luuyin miir-miira oroh, ²³ wa oluy búudé fí Yéésú, wa ayute bílluté fun biti i malaaka feeñiyuute wa, wonute wa biti dī ee pes da. ²⁴ Filoon fe, i ow di fun na payute, olute biti iña wonu belebba ra bēeb lahte. Di fi Yéésú nék, wa oluy ri ! » ²⁵ Yéésú won taalibe yi ana ya tígí daaha tih : « Lúh-nuffi yeh ! Don gémúy iña wonu yonente ya ra gémē doom a ? ²⁶ Buura Koo fal ri ra wadtee ñee coono fi bah, anti haal ndami. » ²⁷ Di na an waa poysiid iña bíníyú sun fi ra bēeb, dala'te kootii Mēyíis, ñeete tééré yē bíníyú yonente ya ra bēeb.

²⁸ Tíluu wë níi wa lebuute gina na suu wa ra, Yéésú na bēnbēndēh baret, ²⁹ ndaa wa caguute ri wonu tih : « Fu saañ dih ? Tase fun na deh ! Na'a yēellēhté te Koo ee saañ elke ra. » Tígí daaha dī ñéerē'té a wa, wa suute faam. ³⁰ Wa tooku reer, Yéésú beḅpe mbúurú símpé Koope, lecsa'te ri yedte wa. ³¹ Affi wa kúnsēhté tígí daaha, wa yúhsúuté rí. Ndaa ri hente mes, wa olluy ri. ³² Wa na wonantuu hanndal ki wa tih : « Yii baa daa tah keeñni yen sos níi sos na won dī a yen waala, na poysiid yen iña bíníyú Téerēe rē ! »

³³ Wa yípútée koloh, nimilute Yerusalem. Lahuu wa ra, wa deefute apootarri sabboo a yínē yē a bēewē nē ñéerúu a wa ra tee'uute. ³⁴ Wa wonu taalibe yi ana ya tih : « Yíkēe kēlluté búudé kaah ! Di feeñiyohete Simon. » ³⁵ Wa fi ana yi yaa bal bílluté wë yee lah waala ra a dee yúhsúu wë rí na lecsa' ri mbúurēe rē.

Feeñiyohi Yéésú taalibe ya

(Saame Maccēe 28.16-20 ; Marka 16.14-20 ; Saṅ 20.19-23 ; Tíledí apootarra 1.6-11)

³⁶ Taalibe yi ana ya homu wona, Yéésú hente jalañ fii wë bēeb, won wa tih : « Cēlirí yaawe ! Hēmii jaamma ! » ³⁷ Ndaa wa tíutú tíitē níi affi wa kúnēhté ; wa habuu biti koon yaa yébitēh. ³⁸ Yéésú won wa tih : « Don tíutú yih ? Haala' yi níi don na lahu nuf ana ? ³⁹ Èlsii

ya' yi so' a kotti so' : yaa so' kay ! Lébí faan so' don olsoh ! Yébitèh na lah bo' faan ti so' nen a ? » ⁴⁰ Wona' ri wa iñyaa ra, di teefpe wa ya' yi a kotti. ⁴¹ Sosi keeña a éemè homuu wa ra, tahte wa mínih rii gém doom. Tígí daaha, di meelte wa won tih : « Don lahute yii ñamun dee a ? » ⁴² Wa yerute ri koy jén hütú. ⁴³ Di beefpe jéné ñampe ri fii wë.

⁴⁴ Di antee waa won tih : « Húmú homa' mi leeloon ra, mi wonte ron unni yeh : “Iña wonu sun fi so' filiḅ kootii Mëyíis a tééré yí yonente ya a Téeríi kaña ya ra béef wadtee lah.” » ⁴⁵ Tígí daaha, Yéesú pañke ní affi wa kúnséhté, wa yúhuté yee won Téerée rë. ⁴⁶ Di won wa tih : « Bíníyúté biti so' mi Buura Koo fal ri ra, mi wadtee mok ní mok, te waali éeyë fë filoon fi húlí sè', may koloh búudé. ⁴⁷ Te dala'te Yerusalem, heetta èldúnë béef warutee waariyu di tii so', wa lof pesad Koope baal wa bakaadfi wa. ⁴⁸ Don daa seede yi so'. ⁴⁹ Te so' mi beh, may cépídf sun fon Ruuh-Pesen fa húmú gap don Baaso' ra. Don nék, ngënë kéli Yerusalem dee ní doolaa nay kolee sun ra cép don na. »

⁵⁰ Filoon fi baaha, Yéesú kúdté wë waal Betani, béyídté ya' yi na barkel wa. ⁵¹ Di hom barkeli wa na taka' a wa, Koo béyídté rí kúdté rí hëbísí sun. ⁵² Wa fi taalibe ya jaamiyuute ri anutee nihil Yerusalem,

keeññi wa sosse ní sos. ⁵³ Faraah wa homuu filiḅ Faam fi gaani Koope wa simé rí.

Uni Neba bíní Sanj ra Kúnsëe

Di baahi janjaa Sanj fa non apootarri sabboo a ana yi Yéésú rë daa bíní téeríi Uni Nebi bee, ndaa biti daa ri bíní rí wonuy filiḅ. Di fi Sanj nék, bíníté iñi yéŋké biti Marka a Maccëe a Lúkkë bíníyúy wë, ndaa iña wonu wa ra caakke yi daa wa bok mante (1.19-28 ; Saame Maccëe 3.1-12 ; Marka 1.1-8 ; Lúkkë 3.1-8).

Sanj wonte biti Yéésú daa Un Koope, te Una a Koope daa mësúu hom. Uni baa daa ac dékké a bëewë, onte bëewë gémú dñi na ra níi wa henute koyyi Koope (1.1-18). Di wonte biti Yéésú daa bëe' Koope wol ri ëldúnë rë (6.29 ; 17.3).

Filiḅ téeríi beh, Yéésú wonte biti daa ri ñama na ona' pes da (6.35), daa ri níiñi ëldúnë (8.12), daa ri waala, daa ri Kaaf ka, daa ri na ona' pesa (14.6), daa ri níirëhí kah-kah fa (10.11).

Sanj wonte sun fi :

- yii lenke iñi éemílë' yë paŋ Yéésú teeḅa'i biti daa ri Koy Koope ra (2.1-11 ; 4.46-54 ; 6.1-21),
- yii lenke tee'a'i Yéésú a Nikodem (3.1-21),
- yii lenke belaa dék Samari ra (4.1-42),
- yii lenke lëfëñídë Betsataa (5.1-18),

- yii lenke bëe' límúu búumíd dë (9.1-7),
- yii lenke wahtaa nay kolee Yéésú feey fi bee saañ deefri Boffa ra (14.28 ; 16.5-11),
- yii lenke biti bëyí fi faha' yúhí Boffa ñeya' Yéésú në, ay rii yúh rë (14.6 ; 16.26),
- a yii lenke daŋa d'agid' dñi taalibe yi, déŋéenté wë Boffi ra (17.1-26).

Bëyí fi jaŋi téeríi bee béeb ay ot biti ow mínéh yúh Boffa te ri ñeyeeh Yéésú në, dñi fa daa Koy ka ra. Bëyí fi ot Koy ka, otte Boffa.

Bëe' na wonuu Una ra

¹ Dalaana deef Una na ; Una a Koope daa húmú, te dñi fi Una Koope. ² Una a Koope daa húmú dalaana. ³ Koope ñeya' dñi na, sakke iña béeb ; lahay yii sakute te ñeyay dñi na. ⁴ Pesa hom dñi na, te pesi baa daa níiñi bëewë. ⁵ Niiña na d'ad' ñúusë, ñúusë habay ri.

⁶ Koo húmú wolte bëyí hínú Sanj*. ⁷ Sanj acce seedii níiña, nda dñi mín tah bëewë béeb gém. ⁸ Di a faanaŋ fi, dñi níiña neh ; seedii níiña daa tah ri koloh. ⁹ Niiñi bah, daa níiñi kah-kah fa yéŋké biti ac ëldúnë níiñi bëewë béeb rë.

¹⁰ Una húmú ëldúnë. Koo ñeya' dñi na sakke ëldúnë, añaŋ, bëy ëldúnë yíih rí. ¹¹ Di ac mboko yi na, ndaa mboko yi síkírúuy rí. ¹² Añaŋ, kaa'eeh

* 1:6 1.6 Sanj fa na wonuu dee ra daa ri Sanj Batis.

lahte b̄ewí síkirúuté rí, te gémúte rí. Te dī onte b̄ewí yaa béeb̄ ní wa henute koyyi Koope. ¹³ Wa henuuy koyyi Koope di pagad̄ yaal a beleb̄. Di yii ow daa faha' ri neh bal. Ēe-ēe' ! Koo daa paṅ ní wa henute koyyi.

¹⁴ Una hente ow, dī dékké filiḅ fi yen, ñéerè'té a kaah koceec a malli mínéh d̄úm, yen na olu. Yen olute ndama liil ri Koo Boffi na ra, ndama yed̄ Boffa Koy ka laha' ri yínè kut da. ¹⁵ Saṅ fa seedeyid̄ dī ra, h́mú béyídté uni sun won tih : « Bee daa b̄ee' na h́mú wona' mi ron ra bitih : lahte b̄eyí ee ac filoon so' ra, dī luk soo gaan fap, ndah balaa mi ac, d̄eef dī h́mú n̄e. » ¹⁶ Malla kúd̄ dī mínéh d̄úm d̄ē, dī onte yen na yi caakke ní caak. ¹⁷ Koope ñeya' M̄eyiis n̄e pokke Kootaa, ñeyídté mal a kaah Yéésú-Kiristaa na. ¹⁸ Ow èll̄ey Koope. Koy ka yínè kut daa èlíd̄ dī, te dī fi baa Koope. Di fa hom a Boffa ra daa teeḅa' d̄ee man dī fi Boffa ra.

Woni Saṅ Batis biti dī Kiristaa neh

(Saame Macc̄ee 3.1-12 ; Marka 1.1-8 ; Lúkk̄e 3.1-18)

¹⁹⁻²⁰ Saṅ seedeya' Yéésú deh : kél̄f̄e yí ȳewúdf̄e homu Yerusalem wolute seeyoh ya a b̄ey tali Léwí Saṅ na nda meel dī dī fi baa daa ri wa. Meeluu wa ri ra, dī d̄apay dara, seedete won

tih : « So' mi Buura Koo fal ri ra neh ! » ²¹ Wa meelaatute ri wonu tih : « Kon fu wah ? Fu Éelí è ? » Di won wa tih : « Ēe-ēe', mi Éelí neh ! » Wa wonaatu ri tih : « Daa fu yonentaa a ? » Di won wa tih : « Di so' neh dé' ! » ²² Wa millúu ri won tih : « Kon daa fu wah ? Won fun b̄ee' hen fu ra, nda fun lah yii léhínún b̄ewē wolu fun da. » ²³ Saṅ lofa'te wa a unna h́mú won yonente Isayii ra, won wa tih : « Daa mi una h́mú d̄ofoh luufa na won bitih : "D̄ēd̄d̄i Yík̄ee waala níi júb."* »

²⁴ I farisenj h́mú filiḅ b̄ewē wolu Saṅ na ra. ²⁵ Wa yabaatute na meelu ri wonu tih : « Fu won ti fu Buura Koo fal ri ra neh, fu Éelí neh te fu yonentaa waḁti ac ra neh. Kon yi tah fu na b̄ētis b̄ewē ? » ²⁶ Saṅ won wa tih : « Mi hom b̄ets̄e' b̄ewē a muluḅ ; ndaa lahte b̄eyí ee filiḅ fi b̄ewē deh, te d̄on yíih rí. » ²⁷ Di ee ac filoon so' ra ndaa mi haayayti liil kotti†. »

²⁸ Yii baa laha' énfí laahi Yurdeṅ di Betani‡, tíḡe n̄e b̄ets̄e' Saṅ b̄ewē r̄e.

Har fa yera' Koope sarah ra

²⁹ Kéy fín f̄e, Saṅ ot Yéésú na ac d̄ii na, dī yípp̄ee won tih : « Èlí ! B̄eyí bee daa har fa nay yeree Koope sarah§, hosii bakaaddi b̄ey èldún̄e r̄e ! » ³⁰ Daa ri b̄ee' na h́mú wona' mi ron ra bitih : lahte

* **1:23** 1.23 Saame Isayii 40.3 † **1:27** 1.27 mi haayayti liil kotti :Di gerek, biníyú d̄eh : te mi yinte sah p̄ekísí níh yí ñafaddi. ‡ **1:28** 1.28 Betani :Betani fi bee bokaay a bee dékú Lasaar a Martaa a Mari ra. § **1:29** 1.29 har :Di gerek, biníyú d̄eh : koy har.

bëyí ee ac filoon so' ra, dí luk soo gaan fap, ndah balaa mi ac, ðeef dí húmú nē. ³¹ So' mi bee sah, mi húmú yéeh bëe' wad' díi hen koon da, ndaa yee kúf' aya ac mi, ma na bëtsé' muluþ ra, dí biti koyyi Israyel yúh rí. »

³² Sanj wonaat tih : « Mi otte Ruuhi Koope kola'te sun céppé sun fi man bédú nen, hompe díi na. ³³ Mi húmú yéeh bëe' wad' díi hen koon da, ndaa Koope fa wol so' bëtís a muluþ ra húmú won so' tih : "Fay ot Ruuha cép hom ow na ; bëyí baa nay bëtsée a Ruuh-Peseñ." ³⁴ Te so' mi Sanj mi otte yii baaha, te mi seedete biti bëyí baa daa Koy Koope. »

Taalibe ya ðébuu ñee tal Yéésú rē

³⁵ Kéy fín fē, Sanj ayaatte tígē húmú wē aa' fin ra, cañke a ow ana di taalibe yi. ³⁶ Ola' ri Yéésú na roombiil, dí won tih : « Èlí ! Bëyí bee daa har fa nay yeree Koope sarah ra ! » ³⁷ Keluu taalibe yi ana ya unni yah, wa ñeyute tal Yéésú. ³⁸ Heelta' Yéésú otte biti wa ñeyu tali ra, dí meelte wa won tih : « Don saamu yih ? » Wa ðeekúuté rí a tii bëyí nē yēeddé' Unni Koope, wonu ri tih : « Rabbi, fu dék dih ? » ³⁹ Di won wa tih : « Èyí ðon ot. » Tígí daaha, bi ðeef na'a konte, wani Yéésú ñéerúuté, wa yúhúté tígé dék dí rē, wa yeelutee díidē' caan fi bisa a dí.

⁴⁰ Anndere koy-yaafi Simoñ Peer, non bëewí ana ya keluu wa unni Sanj, wa ñeyute tal Yéésú rē. ⁴¹ Di ðébpí pay saami Simoñ, won dí tih : « Fun olute Méssiífé ! » (Iti fi tii baa daa ri Kiristaa mbée Buura Koo fal ri ra.) ⁴² Anndere kúdté Simoñ Yéésú nē. Yéésú yeelte Simoñ níi won dí tih : « Daa fu Simoñ, koy Sanj ; dala'te woteh, fay ðeekúu Sefaas. » (Iti fi tii baa daa ri : Peer. Iti fi tii Peer daa : la').

Fílíp a Natanayel

⁴³ Kéy fín fē, Yéésú hampe waali Galile. Laha' ri ra, dí tee'a'te a Fílíp, won dí tih : « Aye fu ñee tal so' ! » ⁴⁴ Fílíp dék Betsaydaa, bani Anndere a Peer daa boku gin. ⁴⁵ Di fi Fílíp nampee pay otte Natanayel, won dí tih : « Fun olute bëe' nē wona' Méyiis téerii Kootaa ra, bee na wonuu yonente ya Téerēe rē : yaa Yéésú fi Suseef, bee dék Nasaret ra. » ⁴⁶ Natanayel won dí tih : « Yin wun mín dúh Nasaret nagajak a ? » Fílíp won dí tih : « Yen saañ fu tíkí' afu í ! » ⁴⁷ Wa bëyute waala na suu. Ola' Yéésú Natanayel na ac díi na, dí won dí tih : « Bee daa koy ki Israyel tígí-tígí, bi yéeh nofa' ow ! » ⁴⁸ Natanayel won dí tih : « Fu yúhē' sē' dih ? » Yéésú loffe ri won tih : « Homa' fu tal eena ðeef Fílíp ðeekēy rē doom ra, mi otte ro. » ⁴⁹ Natanayel bëyídté uni won tih : « Bahaa, kon daa fu Koy Koope ! Daa fu Buuri Israyel ! » ⁵⁰ Yéésú

won dī tih : « Wona won mi ro biti mi otte ro tal eena ra, daa tah fu gém è ? Fay ot yi luk baa éemilè'. »⁵¹ Di antee baat won tih : « Mee ron won kaaf ka ra ee : don ay ot sun-Koo kúnsèh, malaaka yi Koope lawe sun cépé, aye so' mi Koy-bée' nè. »

2

Kílëegë lah Kanaa ra

¹ Waal ana filoon fi baaha, kílëek lahte Kanaa di Galile. Yaafi Yéésú hómú nè. ² Yéésú a taalibe yi bal dëekuté kílëegë, wa ayute. ³ Dúmè' béeñë ndaje ma ra, yaafa ndunutte Yéésú baaha won dī tih : « Wa lahluy béeñ. » ⁴ Yéésú won dī tih : « Síkirèh sè' yaa ow ! Fu faha' biti mi paga yi te wahtii so' lahay doom ? » ⁵ Yaafa payte won koy-pagoh ya tih : « Yii won don dī béeb, lah pégí rí. » ⁶ Deef lahte yaad pëenë yí yugusuu la' hómú nè, yi yewúddë yahti bukutoh raa efuu na. Bina-bina waa na béeb wadtee mín sod binwaar iniil mbée pëenë. ⁷ Yéésú won koy-pagoh ya tih : « Néhi yaadfi yee mulub. » Wa nehute yaadfa níi líiffé pew. ⁸ Tígí daaha, Yéésú won wa tih : « Leegi éfi nè mulaa don kom koy ki gaana. » Wa pagute yii baaha. ⁹ Díkisé' koy ki gaana efa, deef mulaa yíssèhté béeñ. Di yéeh tígë koluu koy-pagoh ya béeñë rë, ndaa wa fi yaa yúhú. Tígí daaha, koy ki gaana dëekké yíkii

kílëegë ¹⁰ won dī tih : « Ndaje mi lah béeb béeewë défbúu efa' béeñë lukki neb da. Tíl níi béeewë sampi píi faanni wa raa nék, yee loolay níi rë anti dúhrú ! Do nék fu henay dah, fu yef béeñë lukki neb da yefo níi a deh. »

¹¹ Baa daa kimtaana défbí pañ Yéésú rë. Di paga' ri Kanaa di Galile. Daaha, dī teeba'te ndami, tahte taalibe yi gémuté rí.

¹² Filoon fi baaha, dī saañce Kafarnawum bani yaafi, koy-yaayyi a taalibe yi ; wa homute i waal daaha.

*Yéésú a yaayoh ya filib
Faam fi gaani Koope*

(Saame Maccëe 21.12-13 ; Marka 11.15-17 ; Lúkkë 19.45-46)

¹³ Leba' Paagiyewúddë rë, Yéésú kolohte saañce Yerusalem. ¹⁴ Laha' ri dī haalte baylii Faam fi gaani Koope ra, dī deef júlë yë wani harra a faññi wa filib, yaayoh yi bédú yë, a béeewë nè lofrantuu hélíis rë. ¹⁵ Tígí daaha, dī saampe dúd níh yugusse njoora, líkké wë, dúhídté wë béeb éssín bani júri wë ; dī júlkeñcé taabulli béeewë nè lofrantuu hélíis rë, hasalte hélsí wë feey, ¹⁶ antee won yaayoh yi bédú yë tih : « Kéllí iñyee béeb deh ! Ngënë tíkí faam Baaso' yaayaa ! » ¹⁷ Filoon fi baaha, nuffi taalibe yi payte unna bíníyú Téerëe rë bitih : « Tígë teem so' Faamu ra, daa mi yúh rí keeñ so' ! »^{*}

* 2:17 2.17 Saame Kañaa ya 69.10

18 Tígí daaha, baha yi yëwúddë wonu ri tih : « Pagid fun yii éemilë'í nay fun teebe bití fu lahte sañsaña paga' fu yii bee ra ! »
 19 Yéésú tahte won wa tih : « Don poysa' Faam fi gaani Koope fi bee raa, may rii tabahaat filíß waal éeyë. »
 20 Baha yi yëwúddë wonu ri tih : « Faam fi bee tabahute kíil sabay iniil a kíil pëenë (46) bee ra, do fantee won fu mín díi tabahaat filíß waal éeyë ë ! »
 21 Ndaa Faam fa na wona' Yéésú rë, dí yin kay neh gét nëe wona' faan dí fi baaha. 22 Tílé' ní Yéésú kèlluté búudé rë, taalibe ya nérsúuté bití Yéésú na húmú won uni bah ; yii baa tahte wa gémuté yee won Téerëe rë a una húmú won Yéésú rë.

Yii homa' ow béeb Yéésú yúh rí

23 Jamanaa homa' Yéésú Yerusalem feedi Paaga ra, ow caak gémuté rí oluu wa kimtaanna pañ dí ra. 24 Ndaa bi yúh Yéésú bëewë béeb, dí lekaay wa. 25 Di húmú sohlaay bití ow ac díi na won bití díw man deh, ndah yii homa' ow béeb dí yúh rí.

3

Yéésú a Nikodem

1 Lahte bëyí hínú Nikodem, dí non farisenja te ri kélfé yëwúdd. 2 Di acce elek deefidte Yéésú won dí tih : « Bahaa, fun yúhuté bití Koope daa wol ro yëeddi

fun, ndah ow mínéh pañ kimtaanna pañ fu ra hém Koope ñéerëey a ri. »
 3 Yéésú tahte won dí tih : « Mee roo won kaaf ka ra ee : ow mínéh yúh iña Nguur ki Koope, hém dí límëetúy. »
 4 Nikodem meelte ri won tih : « Ow tíl níi baha raa, dí ay límëetú díh ? Di ii nimil loo yaafi límëetú kay maan ? »
 5 Yéésú tahte won dí tih : « Mee roo won kaaf ka ra ee : ow mínéh haal Nguur ki Koope, hém dí ñeyay muluß a Ruuh-Pesen, dí límëetú. 6 Bëyí límú ow, pesa' pes ow ; bëyí límú Ruuhi Koope, pesa' Ruuhi Koope. 7 Yin banay roo jaahal di yee wona' mi ro bití bëewë warutee límëetú rë. 8 Ngilaaw ma laba' tígí neba' ri fu kelee na neh a ? Añcañ, fu yéeh tígë kola' ri a tígë na saañ dí ra ! Di daaha kep di bëyí límú Ruuhi Koope ! »
 9 Nikodem won dí tígí daaha tih : « Baa mínë' lah díh ? »
 10 Yéésú won dí tih : « Yëeddëhë tempe ti do nen Israyel fu yéeh yii baa a ? 11 Mee ron won kaaf ka ra ee : fun hom wonuu iña yúhú fun da, fun seede iña na olu fun da, ndaa don fahuuy fun síkírëh. 12 Mi won don iñi ëldúnë don gémúy së' rëe, don ay soo gémée díh bití mi wona ron iñi sun-Koo ? 13 Ow pëyryë yúhí sun-Koo ; so' mi Koy-bëe' fë kola' na ra don daa yúh rí.

14 « Dee kera' Mëyíis goñ fa yugusuu përem sun fi duuda, bëyídté rí luufa

ra[☆], so' mi Koy-bëe' mi wadti bëyrúun daaha, ¹⁵ nda bëyi gém sè' béeb lah pesa na dúméh rë. ¹⁶ Yúhí biti Koope faha' bëewë fahoo ní dī yera'te Koy ka laha' ri ra kut, nda bëyi gém dī na béeb banti sanjku, lah pesa na dúméh rë. ¹⁷ Koope wolay Koohi ëldúnë biti ri ac daani bëewë ; ëe-ëe', dī wol ri sèmlé'i wë. ¹⁸ Kon bëyi gém Koy ka na ii daanu ; bëyi gémëy rí nék daanute ní wocce, af yee gémëy bëe' dī fi Koy ki yínii Koope kut ra. ¹⁹ Te yee haala' daana ra daa ri beh : niiña acce feey, ndaa ñúusë daa génël bëewë niiña ndah pagadfi bossi wa. ²⁰ Bëyi na pañ bos béeb wonay yin niiña, dī hega' ri hegoo, ndah dī kaa' biti pagadfi bossi feen. ²¹ Bëyi paga' kaah nék saama' niiña, nda bëyi ot pagadfi béeb yúh biti Koope daa bek dī na. »

Yéésú a Sanj Batis

²² Filoon fi baaha, Yéésú a taalibe yi koluute suute Yúdée. Di hompe i waal daaha a wa, dī na bëtis bëewë. ²³ Sanj nampee hom Enon di hëbís Salim na bëtis daaha bal, bi caak tígë mulub. Bëewë aye dī na, dī bëtsé wë. ²⁴ Baaha deef dī téyúy kasu doom.

²⁵ Lahte bis, i ow di taalibe yi Sanj na taasuu a yëwúf yii lenjke di na bukutuu. ²⁶ Wa payute Sanj na wonu ri tih : « Bahaa, fu nérsëhté bëe' doni húmú énfí laahi Yurdenj fu na seedeyid dī ra

a ? Di dalte bëtis te bëewë béeb yuluu dī na. » ²⁷ Sanj won wa tih : « Ow mínéh lah yii man dah, te Koo oneh ri ri. ²⁸ Don minú seede biti sah, mi wonte biti mi Buura Koo fal ri ra neh, a biti Koope wol so' këlléhí donj. ²⁹ Kílëek bi yaali ; kooji yaala nék homa' dah, kelee una, keeña sos níi sos. Daa mi kooji bah, yii baa daa tah keeñ so' sos níi sos. ³⁰ Di wadti laha maakaama laho saye, bi so' eylée.

³¹ « Bëe' kola' sun-Koo ra daa paa' béeb sun. Bëyi feey fi beh, míntí nona feey te wona' yii lenj ëldúnii beh. Bëe' kola' sun-Koo ra nék [daa paa' béeb sun] ; ³² dī seedeya' iña ot dī a yee keloh ri ra, ndaa ow na síkiréeh rí. ³³ Bëyi tah iña na won dī ra, déggélté biti Koo wona' kaah. ³⁴ Bëe' Koope wol ri ra, léhínë' woni Koope, ndah Koope beñ Ruuhi Pesenji béeb sodte ri ri. ³⁵ Boffa daa faha' Koy ka ní tikké iña béeb ya'i. ³⁶ Bëyi gém Koy ka lahte pesa na dúméh rë ; bëyi kaa' gémí rëe nék ii yúh pesi bah, te Koope ay rii dékée teeb haay-keeñ. »

4

Yéésú a belaa dék Samari ra

¹⁻² Waalli yaaha, farisenja keluute ban fi biti yee lah Yéésú taalibe, bëtissé wë rë, luk yi Sanj Batis. (Deef nagajek dī fi Yéésú neh daa na húmú bëtis, taalibe yi daa na húmú pagu yaa

tigë.) Yúhë' Yéésú biti yii baa halte nuffi farisenja ra nék, ³ di kolohte Yúdée, na nimil Galile. ⁴ Di yahti saañ dín fë rëe, di wadtee ñee Samari. ⁵ Daaha, di tílté ní di lebohte gini hínú Sikaar non Samari, di hëbís feey fa húmú on Yakop koohi Suseef ra. ⁶ Yakop húmú hacce yéem daaha. Bi mok Yéésú waali, di tookke búk yéemë na hílsëh, deef na' lahte leelu af. ⁷⁻⁸ Taalibe yi suute filib ginin saam yii nay waa ñame.

Lahte belii dék Samari acce neh wahtii baaha. Yéésú won dī tih : « On so' muluβ mi han yaa ow. » ⁹ Belaa won dī tih : « Mantee bal, fu daga' so' muluβ dīh te fu yëwúdf, mi bëy Samari ? » (Deef wa fi yëwúdfë nagajek, fahuuy bok a bëy Samari dara.) ¹⁰ Yéésú won dī tih : « Fu yúh yii na ona' Koo a so' mi bëe' na won a dō ra koon, daa fay soo dāge muluβ, mi on dō mulaa na ona' pes dā. » ¹¹ Belaa tahte won dī tih : « Bahaa, dō fu lahay hoc ní wocce, te yéemë noodte tikké sun ! Fay dūhée mulaa na ona' pes dā di kon ? » ¹² Ciffi fun Yakop daa helid fun yéemí beh. Di hante na mulaa, koyyi hanute na, yuppi hanute na, fantee haba' biti fu luk dīi gaan a ? » ¹³ Yéésú won dī tih : « Bëyí han na mulii yéemí bee bëeb, fay sifiraat ; ¹⁴ ndaa bëyí han na mulaa nay mi rii one ra, ii sifiriil ta' : mulaa nay mi rii one ra

kay, ay yíssée culi julli pesi na dúméh dīi na. » ¹⁵ Belaa won dī tih : « Bahaa, on so' na mulii yah, nda mi woc sifiroh te mi aylileh neh yéemí beh. »

¹⁶ Yéésú won dī tih : « Kon paye fu kale yaalu fu ac. » ¹⁷ Belaa won dī tih : « Mi lahay yaal. » Yéésú won dī daaha tih : « Fu won kaah biti fu lahay yaal, ¹⁸ ndah fu ñeete yaal iip, te bëe' doni na pesu leegi ra yaalu neh. Kon fu won kaah ! »

¹⁹ Tígí daaha, belaa won dī tih : « Bahaa mi ot na, fu yonente ! » ²⁰ Caacci fun húmú jaamiyuu Koope sun fi dañi beh, ndaa dōn fi yëwúdfë, dōn wonu dī wadti jaamiyuun Yerusalem. » ²¹ Yéésú won dī tih : « Yaa ow, gémé yee na won mi ro bee ra : ay tīl níi jaamiyohi bëewë Baap-Koo sun fi dañi beh, mbée Yerusalem ii caak solo. » ²² Don fi bëy Samari, dōn na jaamiyuu, ndaa dōn yíih Koope ; fun fi yëwúdfë nék, fun na jaamiyuu ri te fun yúhú rí, ndah ri ñeya' fun fi yëwúdfë nè, múclí ëldúnë. ²³ Wahtaa hompe lah, te ri lahte, wahtaa nay jaamiyee bëewë na saamu Baap-Koo kah-kah ra, wa ñeya' ri Ruuh-Pesen a kaaf ka ra. Baap-Koo saam mani bëewí yah. ²⁴ Koope dī Ruuh, te bëyí na jaamiyoh ri wadti ñeyaa Ruuhi a kaah. » ²⁵ Belaa won dī tih : « Mi yúhté biti Buura Koo fal ri ra maanam Kiristaa, ac ayo. Di ac dāa, dī ay fun teeb bëeb. » ²⁶ Yéésú won dī tih : « Daa

mi, so' fa na won d'oo na ra.

»²⁷ Taalibe yi Yéésú lahuu tígí daaha. Oluu wa Yéésú na won a beleb ra, wa éemuté níi éem, ndaa ow di waa na kaañay meel Yéésú yee na saam dī ra, a yee tah dī na won a belaa ra.²⁸ Tígí daaha, belaa helte peni mulii, nimilte ginin won bēewē tih :²⁹ « Ēyí d'on ot bēe' abee wonte so' iña pañ mi ra béeb. Di Buura Koo fal ri ra neh delem a ? »³⁰ Bēewē koluute, suute deefri Yéésú.

³¹ Filiβ fi baaha, taalibe ya gangalu Yéésú ñam wonu tih : « Bahaa, tǔmé yin lowu book ! »³² Ndaa dī won wa tih : « Mi lahte ñami d'on yíih rí. »³³ Tígí daaha, wa na meelantuu hanndal ki wa wonu tih : « Ow kompe ri ñam neh a ? »³⁴ Yéésú won wa tih : « Pañ yee faha' bēe' wol so' ra níi mit sēk, daa ñami so'.

³⁵ « Don wonu neh dee a lec tas céyín iniil a ? So' mi won d'on tee : élí meeyya ! Iña nonte níi seh lec. »³⁶ Bēe' nē lec dā ee liil yínlí rē, na négirē' peba na saañ pesa na dǔmēh rē. Hen daaha raa, bēe' soh ra a bee lec dā bok, lah sos-keeñ. »³⁷ Léehē won kaah bitih : "Bēe' soh ra bokaay a bee lec dā." ³⁸ Mi yeñce ron lec meeyi d'on mēsúy nēe pañ dara. I ow kay daa légéyú rí, d'on daa njiriñuu ri. »

³⁹ Kola'te bee wona' wa belaa bití Yéésú wonte ri iña pañ ri béeb rē, i ow caak di bēy Samari dékú gini baa ra gémuté Yéésú. ⁴⁰ Te deefruu

wa ri ra, wa dagute ri dī hom waa na daaha ; tígí daaha, dī hompe waal ana waa na. ⁴¹ Iña na won dī ra tahte wa baatuutee caak na haalu ngémē. ⁴² Wa wonu belaa tih : « Iña bílíd fu fun dā daa tah fun gém neh d'on, ndaa bití fun kellirute affi fun dī na won, te fun yúhúté bití daa ri Sēmlēhí èldúnē kaah. »

Koy daga pay Yéésú rē

⁴³ Filoon fi waalli ana ya hom Yéésú daaha ra, dī kolohte saañce Galile. ⁴⁴ Di wonidte afi bitih : « Yonente heefuu gina dék dī rē. » ⁴⁵ Laha' ri Galile ra, bēy gina teeriyuute ri daaha, ndah payuu wa feedi Paaga Yerusalem ra, wa olute iña pañ dī filiβ feeda ra béeb.

⁴⁶ Daaha, Yéésú ñeyaatte Kanaa di Galile, tígē hǔmú yíssē' rí mulaa bēeñ rē. Deef ow di dakki buur dék Kafarnawum, koy ka keente jér. ⁴⁷ Kela' ri bití Yéésú kolohte Yúdée acce Galile ra, dī saañce deefidte ri, danje ri pay Kafarnawum payid' dī koy kee ke ri na maannda' húl rē. ⁴⁸ Yéésú won dī tih : « Don oluy kimtaan a iñi éemílē'té rēe daal, won ti d'on ii gém múk ē ! » ⁴⁹ Daga won dī tih : « Bahaa, yípée ac faam balaa koy so' húl. » ⁵⁰ Yéésú won dī tih : « Nimile faam, koohu béyídté af, yin ii rii kat. » Bēe' gémpé yee won dī Yéésú rē, kolohte na saañ faam. ⁵¹ Di hom waali faam fa, súrgē yí téebilúuté rí wonu ri tih : « Bahaa, koohu kolohte

! » ⁵² Di meelte wa wahtaa koloh kúkëyë rë, wa wonute ri biti faan kúkëyë woc tama bee wota' na' yutuud' leelu af aa' fin ra. ⁵³ Boffi kúkëyë yíppée ot biti yaa wahtaa wona' ri Yéésú biti koohi béyídté af ra. Kola'te baaha, bani bëy faami bééß gémúté Yéésú. ⁵⁴ Baa daa kimtaani ana fa paŋ Yéésú kola' ri Yúdée nimilte Galile ra.

5

Lëfëñidë pay Yéésú rë

¹ Filoon fi baaha, ndaje di ndaje yi yëwúddë lahte Yerusalem, Yéésú kolohte saañce na. ² Gini baaha lahte laahi Ébrë yë wonuu ri Betsataa, hom hëbís ilë në wonuu Ílí Harra* ra. Di lahte mbaar iip. ³ I jéríð caak daa fanuu mbaarri yaaha : búumíddë deh, bëewë në yíibú rë deh, lëfëñíddë deh. [⁴ †] ⁵ Filiß fi jéríðdí yaaha, lahte na bëyí hente kíil sabay éeyë a kíil peeye (38) dī fanohte ri jér. ⁶ Ola' Yéésú bëe' fanohte feey te ri yúhté biti dī maañcee jér rë, dī meelte ri won tih : « Fu faha'te biti fu wah a yaal kowa ? » ⁷ Jérðe won dī tih : « Bahaa, mulaa hégíyëh rëe, mi na laheh bëyí mín sëe ßek filiß laaha ; mi home étíð saañ haal raa, ow kay déß së' filiß.

» ⁸ Tígí daaha, Yéésú won dī tih : « Kolee, fu pon dilu fu tíl. » ⁹ Bëe' yíppée wah, kolohte ponte dili na tíl.

Yiin pay Yéésú bëe' rë tee'a' a bisa na hílsúu yëwúddë rë. ¹⁰ Oluu baha yi yëwúddë bëe' a dili, wa wonu ri tih : « Fu waray meeß dilu bisee woteh beh, dī bisa na hílsúu rë ! » ¹¹ Bëe' won wa tih : « Bëe' pay so' ra daa won so' mi bëß dili so' mi tíl. » ¹² Wa meelute ri wonu tih : « Bëe' won dō baaha ra wah ? » ¹³ Ndaa bëe' yéeh payohi, dī mínéh ríi teeßa', bi múuy Yéésú filiß dúukélí bëewë húmú daaha ra.

¹⁴ Filoon fe, Yéésú tee'a'te a bëe' filiß Faam fi gaani Koope, won dī tih : « Fu abaa fu wahte leegi ! Ngana bakaaril, toñeh yii luk baa misik ay roo kate. » ¹⁵ Kola' bëe' dah, dī payte wonte baha yi yëwúddë biti bëe' pay dī ra Yéésú. ¹⁶ Kola'te baaha, wa henute halañ sun fi Yéésú, di yee paya' ri ow bisa na hílsúu wë rë. ¹⁷ Ndaa Yéésú won wa tih : « Baaso' ee légéy rë na saañ, so' bal mee légéy rë maa saañ. » ¹⁸ Wona won dī baa ra, tahte baha yi yëwúddë baatuutee caŋ hawi húl, ndah teyay biti doŋ dī poote kootii bisa na hílsúu rë, ndaa dī wona' ti

* **5:2** 5.2 Gini Yerusalem bëéß húmú mírú mírë níi embite, dī antee lah íl caak. Ílí bee na wonuu Ílí Harra bee ra, bëewë habuu biti harra húmú ñeyrúu në biti wa húmú yahti haal gina. † **5:4** 5.4 Bëewë húmú ñeyaatu unni yee bín fë wora'i wa bëewë rë, lahte na yi húmú bíníyú yii beh : Wa homuu daaha sehe hégíyëhí mulaa. Na hom níi lah wahtii malaakii Koo-Yíkëe ac hégíy mulaa, te jérðe në déßpí haal mulaa wahtii baaha ra ay wah, a di míntí man jérë bëéß.

Koope daa boffi, daa ri biti daa wa teyu.

Sañ-sañi Koy ka

¹⁹ Yéésú tahaatte won tih : « Mee ron won kaaf ka ra ee : so' mi Koy ka mi mínéh koloh rek mi pañ ; mi paga' yee ot mi Baaso' na ra. Yii pañ Baaso' bééβ, so' mi Koy ka mi paga' ri. ²⁰ Di faha'te so', te dī na teeβ so' iña na pañ dī ra bééβ. Di ay soo teeβ yi ay pagu kay, yi luk yaa gaan fap nī dōn éem : ²¹ di na kèllè' Baaso' ow búudé on dī pes, so' mi Koy ka bëyí neβ so' mi on dī pes. ²² Baaso' na aatiyeeh ow, ndaa dī onte so' mi Koy ka sañ-sañi aatiyaa mi bééβ, ²³ nda bëewë bééβ yed' so' mi Koy ka cér ti di yeruu wa ri Baaso' nen. Bëyí yeray so' mi Koy ka cér, deef yeray Baaso' fa wol so' ra cér. ²⁴ Mee ron won kaaf ka ra ee : bëyí síkírèh woni so', te ri gém bëe' wol so' ra, lahte pesa na dúméh rë. Di ii daanu : dī múccé kúl kē, haalte pesa. ²⁵ Kaaf ka bee búk sē' beh : wahtaa ee sañ lahe ra, te ri lahte nī wocce, wahtaa nay kelee bëewë húlú rë un so' mi Koy Koope ra, te bëewë nay kelee woni so' ra ay pes. ²⁶ Di homa' pesa Baaso' na, dī tahra' so' ri daaha, pesa hompe soo na. ²⁷ Te ri onte so' mi Koy ka sañ-sañ aatiyaa, ndah daa mi Koy-bëe'. ²⁸ Yee won mi dōn ra banay ron jaahal : wahtaa ee ac da, bëewë húlú hacu feey fi bee ra bééβ ay keloh un so', ²⁹ te

wa ay koloh búudé. Bëewë húmú paguu yin wun ra ay koloh, haal pesa na dúméh rë, yee húmú paguu yin bos ra koloh, daanu. ³⁰ So' mi Koy ka mi mínéh koloh rek mi pañ, mi na pageh yee neβa' so' ra, ndaa yee neβa' bëe' wol so' ra. Mi hom aatiya' yee nah so' Koope ra, te aatiya'i so' júβpé.

Seede yi Koy ka

³¹ « Daa mi seedeyira af so' iñi so' koon kep, ow ii tah biti mi won kaah. ³² Ndaa ow kay daa na seedeyid' so', te mi yúhté biti iña na won dī sun fi so' ra kaah. ³³ Don wolute i ow Sanj Batis na, te iña won dī sun fi so' ra kaah. ³⁴ Seedii leñ sun fi so' yaha bi ow kut, mi sohlaay ; ndaa mi won dōn woni Sanj, nda dōn mín múc. ³⁵ Sanj húmú man lampii kédúdu hawaanaa nen, te dōn húmú dalute ot neβ nīñi. ³⁶ Ndaa lahte seedii daa luk bi Sanj lah solo : daa wa iña na pañ mi ra. Yee nah so' Baaso' pañ ra won sun fi so', wa teeβa' biti Baaso' daa wol so'. ³⁷ Te Baaso' fa wol so' ra, seedeyid' so' bal. Yaa biti kay, dōn kéllúy dī na won, te dōn èllúy rí. ³⁸ Don habuy unni dōn na ndah dōn gémúy so' mi bëe' dī wol ri ra. ³⁹ Don yahti yoon Téerëe rëe, dōn bekuu keeññon bééβ filiβ, ndah dōn séentúu pesa na dúméh rë në. Añcañ, Téerëe seedeyid' so', ⁴⁰ dōn anutee kaa' deefri so', dōn pes !

41 « Mi sohlaay kañi kola' ow na. 42 Mi yúh đon : mi yúhté biti đon fahuuy Koope. 43 Mi ayid' Baaso', đon kaa'uute síkírèhí sè'. Ndaa ow kay daa ayira afi raa, đon síkírèh rí. 44 Don fahuu biti rek đon kañantee affon, đon anutee fahuuy kañi kola' Koope fa yínè kut da ! Don ay soo gémée đíh ? 45 Ngèné hëbíi biti daa mi nay ron teebee a Baaso' ; Mëyiis daa nay ron teebee, đí fa đon tíkú yaakaaron đíi na ra. 46 Nagajek, đon gém Mëyiis kaah koon, đon warutee soo gém, ndah đí bíníté yii leŋ soo na. 47 Ndaa hém đon gémúy iña bíní rí rëe, đon ay gémée wonni so' đíh ? »

6

Mbúurú yí iippa a jénní ana ya

(Saame Maccëe 14.13-21 ; Marka 6.30-44 ; Lúkkë 9.10-17)

1 Filoon fi baaha, Yéésú húussé laahi Galile fa na wonuu bal laahi Tiberiyat ra, saañce búgí yínée. 2 Bi olu bëewë kimtaana na paŋ đí, đí na wahil jéríđđë rë, dúukël ow ñeete tala. 3 Laha' ri ra, đí lappe dan, tookke a taalibe yi. 4 Baaha, đeef feedi yëwúđđë na wonuu Paak ra lebohte. 5 Bëyrë' Yéésú afi, đí otte bëewí caakute níi caak na ayu đíi na. Tígí daaha, đí meelte Fílíp won tih : «

Yen ay lomee mbúuríi mín ñëmíđ bëewí yee dih ? » 6 Di hom olsohi Fílíp, daa tah đí wona' ri đah ; đeef đí yúhté yee nay ri page ra níi wocce. 7 Fílíp won đí tih : « Wuti yen lah hélsí tam dúmléh wë koon* , ii mín lom mbúurú níi wa béeb lah wuti yaha ñiip. »

8 Tígí daaha, ow kay di taalibe yi, Anndere koy-yaafi Simon Peer won đí tih : 9 « Lahte kúkëyí kúđté mbúurú loorso† iip a jén ana deh, ndaa wa ay taabe bëewí caakki yee yih ? » 10 Yéésú won wa tih : « Wëní wë took. » Deef tígë húmú caakke gaawa. Wonuu wa baaha ra, wa tookute. Bëewí yaalla húmú në rë warutee mit ow júnni iip (5.000).

11 Yéésú bebpe mbúurëe, simpé Koope, wora'te wa bëewë. Di bebpe jéné hente daaha bal, wora'te wa bëewë níi ow fi ow waa na béeb lahte yi doyte ri. 12 Ñamuu wa béeb níi wa laalute ra, Yéésú won taalibe yi tih : «

Négíríi wooñjiida, yin ban naa yah. » 13 Négírúu wooñjiidi mbúurú yí iippa ñamu bëewë rë, wa líífé dama sabboo a dama ana. 14 Ola olu bëewë kimtaana paŋ Yéésú rë, tahte wa wonu tih : « Bëyí bee daa yonen-taa húmú wonu biti wađtee ac ëldúnë rë kaah ! » 15 Bi yúh Yéésú biti bëewë yuluu hami daaha tík đí buuri wa,

* 6:7 6.7 hélsí tam dúmléh wë :Di gerek, bíníyú deh : deñé tíméer ana (200). Deñé yínë, daa ganjarma yíníl légéy súrgë bis múlgús. † 6:9 6.9 loorso :Wa peppi man pep bele nen. Wa hom yugusuu mbúurú.

dī héciilté lappe daŋa, bani
afi njunduŋ.

Tíli Yéésú sun fi mulaa
(Saame Maccëe 14.22-33 ;
Marka 6.45-52)

16 Sos na'in, taalibe yi
Yéésú céputé búk laaha.
17 Wa haalute gaal na húsus
laaha yullute waal Kafar-
nawum. Koo elekke affi
wa, deef Yéésú deefray wa
doom. 18 Bi gaan ngilaaw
ma, mulii laaha yampe na
hégíyëh. 19 Sayuu taalibe
ya ní wa homute yii mitte
kilomet iip mbée pëenë filib
laaha ra, wa séenuté ow na
tíl sun fi mulaa, deef Yéésú
daa na ac waa na gaala ;
wa yípútée tíit. 20 Ndaa
Yéésú won wa tih : « Ngënë
tíiti ! Yaa so' ! » 21 Tígí
daaha, taalibe ya homu woni
dī haal gaala, wa yípútée
teer tígë na suu wa koon da.

Ñama na ona' pes da

22 Yíilë' Koo káy fín fë,
dúukëli bëewë húmú tasu
búk laaha ra húmú olute
biti gaal yínë kut daa húmú
daaha aa' fin ; te wa yúhúte
biti na suu taalibe ya ra,
Yéésú ñéerëey a wa filib
gaala ; wani affi wa kut daa
suu. 23 Tígí daaha, lahte
gaalli koluu Tiberiyat ayute
teerute hëbís tígë húmú
ñamuu wa mbúurëe, bee
símë' Yíkëe Koope ra. 24 Bi
olu wa biti dī fi Yéésú a
taalibe yi húmúy nè, wa

haalute gaalli yaaha, na suu
Kafarnawum saami.

25 Deefuu wa ri búgí yíní
laaha ra, wa meelute ri
wonu tih : « Fu ac dee kiri
bahaa ? » 26 Di won wa tih
: « Mee ron won kaaf ka ra
ee : wëerté sè' biti mbúurëe
ñamu don ní looyon mayce
ra daa tah don na saamu
so', ndaa biti don yúhú iti fi
kimtaanni so' neh. 27 Ngënë
mëkí ñami ay millée yah.
Lah mëkí bee na ona' pesa
na dúméh rë kay, bee nay
mii onee so' mi Koy-bëe' rë.
Baap-Koo yedte so' sañ-sañ
baaha. » 28 Wa meelute ri
wonu tih : « Koope faha'
biti fun paŋ légéyí bih ? »
29 Di won wa tih : « Légéyë
seh Koope don na ra biti don
gém so' mi bëe' dī wol ri ra.
» 30 Wa wonu ri tih : « Fay
fun teebe kimtaani bi ní tah
fun gém dë ? Fay page yii
bih ? 31 Caacci yen ñamute
maan‡ luufa ti di bíníyúu rí
Téerëe bitih : “Di onte wa
yii ñamun wa, yii kola' sun-
Koo.”* » 32 Yéésú won wa
tih : « Mee ron won kaaf
ka ra ee : Mëyíis neh daa
ona' ñama kola' sun-Koo ra,
Baaso' daa na on don ñami
kah-kah fa kola' sun-Koo ra.
33 Ñama na ona' Koope ra,
daa ri bee kola' sun te na
on bëewë pesa na dúméh
rë. » 34 Tígí daaha, wa wonu
Yéésú tih : « Bahaa on
fun ñami yaa faraah. » 35 Di
won wa tih : « Daa mi
ñama na ona' pesa ra. Bëyí
deefid' so' wocce yaab, bëyí

‡ 6:31 6.31 maan :Wa peppi sewte, wa man pëndë miraa nen. Daa wa ñama húmú on Koope bëy Israyel koluu wa Ésip homute luufa ní hente kíil sabay iniil (40) ra. * 6:31 6.31 Saame Kolohi koyyi Israyel Ésip 16.4, 15 ; Kañaa ya 78.24

gém sè' wocce sifiroh. ³⁶ Mi wonte ron ri : don olute so' ngëey, ndaa don kaa'uute gémí sè'. ³⁷ Bëyí Baaso' on so' ri béeb ay soo deefid, te bëyí deefid so' mii rii lik, ³⁸ ndah mi cëpëy feey fa pañi yee faha' mi ra, ndaa pañi yee faha' bëe' wol so' ra. ³⁹ Yee faha' bëe' wol so' ra nék daa ri beh : mi ñanti ñak ow yinë di yee déñéen dí so' ra, ndaa mi wad' waa källë källë búudé yiin nay túkkíyë ëldúnë rë. ⁴⁰ Yee faha' Baaso' ra daa ri bitih : bëyí yeel so' mi Koy ka béeb te ri gém sè', dí liil pesa na dúméh rë, mi këlíd dí búudé yiin nay túkkíyë ëldúnë rë. »

⁴¹ Wona won Yéésú biti daa ri ñama kola' sun da, tahte yëwúddë nè úlúm-úlúmú hanndal ki wa ⁴² wonu tih : « Yaa Yéésú koy Suseef neh hanaa ? Yen yúhú boffi a yaafi ! Di wona' biti dí kola' sun díh ? » ⁴³ Yéésú won wa tih : « Yéfi yee na wonu ron hanndal kon da. ⁴⁴ Ow mínéh sée deefid' hém Boffa wol so' ra yejeh ri soo na ; te so', may këlíd bëyí baaha búudé yiin nay túkkíyë ëldúnë rë. ⁴⁵ Yonente ya biniyúté yii beh : «*Wa béeb, Koope ay waa teeb.*»* Bëyí síkírëh Boffa béeb te keloh woni, deefidte so'. ⁴⁶ Baa homay won biti ow ëlídte Boffa. So' fa kola' Koope na ra kut daa mi ot dí. ⁴⁷ Mee ron won kaaf ka ra ee : bëyí gém sè' liilte pesa na dúméh rë. ⁴⁸ Daa mi ñama na ona' pes da. ⁴⁹ Caaccee ke ron

ñamu maana luufa ra húlúy ë ? ⁵⁰ Ndaa dee man ñama kola' sun yee ra, bëyí ñam na béeb ii húl. ⁵¹ Daa mi ñama kola' sun, na ona' pes ra. Bëyí ñam na ñami yeh, fay pes faw. Ñama nay mii onee ra daa faan so' ; may rii ona' nda bëewë pes. »

⁵² Unna won Yéésú yaa ra tahte yëwúddë béyruté unni wa sun, na capuu hanndal ki wa wonu tih : « Bëyí bee mínë' yen yed' faani dí níu yen ñam ? » ⁵³ Di won wa tih : « Mee ron won kaaf ka ra ee : don ñamuy na faan so' mi Koy-bëe' te don hanuy na ñif mi so', don ii naa liil pesa. ⁵⁴ Bëyí ñam na faan so' te ri han na ñif mi so', liilte pesa na dúméh rë te may rii këlíd búudé yiin nay túkkíyë ëldúnë rë. ⁵⁵ Faan so' ñamað kah-kah, ñif mi so' han kah-kah. ⁵⁶ Bëyí ñam na faan so' te han na ñif mi so', dí pokohte soo na te mi pokohte díi na. ⁵⁷ Baaso' fa wol so' ra ee pes da, te daa ri tah mi na pes ; ti daaha nen, bëyí ñam na faan so', daa may tahe dí pes. ⁵⁸ Ñama kola' sun-Koo ra daa reeni. Bani yee húmú ñamu caaccee ke ron húlú rë maduy. Bëyí ñam na ñami yah, fay pes faw. » ⁵⁹ Na yëeddë' Yéésú unni yaa ra, deef dí húmú filib tígë na daguu yëwúddë Koope ra, di Kafarnawum.

Taalibe ya heguu ra

⁶⁰ SÍKÍRÚ wē Yéésú ní wocce ra, i ow caak di taalibe yi wonu tih : « Unna won dī ra nebeh keloh ! Wa ay tahuu dīh ? » ⁶¹ Bi yúhíd' Yéésú afi biti taalibe ya úlúm-úlúmú wona won dī unni yaa ra, dī won wa tih : « Baa daa ñogol don a ? » ⁶² Don ot so' mi Koy-bée' mi saye sun nimil tígē kola' mi raa, don ay page yih ? ⁶³ Ruuhi Koope daa na ona' pes. Ow tikkiyay yin. Unna won mi don ra kola' Ruuhi Koope na, te daa wa na tah ow pes. ⁶⁴ Ndaa i ow don na gémúy sē'. » Yaaha béeb, deef Yéésú maañcee yúh béewē gémúy rí rē, a bēe' nay rii yaaye ra. ⁶⁵ Di baatte won tih : « Yii baa daa tah mi won don biti ow mínéh sēe deefid, hém Baaso' tahreh ri ri. »

⁶⁶ Kola'te baaha, ow caak di taalibe yi heguute, wocute ñéerē' a ri. ⁶⁷ Tígí daaha, Yéésú won taalibe yi sabboo a ana ya tih : « A don, don nampi fahuuy saañ neh a ? » ⁶⁸ Simonj Peer loffe ri won tih : « Yíkēe, fun ay ñee tal wah ? Daa fu na won unna na kúd' ow pesa na dúméh rē. ⁶⁹ Fun gémúté, te fun yúhúté biti daa fu Bēyí selaa d'uhē' Koope na ra. » ⁷⁰ Yéésú won wa tih : « Daa mi tanis don fi sabboo a ana ya neh a ? Añcañ, ow yínē don na seytaane gaan ! » ⁷¹ Deef dī wona' Yudaas koy Simonj Iskariyot. Di fi Yudaas, nona' ri taalibe yi sabboo a ana ya ní, daa ri

nay rii yaaye.

7

Yéésú a mboko yi

¹ Filoon fi baaha, Yéésú hompe filib Galile na wēr ; dī fahaay pay Yúdée ndah baha yi yēwúddē fahuu hawi húl. ² Filib fi baaha béeb, bi na leboh ndaje ma na homuu yēwúddē dúttē rē,^{*} ³ koy-yaayyi wonu ri tih : « Kolee dee fu saañ ndaje mín Yúdée, nda taalibe ya béeb ot iñi éemilē' yē na pañ fu ra. ⁴ Bēyí faha' biti yúhú na dapeeh pañi iñi. Fu mín pañ iñyee raa kay, feheye ní bēy éldúnē béeb yúh rē. » ⁵ Nagajek, wa fi koy-yaayyi gémúy rí. ⁶ Yéésú won wa tih : « Wahtii so' lahay doom ; ndaa don, wahtu ya béeb wun don na. ⁷ Béewē mínih rēn kaa', ndaa wa kaa'uute so' di yee teeba' mi wa biti pagad'dī wa bosse ra. ⁸ Don fi yaa tili don saañ feedin. So' mi saay, ndah wahtii so' lahay doom. » ⁹ Filoon fi unnee ke ri yah, dī tasse Galile daaha.

Yéésú filib feedi yēwúddē

¹⁰ Sayuu koy-yaayyi yi ndaje min ra, dī fi Yéésú nampee naa saañ ndañ feey, ow yéeh baaha. ¹¹ Baha yi yēwúddē homute filib ndaje ma na saamu ri, na meeluu tígē wad dīi homa ra. ¹² Úlúm-úlúmí ban fi Yéésú misikke filib fi béewē. Yee na wonu biti dī bēyí wunte, yee kaa'uute na

* 7:2 7.2 Saame Tali Léwí 23.34-36 ; Nérsí Kootaa 16.13

wonu biti dī yaha' nuffi bēewē yahoo. ¹³ Di filib yaaha béeb, ow kaañay béyíd uni sun, ndah wa helute nuf baha yí yēwúdfē nē.

¹⁴ Tíle' feeda nūi lahte leelaa ra, Yéésú saañce haalte Faam fi gaani Koope na yēeddē'. ¹⁵ Yēwúdfē éémúté dee na yēeddē' rí rē, wonu tih : « Di yúhē' iñi caakki yee dih, te ri yooday ? » ¹⁶ Yéésú loffe wa won tih : « Iña na yēeddē' mí rē dūhēey soo na, dūhē' Koope fa wol so' ra. ¹⁷ Bēyí cañke pañi yee neba' Koope ra ay yúh nda iña na won mi ra kola' Koope na, nda mi won woni so'. ¹⁸ Bēyí wona' woni, saamda' afi ndam. Ndaa so' fa saama' ndami bēe' wol so' ra, mi yéeh fel, mi wona' kaah. ¹⁹ Mēyíis yeray ron Kootaa a ? Añcañ, ow yínē don na pagay yee won dī ra ! Don fahuu hawi so' húl yih ? » ²⁰ Bēewē wonu ri tih : « Yébitēh ham do neh a ? Daa faha' hawu húl ? » ²¹ Di won wa tih : « Mi pañ kimtaan yínē kut don béeb éémúté ! ²² Ēlsíi affon ! Mēyíis nahte ron leji tunka. Te yii baa dalaay dīi na, kola' níi caacci na. Biti Mēyíis daa nah ron ri, don na pagu ri wuti yaha bisa na hílsúu rē, te ñogoleh ron. ²³ Kon don ham kootii Mēyíis, don mín lec kúkēy bisa na hílsúu rēe, don ngaaruu so' yi paya pay mi ow múlgús bisi baaha ra ? ²⁴ Ngēnē élí rek don yíppi aatiya', lah éettiyíi kaah. »

Buura Koo fal ri ra kola'

dih ?

²⁵ Filoon fi baaha, i ow di bēy Yerusalem wonu tih : « Bee daa bēe' na fahuu hap húl rē saa ? ²⁶ Ēlsíi di na wona' ri sun te ow hégíyēey. Kélfē yē habuuy kah-kah biti daa ri Buura Koo fal ri ra a ? ²⁷ Wonuy biti Buura Koo fal ri ra yahti ac daa ow ii yúh tígē nay rii kolee ra a ? Bēyí bee nék yen yúhú tígē kola' ri ra ! » ²⁸ Filib yēeddē'í di Faam fi gaana, Yéésú béyídté uni sun won tih : « Don wonu ti don yúhú sē' a tígē kola' mi ra ! Yúhí biti nék nebaay so' neboo rek mi acce, bēe' mit wēelíyēh rē daa wol so', te don yíih rí. ²⁹ So' nék mí yúh rí ndah mi kola' hēbísí, te daa ri wol so'. » ³⁰ Tígí daaha, lahte bēewí na fahuu hami, ndaa bi lahay wahtii, ow tíkēy rí ya'. ³¹ Di filib yaaha béeb, lahte bēewí caakki gémúté rí, wonu tih : « Buura Koo fal ri ra ac daa ay pañ kimtaanni luk yee pañ bēyí bee ra a ? »

Wola'i hami Yéésú

³² Yee na úlúm-úlúmú bēewē sun fi Yéésú rē siitē' rí nuffi farisenña, bani kélfē yí seeyoh ya yejute i ow di wohoh yi Faam fi gaani Koope hami. ³³ Lahuu wa ra, Yéésú won bēewē tih : « Mi talla'te hom filib fon níi fii yutuud, mi anti saañ deefri bēe' wol so' ra. ³⁴ Ay tíl níi don ay soo saam ndaa don ii soo ot, ndah don mínih lah tígē nē saañ mi ra. » ³⁵ Yēwúdfē na wonantuu filib fi wa tih : « Di ay

saye di nii yen minih nee lah ? Di saan deefri yewudfe tasaaru ginni beewi kayya ra neh, di yeel hom din fe yeedde beewi kayya ginni yaaha a ? ³⁶ Yee wona' ri biti ay til nii yen ay rii saam ndaa yen ii rii ot, ndah yen minih lah tige ne saan di ra, di faha' won yi na ? »

Culli mulaa na ona' pes da

³⁷ Bisa mill'e feeda ra daa ri bisa lukki lah solo ra. Yiin fin fa, Yeesu canke fii beewe, beyidte uni won tih : « Beyi sifiroh, aya soo na mi on di han. ³⁸ Beyi gem soo na, di biniyuu ri Teeree, culli muli na ona' pes ay julli keeni. » ³⁹ Di hom woni tigi daaha biti beewe nay rii gеме re ay liil Ruuhi Koope. Jamanu yi yaaha, deef Koope cepirey Ruuha sun fi beewe gemu re, ndah deef di teebaay ndami Yeesu doom.

Taasa'i beewe sun fi Yeesu

⁴⁰ I ow filib fi beewe keluu wa unni yah, wonu tih : « Beyi bee daa Yonentaa kaah ! » ⁴¹ Lahte yi wonu tih : « Daa ri Buura Koo fal ri ra ! » Ndaa lahte yi tahute wonu tih : « Buura Koo fal ri ra min duhe' Galile a ? ⁴² Biniyuy Teeree biti Buura Koo fal ri ra ay coosaanee tali Dawit te ri ay duhee Betle'em^{*}, gina humu dek Dawit ra a ? » ⁴³ Af Yeesu tahte wonni beewe keld'eey. ⁴⁴ I ow waa na fahuu hami, ndaa ow tikey ri ya'.

⁴⁵ Nimiluu wohoh yi Faam fi gaani Koope humu wolu ra, kelfe yi seeyoh ya a farisenja meelute wa yee tah wa kureeluy Yeesu re. ⁴⁶ Wohoh ya wonu wa tih : « Iina won beyi baa ra, ow mesey wee won ! » ⁴⁷ Farisenja wonu wa tih : « 'Bee' kurelehte don bal a ? ⁴⁸ Don olute kelfe mbee farisenj yine gemp'e ri e ? ⁴⁹ Beewe gemu ri re yih yin kootii Meyiis ! Wa ay alkoh ! » ⁵⁰ Nikodem fa non wa fi farisenja, te humu peyidte deefri Yeesu re won wa tih : ⁵¹ « Kootii yen onay yen biti yen daan ow te deefa yen sikirih ri nii yen yuh yee pan di ra. » ⁵² Wa wonu ri tih : « Kon fu dek Galile do bal ! Kuns'e Teeree fu saam nda yonente yine kut wadtee duhe' Galile raa ! » [⁵³ Filoon fi baaha, wa haslute suute faam.

8

Belaa habuu a yaal ra

¹ Yeesu kola' daaha, saance dani Eliiffe. ² Key baaB fin cub, di nimilte Faam fi gaani Koope, beewe beeb deefrute ri. Di tookke na yeedid we. ³ Hom homo nii, i ow di yeeddeh yi kootii Meyiis a i farisenj kurete belii habuu a yaal. Wa tikute ri fii beewe beeb, ⁴ wonu Yeesu tih : « Bahaa, belii bee habuu a yaal. ⁵ Te di filib Kootaa, Meyiis tuuyce yen tap mani belii bee la' nii ri hul. Do nek, fu won yi na ? » ⁶ (Woni baa

* 7:42 7.42 Saame 2 Samiyel 7.12 ; Misee 5.1

béeb, wa homu fiiri Yéésú, nda wa mín lah yii yabun wa ri.) Ndaa Yéésú sígimpé, bebpe kuni yampe na fiis feey. ⁷ Bi caguu wa Yéésú na sehu biti di lof wa, di béyídté afi won wa tih : « Ow di don na, bi mësëy bakaaf, débëe rii tap. » ⁸ Di antee sígímëet, yampe na fiisëet feey. ⁹ Keluu wa unni yah, dala'te yee lukuu baha ra, wa sayuu yinë-yinë nii Yéésú a belaa kep daa tasu, belaa canke hompe tigë hom di ra. ¹⁰ Di béyrëetté afi, won belaa tih : « Bëewë kúrú rë dee ra di yaa ow ? Kon lahay bëyí daana ro waa na a ? » ¹¹ Belaa won di tih : « Lahay, bahaa. » Yéésú won di tih : « So' bal, mi daanay ro. Fu mín saañ, ndaa kola'te woteh ngana bakaaril. »]

Yéésú daa niiñi ëldúnë

¹² Yéésú wonaat bëewë filib Faam fi gaani Koope tih : « Daa mi niiñi ëldúnë ; bëyí ñee tal so' wocce til ñúus, di ay tilé niiña na ona' pesa na dúmëh rë. » ¹³ Tígí daaha, farisenja wonu ri tih : « Gaaf na peleh kukuumi ! Ow mínëh tah biti fu won kaah. » ¹⁴ Yéésú won wa tih : « Wuti mi seedeyid af so' raa, mi won kaah. Mi yuh tigë kola' mi ra a tigë na saañ mi ra ; ndaa don, don yiih tigë kola' mi ra ní pulé tigë na saañ mi ra. ¹⁵ Dee na aattiyuu don da, homa' olaf ow ; so' mi na aattiyeeh ow. ¹⁶ Ndaa til nii mi aattiya' raa,

lah tëhí biti ri kaah ndah funi af so' na neh ; funi Baaso' fa wol so' ra daa na ñeerúu në. ¹⁷ Kootii ron wonay biti tígí seedeyuun ow ana, deef kaah woo ? ¹⁸ Kon mi seedeyid af so', te Baaso' fa wol so' ra seedeyid so' bal ! » ¹⁹ Tígí daaha, wa wonu ri tih : « A boffu dih do ? » Di tahte won wa tih : « Don yiih sè', don yiih Baaso'. Don yuh sè' koon, don ay yuh Baaso'. »

²⁰ Na won Yéésú unni yaa ra, deef di na yëeddë' filib Faam fi gaani Koope, hëbís tigë na bekuu sarah ya ra, ndaa ow étdëy hami, ndah deef wahtii lahay doom.

Tigë na saañ Yéésú rë

²¹ Yéésú wonil wa tih : « Mee saañ da ee ; don ay soo saam ndaa don ay húlée filib bakaadfon. Don mínih lah tigë në saañ mi ra. » ²² Tígí daaha, yëwúdfë wonantuu hanndal ki wa tih : « Mbaa ri faha' naadoh daa tah di won biti yen mínih lah tigë na saañ di ra neh ? » ²³ Yéésú won wa tih : « Don dékú feey, ëldúnii beh, ndaa so' mi dékéh në, mi dék sun. ²⁴ Yii baa daa tah mi won don biti don ay húlée filib bakaadfon. Mee ron won ra ee don gémúy biti daa mi^{*} raa, don ay húlée filib bakaadfon. » ²⁵ Wa meelute ri wonu tih : « Daa fu wa kon ? » Di won wa tih : « Mi maañce ron ri dal won bín fë ní a deh ! » ²⁶ Mi caakke yii mín mí won sun fon, a yii mín mí ron aattiya', ndaa mi léhín bëy ëldúnë iña won

* 8:24 8.24 Saame Kolohi koyyi Israyel Ésip 3.14-15

so' bēe' wol so' ra, te dī fi bēyí baa wona' kaah. » ²⁷ Bi yíih wē bití Yéésú wona' wa Boffa sun, ²⁸ dī baatte won wa tih : « Tíi níi dón bēyíd' so' mi Koy-bēe' rēe, dón ay yúh bití daa mi, te dón ay yúh bití ma na koleeh rek mi pañ yin, ndaa mi léhínē' iña yēedíd' sē' Baaso' ra. ²⁹ Te dī fi bēe' wol so' ra funi ñéerúu, dī yedday so' a af so', ndah mi dékē' pañ yee neba' ri ra. » ³⁰ Filiḅ woni iñyah, i ow caak gémúté rí.

Kaah daa na pēkís ow

³¹ Tígí daaha, Yéésú won yēwúddē gémú rí rē tih : « Don pokoh unna won mi ron ra raa, deef dón taalibe yi so' kaah. ³² Hen daaha raa, dón ay yúh kaah te kaaf ka ay ron pēkís, dón laha' affon. » ³³ Wa wonu ri tih : « Fun séttí Abraham, fun mēsúy hen ñaam ! Fu wona' fun bití fun ay laha' affi fun díh ? » ³⁴ Yéésú won wa tih : « Mee ron won kaaf ka ra ee : bēyí pañ bakaad' béeb, deef dī ñaam bakaad'. ³⁵ Te ñaam noneh faam, ndaa koy non faam faraah. ³⁶ Kon so' mi Koy ka daa mi pēkísē ron raa, dón ac bēewí lahuute affon kaah. ³⁷ Mi yúhté bití dón séttí Abraham ndaa dón fahuu hawí so' húl, ndah iña won mi ron ra haaleh affon. ³⁸ So' mi wona' iña ot mi Baaso' na ra. Don nēk, dón paguu iña keluu ron boffon na ra. » ³⁹ Wa wonu Yéésú tih : « Abraham daa boffi fun. » Yéésú won wa tih : « Don henun koyyi Abraham kaah koon, tin dón ñeyun kotti. ⁴⁰ Ndaa dón paguy bah, dón

na anuu faha' hawí so' húl ndah mi wona' ron kaaf ka keloh mi Koope na ra. Iña na pagu ron ra, Abraham mēsēy wēe pañ. ⁴¹ Don paguu di na paga' boffon kep. » Wa wonu Yéésú tih : « Fun koyyi píyúu waal neh ! Fun lahuu baap yínē, te ri Koope. » ⁴² Yéésú won wa tih : « Koope daa yaha Boffon kaah koon, tin dón faha' so', ndée mi kola' díi na, te daa ri tah mi ac. Nebaay so' neboo rek mi acce, daa ri wol so'. ⁴³ Yi tah dón kéliih woni so' ? Mi ot na : woni so' haaleh affon daa tah. ⁴⁴ Seytaane daa boffon tígí-tígí ! Pañ yii neba' dī fi boffon, neba'te ron. Dalaana níi a dēh, dī mēsší sanju ow sanjukuyo. Di mēsēy ñéerē' a kaah, ndah kaah íníh díi na. Di home fel raa, dī na hélléeh yínē sah. Di pesa' fel, te fel coosaana' díi na. ⁴⁵ Ndaa so' mi beh, mi wona' kaah daa tah dón gémúy iña na won mi dón ra. ⁴⁶ Wa di dón na daa mín cañ won yii nay teebee bití mi bakaadte ? Kon mi won kaah raa, yi kaa' dón gém iña na won mi ra ? ⁴⁷ Bēyí non bēewí Koope, kela' iña na won dī Koope ra. Ndaa dón nēníh bēewí daa tah dón kéliih iña na won dī ra. »

⁴⁸ Yēwúddē wonu Yéésú tih : « Fun wonuy kaah bití nagajek fu heedi bēy Samari, te yébitēh daa ham dō a ? » ⁴⁹ Di nampee waa won tih : « Yébitēh habay so' ! So' kay mi yed Baaso' cér ; dón daa yeruy so' cér ! ⁵⁰ So' mi

saamɗay af so' ndam. Lahte bëyí daa na saamid so' ri te daa ri na aattiya'. ⁵¹ Mee ron won kaaf ka ra ee : bëyí ñee woni so', ii mëssi húl. » ⁵²⁻⁵³ Wa wonu ri tih : « Wëerté leegi biti yébitèh daa ham ɗo ! Fu haba' biti dee fu luk ciffi fun Abraham gaan a ? Abraham húlté, yonente ya húluté, fantee won biti bëyí ñee wonu ii mëssi húl è ? Fu tik afu yih ? » ⁵⁴ Yéésú won wa tih : « Mi ðemndëe af so' raa, ay lahee njiriñ mi bih ? Baaso' kay daa na on so' ndam. Don wonu ti ði Koope fon, ⁵⁵ ðon anutee rii yíih. So' mi bee mi yúh rí. Mi won biti mi yéeh rí rëe, mi ac feloh ti ðon nen. Ndaa mi yúh rí, te mi ñeya' woni. ⁵⁶ Keeñ ciffon Abraham sosse nū sos séenté' rí biti mi ac ayo ra ; ði otte te keeña sosse. » ⁵⁷ Wa wonu ri tih : « Fu ola' Abraham ðih, te fu lahay kíil sabay iip (50) doom ? » ⁵⁸ Yéésú won wa tih : « Mee ron won kaaf ka ra ee : balaa Abraham límú, daa mi. » ⁵⁹ Tígí daaha, wa na píyú i la' ay yeese ri, Yéésú múuycé filiḅ bëewë, dúhté Faam fi gaani Koope.

9

Bëe' límú búumíɗ ðë

¹ Filoon fi baaha, Yéésú hom waal otte bëyí límú búumíɗ. ² Taalibe yi meelute ri wonu tih : « Bahaa, bakaadɗi bëyí bee daa tah ði límú búumíɗ mbée bakaadɗi boffi a yaafi ? » ³ Yéésú won wa tih : « Ñeyaay ðii na, ñeyaay boffi a yaafi na. Don ot ði búum,

Koope daa faha' ñeya' ðii na, teeba' doolii. ⁴ Na'a béeb, yen warun paŋ légéyí bëe' wol so' ra ; te leŋ Koo elek, ow ii naa mín légéy. ⁵ Homi so' èldúnë béeb, daa may niñle bëewë. » ⁶ Kola' ri woni unni yah, Yéésú tuulte feey, túpëlsé'té muluuc ma a feey fa, ði antee waa leef illí búumndë, ⁷ won ði tih : « Paye fu súlmée laahi Silowe. » (Iti fi tii Silowe daa wolu wolo.) Búumndë payte dín fë súlmèhté, nimilte yeelte.

⁸ Oluu ri bëewë wani dékú rë a yee na olu ri merees ði na saraatoŋ ra, wa na wonantuu hanndal ki wa tih : « Bee bëe' húmú took na saraatoŋ ra saa ? » ⁹ Lahte bëewí wonu tih : « Yaa ði ! » Lahte yi wonu tih : « Èe-èe', yaa ði neh, wa madu mado rek ! » Bëe' won wa tígí daaha tih : « Yaa so' kay ! » ¹⁰ Tígí daaha, bëewë meelute ri wonu tih : « Yi daa wëdís illú ? » ¹¹ Di won wa tih : « Bëe' hínú Yéésú rë daa hilsid feey, leeffe illí sè' antee soo nah mi pay súlmèh laahi Silowe. Mi payte dín fë, mi súlmèhté illí sè' wërsèhté. » ¹² Bëewë meelute ri wonu tih : « Bëe' hom ðih ? » Di won wa tih : « Mi yéeh tígè hom ði ra ! »

¹³ Wa koluu daaha, beyute bëe', kúruté rí farisenŋa na. ¹⁴ Deef Yéésú hilsid feey fa wëdissé illí bëe' yiin bisa na hilsúu yëwúɗɗë rë. ¹⁵ Wa fi farisenŋa bal namutee meel bëe' dee wërsè' illí rë. Di won wa tih : « Di leef so' feey hilsid il, mi súlmèhté, mi yíppée yeel. » ¹⁶ Tígí

daaha, lahte farisenjji wonu tih : « Bëe' paŋ yii baa ra mínéh hen bëyí Koope daa wol ri, ndah dī ñeyay yee won kootii bisa na hílsúu rē. » Ndaa lahte bëewí wonu tih : « Bakaaroh mínē' paŋ kimtaanni man dee díh ? » Daaha, wonni wa kéldëey. 17 Farisenja meelaatute bëe' wonu ri tih : « A do, fu won yi bëe' wëdis íllú rē ? » Bëe' won wa tih : « Di yonente ! »

18 Di filiḅ yaaha béeb, kélfē yí yëwúdfē kaa'uute gém biti bëe' na ot bee ra húmú búumídf. Yii baa tahte wa woluute boffi a yaafi, 19 meelute wa wonu tih : « Won ti bëyí bee koohon kaah te ri límú búumídf è ? Yi tah dí na ot leegi kon ? » 20 Boffa a yaafa wonu wa tih : « Yee yúhú fun ḁa biti dī koy fun sah-sah, te ri límú búumídf kaah. 21 Yee tah níi dī na ot leegi ra nék, fun yíih rí, a fun yíih bëe' pay dī ra ḁal. Méelí rí dī teeb ron ! Di kúkëy woo ? » 22 Biti wa kaañuy kélfē yí yëwúdfē daa tah wa lofa' ḁah, ndah deef wa fi kélfē yí yëwúdfē pokute biti bëyí won ow biti Yéésú daa Buura Koo fal ri ra, ay líkú tígē na ḁaguu yëwúdfē Koope ra. 23 Yii baa daa tah wa won biti wa meel ri, dī kúkëy neh.

24 Farisenja dëekëetúté bëe' húmú búum dē, wonu ri tih : « Fun yúhúté biti bëe' na wona' fu ra bakaaroh ! Wone kaah di tii Koope. » 25 Di won wa tih : « Di yaha bakaaroh mbée bakaaroh neh béeb, mi yéeh

yin na. Yee yúh mí rē biti mi húmú búumídf, mi yeelte leegi. » 26 Tígí daaha, wa meelute ri wonu tih : « Di paŋ do yih ? Di hen díh níi payce íllú ? » 27 Bëe' won wa tih : « Mi húmú wonte ron baaha, ḁon kaa'uute síkírēh. Don fahuu biti mi wonaat ḁon baaha yih ? Don fahuu hen taalibe yi man bitih ! » 28 Tígí daaha, wa solsuute ri anutee rii won tih : « Do kay, daa fu taalibii bëyí bah ! Ndaa fun, fun taalibe yi Mëyíis. 29 Fun yúhúté biti Koope wonte a Mëyíis, ndaa dī fi bah, fun lukki yíih tígē kola' ri ra sah ! » 30 Bëe' tahte won wa tih : « Don yíih tígē kola' bëe' rē, te ri payce íllí sē ! Baa daa yee téy af ra ! 31 Yen yúhúté biti Koope na taheh ḁaŋ bakaaroh, ndaa bëyí neeh ri, ñee woni te paŋ yee faha' ri raa, dī tah ḁañi. 32 Biti ow payce íllí bëyí límú búumídf níi na yeel, kéllúy ! 33 Kon bëe' paŋ yii baa ra Koo daa wol ri ; henay baa koon dī mínéh paŋ kimtaan. » 34 Farisenja wonu ri tígí daaha tih : « Límúu fú níi a ḁeh, fu mësší hen bakaaroh, antee won daa fay fun yëeddé è ? » Wa koluu daaha, líkúté rí tígē na ḁaguu ra, ḁúhrúté rí èssín.

35 Kela' Yéésú biti farisenja líkúté bëe' tígē na ḁaguu ra, dī deefidte ri, won dī tih : « Fu gémpé Koy-bëe' è ? » 36 Bëe' won dī tih : « Teeb so' ri bahaa, nda mi gém dí. » 37 Yéésú won dī tih : « Fu otte ri, daa ri na won ḁoo na. » 38 Tígí daaha, dī

yekke fii Yéésú na jaamiyoh ri, won tih : « Yíkée, mi gémpé rē. » ³⁹ Yéésú antee won tígí daaha tih : « Mi ac aattiya' feey fi beh, nda búumídfē yeel, te bēewē na yeelu ra yíssēh búumídf. » ⁴⁰ Lahte farisenji húmú daaha, keluu wa unni yah, wa meelute Yéésú wonu ri tih : « Fun i búumídf fun bal a ? » ⁴¹ Yéésú won wa tih : « Don yahun búumídf koon, tin don ii lah bakaad ; ndaa don wonu ti don olu na, yii baa daa tah bakaadfon dék don na ! »

10

Níirēhē a harri

¹ Yéésú tikké won wa tih : « Mee ron won kaaf ka ra ee : bēyí ñeyaay ílí gélgí harra, anti dara buut ñeyaa na, bēyí baa lohoh, dī banndi. ² Ndaa bēyí haalaa gélgē ílē, deef daa ri níirēhí harra. ³ Di fi bah, wohohi yuba ay rii kúnsídf, te harra laha' ri ra ay yúhsē' una. Di ay ñee tii yi wa dēek wē, dūhídf wē èssín. ⁴ Di dūhídf wē bēeb níi woc raa, dī kèllēh, harra ñee tali, bi yúhsúu wē uni. ⁵ Wa ii ñee tal bēyí wa yíih rí nék ; wa ay rii hegee hegoo kay, ndah wa yíihsiih una ! » ⁶ Yéésú ñeya'te wa léehí bah, ndaa wa yíih yee faha' ri waa won da.

⁷ Tígí daaha, Yéésú wonaat wa tih : « Mee ron won kaaf ka ra ee : daa mi ílí gélgí harra. ⁸ Bēewē húmú kèllúu sē' dee ra bēeb, húmú i lohoh a i banndi, yii baa tahte níi harra síkírúuy wē. ⁹ Daa mi ílē. Bēyí

ñeya' soo na haal, ay múc ; dī ay mín haal, dī dūhé, dī lah yii pesaa ri faraah. ¹⁰ Lohoh aya' loh, bēem a sanjku kut. So' nék, mi ac biti bēewē pes, wa pes pesi neŕpe. ¹¹ Daa mi níirēhí kah-kah fa. Níirēh kah-kah hom gara' ñíiní garoo harri na. ¹² Súrgē nék, dī lahaay harra ; dī níirēh kah-kah neh. Di ole gúmú aye rek, dī hegoh, gúm fē yejoh sun fi harra, hasla' yuba. ¹³ Súrgíi baa ay mínée hen daaha, ndah dī séentēh héliis légéyí kut, harra tahay dī koloh. ¹⁴⁻¹⁵ Daa mi níirēhí kah-kah fa. Di yúhē' sē' Baaso' mi yúhté rí, so' mi yúhē' harri so' daaha wa yúhúté sē'. Te af wa ay tah mi yera' ñíin sē'. ¹⁶ Mi lahte harri kayyi ínih gélgí beh, te mi wadtee waa níid' bal ; wa ay yúhsē' un so', wani yee boolla' bēeb hen yup yínē, níirēhē hen yínē. ¹⁷ May yera' ñíin sē', mi liilaat dī. Yii baa daa tah Baaso' faha' so'. ¹⁸ Ow minéh bek ñíin sē' feey, daa mi mín dīi yera'. Daa mi mín dīi yera', daa mi mín dīi liilaat. Baaso' túuy sē' yii baaha. »

¹⁹ Unna won Yéésú yaa ra tahte yēwúdfē kéldúuy won. ²⁰ Ow caak waa na wonu tih : « Nagajek don síkírúu wa ? Bee yébitēh daa ham dī bee ra a ? Bee yulkídf bee ra a ? » ²¹ Ndaa lahte bēewí na wonu tih : « Bēyí yébitēh daa ham dī na woneeh deh ! Yébitēh mín wédís íl búumídf è ? »

²² Feedi yēwúdfē, bee

na nérsúu jébèlè jébèlú Koope Faam fi gaana ra lahte. Feedi baa húmú Yerusalem jamanii sosa. Jamanii baaha filib feeda, ²³ Yéésú na tiléesèh tígè nè wonuu Mbaar mi Salomoo di filib Faam fi gaana ra. ²⁴ Tígí daaha, yéwúdfè ayute gíwúté rí, wonu ri tih : « Fay home dee fu kúné affi fun níi kirih ? Daa fu yaha Buura Koo fal ri ra raa, won fun baaha ! » ²⁵ Di won wa tih : « Yee meelu so' don da, mi húmú wonte don di, ndaa don gémúy sè'. Añcañ, iña na pañ mi di tii Baaso' ra seedeyidte so', ²⁶ ndaa don gémúy sè', af bití don nènih harri so'. ²⁷ Harri so' yúhsúu un so' ; so' mi yúh wè, te wa ñeyuu tal so'. ²⁸ May waa on pesa na dúmèh rè. Mii waa mèssi ñak, te ow mínèh wèe naaf ya' so'. ²⁹ Baaso' daa déjéén sè' wè, te daa ri lukki gaan béeb. Ow mínèh naaf yin ya' Baaso'. ³⁰ Funi Baaso' daa lígínúu yínè. »

³¹ Wona' Yéésú uni bah, yéwúdfè yabaatute na píyú la' ay rii bëémé, ³² dī won wa tígí daaha tih : « Mi pañke iñi wunni caakki Baaso' daa nah so' wa. Yii bih di iñyah daa tah don na fahuu bëémí sè' a la' ? » ³³ Wa lofute ri wonu tih : « Fun fahuuy hawu húl bití fu pañ yin wun, ndaa bití fu solte Koope. Fu ow kut, fu na anti tík afu Koope a ? » ³⁴ Yéésú won wa tih : « Bíníyúté filib téeríi kootii ron bití Koope won tih :

“Don i koope.”[☆] ³⁵ Yee won Téerèe rè ow mínèh rii nís maan ? Bèewè Koope yulid woni waa na ra, dī wona' wa bití wa i koope neh a ? ³⁶ A so' fa Baaso' fal so', wol so' èldúnè rè, don wonuu bití mi sola' Koope soloo dīh di yee wona' mi bití mi Koy Koope ra ? ³⁷ Hena bití mi pagay yee nah so' Baaso' raa, ngènè gémí sè' ! ³⁸ Ndaa mi pañ wa raa, wuti don gémúy iña na won mi raa sah, gémí iña na pañ mi ra book, nda don ham affon bití Baaso' ee soo na, te mi ee dīi na. » ³⁹ Wona' Yéésú unni yah, wa yabaatute na fahuu hami, ndaa dī fússé wè.

⁴⁰ Yéésú kola' dah sayilte hatni yíníi laahi Yurden, tígè nè húmú bëtsè'Sanj Batis bëewè rè, dī hompe daaha. ⁴¹ I ow caak deefute ri daaha. Bèewè na wonantu hanndal ki wa tih : « Kimtaan yínè sah Sanj pagay ri, ndaa iña won dī sun fi bëyí bee ra béeb kaah. » ⁴² I ow caak gémúté Yéésú daaha.

11

Kolohi Lasaar búudé

¹⁻² Húmú laha' bëyí keente jér hínú Lasaar. Di húmú dék Betani, bani koy-yaayyi beleb Mari a Martaa. Mari daa belaa nay túmé laakkoloña kotti Yíkèe, an waa moos a fen fi ra. ³ Koy-yaayyi belebfi ana ya wolute ow woni Yíkèe bití kooji jéríid. ⁴ Kela' dī fi Yéésú baaha, tígí daaha dī won tih

☆ 10:34 10.34 Saame Kañaaya 82.6

: « Jéri Lasaar jér húlëe neh ; Koo ay ñeye na teeba' gaanaa ki ndami ; hen ðaaha raa, ndami so' mi Koy Koope yúhú. »

⁵ Yéésú húmú kooji Martaa, Mari a Lasaar. ⁶ Di filib yaaha bééß, kela' ri biti Lasaar jérif ðë, ði hompe tígë hom ði ðaaha ra ní hente waal ana, ⁷ ði antee won taalibe yi biti bani wa ñéerë' nimil Yúdee. ⁸ Taalibe yi wonu ri tih : « Bahaa, maañay-maañay rek fu na fahuu bëem a la' dín fë, fan naa faha' nimil a ? » ⁹ Di won wa tih : « Na' homa' wahtu sabboo a wahtu ana neh a ? Bëyí til na' ii kabinoh ndah ði ot kotti na niñi feey fi beh. ¹⁰ Bëyí til ñúus nék ay kabinoh ndah niña ính ðii na. » ¹¹ Filoon fi bee wona' ri unni yaa ra, ði baatte won wa tih : « Kooji yen Lasaar nee'te, ndaa may pay mi yúun dí. » ¹² Taalibe yi wonu ri tih : « Yíkëe, ði nee' nee'o saa ? Kon ði ay wah ! » ¹³ Taalibe ya habuu biti rek Yéésú won wa woni nee' pëní, ðeef ði won wa biti Lasaar húl húlë. ¹⁴ Tígí ðaaha, Yéésú millë' wëe won tih : « Lasaar húlté. ¹⁵ Don tahute keen so' sosse di yee ðeefay so' ri dín fë rë. Di laha' ri ðaaha daa nay tahe ðon gém. Këli yen lah ðii na ! » ¹⁶ Tígí ðaaha, Toomaa fa na ðëekúu Síisë rë won taalibe yi kayya tih : « Yen bal yen saañ hulé a kélfi yen ! »

¹⁷ Tíluu Yéésú a taalibe yi ní wa tíimuté gina ra, ði kelohte biti Lasaar

húlté ní nee'te waal iniil feey. ¹⁸ Betani wulaay a Yerusalem ; hanndal ki wa wadti hena kilomet éeyë. ¹⁹ I yëwúð caak ayute yéri Martaa a Mari na mësdú wë húlí koy-yaafi wa. ²⁰ Kela' Martaa biti Yéésú ee ac ða, ði saañce téebiléhí ; ndaa Mari tasse faam. ²¹ Tee'a' Martaa a Yéésú rë, ði won ði tih : « Fu homa ðee koon Yíkëe koy-yaaso' húléh. ²² Ndaa mi yúhté biti ní a ðeh, yii fu ðan ði Koope bééß, ði ay roo rii on. » ²³ Yéésú won ði tih : « Koy-yaafu ay koloh búudé. » ²⁴ Martaa won ði tih : « Mi yúhté biti ði ay koloh yiin nay kolee bëewë búudé rë biti ëldúnë túkkí. » ²⁵ Yéésú won ði tih : « Daa mi na këlif bëewë búudé, daa mi na on wa pes. Bëyí gém soo na wuti ði húl rëe sah, ði ay pes ; ²⁶ te bëyí në pes, gémpé së', ii mëssi húl. Fu gémpé baaha a ? » ²⁷ Martaa won tih : « Íi Yíkëe ! Mi gémpé biti daa fu Buura Koo fal ri ra, Koy Koope fa húmú wonu biti daa nay aye ëldúnë rë. »

²⁸ Filoon fi wonni yah, Martaa saañce ðeegí Mari koy-yaafi, mëddë'té rí won ði tih : « Yëeddëhë acce, te ri won fu ac fu tiil ri. » ²⁹ Kela' Mari woni bah, ði yíppëe koloh saañce téebiléhí Yéésú. ³⁰ Wahtii baa ðeef Yéésú haalay gina doom, ði húmú líis tígë tee'uu bani Martaa ra. ³¹ Yëwúððë húmú faam fa na mësdú Mari ra, oluu wa Mari yíppëe koloh na ðúh faam fa, wa ñeyute tala.

Wa habuu biti dī saañ looy luuyin. ³² Laha' Mari tígē hom Yéésú nūi ri otte ri ra, dī yedfohte kotta feey, won dī tih : « Fu homa dee koon Yíkēe koy-yaaso' húléh. » ³³ Ola' Yéésú Mari na foñ, bēewē ñéerúu a ri ra na fogu bal ra, keeña d'umpé ces, afa kúnēhté, ³⁴ dī meelte wa won tih : « Don dapuu ri dih ? » Bēewē wonu ri tih : « Bahaa, aye fu ot. » ³⁵ Yéésú yampe na looy. ³⁶ Tígí daaha, yēwúddē na wonu hanndal ki wa tih : « Ēlí di hómú faha' ri ri kan ! » ³⁷ Ndaa lahte yí na wonu waa na tih : « Di fa pay illí búumndē rē, dī mínéh kaa' Lasaar húl koon a ? » ³⁸ Keeñ Yéésú d'úmēette ces, dī lahte luuyin. Luuya, kili kúnúu a la' gaan. ³⁹ Di won bēewē tih : « Píníní la'a ! » Martaa koy-yaafi húlēhē won dī tih : « Búudé fē wadtee yah Yíkēe, hente waal iniil woteh, dī ee deh. » ⁴⁰ Yéésú won dī tih : « Mi wonay ro ri wono a ? Fu gém soo na raa, fay ot ndami Koope. » ⁴¹ Tígí daaha, la'a pínínúté, Yéésú béyídté afi, yeelte sun-Koo won tih : « Baap, mi na sím dē di yee taha' fu d'añi so' ra. ⁴² Mi yúhté biti wahtii dagaa mi ro bēeb fu tahid so', ndaa fu ot mi won dī sun, bēewí yee giwú sē' yee ra daa tah, nda wa gém biti daa fu wol so'. » ⁴³ Woca' ri woni baa ra, dī béyídté uni sun won tih : « Lasaar, dúhé deh ! » ⁴⁴ Lasaar fa hómú húl rē dúhté, kotta, ya' ya a afa bēeb líiwuté boy. Yéésú

won tígí daaha tih : « Nísí boyya faana don yeris dī tíl. »

Peeni hawi Yéésú húl
(*Saame Maccēe 26.1-5 ; Marka 14.1-2 ; Lúkkē 22.1-2*)

⁴⁵ Ow caak di yēwúddē hómú faam Mari te olute iña na pañ Yéésú rē, gémúté dīi na. ⁴⁶ Ndaa i ow waa na payute olute farisenña, bíllúté wē iña pañ ri ra. ⁴⁷ Tígí daaha, kélfé yí seeyoh ya a farisenña dēekuté bēy kēemí gaani yēwúddē bēeb, wonu tih : « Yen ay hene díh bal ? Bēyí bee ee pañ kimtaanni caakke ra dé' ! » ⁴⁸ Yen took yen olsee ri page iñyeh, bēewē bēeb ay gém dīi na, te bēy Rom ay koloh d'akaya' Faam fi gaani Koope a heedi yen ! » ⁴⁹ Lahte bēyí hínú Kayif waa na, kíilí baaha deef daa ri hómú seeyohi gaana, won wa tih : « Yin ínih affon ! » ⁵⁰ Don yíih biti ow yínē kut ñak ñíini ndah bēewē, daa gém biti heedi yēwúddē bēeb san'ku a ? » ⁵¹ Yee won dī baa ra kolaay dīi na nék. Kíilí baaha, bi daa ri hómú seeyohi gaana, Koope daa wondoh ri d'aaaha teeba'i biti Yéésú ay húlíd' heedi yēwúddē. ⁵² Te ri ii teem húlídí yēwúddē don, dī ay húlélé koyyi Koope bēeb, dī nēgírē' yee hasлуу ra, wa hen yínē.

⁵³ Kola'te yíin fin fa, kélfé yí yēwúddē habute biti wa ay hap Yéésú húl. ⁵⁴ Yii baa tahte dī wocce haal filib fi yēwúddē. Di kolohte saañce waal luufa di gina

na wonuu Efarayim ra, di hompe daaha a taalibe yi.

⁵⁵ Leba' Paagi yëwúdfë rë, ow caak di bëy gina koluute na suu bukutoh a sehi feeda Yerusalem. ⁵⁶ Wa homu filiḅ Faam fi gaana na saamu Yéésú, na meelantuu filiḅ fi wa wonu tih : « Di ayoh feeda aa di ayoh neh ? Don wonu yi na ? » ⁵⁷ Kélfë yí seeyoh ya a fariseḅna nahuute wonu tih : « Bëyí yúh tígë hom dī ra, teebaa ri, dī habu. »

12

Mari yúinté Yéésú laakkoloñ kot
(Saame Maccëe 26.6-13 ; Marka 14.3-9)

¹ Waal pëenë balaa feedi Paaga, Yéésú kolohte saañce Betani, tígë dék Lasaar fa dī húmú kélid dī búudé rë. ² Laha' ri daaha ra, dī pagirute ñam. Martaa daa na húmú norsa' ñama. Lasaar húmú non bëewë boku a Yéésú loon ra. ³ Mari nampee bëḅ bútéel laakkoloñ, yi yugusuu naarde kah-kah te kofeelte, bi mitte genwal lítër, yúinté wë kotti Yéésú, na an waa moos a fen fi. Faam fa bëḅ liiwëls'é té a ngedi laakkoloña. ⁴ Yudaas Iskariyot, ow di taalibe yi Yéésú, bee millé' rii yaay ra, won tígí daaha tih : ⁵ « Laakkoloñi yee yaayeeh héliis caak koon cadum fa yeru ñëkídfë è ? » ⁶ Yee won dī baa ra, dī wonday ri ñëkídfë dé' ! Biti ri lohoh te daa ri yef keesi wa, dī

núhë' në tílé sohle yi daa tah. ⁷ Yéésú won dī tígí daaha tih : « Baale jaambura afi ! Di waay hacadi so' daa tah di yef wa níi a deh. ⁸ Ñëkíd ii koloh filiḅ fon ; ndaa so' mi bee mii hom filiḅ fon dee faraah. »

Cañi yëwúdfë hawi Lasaar

⁹ I ow caak di yëwúdfë keluu wa biti Yéésú in Betani ra, wa suute dín fë. Af dī neh doḅ daa kúdf wë në, ndaa olaalohi Lasaar fa dī kélid dī búudé rë. ¹⁰ Tígí daaha, kélfë yí seeyoh ya habute biti Lasaar ay hawu húl bal, ¹¹ ndah af dī tahte yëwúdf caak helute wa, gémuté Yéésú.

Haali Yéésú Yerusalem
(Saame Maccëe 21.1-11 ; Marka 11.1-11 ; Lúkkë 19.28-40)

¹² Kéy fín fë, bëewí caakka húmú ayu feedi Paaga ra koluute biti Yéésú ee ac Yerusalem ra. ¹³ Wa saamute soor-soor, dúhuté gina na tébilúu rí, béyruté unni wa sun na njoobu ri wonu tih : « *Oosaanaa ! Koo-Yíkëe barkela bëe' dī wol ri ra ! Koo barkela buuri Israyel !* »* ¹⁴ Deef Yéésú húmú saampe cúmbúr mbaam. Di yaagohte sun ti di bíníyúu rí Téerëe bitih : ¹⁵ « *Ngënë néekíñi, don fi bëy Siyoḅ ! Élí ! Buuron ee ac da, yaagoh cúmbúr.* »* ¹⁶ Filiḅ fi iñyaaha bëḅ, taalibe ya húmú yíih iti fi wa ; ndaa tílé' níi Koope

* 12:13 12.13 Saame Kañaa ya 118.25-26

* 12:15 12.15 Saame Sakari 9.9

teeba'te ndami Yéésú rē, nuffi wa onte wa biti yee húmú bíníyú Téerēe rē won sun fi, te ri laha' dāaha. ¹⁷ Bēewē húmú a Yéésú na won dī Lasaar dūh nuja kēlídte rí búudé rē, bíllúté yee olu wa ra. ¹⁸ Daaha, ow caak keltuete biti Yéésú paŋke kimtaani bah, wa ayute téebilēhí. ¹⁹ Tígí daaha, farisenŋa na wonantuu filiḅ fi wa tih : « Yen mínih yin na ! Bēewē béeb űeyuu tala ! »

Gerekka na saamu Yéésú rē

²⁰ Bēewē ayu feeda Yerusalem jaamiyohi Koope ra, lahte Gerekki húmú filiḅ fi wa. ²¹ Wa lebuute Fílíp fi bēy Betsaydaa fa hom Galile ra, wonu ri tih : « Bahaa, fun fahuu oli Yéésú koon. » ²² Fílíp payte wonte Anndere baaha, wa béeb ana űéerúuté léhíní Yéésú. ²³ Wonuu wa ri baa ra, Yéésú won wa tih : « Wahtaa nay teebee Koope ndami so' mi Koy-bēe' rē lahte. ²⁴ Mee ron won kaaf ka ra ee : pep bele teem pep bele kep bití űíinē haaleh feey. Ndaa űíinē haal feey raa ay dūhíd' pep caak. ²⁵ Ti dāaha nen, bēyí pokoh űíiní ay rii űak ; ndaa bēyí kaa' pokohi űíiní ēldúnē fi beh ay lah pesa na dúméh rē. ²⁶ Bēyí hen sūrgíi sē' űeya tal so' ; te tígí hom mi, dī ay home na bal. Bēyí hen sūrgíi sē', Baaso' ay rii bēyíd'.

Woni Yéésú yii lenke húlí

²⁷ « Tígē homa' mi bee ra, af so' kúnēhté níi mi yéeh yii wona mi ! Mbaa may wone Baaso' biti sēmlē' sē' wahtii coono fa na saañ mii pese bee ra neh ? Ndaa coono fi baa daa tah mi ac feey nék ! ²⁸ Kon Baap, teebee ndamu ! » Tígí daaha, un dofohte sun won tih : « Mi teeḅpe bēewē ndami so' níi wocce, te may waa rii teeḅaat. » ²⁹ Bēewē húmú daaha keluu űa ra wonu tih : « Yaa híníŋ ! » Lahte yi wonu tih : « Malaaka daa won dīi na ! » ³⁰ Ndaa Yéésú won wa tih : « Uni baa wonḅuy so', wonḅu ḅon ! ³¹ Wahtaa wadti aattiyuun ēldúnē rē lahte ; kēlfēe hom afa ra ay líkú leegi. ³² Te so', mi bēyrú mi paa' feey fa sun raa, may héc bēewē béeb soo na. » ³³ Wonee ke Yéésú bah, dī teeḅa' dee nay rii húlée rē. ³⁴ Bēewē wonu ri tih : « Yee yoodu fun téeríi kootii yen ra biti Buura Koo fal ri ra ay pese peso faraah. Kon fu wona' biti Koy-bēe' ay keru sun dīh ? Koy-bēe' fē wah ? » ³⁵ Dī won wa tih : « Níiűa ee filiḅ fon ndaa ri tallaay yin caak. Kon tíli níiűa bee homa' ri ḅon na bee ra, toñeh űúusē beetti ron, ndah bēyí tíl űúus yéeh tígē na saañ dī ra. ³⁶ Gémi níiűa bee homa' ri filiḅ fon ḅa, nda ḅon hen bēy níiűa. »

Wona' Yéésú iñyaa níi wocce ra, dī hécēhté, dapohte wa.

Kaa'a'i yēwúddē gém

³⁷ Kimtaanna paŋ Yéésú fíi bēewē rē béeb, taheh wa

gém dí. ³⁸ Yee húmú won yonente Isayii ra laha'te dah. Di húmú won tih :

« *Yíkée, daa gém yee wonu yen ra ?*

Yíkée, fu teeb bídí ya'u wah ? »✧

³⁹ Isayii wonte yee tah bëewë mínih gém rë, won tih :

⁴⁰ « *Koope búumílté wë,*

súhílté keeñni wa,

toñeh wa ay ole,

keeñni wa ay kúnsée ndín

wa lof pesad, mi pay wa yee homuu wa ra. »✧

⁴¹ Isayii húmú wona' Yéésú bín fë, ðeef dí séenté ndami. ⁴² Filiß fi yaaha béeb, kaa'eeh ow caak di kélfë yí yëwúddë gémúté Yéésú. Ndaa bi helu wa nuf farisenja na, wa kaañuy rii teeba' toñeh wa ay líkú tígë

na ðaguu yëwúddë Koope ra, ⁴³ ndah biti ow daa kaña wa, daa génël wë biti Koope daa kaña wa.

Iña won Yéésú rë daa na aattiya'

⁴⁴ Yéésú béyídté uni won tih : « Bëyí gém soo na, gémëy soo na don, ði gémpé bëe' wol so' ra bal. ⁴⁵ Bëyí ot so', ðeef otte bëe' wol so' ra.

⁴⁶ So' mi ac ëldúnë hawaanri bëewë, nda bëyí gém soo na dékéeh ñuusë. ⁴⁷ Bëyí keloh woni so' te ri ñeyeh na, daa may ri daane neh, ndah mi ac sëmlë'í bëy ëldúnë ndaa daani wa neh. ⁴⁸ Bëyí fahaay soo ot te kaa'a'te keloh woni so', iña won mi ra nay rii aattiyee yiin nay túkkíyë

ëldúnë rë. ⁴⁹ Nagajek, mi kolaay koloo rek mi na won, Baaso' fa wol so' ra daa túuy sè' won iña yëeddë' mí rë.

⁵⁰ Te mi yúhté biti yee túuyë' rí rë daa na ona' pesa na dúmëh rë. Ti ðaaha nen, iña na won mi ra, mi wona' wa ti di naha' so' wa Baaso' nen. »

13

Hosi Yéésú kotti taalibe yi

¹ Bisa míllë' balaa Paagi yëwúddë rë lahte. Yéésú yúhté biti wahtaa wad' ðii koloh ëldúnë, ði ðeefid Boffi ra lahte. Di mëssi faha' bëewëe ké rí nay rii hele feey fa ra fahoo. Te ri teebpe wa ðee faha' ri wa níi tígí teem faha' ra.

² Yéésú a taalibe yi homu reer, ðeef Seytaanaa bekke Yudaas koy Simon Iskariyot nufa nay rii yaayee Yéésú rë.

³ Yéésú yúhté biti Boffi tíkké iña béeb ya'i, ði yúhté biti bal ði kola' ðii na te ri ay nimile ðii na. ⁴ Daaha, ði kolohte loona, nissé búubí, bebbe ndiimú moosaa pokke kinohi, ⁵ antee beb if, túmpé muluþ, ñeete taalibe yi na, na hos kotti wa ; bi ri hosid' ði kotti béeb, ði moosid' ði wa a ndiimëe pok ði kinohi ra.

⁶ Laha' ri Simon Peer na ra, Peer won ði tih : « Do fi Yíkée, fu hosid' so' kotti so' a ? » ⁷ Yéésú won ði tih : « Fu yéeh iti fi yee na pañ mi ra doom, fay rii yúhé fayu. » ⁸ Peer won ði tih : «

Damaay fu hosde so' kotti so' ! » Yéésú tahte won dī tih : « Mi hosday ro kottu raa, deef hanndal ki yen dúmpé. »⁹ Peer won dī tih : « Kon Yíkée, ngana teem kotti so' kut, lahe níi ya' yi so' a af so' bal ! »

¹⁰ Yéésú won dī tih : « Bèyí kola' boohoh, faana béeb lante, sohlaay dī boohlee*. Don fi yee don ladute, ndaa don béeb daa ladu neh. »¹¹ Deef Yéésú yúhté bée' nay rii yaaye ra, daa tah dī won biti wa béeb daa ladu neh.

¹² Hosa' Yéésú kotti taalibe yi níi wocce ra, dī bekaatte búubí, tookaatte loona, antee waa won tih : « Don yúhú iti fi yee pagid' mi ron ra a ? »¹³ Don dèekúu sè' yèeddèh a Yíkée, te don wonu kaah, mi dī.¹⁴ Hém so' mi Yíkèen, so' mi yèeddèhèn, daa mi hos kotton raa, kon don waruttee hosanta' kot hanndal kon bal.¹⁵ Don ot mi pagid' don yii bah, deef mi faha' biti don pagee ri daaha.¹⁶ Mee ron won kaaf ka ra ee : sùrgè lukeh kèlfii gaan, bée' wolu ra lukeh bée' wol ri ra gaan.¹⁷ Bee yúhúu ron iñyaa leegi ra, don ñee na raa, keeñnon ay sos.¹⁸ Mi wonaay don béeb nék ! Mi yúh bèewè tanis mi ra. Ndaa yee bíníyú Téerèe rē wadti laha laho. Téerèe won tih : *“Bèe' funi woruu mbúurú sè' rē, daa millè' hen kaa'ohi*

so'.”¹⁹ Mi wonte ron baaha abah balaa wahtaa lah. Hen daa wahtaa lah raa, don ay gém biti daa mi²⁰. Mee ron won kaaf ka ra ee : bèyí tah bèyí daa mi wol ri a ya' ana, deef dī tah so' ; te bèyí tah so', deef dī tah bée' wol so' ra. »

Bèe' nay yaaye Yéésú rē
(Saame Maccèe 26.20-25 ; Marka 14.17-21 ; Lúkkè 22.21-23)

²¹ Woca' Yéésú woni baa ra, afa kúnèhté pak, dī won tih : « Mee ron won kaaf ka ra ee : ow di don na ay soo yaay. »²² Taalibe ya yíih bée' na wona' Yéésú rē, wa na yeelantuu affi wa.²³ Ow di taalibe ya, kooji Yéésú, húmú hēbísí.²⁴ Tígí daaha, Simoñ Peer panke yodad', nahte ri meel Yéésú bée' na wona' ri ra.²⁵ Taalibee sígimpé nuf Yéésú, meelte ri won tih : « Fu wona' wa Yíkée ? »²⁶ Yéésú loffe won tih : « Mee saañ soop mbúurú loona ra ee : bée' nay mi rii yere ra, dī bèyí baaha. » Tígí daaha, Yéésú bebpe mbúurú, sooppe ri loona, yedte ri Yudaas fi Simoñ Iskariyot.²⁷ Yudaas na tah mbúurèe, Seytaane na haal ri. Yéésú won dī tih : « Yee nay fuu page ra, page ri gaaw ! »²⁸ Ow yínè sah di wa fi taalibe ya húmú loona ra, yéeh yee faha' rii won da.²⁹ Bi Yudaas daa yef keesi wa, i ow waa na habuu biti Yéésú nah ri pay

* **13:10** 13.10 sohlaay dī boohlee : Bèewè húmú ñeyaatu unni yee bín fē wora' i wa bèewè rē, lahte na yi húmú bíníyú yii beh : henay hosi kotta, sohlaay dī boohlee. ☆ **13:18** 13.18 Saame Kañaa ya 41.10 ☆ **13:19** 13.19 Saame Kolohi koyyi Israyel Ésip 3.14-15

saam iña nay waa sohlee feeda ra, mbée nah ri komi ñëkíddë sarah. ³⁰ Taha' Yudaas mbúurée rë, dī yíppée dūh ëssín. Wahtii baaha deef Koo elekke.

Túuyë'í hasa

³¹ Dúhë' Yudaas ëssín dë, Yéésú won tih : « Leegi Koope teeḃa' ndami so' mi Koy-bëe', mi teeḃa' ndami dī fi Koope. ³² [Te mi teeḃa' ndami Koope raa,] Koope ḃal ay teeḃa' ndami so', te ri yuloh pañi, maañlay. ³³ Yee talla' mi hom filiḃ fon ḃa gaanlay yaawe ! Don ay soo saam, ndaa cëe mi won ḃon yee won mi yëwúddë rë : ḃon mínih lah tígë në saañ mi ra. ³⁴ Mee ron yed' túuyë' has ḃa ee : lah fëhëntii hanndal kon. Di faha' mi ron, lah fëhëntii ḃaaha hanndal kon. ³⁵ Don fahanta' hanndal kon raa, tígí daaha bëewë béeb ay yúh biti ḃon taalibe yi so' . »

Woni Yéésú biti Peer ay taasa' yúhi

(*Saame Maccëe 26.31-35 ; Marka 14.27-31 ; Lúkkë 22.31-34*)

³⁶ Filoon fi baaha, Simon Peer meelte Yéésú won tih : « Fu saañ dī Yíkëe ? » Di loffe Peer won tih : « Tígë homu yen bee ra kep fu mínëh ñee tal so' nūi fu lah tígë na saañ mi ra, sehe nūi fayu, fay naa lah. » ³⁷ Peer won dī tih : « Yíkëe, yi tah mi mínëh ñee talu leegi ? Mi tahte ñagi ñiin së' ndah ḃo ! » ³⁸ Yéésú won dī tih : « Fu won kaah biti fu tahte ñagi ñiinú ndah so' a ? Mee roo

won kaaf ka ra ee : añcañ, fiisiin ki paan, fay taasa' biti fu yúh së' nūi hen waal éeyë. »

14

Yéésú daa waala yulid' Boffa na ra

¹ Yéésú antee won taalibe yi béeb tih : « Af-fon ḃanay kúnëh ! Gémí Koope, te ḃon gém së' ḃal ! ² Faam Baaso' hanke ; may pay mi waayid' ḃon tígí nay ron home. Henay baa koon mi wonëh ron dī ! ³ Mi pay mi waayid' ḃon dī nūi woc ḃaa, may nimil mi kali ron. Hen ḃaaha raa, tígë nay mii home ra, ḃon ay home na ḃal. ⁴ Don yúhú waala yulid' tígë na saañ mi ra. » ⁵ Toomaa won dī tígí daaha tih : « Yíkëe, fun yiih tígë na saañ fu ra, fun ay yúhëe waala yulid' na ra díh ? » ⁶ Yéésú won dī tih : « Daa mi waala, daa mi kaaf ka, daa mi na ona' pesa. Ow mínëh pay Boffa na te ñeyeh soo na. ⁷ Don yúhú së' rëe kay, ḃon ay yúh Baaso' ḃal ! Te dala'te woteh, ḃon yúhúté ri te ḃon olute ri ! »

⁸ Fílíp won dī tígí daaha tih : « Yíkëe, teeḃ fun Boffa kut, fun sohluuy yin kay. » ⁹ Yéésú won dī tih : « Fílíp, maaña maañ mi filiḃ fon ḃa béeb fu yéeh së' doom a ? Bëyí ot so', deef otte Boffa ! Kon fu wona' biti mi teeḃ ḃon Boffa díh ? ¹⁰ Fu gémëy biti mee Baaso' na, te ri ee soo na a ? Unna won mi ḃon ra béeb, kolaay soo na, dī fi Boffa hom soo na ra kay

daa na paŋ légéyí. ¹¹ Gémi sè' di yee wona' mi biti mee Baaso' na, te ri ee soo na ra. Don gémúy unna won mi don yaa raa, iña na paŋ mi ra wadtee tah don gém book ! ¹² Mee ron won kaaf ka ra ee : bëyí gém sè', dī fi bëyí baa bal ay paŋ iña na paŋ mi ra. Di ay paŋ yi luk waa gaan sah, ndah mi saañ Boffa na, ¹³ te yii don daŋ dī bééβ, don ñeya' ri tii so', may ron rii pagid, nda so' mi Koy ka mi teeβa' ndami Boffa. ¹⁴ Yii don daŋ dī, don ñeya' ri tii so', may rii paŋ.

Gapa'i Yéésú Ruuh-Peseŋ

¹⁵ « Don faha' so' raa, don ay ñee iña na túuy mí don da. ¹⁶ Daaha raa, may daŋ Baaso' kom don Dímléh kay, bi ay home don na faraah. ¹⁷ Daa ri Ruuha na teeβ bëewë kaaf ka ra. Bëewë feey fi bee mínih rii haba' Dímléh, ndah wa oluy ri, wa yíih rí. Don nék, don yúhú rí ; dī ee filib fon te ri ay home ow fi ow don na faraah. ¹⁸ Mii ron yedda' baayu, may ayaat don na. ¹⁹ Tasse yutuud fii bëewë feey fi bee ii soo olil, ndaa don ay ot biti mee pes da, te don bal don ay pes. ²⁰ Bín fë rëe, don ay yúh biti mee Baaso' na, don ewu soo na, te mi ee don na. ²¹ Bëyí ham iña na túuyè' mí rë afi te ri ñee na, deef bëyí baa faha'te so'. Bëyí faha' so', Baaso' ay rii faha' ; so' bal may rii faha' te may rii teekiroh. »

²² Taalibee na wonuu Yudaas, bokaay a Yudaas

Iskariyot ra, won Yéésú tih : « Yíkëe, yi tah fay teekiree fun, fi teekiroh bëewí kayya ? » ²³ Yéésú won dī tih : « Bëyí faha' so', ay ñee iña na won mi ra ; Baaso' ay faha' bëyí baaha, te funi Baaso' ay haal dīi na, fun dék dīi na. ²⁴ Bëyí fahaay so', na ñeyeh iña na won mi ra. Te iña na keluu don maa won wa ra, kolaay soo na, wa kola' Baaso' fa wol so' ra.

²⁵ « Mi won don iñyah bee homa' mi leeloon bee ra. ²⁶ Lahte Dímléhí ee ac filoon fi so' ra, daa ri Ruuh-Peseŋ fa nay wolee Baaso' di tii so' ra. Di nay ron yeeddé bééβ, dī nédís don iña won mi ron ra bééβ. ²⁷ Mi saañ sayo, ndaa may ron helid jaamma, jaamma laha' mi ra. Mii ron rii hella' ti di na paguu ri bëy éldúnë nen. Affon banay kúnëh, te ngënë tíití. ²⁸ Don keluute woni so' ron biti mi saañ sayo ndaa may ayaat don na ra maan ? Don faha' so' koon, saaña na saañ mi Baaso' na ra, keeññon ay naa sose soso. Mi saañ Baaso' na, Baaso' fa luk soo gaan da. ²⁹ Mi wonte ron baa leegi balaa iñyaa lah, nda bín fë rëe, don gém. ³⁰ Mii wonil caak a don, ndah kélfii feey fi bee ee ac da. Di mínéh yin soo na, daa may rii yeddee yee nay lahe ra. ³¹ Yaaha bééβ, nda bëewë yúh biti mi faha'te Baaso' te mi paga' yee na nah ri so' ra. Kèlíi yen saañ ! »

Yéésú daa tal béeñi kah-kah fa

¹ Yéésú wonil tih : « Daa mi tal béeñi kah-kah fa, te Baaso' daa na tooppitoh tal béeñe. ² Ya'i tokoh so' mi tal béeñe béeb te límey, Baaso' ay rii lec. Ndaa bi na lím, dī ay rii yugus níi lan, dī baatti lím. ³ Don fi yee nék, don yugusute níi don ladute. Unna won mi ron ra daa yugus don níi don madute daa lan. ⁴ Kon pēkii soo na ti di poka' mi don na nen. Ya' béeñi tokaay tala, bani afi kep dín mínéh lím ; ti daaha nen, don a affon kut don mínih dúhíd njiriñ hém don pokuuy soo na.

⁵ « Daa mi tal béeñe, don daa ya' ya. Bēyí pokoh soo na, te mi pokoh dīi na ay dúhíd njiriñ mi gaante. Don mínih pañ yin deefa don pēkiih soo na. ⁶ Bēyí pokaay soo na ay betu ti ya' béeñi lecu leco, betute súhté nen ; ya' yi béeñi man dah ay lu-uhu luuho, betu kii wa tam. ⁷ Don pokoh soo na, te don ham unni so' don na raa, dēgí yii neba' ron, don ay rii liil. ⁸ Ndami Baaso' yúhúu biti don dúhíd njiriñ caak, don teeβa' biti don taalibe yi so'. ⁹ Di faha' so' Baaso', mi faha' ron daaha. Pésii filib faha'a faha' mi ron ra. ¹⁰ Di ñeya' mi túuyē' yí Baaso', mi na pes filib faha'a faha' dī so' ra, don ñee túuyē' yí sē' rēe, don ay pesee daaha filib faha'a faha' mi ron ra.

¹¹ « Don ot mi won don yii bah, mi faha' biti sosi

keeñ so' hom don na, te sosi keeñon mit sēk. ¹² Túuyē'í sē' daa ri beh : Di faha' mi ron, lah fēhēntii daaha hanndal kon. ¹³ Lahay bēyí faha'te ow níi luk bēyí tah yera'i ñiini af kooyyi. ¹⁴ Don pañ yii won mi don raa, deef don kooyyi so'. ¹⁵ Mii ron dēekiil sūrgē, ndah sūrgē na yēeh yii pañ kēlfii. Mi dēekē' rēn kooy, ndah mi teeβpe ron iña kola' mi Baaso' na ra béeb. ¹⁶ Don neh daa tansu so' ; daa mi tanis ron. Daa mi fal ron, mi wolte ron, don dúhíd njiriñ, njiriñ mi na dúméh. Hen daaha raa, yii don dañ dī béeb, don ñeya' ri tii so', Baaso' ay ron rii on. ¹⁷ Filib iñyaa béeb, mi faha' woni ron biti lah fēhēntii hanndal kon.

Taalibe ya a bēewē feey fi beh

¹⁸ « Don ot bēewē feey fi bee kaa' ron, yúhí biti wa dēbúu kaa' so'. ¹⁹ Don nonun bēy feey fi bee koon, tin wa ay ron faha' ndah don nonu waa na. Ndaa mi tanisse ron mi dúhídté rēn waa na, tahte don nēnlíh waa na. Yii baa daa tah wa kaa' ron. ²⁰ Nérsii yee húmú won mi ron biti sūrgē lukeh kēlfii gaan da. Bēewē mok-lute so' raa, kon wa ay ron mokil ; yee ñeyu woni so' ra ay ñee wonnon bal.* ²¹ Yii wa pañ dī don béeb daa mi tah, ndah wa yiih bēe' wol so' ra. ²² Hena biti mi ayay te mi wonay a wa koon, tin wa ii habuu bakaaroh. Ndaa

* 15:20 15.20 Saame Maccēe 10.24

tigè homuu wa bee ra kep, wa lahluy layaa. ²³ Bëyí kaa' so', dëef kaa'a'te Baaso' bal. ²⁴ Hena biti mi pagay kimtaanni ow kay mësëy wëe paŋ fii wë koon, tin wa ii habuu bakaaroh. Leegi wa olute kimtaanni so', wa anuttee kaa' funi Baaso' bëeḅ. ²⁵ Yee bíníyú téeríi kootii wa ra laha'te dah. Bíníyúté bitih : *"Yee kaa'uu wa so' ra lahay dalaá !"* ²⁶ Dímléhí ron ac ayo : daa ri Ruuha na teeba' kaaf ka ra. Ruuha kola' Boffa na. May ñee'ee Baaso' na mi wola' ron ri, te ri ay soo seedeyid. ²⁷ Te don bal, don ay soo seedeyid ndah yen daa húmú dalaana níi a deh. »

16

¹ Yéesú baatte won tih : « Don ot mi won don yii bah, nda don banti sélít. ² Yúhí biti don ay líkú íllyyë na d'aguu yëwúdfë Koope ra ; te ay tíl níi sah, bëyí yahti ron bëem ay rii habee biti jaamiyoh Koope. ³ Biti wa yíih Boffa te wa yíih so' bal daa nay tahe wa paŋ yii baaha. ⁴ Mi won don yii baaha biti lah na bín fë rëe, don nérsëh yee húmú won mi ron ra. Biti mi mëssí homleelon daa tah mi wonay ron yin na daluu yen ñéeré' bín fë níi a deh.

Pagad'fi Ruuh-Pesey

⁵ « Leegi mee saañ bëe' wol so' na ra, te ow di don na meelay so' tigè nè saañ mi ra. ⁶ Yee won mi don baa ra tahte keeññon d'umpé

ces. ⁷ Añcaŋ, mi won don kaah : biti mi saañ daa gén don na. Nagajek, mi saay raa, Dímléhë wadti ac don na ra ii ayil ! Ndaa mi saañ daa, may ron d'ii wola'. ⁸ Te ri ac daa, di ay teeb bëy ëldúnë biti wa homuy kaah di yii lenke dee na oluu wa bakaad' da, dee na oluu wa júb dë, a dee na oluu wa aattiya' ra : ⁹ wa homuy kaah di yii lenke bakaad', ndah wa gémúy së' ; ¹⁰ di yii lenke júb, ndah mee saañ Baaso' na ra, te don ii soo ollil ; ¹¹ di yii lenke aattiya', ndah kélfií feey fi bee daanute níi wocce.

¹² « Mi talla'te iñi caakki wona mi ron, ndaa tigè homuu yen bee ra kep wa dameh affon. ¹³ Ruuha na teeba' kaaf ki Koope ra ac daa, di ay don ñéyíd' kaaf ka bëeḅ. Iña nay rii wone ra ii kola' d'ii na, di ay wone iña keloh ri ra, di teeb don yii nay lahe. ¹⁴ Daa ri nay teebee ndami so', ndah di ay beyee iña soo na, teeb don wa. ¹⁵ Yii Baaso' daa laha' ri bëeḅ, daa mi laha'. Daa tah mi won don biti Ruuha ay beyee iña soo na, teeb don wa. »

Yee nay yíssiré súfúñ fë sos-keñ ra

¹⁶ Yéesú wonil taalibe yi tih : « Tasse i waal fii don ii soo ot, tíkëh i waal don an soo olaat. » ¹⁷ I ow di taalibe yi na wonantuu hanndal ki wa tih : « Di faha' won yi biti tasse i waal yen ii rii ot, tíkëh i waal raa

yen an dīi olaat ? Di faha' won yi biti bal dī saañ Boffa na ? »¹⁸ Wa na wonaaluu wonu tih : « I waal fi bah, dī faha' won yi na ? Ow yéeh yee na faha' rii won ra kat ! »¹⁹ Yéésú otte biti wa fahuu meeli, dī won wa tígí daaha tih : « Yee wona' mi ron biti tasse i waal don ii soo ot, tikèh i waal raa don an soo olaat ra, don meelantuu baaha a ? »²⁰ Mee ron won kaaf ka ra ee : don ay foŋ don hawoh, deefa bëy ëldúnë homun sos-keñ ; don ay súfúñ lool, ndaa súfúñ fë ay yíssëh sos-keñ.²¹ Loo bëleb ham raa na misik dīi na, ndah deef lowa daa lah ; dī múc dëe nék, dī hal misiga keeña sos níi sos, ndah dī kúdté koy ëldúnë.²² Don bal, tígë homuu don bee ra, don homuu misik a súfúñ ; ndaa may ron olaat, keeññon ay sos te ow ii mín kaa' keeññon sos.²³ Bín fë rëe, don ii soo meellil yin. Mee ron won kaaf ka ra ee : yii don daŋ dī bëeb, don ñeya' ri tii so', Baaso' ay ron rii on.²⁴ Níi a deh, don ñeyuy tii so' don dagute yin. Mantee dëgí, don ay liil ; daaha, keeññon ay sos dotooy. »

²⁵ Yéésú antee tik won tih : « Iña won mi ron yaa ra bëeb, mi ñeya' wa léeh. Wahtu ín ac fii rë nék mii ron wonliil daaha, may ron wonee iñi Baaso' bëñéet.²⁶ Bín fë rëe, don ay ñee'ee tii so' don daŋ Boffa. Mi wonay ron biti may ron dagire dīi na, don daa nay dagire affon.²⁷ Di fi

Boffa faha'te ron ndah don fahuute so', te don gémúté biti daa ri wol so'.²⁸ Mi kola' Boffa na mi acce ëldúnë. Leegi may koloh ëldúnë, mi nimil Boffa na. »²⁹ Taalibe yi wonu ri tígí daaha tih : « Di deh ! Fu wonte wonni lante te fu ñeyaay léeh.³⁰ Biti fu yúh bëeb te sohlaay ow meelle ro yin, haalte affi fun leegi, daa tah fun gém biti fu kola' Koope na. »³¹ Yéésú won wa tih : « Don wonu kaah biti don gémúté leegi a ? »³² A' ! Wahtaa ee saañ lahe ra kat, te ri lahte níi wocce, wahtaa nay ron hasлуу ra, ow fi ow don na bëeb nimil faam wa, don hel so' njunduŋ ! Añcaŋ, mi homay a af so' njunuŋ kat, ndah Baaso' ee hëbís së' !³³ Don ot mi won don iñyah, nda don pokoh soo na, don lah jaamma. Don ay mok ëldúnë nék ! Ndaa lah hëbí híin, mi banke nguur ki ëldúnë ! »

17

Dagiri Yéésú taalibe yi

¹ Wona' Yéésú iñyaa níi wocce ra, dī béyídté aŋi sun won tih : « Baap, wahtaa lahte : teebee ndami so' mi Koohu, nda mi mín teeba' ndamu bal.² Fu onte so' sañ-sañ sun fi bëewë bëeb, nda mi mín on bëewë dénjeen fú së' rë bëeb pesa na dúmëh rë.³ Pesa na dúmëh rë nék, toka' níil yúhí do fi Koope fi kah-kah fa yínë kut da, a yúhí so' mi Yéésú-Kiristaa fa wol fu ra.⁴ Mi panke légéyë nah fu so' ra, mi teeba'te ndamu feey fa.⁵ Baap, kon

leegi on so' ndam hēbísú, ndama h́mú laha' mi d́oo na, na lahay ēldúnē doom ra.

⁶ « Bēewē bēb fu ēldúnē fu déjéenté sē' wē rē, mi teebpe wa daa fu wah. Daa fu laha' wa, fu déjéenté sē' wē, wa ñeyute wonu.

⁷ Leegi, wa yúhúté bití iña on fu so' ra b́éeb kola' d́oo na. ⁸ Mi wonte wa unna won fu so' ra, te wa tahute wa. Wa yúhúté bití mi kola' d́oo na kah-kah, wa gémúté bití daa fu wol so'. ⁹ Af wa daa tah mi na d́aŋ d́o. Mi d́agiray b́eewē feey fi beh, mi d́agid' b́eewē déjéen f́ú sē' rē, ndah wa yuu. ¹⁰ Yii lah mi b́éeb daa fu laha', te yii lah fu b́éeb daa mi laha' ; te ndami so' feeñce waa na. ¹¹ Tasse yutuud' mii homil ēldúnē ; mi yuloh d́oo na, ndaa wa fi yeh, wa lísú ēldúnē. Baap, d́o fa sela ra, níirée wē tii gaanu, bee on fu so' ra, nda di ĺiginúu yen ana yen henute yínē, wa hen yínē d́aaha. ¹² Homa' mi a wa ra, mi h́mú níirē' wē a tii gaanu, bee on fu so' ra. Mi níidté wē, te ow múuyēy waa na, henay b́ee' wadti múuy d́ē, nda yee won Téerēe rē lah.

¹³ « Bi leegi mi yuloh d́oo na, mi won wa iñyah bee lís mí ēldúnē bee ra, nda sosi keeña laha' mi ra hom waa na, keeññi wa sos dotooy. ¹⁴ Mi ĺéhínté wē yee won fu so' ra, b́ey ēldúnē anutee waa kaa', ndah wa nēnín b́ey ēldúnē tí so' nen. ¹⁵ Mi d́aŋ d́o bití fu sēmlē' wē ya' Seytaane, ndaa bití fu kélid'

wē ēldúnē neh. ¹⁶ Wa nēnín ēldúnē tí so' nen. ¹⁷ Bukutee wa kaaf ka, wa hen yuu ; wonu daa kaaf ka. ¹⁸ Mi wolte wa ēldúnē tí di wola' fu so' ēldúnē nen. ¹⁹ Af wa tahte mi jébélté rē af so' mi hente buu, nda wa bukutoh kaaf ka raa, wa hen yuu bal.

²⁰ « Mi d́agid' wa neh dón, ndaa a b́eewē nay soo gémé filoon fe ndah iña nay wone wa fi yee sun fi so' ra. ²¹ Baap, mi d́aŋ d́o bití wa b́éeb hen yínē. Di homa' fu soo na mi hompe d́oo na, wa bal homuun yen na d́aaha. Hen d́aaha raa, b́ey ēldúnē ay gém bití daa fu wol so'. ²² Ndama on fu so' ra mi onte wa ri, nda wa hen yínē tí di henuu yen yínē nen, ²³ mi hom waa na, fu hom soo na, wa b́éeb bok hen yínē. Hen d́aaha raa, b́ey ēldúnē ay gém bití daa fu wol so', te fu faha'te wa tí di faha' fu so' nen. ²⁴ Baap, tígē na saañ mi ra, mi faha'te bití b́eewē déjéen f́ú sē' rē hom na bal, nda wa ot ndama on fu so' ra, ndah fu maañcee soo faha' balaa ēldúnē saku. ²⁵ Te Baap, d́o fa júb d́ē, b́ey ēldúnē yíih rē, ndaa mi yúh rē, te b́eewée ke so' yee yúhúté bití daa fu wol so'. ²⁶ Mi teebpe wa níi wa yúhúté daa fu wah, te may waa rii baatti teeb, nda faha'a faha' fu so' ra hom waa na, te so' bal mi hom waa na. »

18

Hami Yéesu
(*Saame Maccée* 26.47-56 ; *Marka* 14.43-50 ; *Lúkké*

22.47-53)

¹ Wona' Yéésú iñyaa ní wocce ra, di kolohte dah bani taalibe yi húusúté húlbí Sedoron, haalute meey daaha. ² Di fi Yudaas fa nay rii yaaye ra yúh hatni baaha, ndah Yéésú a taalibe yi na húmú nëfih daaha. ³ Di kúdté goomal soldaar a i wohoh di Faam fi gaani Koope yi yéjké biti kélfé yí seeyoh ya a farisenja daa yeru ri wa. Wa ayute, kúréelúuté i lampa, kocom hawaanaa a ganaay. ⁴ Bi yúh Yéésú iña nay rii kate ra béeb, di lebohte wa won wa tih : « Don saamu wah ? » ⁵ Wa tahute wonu ri tih : « Fun saamu Yéésú fi bëy Nasaret. » Di won wa tih : « Daa mi ! » Yaaha béeb, deef Yudaas fa na saañ dñi yaaye ra húmú filiḅ fi wa. ⁶ Yéésú na won wa bitih « daa mi » rek, wa sajalute, lasuute feey. ⁷ Yéésú meelaatte wa won tih : « Don saamu wah ? » Wa wonu ri tih : « Fun saamu Yéésú fi bëy Nasaret. » ⁸ Di wonaat wa tih : « Mi wonte ron ri koon, daa mi ! Don saamun so' kut daa, yéddí bëewi yee saañ. » ⁹ Yee húmú won Yéésú rë laha'te dah. Di húmú won tih : « Baap, mi ñakay ow yínë sah di bëewë déjéén fú sè' rë. » ¹⁰ Deef Simon Peer kúdté jépíl. Di yíppée ríi fúul, paanke ri súrgíi seeyohi gaana, lecce nufi ñamaa fa. Súrgëe nufa lecu ra hínú Malkus. ¹¹ Yéésú won Peer tígí daaha tih : « Nimilire jépílú mbari ! Gulii coono fa yed' so' Baaso' ra

mi waray rii han waro a ? »

Kúrí Yéésú fii Haan

(Saame Maccëe 26.57-58 ; Marka 14.53-54 ; Lúkkë 22.54)

¹² Soldaarra a kélfii wë, a wohoh yi Faam fi gaani Koope habute Yéésú tígí daaha, pokalsuute ri a nih. ¹³ Wa débúu ríi kúdf faam Haan. Haan daa pacool Kayif fa húmú seeyohi gaana kiilí baaha ra. ¹⁴ Di fi Kayif daa húmú won yëwúddë biti ow yínë kut ñak ñíini ndah bëewë daa gén.

Taasa'i Peer yúhí Yéésú

(Saame Maccëe 26.69-70 ; Marka 14.66-68 ; Lúkkë 22.55-57)

¹⁵ Na kúru wë Yéésú faam seeyohi gaana ra, Simon Peer a ow kay di taalibe ya ñeyute tala. Bi yúh seeyohi gaana taalibii bah, tahte di fi taalibee a Yéésú daa hëeltú filiḅ faam fa. ¹⁶ Ndaa Peer húmú ëssín, hëbís ilë. Tígí daaha, taalibee koon dúhté, wonte a belaa na woh ilë rë, bekke Peer filiḅ. ¹⁷ Belaa won Peer tih : « Do fi bee bal, fu noneh taalibe yi bëyi bee nagajek a ? » Peer won dí tih : « Mi noneh na dé' ! »

¹⁸ Bi húmú sos Koo, súrgë yë a wohoh ya kéddúté kii na yoonnduu ; Peer hompe a wa na yoonndoh bal.

Yéésú fii Haan

(Saame Maccëe 26.59-66 ; Marka 14.55-64 ; Lúkkë 22.66-71)

19 Seeyohi gaana* yampe na meel Yéésú yii lenke taalibe yi na a yee na yéeddé' rí rē. 20 Yéésú won dī tih : « Iña won mi ra, mi wona' wa sun bēewē béeb na keluu. So' mi mēssí yéeddé' filib íliyyē na daguu yēwúddē Koope ra a filib Faam fi gaani Koope, te yēwúddē béeb tee'uu na ; mi wonay yin las ! 21 Ngana meel so' ! Iña won mi ra, meelee wa bēewē síkírúu sē' rē. Wa yúhú iña won mi ra. » 22 Wona' Yéésú woni bah, lahte wohohi hómú nē, fúúdté rí mbey, won tih : « Fay lofee seeyohi gaana daaha a ? » 23 Yéésú won dī tih : « Woni so' ñeyay waal raa, teef so' tígē hélé' mí rē, ndaa hena biti mi wona kaah raa, deef fu laba' so' yih ? » 24 Tígí daaha, Haan yeñce Yéésú faam Kayif seeyohi gaana, deef Yéésú lís pokki.

Peer taasiilte yúhí Yéésú

(Saame Maccēe 26.71-75 ; Marka 14.69-72 ; Lúkkē 22.58-62)

25 Filiḅ fi yaaha béeb, Simonj Peer hompe na yoonndoh rek. Lahte bēyí won dī tih : « Do fi bee bal, fu noneh taalibe yi nagajek a ? » Peer taasa'te won dī tih : « Mi noneh na dé' ! » 26 Filoon fi baaha, ow di sǔrgē yí seeyohi gaana, mboko mi bēe' Peer lec nufa ra, won dī tih : « Mí ot dō fi bee a dī filib meeya neh

nagajek a ? » 27 Taasa' Peer waali yínée, paan yíppée fi isoh.

Kúrí Yéésú fī Pilaat

(Saame Maccēe 27.1-2, 11-31 ; Marka 15.1-20 ; Lúkkē 23.1-5, 13-25)

28 Yéésú beyute faam Kayif daaha, kúrúte faam gēernēer baabin cúḅ. Ndaa lahuu wa ra, wa haaluy filib, wa kaa'uu biti wa ay sobeye nda wa mín ñam ñami feedi Paaga. 29 Tígí daaha, Pilaat deefidte wa won wa tih : « Don wonu ti bēyí bee pañ yih ? » 30 Wa lofute ri wonu tih : « Di henay ow bos koon fun kēmí rē rí ! » 31 Pilaat won wa tih : « Don fi yaa bēyí rí, don ñee yee won kootii ron ra don aattiya' ri ! » Wa wonu ri tih : « Fun lahuy sañ-sañi tíkúun fun húl sun ow, fun hap ri. » 32 Yee hómú won Yéésú rē laha'te dah sun fi dee nay rii húlée rē.

33 Tígí daaha, Pilaat nimilte filib faam fa, dēekrēhte Yéésú meelte ri won tih : « Daa fu buuri yēwúddē è ? » 34 Yéésú won dī tih : « Woni baa kola' dōo na mbée ow daa won dō baaha sun fi so' ? » 35 Pilaat tahte won tih : « Maa mi yēwúddē è ? Bēy heedon a kélfē yí seeyoh yon daa komu so' ro ! Kon fu pañ yih ? » 36 Yéésú loffe ri won tih : « Nguur ki so' nguur ki feey fi bee neh. Nguur ki so' yaha nguur ki feey fi bee koon, tin sǔrgē yí sē'

* 18:19 18.19 Seeyohi gaana na wonuu dee ra, dī Haan. Bín fē nagajek deef Kayif daa hómú seeyohi gaana, ndaa bi Haan mēssée hen seeyoh gaan te daa ri pacool Kayif, bēewē hómú dēekúu rí seeyoh gaan.

ay soo haa'id ní mi yëeyih yëwúdfë ; ëe-ëe', nguur ki so' nguur ki feey fi bee neh. »³⁷ Pilaat won dī tih : « Kon fu buur a ? » Yéésú won dī tih : « Fu wonte ri, daa mi ! Seedii kaaf ka daa tah mi límú, seedii kaaf ka daa tah mi ac feey fi beh. Te bëyí hom kaaf ka bééβ, helte nuf iña na won mi ra. »³⁸ Pilaat won dī tih : « Úh ! Yi daa kaah ? »

Kola' ri woni bah, Pilaat dúhëetté ëssín dëefidte yëwúdfë, won wa tih : « So' mi olay yii mín tíkú sun fi bëyí beh, »³⁹ te don baahuu biti lahaa Paak bééβ, mi dúhríd don ow yínë kasu. Don fahuuy biti mi yessid don buuri yëwúdfë ë ? »⁴⁰ Tígí daaha, wa béyruté unni wa sun wonu tih : « Èe-ëe' ! Di neh ! Dúhríd fun Barabaas. » Deef dī fi Barabaas fa banndi.

19

¹ Filoon fi baaha, Pilaat naha'te fúudfëhí Yéésú laraw. ² Soldaara beyute ñap yugusute baane, bekute ri af Yéésú, tíkuté paltu luum sun fi, ³ lebuute ri wonu ri tih : « Coleere buuri yëwúdfë ! » Wa na anuu rii fúudsë' mbey.

⁴ Pilaat dúhëetté yëwúdfë në, won wa tih : « Cëe mi ac mi komdoh ron ri ëssë, nda don yúh biti mi olay yii mín tíkú sun fi bëyí beh. »⁵ Tígí daaha, Yéésú dúhté, bani baani yëlbí a paltii luumi. Pilaat won bëewë tih : « Bëe' abah ! »

⁶ Kélfë yí seeyoh ya a wohoh ya oluu wa Yéésú, wa béyruté unni wa sun na wonu tih : « Daaye ri kurwah bal ! Daaye ri kurwah ! » Pilaat won wa tih : « Bëyí rí don daayid dī affon. So' mi olay yii mín tíkú sun fi. »⁷ Yëwúdfë wonu Pilaat tih : « Kootii fun kadda'te ow sol Koope, te ri wonte biti dī Koy Koope. Kon dī wafti hawun húl ! »

⁸ Kela' Pilaat woni bah, dī baattee tít. ⁹ Di haalaatte faam, meelte Yéésú won dī tih : « Fu dúhë' dih ? » Yéésú hente tid, lofay ri. ¹⁰ Tígí daaha, Pilaat won dī tih : « Fii soo tiil a ? Fu yéeh biti mi mín dëe yeris te mi mín dëe daaydoh kurwah a ? »¹¹ Yéésú won dī tih : « Fu mínéh yin yínë sah sun fi so', henay yee yed do Koope fa sun da. Yii baa daa tah bakaadi bëe' yeñ so' doo na ra luk buu gaan. »

¹² Pilaat kola' daaha na saam dëe nay rii yeddee Yéésú rë. Ndaa yëwúdfë béyruté unni wa wonu tih : « Fu yeris bëyí bee dëef fu ñéerëey a Sesaar*. Bëyí tik afi buur, dëef haa' Sesaar. »¹³ Kela' Pilaat unni yah, dī dúhídté Yéésú fëel, antee took ñaana na aattiyuu, hom ëssë dérúu a la', na wonuu yëwúdfë Gabataa ra. ¹⁴ Yiin fi baaha, tee'a' a bisa millé' waaji Paagi yëwúdfë, bee laha' na' leelu af ra. Pilaat won wa tígí daaha tih : « Buuron abah ! »¹⁵ Ndaa wa béyruté unni wa na wonu

* 19:12 19.12 Sesaar :Bín fë, bëyí húmú hen buur di Rom bééβ dëekúu daaha.

tih : « Di húlë bal ! Di húlë ! Daaye ri kurwah ! » Pilaat won wa tih : « May daaye buuron kurwah nam a ? » Kélfë yí seeyoh ya wonu ri tih : « Henay Sesaar, fun lahuu buur kay. »

¹⁶ Tígí daaha, Pilaat yedda'te wa Yéésú, wa daaye ri kurwah.

Daaji Yéésú kurwah

(*Saame Maccëe 27.32-44 ; Marka 15.21-32 ; Lúkkë 23.26-43*)

Soldaarra yípútée ham Yéésú. ¹⁷ Di fi Yéésú daa enoh kurwahi, wa dúhúté gina, yullute tígë nē wonuu « Kēen-af » ra. Tígí daaha wonuu « Golgotaa » di ébrë. ¹⁸ Lahuu wa ra, soldaarra daayute Yéésú kurwaha. Wa daayaaluute ow ana kay kurwah : bëyí yínëe paa'te Yéésú ya' ñamaa, yínëe paa'te ri ya' sugu, Yéésú hompe leelaa.

¹⁹ Pilaat naha'te bíníi a tikrēhí unni yee sun fi kurwaha. Unna won yii beh : « Yéésú fi bëy Nasaret, buuri yēwúddē. » ²⁰ Bi wulay tígë daayuu Yéésú rē gina, te unna bíníyú ébrë, lateñ a gerek, ow caak olute, yúhúté yee bíníyú rē. ²¹ Yee bíníyú baa ra nebaay kélfë yí seeyoh ya, wa payute wonu Pilaat tih : « Fu waray bíníi "buuri yēwúddē" koon. Fu wadti bíníyë bití "bëyí bee won ti daa ri buuri yēwúddē". » ²² Pilaat won wa tih : « Yee bíní mí rē, mi bíníté rí nūi wocce. »

²³ Daayuu soldaarra Yéésú nūi wocce ra, wa bëyute yéré yí woruute wa cér iniil handal ki wa. Wa anutee bëb búubée ké rí teru sun nūi feey te lahay dñis dē, ²⁴ wonu tih : « Génë bití yen d'arun ri d'aro raa, yen púlúf rí yen ot bëe' nay rii lahee ra. » Yee húmú bíníyú Téerëe rē laha'te dah. Téerëe húmú won tih : « *Wa woruute yéré yí sē', púlúfúté búubí sē'.* »^{*} Dee bíníyúu rí d'aa ra, soldaarra paguu ri d'aaaha kep. ²⁵ Yaafi Yéésú húmú cañ hëbís kurwaha bani koyyaafa bëleb, a Mari bëleb Kolopas, a Mari fi bëy Makdala. ²⁶ Yéésú otte yaafi, otte taalibee daa kooji ra hompe hëbísí, dī won tih : « Yaa ow, kochu abah. » ²⁷ Di won taalibee tih : « Yaafu abah. » Kola'te baaha, taalibee bëbpe yaafi Yéésú yeffe ri faami.

Húlí Yéésú

(*Saame Maccëe 27.45-56 ; Marka 15.33-41 ; Lúkkë 23.44-49*)

²⁸ Nda yee won Téerëe rē lah, filoon fi baaha, bi yúh Yéésú bití iña bëeb púlgísë'té leegi, dī won tih : « Mi sifirohte. » ²⁹ Deef lahte yaadi líiffé bineegar húmú hatinni yaaha. Soldaarra yípútée bëb líil soopute ri bineegar, pokute ri ya' isop, yullute ri búk Yéésú na fahuu hēndí. ³⁰ Díkísë' Yéésú bineegara, dī won tih : « Iña bëeb púlgísë'té. » Di sígimpé, yeddohte lússé.

* 19:24 19.24 Saame Kañaa ya 22.19

Yéésú tawute juun araal

³¹ Wahtu yi yaaha, deef bisa na hílsúu yéwúddē rē ee saañ dale ra. Kélfē yí yéwúddē fahuuy biti búudé hom sun kurwah bis hílsēe, baatte biti bisi hílsíi bee bis gaan. Tigi daaha, wa payute Pilaat na, wonute ri biti dī naha' korsa'i kotti bēewē daayu ra†, búudé yē kēllú tīgē. ³² Nahuu soldaarra baaha ra, wa ñeyute bēewē daayu a Yéésú rē, korsuute kotti bee dēb dē, ñeyute ana fa na, korsuute kotta. ³³ Di fi Yéésú nék, lahuu soldaarra dīi na olute biti dī húlté níi wocce ra, tígí daaha, wa korsuuy kotta. ³⁴ Ndaa ow di soldaarra tappe ri juun hatin araal, ñif a muluḅ yíppée nēe dūh.

³⁵ Bēe' bílíd iñyee ra tíkkē íllí nē ngēey, te iña won dī ra laha' daaha. Di a faanañ fi yúhté biti iña laha' daaha. Don ot dī won iñyeh, nda don gém don bal. ³⁶ Iñyaa bēeb laha'te dah, nda yee bíníyú Téerēe rē lah. Bíníyuté Téerēe bitih : « *Yuh yínē sah ii kon faana.* »* ³⁷ Bíníyuté biti bal : « *Wa ay yíid' bēe' wa jabu ri ra.* »*

Haji Yéésú

(*Saame Maccēe 27.57-61 ; Marka 15.42-47 ; Lúkkē 23.50-56*)

³⁸ Filoon fi baaha, lahte bēyí hínú Suseef dék Arimate, payte Pilaat na, meelte ri búudé fí Yéésú. Di

non taalibe yi Yéésú ndaa bi húmú neeh ri kélfē yí yéwúddē, dī húmú teeki-raay baaha. Pilaat tahidte ri, Suseef payte bēbpe búudé fē. ³⁹ Tígí daaha, Nikodem bal acce habra'te ri. (Nikodem fi baa húmú mēssée pay yérí Yéésú elek.) Wa kúrúte laakkoloñi yugusuu mírí boolluu a barbosaa, yi wadtee mit kílē sabay éeyē. ⁴⁰ Wa beyute búudé fí Yéésú, na líiwú rí boy, na túmú rí yin heeñlaa ti di baahuu ri yéwúddē nen biti wa yahti hac búudé. ⁴¹ Tígē daayuu Yéésú kurwah ra lahte meey, bi kolom ki ow mēsúy nēe hacu húmú nē. ⁴² Bi na saañ dale bisa na hílsúu yéwúddē rē te kolom ka wulay daaha, wa dapute búudé fí Yéésú nē.

20

Kolohi Yéésú búudé
(*Saame Maccēe 28.1-8 ; Marka 16.1-8 ; Lúkkē 24.1-12*)

¹ Hagadi dímēesē, Mari fi bēy Makdalaa kolohte saañce tīgē haccuu Yéésú rē. Laha' ri ra, dī deef la'a húmú búk luuya ra éccírúte.

² Di yíppée múkē Simon Peer na a taalibii yínēe Yéésú kooya' ri ra, won wa tih : « Búudé fí Yíkēe beyute nuña, te fun yíih tīgē kúrú rí rē. »

³ Tígí daaha, Peer a taalibii yínēe koluute na suu luuyin.

† **19:31** 19.31 Bín fē, bēewē húmú daay ow kurwah wa faha' biti bēe' yíppí húl rēe, wa húmú korsuu kotti bēe' korsoo. * **19:36** 19.36 Saame Kolohi koyyi Israyel Ésip 12.46 ; Kíní bēy Israyel 9.12 ; Kañaaya ya 34.21 * **19:37** 19.37 Saame Sakari 12.10

⁴ Wa húmú múkëyú múkëyë na suu wa ra. Bi luk taalibii yínëe Peer gaaw, dī dēbpé rí luuya. ⁵ Laha' ri ra, dī yérëntéhté otte boyya filiḅ, ndaa ri haalay. ⁶ Simon Peer laha' daaha, haalte na yeel boyya. ⁷ Boya húmú af Yéésú rē homay a boyyi kayya ; dī tuluñú tuluñë, hompe kay. ⁸ Taalibii yínëe dēbpí lah ra haala' daaha otte boyya, gémpé biti Yéésú kolohte. ⁹ Yúhí biti nūi a baaha, deef taalibe ya yíh yee faha' won Téerëe rē doom, biti Yéésú wadtee koloh búudé. ¹⁰ Taalibe yi ana ya koluu daaha, suute faam.

Feeñiyohi Yéésú Mari fi bëy Makdalaa

(Saame Maccëe 28.9-10 ; Marka 16.9-11)

¹¹ Di fi Mari, nimila' ri ra, hom fëel fí luuya na looy. Di hom looya yérëntéhté filiḅ, ¹² otte malaaka ana yi bekuu búuḅ naa', tookute tígë húmú fëndú búudé fí Yéésú rē, bee hompe hatna húmú afa ra, yínëe hompe hatna húmú paa' kotta ra. ¹³ Wa wonu ri tih : « Fu looy yi yaa ow ? » Di won wa tih : « Búudé fí Yíkíi sè' beyute, te mi yéeh tígë kúru rí rē. »

¹⁴ Di hom woni yii baa na heeltoh, dī otte ow canjke hëbísí ndaa ri yéeh bëe', deef yaa Yéésú. ¹⁵ Yéésú won dī tih : « Fu looy yi yaa ow ? Fu saam wah ? » Bi haba' Mari biti yaa wohohi meeya, dī won bëe' tih : « Bahaa, daa fu kúre rí rëe, won so' tígë ḁap fu

ri ra, mi kale ri. » ¹⁶ Yéésú won dī tígí daaha tih : « Mari ! » Di yíssëhté Yéésú në, won tih : « Rabbuni ! » (daa ri yëeddëh di ébrë). ¹⁷ Yéésú won dī tih : « Ngana ham so' deh, ndah mi lahay Baaso' na doom. Tilé fu won koy-yaayyi so' biti mi hom kotti saañi Baaso' na daa Boffon ḁa, Koope fi so' na daa Koope fon ḁa. » ¹⁸ Mari fi bëy Makdalaa yíppëe saañ, wonte taalibe ya biti dī otte Yíkëe, léhínté wë yee won dī ra.

Feeñiyohi Yéésú taalibe yi
(Saame Maccëe 28.16-20 ; Marka 16.14-18 ; Lúkkë 24.36-49)

¹⁹ Sosad' na'i dímeesi baaha, bi deef taalibe ya kaañuy kélfë yí yëwúḁḁë, wa téyúuté faam. Yéésú acce hente bereeh leelii wa, won wa tih : « Cëlíirí yaawe ! Hëmíi jaamma ! » ²⁰ Wona' ri wa iñyaa ra, dī teeḅpe wa ya' yi a hatni yíníi araali. Keeñni taalibe ya sos soso níi ola olu wa Yíkëe rē. ²¹ Yéésú wonaat wa tih : « Cëlíirí yaawe ! Hëmíi jaamma ! Di wola' so' Baaso', so' mi wola' ron ḁaaha. » ²² Kola' ri woni baa ra, dī éffé sun fi wa, won wa tih : « Tëhí Ruuh-Pesëñ ! » ²³ Bëyí ḁon baal ri bakaadḁí, deef Koope baalte ri. Bëyí ḁon habid' dī bakaadḁí, deef Koope habidte ri wa. »

Feeñiyohi Yéésú Toomaa

²⁴ Toomaa fa na dëekúu Síisë rē non taalibe yi sab-boo a ana ya, deefaay na ac Yéésú rē. ²⁵ Aya' ri taalibe yi kayya wonute ri biti wa

olute Yíkëe rë, dī won wa tih : « Hém so' mi olay daayiitti pontu ya ya' ya, hém so' mi bekay kun so' íllyyë daayuu ri faana ra, te mi bekay ya' so' lafi araali, mii mëssi gém bitī dī kolohte búudé. »

²⁶ Nimila' bisī baa deef taalibe yi Yéésú téyëetúté faam fa, Toomaa hompe a wa ra, Yéésú acce hente bereeh waa na won tih : « Célíirí yaawe ! Hëmií jaamma ! » ²⁷ Di antee won Toomaa tih : « Beke kunu nunji ya' yi so' fu olsoh ; beke ya'u araal so'. Yedde lah nuf ana, fu gém ! » ²⁸ Toomaa won dī tih : « Daa fu Yíkíi sè', daa fu Koope fi so' ! » ²⁹ Yéésú won dī tih : « Bitī fu otte so' daa tah fu gém è ? Bëyí gém sè' te olay so', lahte sos-keñ. »

Yee tah téeríi bee koloh ra
³⁰ Yéésú panje kimtaan kay caak fii taalibe yi, yi yénké bitī bíllúy téeríi beh. ³¹ Yee filiḅ téeríi bee nék, bíllú bitī ḁon gém bitī Yéésú daa Buura Koo fal ri ra, Koy Koope. Te ḁon gém dīi na raa, ḁon ay pes ndah dī.

21

Kimtaani mbaala líif jén dē

¹ Filoon fi baaha, Yéésú feeñiyaatte taalibe yi búk laahi Tiberiyat*. Di feeñiya' wa ḁeh : ² Simonj Peer a Toomaa fa na dëekúu Síisè rë daa húmú, a Natanayel fi bëy Kanaa di Galile, a koyyi Sebede, a taalibe yi Yéésú

ana kay. ³ Simonj Peer won wa tih : « Mee saañ seeb ḁa. » Wa wonu ri tih : « Caa fun ñéerè' a ro fun bal. » Tígí daaha, wa ñéerúté haalute gaala. Ndaa elgi baaha béeb wa habuy yin.

⁴ Yíilè' Koo ra, Yéésú acce canje búk laaha, ndaa taalibe ya yíihsíih rí. ⁵ Di won taalibe ya tih : « Don habute jén saa yaawe ? » Wa wonu ri tih : « Fun habuy yin. » ⁶ Di won wa tih : « Yéésí mbaala hatna paa' ya' ñamaa di gaala ra, ḁon ay ham. » Tígí daaha, wa yeesute mbaala. Mbaala hampe jén, líif líifé níi wa mínih ríi ḁúhíd' mulaa. ⁷ Ow di taalibe ya, kooji Yéésú, won Peer tih : « Yaa Yíkëe ! » Kela' Simonj Peer uni bah, dī yíppée bekoh búubée ké rí húmú nís dī na seeb dī ra, yíppée haal mulaa. ⁸ Taalibe yi kayya ayuu a gaala, na fasu mbaala líif jén dē. Wa húmú wuluuy búk laaha, yee talluu wa ra waḁti hena jaak tíméer (100).

⁹ Lahuu wa cépúté gaala ra, wa olute jén tíkuté sun kíi, mbúurú hompe hatni beh. ¹⁰ Tígí daaha, Yéésú won wa tih : « Jéné ḁúhúu ron ham ḁa, kúrí i koy na deh. » ¹¹ Simonj Peer haalaatte gaala, fasse mbaala líif jén dē, ḁúhíd'té rí éssè. Jéné béeb hente koy tíméer a koy sabay iip a koy éeyè (153), te ḁee teem wa ra béeb tahay mbaala ḁaḁ. ¹² Filoon fi baaha, Yéésú won

* 21:1 21.1 laahi Tiberiyat :non tii ya na dëekúu laahi Galile ra.

wa tih : « Ęyí don ñam ! » Ow yíně sah di taalibe ya kaañay rii meel daa ri wah, ndaa wa yúhúté bití yaa Yíkée. ¹³ Yéésú lebohte, bebpe mbúurée wora'te wa, dí bebpe jéně bal hente daaha. ¹⁴ Baa daa waali éeyě fě feeñiyoh Yéésú taalibe yi, kéllúu rí búudé rě.

Yéésú a Peer

¹⁵ Ñamuu wa níi wocute ra, Yéésú meelte Simoñ Peer won dí tih : « Simoñ fi Sanj, di faha' fu so' luk di fahuu so' bēewí yee a ? » Peer won dí tih : « Yíkée, fu yúhté bití mi faha'te ro. » Yéésú won dí tih : « Lah tooppitee harri so'. » ¹⁶ Yéésú meelaatte ri won tih : « Simoñ fi Sanj, fu faha'te so' a ? » Peer won dí tih : « Yíkée, fu yúhté bití mi faha'te ro kay ! » Yéésú won dí tih : « Lah níiré harri so'. » ¹⁷ Dí wonil ri waali éeyě fě tih : « Simoñ fi Sanj, fu faha'te so' a ? » Yee meela' ri Yéésú waali éeyě fě bití nda ri faha'te ri ra, dúmélte keeña. Di loffe Yéésú won tih : « Yíkée, fu yúh bées ! Kon fu yúhté bití mi faha'te ro ! » Yéésú wonil ri tih : « Lah tooppitee harri so'. » ¹⁸ Mee roo won kaaf ka ra ee : hena' fu kúkěy rě, daa fu na húmú pokit afu geñuu, fu pay tígí neba' ro ; ndaa tíl níi fu baha raa, fay béyíd ya' yu, ow kay pokid' dō geñuu, kúd' dē tígí fu fahaay naa pay. » ¹⁹ (Unna won Yéésú yaa ra, dí hom teeβa'i dee nay húlée Peer ra. Peer ay teeβee ndami Koope daaha.)

Yéésú antee tik won dí tih : « Ñeye tal so'. »

Yéésú a taalibee dí kooya' ri ra

²⁰ Filoon fi baaha, Peer heeltohte, otte taalibee Yéésú kooya' ri ra na ac filoon wa. Daa ri taalibee húmú sigím nuf Yéésú homuu wa ñama, meelte dí fi Yíkée bēe' nay rii yaaye ra. ²¹ Ola' Peer taalibee ra, dí meelte dí fi Yéésú won dí tih : « A dí fi bee nék Yíkée ? » ²² Yéésú won dí tih : « Mi faha' bití dí pes níi mi nimil raa, waal fu yaha yi na ? Fu laha' bití fu ñee tal so'. » ²³ Yaa bah, wona líiwělsé'té filib fi bēewě gémú Yéésú nē rě bití taalibii baa ii ñee húl. Añcañ, Yéésú wonay bití ri ii húl, dí won wono ndék tee : « Mi faha' bití dí pes níi mi nimil raa, waal fu yaha yi na ? »

²⁴ Dí fi taalibee sah-sah daa bílíd iñyaa bíníté wě, te fun yúhúté bití iña won dí ra kaah.

²⁵ Yéésú pañke i yin kay caak yi fu yénké bití ñeyun yíně-yíně bíníyú koon, mi lahte yaakaari bití tééré yē ii dam feey fi beh.

Téerëe bíníyú unna won Pool bëy Fílíp ra Kúnsëe

Fílíp non ginna pay Pool fi apootara waare ra (Saame Tíledí apootarra 16.11-40). Paya' ri daaha ra, dí cëgídté goomali bëewí haalute ngémë.

I kíil filoon fi baaha, Pool hom kasu bíníté bëy ílí janjii Fílíp unni neɓpe keloh, na sím wë di íña kéyrúu wë Epaforodit díi na onute ri wa, bee homa' ri coono ra (4.18). Dí wonte bëy Fílíp bal biti wa ham ngémë híin, wa mínë' hanndal ki wa, wa cépíd' affi wa te wa mada' a Yéésú-Kiristaa (2.1-5). Dí baattee waa toñ bal nda wa ham Kiristaa na híin, wa banti síkírëh bëewí bossa, wa fa lukuu fonko lecoh ra (3.2).

Di wonte wa :

- yii lenke sosi keeña laha' ri bëewí Kiristaa na ra di Fílíp (1.3-4),
- a yii lenke íñi afi, teeɓa'te na biti nona non dí Yéésú-Kiristaa na ra tahte dí neehay dara (3.4-9).

Unna bíní Pool yee ra lahte bëewí wonuu wa : « Unna sosil keeñ da ».

Bëyí fi janjii téeríi bee béeb ay ot biti ow fi ow yen na béeb waɗti yípë illí Kiristaa na, dí híin në gíj.

¹ Don fi bëy Fílíp, so' mi Pool, funi Timoote, fun fi súrgë yí Yéésú-Kiristaa, fun na woduu don béeb, don fa nonu bëewí Koope ndah Yéésú-Kiristaa ra, doni njíttën a bëewë na habruu wa ra. ² Baap-Koo a Yéésú-Kiristaa Yíkëe líhún ron mal, on don jaamma !

Yee dagid' Pool bëy Fílíp rë

³ Koy-yaayyi yeh, wahtii payaa nuf so' don na béeb, mi sím Koope. ⁴ Kolaa mi dagiri ron faraaah, mi paga' ri a sos-keeñ. ⁵ Mi símpé Koope di yee bekuu don ya' yon waarii Uni Neba ra, dala'te bee liiluu don dí níi a woteh ra. ⁶ Wëerté së' biti di dala' Koope légéyí wunee ke ri baa don na, dí ay rii lúsdée daaha níi yiin nay nimile Yéésú-Kiristaa ra. ⁷ Faha'a faha' mi ron béeb baa ra waɗ waro, ndah mi bek don beko keeñ so'. Nagajek, na húmú waare mi Uni Neba mi na won biti dí kaah níi a bee homa' mi kasu bee ra béeb, mala lah mi Koope na ra, yen daa boku ri. ⁸ Koope yúhté biti mi faha'te don béeb, te faha'i baa mi kola' ri Yéésú-Kiristaa na. ⁹ Mi yahti dan raa, mi daga' biti don baatti fahantee don saye, te fahanta'i baaha ñéerë' a baatti yúhsé' a bíssé' yii lante, ¹⁰ nda don mín yúhsé' yee gén dë. Hen daaha raa, don ay lan, don lëhíh dara yii wunun sun fon yiin nay nimile Kiristaa ra. ¹¹ Dí fi Yéésú-Kiristaa ay tah níi don júb

Wodohi Pool bëy Fílíp

níi júf. Hen dfaa raa, bëewë ay njoob Koope, kañ dî.

Kiristaa daa pesa

¹² Koy-yaayyi yeh, mi faha' don yúh bitih, nagajek téjé téyú mí kasu ra non yee baatti yeñ Uni Neba fii rë.

¹³ Leegi, bëewë béeb, yee faam buur a yee ílyyí kayya béeb yúhuté bití légéyírí Yéesú-Kiristaa daa tah mi beku kasu. ¹⁴ I ow caak di koy-yaayya filib ngémë oluu wa mi téyuté rë, wa baatuutee yaakaar Yíkëe në, na kaañu waarii Unni Koope te neehuy na dara.

¹⁵ Lahte bëewí awu waa na, nagajek iñaan a haa' i so' daa tah wa na waariyu Kiristaa, ndaa lahte na yi haaluu na a nufi lante. ¹⁶ Bëewí yaaha paguu ri a keeñi naa'te, ndah wa yúhuté bití wona na won mi bití Uni Neba kaah ra daa tah mi téyú kasu deh. ¹⁷ Bëewí kayya haa' i so' daa tah wa na waariyu Kiristaa ra nék, nuffi wa laday. Wa habuu bití wa mínú baat súfúñ fi sè' kasu.

¹⁸ Eboh ! Yee tah wa koloh ra, yaha kaah waa na yaha padfah béeb, Kiristaa waariyute rek, keeñ so' sosse, te ay lukee sos na. Ahanjay, keeñ so' ay lukee sos na, ¹⁹ ndah mi yúh yúhë bití mújí sè' nay naa millée af danji ron a habra'a na habra' so' Ruuhi Yéesú-Kiristaa ra. ²⁰ Mi olay yii tah so' mi sopoh di yee na seh mi, mi tikké yaakaari so' na ra. Dalaani so' níi a yee tas fii rë kay, may pok fidí

sè' mi teebee gaanaa ki Kiristaa, mi pesa peso mbée mi húlë húlë béeb, ²¹ ndah mi haba' bití Kiristaa daa pesa, te kúl kè ay soo baate baato. ²² Ndaa hena bití baato hi so' pes ay kúf njiriñ raa, tanis ay soo kofeel. ²³ Iñi ana yi bokuuy daa na til af so' : mi koloh pesi bee mi saañ deefid' Yéesú-Kiristaa koon daa génël sè' fap ; ²⁴ ndaa mi tas pesa daa lukki lah solo don na. ²⁵ So' nék, wëerté sè' bití may tas mi pes, mi hom a don béeb mi habra' ron don gëergëerlëh, don lah sos-keeñ filib ngémën. ²⁶ Daaha, mi nimil mi hom hëbissën dëe, don baatti lah sos-keeñ di yee nonuu ron Yéesú-Kiristaa na ra.

²⁷ Mi nah ron yii beh : Pésii pesi ñéerë' Uni Nebi Yéesú-Kiristaa rek. Hen daaha raa, mi ac yérën mi aay béeb, may keloh bití don habute hiin henute yinë, don bokute nuf te don ñéerúuté haa'ri yii lenke ngémë tikëh sun fi Uni Neba ra. ²⁸ Bëewë na haa'uu ron ra banuy don tiitid', baa daa nay waa teebe bití wa lebuute alkoh, te don homute kotti múc. Yii baa kola' Koope na, ²⁹ ndah dî onte ron don gémuté Yéesú-Kiristaa na, teyay bah don mokute af dî. ³⁰ Yee na húmú haa' mi don na olu ri, te don keltuute bití mi lís dñi haa' ra, don ee rii haa'uu ra leegi.

2

Kiristaa cépidté afi, hente ow

1 Koy-yaayyi yeh, nona nonu ron Kiristaa na ra onay ron doole a ? Faha'a faha' ri ron da beddaay ron a ? Nona nonu ron Ruuha na ra tahay don henute yinë è ? Don pokuuy hanndal kon don naa'antuute keñ a ?
 2 Kon sèsdí keñ so' nii hen dotooy di iñyeneeni : don bok don fahanta', don bok keñ yinë, don bok nuf yinë.
 3 Yii yaa don paŋ bééβ, ngënë hée'í ow, ngënë sēmí tii, cépírí affon rek don haba' biti bēewí kayya luku ron gaan.
 4 Ngënë díiddí affon kep, lah héli nuf bēewí kayya na.
 5 Lah pēsú filib fon ti di na pesuu bēewí nonu Yéésú-Kiristaa na nen :
 6 Di fi Yéésú-Kiristaa, dí fa bín fē nii a deh, yii hom Koope na bééβ ee díi na ra, bani Koope daa teyu naam, ndaa ri tikëy rí afi.
 7 Di kay cépídfi afi cépírē iña bééβ yíssēhté súrgē hente ow. Di hente ow hompe filib fi bēewē, habuute biti dí ow.
 8 Di cépídfé afi ñeete iña nahu ri ra nii ri húlté nē sah faf, nii rí húlté sun kurwah.
 9 Yii baa daa tah Koope báyídfi dí, dí kèllēh bééβ, yedte ri tii lukki gaan di tii ya
 10 nii tii Yéésú tah mbínéeffē bééβ : yín sun-Koo, yee feey fa,

yee fēgērēh fí feey fa bééβ yek,
 11 wa bééβ bok kañe Baap-Koo wone biti Yéésú-Kiristaa daa Yíkēe.

Bëyí gémpé Yéésú

12 Koy-yaayyi yee faha' mi nii faha' ra, húmú homa' mi filib fon da, yii wonu ron, don mēsúu rii paŋ pago. Lah lúkii rii paŋ leegi bee homay mi na ra. Yii yaa don paŋ bééβ, lah cépírí affon don boolla' na a neeh Koope. Pésú biti don múcúté kaah,
 13 ndah Koope ñéerē'té a ron, te dí onte ron nii don faha' paŋ yee ñéerē' a yii wuna neba' ri raa, don paŋ ri.

14 Yii yaa ron paŋ bééβ, ngënë cépítii, ngënë iñii,
 15 nda don lēhíh yii wonun sun fon, don lan ces, don hen bēewí Koope, yi lahuy síkkē di filib bēy jamanii beh, yee bosu nii bos èldúnē rē. Don wadti niiñun niiño leeli wa ti di na niiña' hulla sun-Koo nen,
 16 don fa na komu wa fi bēewē bosu yaa ra Unna na ona' pes da. Hen daaha raa, don ay tah mi mín damoh yiin nay aye Yéésú-Kiristaa ra. Bín fē rēe, may yúh biti múkēmí sē' a mogi so' bééβ pētíh neh.

17 Bi ngēmēn man sarah nen Koope na, mín hen ñif mi so' wadti keen ti hana nay baaddee sarahi baa ra nen. Lahaa daaha raa, keñ so' ay naa sos deefid keññon bééβ. 18 Ti

daaha nen, keeññon sosa bal ðeefid keeñ so'.

Timootte a Epaforodit

¹⁹ Hém neḃa' Yéésú-Yíkée moos, mi lahte yaakaar biti leŋ mi wola' ron Timootte, nda mi keloh yee homuu ron ða raa, so' mi bee af so' took. ²⁰ Di fi baa kut daa bok a so' nuf, nufa béeb homa' ðon na. ²¹ Bëewí kayya, iñi affi wa daa tah wa koloh ndée iñi Yéésú-Kiristaa neh. ²² Don ollute affon sah iña na paŋ Timootte te déké' nē rē : ði yera'te aŋi hompe soo na waarii Uni Neba ti ði na habra' koy boffi nen. ²³ Kon, mi yúhé yii lante so' téjē téyú mí bee ra raa rek, may ron rii yíppí wola'. ²⁴ Wéerté sē' biti Yíkée ay soo on so' mi beh, mi ac yérēn, te ii maañ.

²⁵ Mi otte biti mi wadtee ron nimilid' koy-yaafi yen Epaforodit, bee hom na légéy a so' fun bokute haa'a ra, ði fa ðon húmú yeju ri habra'i so' ra. ²⁶ Di namute ron béeb nék te nufa béeb ee ðon na, ndah ði yúhté biti ðon keltuute jérí. ²⁷ Di húmú jérté níi lebohte húl sah, ndaa Koope yérémpé rí, yérémpé sē' na bal nda mi banti lah yii misik so' lool. ²⁸ Tígē homa' mi bee ra, mi ot biti kep mi yíp ðon ðii wola' nda keeññon sos biti ðon ot ði ndín, af so' féeh. ²⁹ Lah téertiyíi rí a sos-keeñ ndah ði koy-yaay filiḃ ngémē. Lah fēŋkēyí bëewē madu ðaaha ra, ³⁰ ndah ði húmú talla' ñak ñiini af légéyerí Kiristaa

: ði húmú tahte ñagi ñiini, hompe hēbís sē' na habra' so' habra'i ðon míndíh sē' rí.

3

Bëyí bih daa júḃ fii Koo ?

¹ Kon koy-yaayyi yeh, keeññon sosa nona nonu ron Yíkée nē rē. Mi ñeyaaf unna húmú bini mí ron ra ñogoleh so', te daa nay géné ðon na sah. ² Lah mëytií bëewí bossa, wa fi buh yi bossi yah, wa fa lukuu foŋko lecoh, na wonu biti lec bo' faan daa na tah ow múc ðē ! ³ Yen kay yen daa lecuu lecohi kah-kah fa, yen fa yēŋké biti yen yahti jaamiyoh Koope raa, yen ñee'uu ri Ruuhi, te yen damuu Yéésú-Kiristaa ra. Yen tíkúy yaakaari yen pagad' ow. ⁴ Añcaŋ, so' mi mín tík yaakaari so' pagad'ðee ke ow yaa koon, ndah iñyaa béeb ow lukay so' naa ñee : ⁵ So' mi lecu bee nimila' bisa límú mí rē, mi koy ki Israyel tígí-tígí, mi non tali Bensame, mi ébrē koceec. Mi húmú ñeya' yee won kootiiyewúddē rē toŋ ti ði na paga' ri fariseŋ béeb nen, ⁶ te mi húmú lukusid' lukusiro níi mi tassi mokla' bëy ílí jaŋaa mokloo. Dee na pesuu pesi júḃē naha' Kootaa ra, ow mínéh so' naa won dara. ⁷ Iñyaa húmú haba' mi biti baat so' baato ra nék, leegi Kiristaa tahte mi haba' wa iñi eyíl sē' eylē. ⁸ Te iña béeb, mi haba' wa pad'dah biti mi cēldē' wē a yee dara mínéh rí ðaḃ

bee ra, daa ri : yúh Yéésú-Kiristaa Yíkii sē', dī fa tah mi yeris yii na kom so' yin merees ra béeb. Mi haba' yaa béeb púukéré, nda mi lah Kiristaa, ⁹ mi non dīi na lej. Kon ñeya na húmú ñee mi Kootaa ra neh daa tah mi júb. Gémē gém mí Kiristaa na ra kay daa tah mi júb, te júbí baa kola' Koope na te tikēh ngém. ¹⁰ Yee hom af so' ra béeb, dī yúhí Yéésú-Kiristaa a doolaa kélídf dī búudé rē, mi ñee misikka ñee ri ra níi mí húl ti dī nen, ¹¹ ñéerē' a yaakaari biti mi koloh búudé so' bal.

¹² Yee hom af so' baa ra, mi wonay biti mi liilte ri mbée mi lahte tígē na saañ mi ra, ndaa mi ee múkē filoon yii baa ra ndah Yéésú-Kiristaa saampe so' níi otte so'. ¹³ Koy-yaayyi yeh, mi bekay af so' biti mi liilte yee faha' mi ra níi wocce dé', mi won wono tee : yee tíl mí filoon da mi halte wa ; mi b́ébírēetté te mi tassi yulídf dabaadi yee fíi. ¹⁴ Daaha, mi tassi yulídf fíi cid' nda mi liil yee na seh so' sun da. Koope ñeya' Yéésú-Kiristaa na dēekké sē', nda mi liil yii baaha.

¹⁵ Koy-yaayyi yi yeh, yen fa maanu ngémē rē, yen tik iñyaa affi yen. Lah na bi don oluuy ri daaha raa, Koope ay ron rii poysiídf níi lan affon. ¹⁶ Di mín dīi man béeb, yen ham waala habu yen níi a dee ra, yen saañ fíi.

¹⁷ Koy-yaayyi yeh, mēdíi a so' don yeel b́eewē nē ñeyu kotti fun, homuu fun filíb

fon da. ¹⁸ Mi húmú dékē' woni ron ri te mee ron rii wonaat da ee a keeñi líiffé bitih : caakke b́eewí fí yúhté biti wa kaa'oh yi Kiristaa te wa pesuu ri daaha, ndah húlē húl rí kurwaha ra safay wa. ¹⁹ Wa ay míllée sanju. Wa gémú loo yi wa te tígē warun waa sopoh koon da, wa gaan-gaanluu tígí daaha te pesi wa béeb wa téyírúté rí iñi éldúnē. ²⁰ Yen nék, yen b́eewí sun-Koo, sun-Koo fa na sehúu yen cébí Sēmlēhí yen Yéésú-Kiristaa Yíkēe rē. ²¹ Bín fē rēe, dī ay beb faanee ke yen bo' kut yee ra, yídís wē níi mada' faanee ke ri líif a ndam ra. Di ay rii pagee a doolaa tah dī paa' iña béeb sun da.

4

¹ Koy-yaayya faha' mi níi faha' yee ra, Koope kep daa yúh dee faha' mi ron tikēet íl rē ! Don daa sēsdfú keeñ so', don daa baanii ndami so'. Hēbí yee habuu ron Yíkēe nē rē híin !

Líkinnē míllē' Pool ra

² Do fi Ewodi a do fi Sēntise, mi dañ don biti don bok nuf nona nonu ron Yíkēe nē rē. ³ Do fa yen na ñéerúu légéy bee ra nék, do fa tídēey dara ra, lah beddee belebbi yeh. Wa habruute so' habra'i mitte waarii Uni Neba, a Kelma bal a b́eewí kayya, yee tii yi wa ín téerēe b́íníyú tii yi b́eewē nay haale pesa na d́úméh rē.

⁴ Lēhí sos-keeñ Yíkēe nē faraah di yee nonuu ron dīi na ra ; mantee bal lēhí

sos-keñ ! ⁵ Bëewë béeb yúhún bití ðon bëewí so-sute. Nimili Yíkëe wullilay. ⁶ Ngënë sídíi yin ! Di mín díi man béeb, ðéǵí Koope ðon won ði sohle yon. Don yahti ðaŋ raa, lah símí rí. ⁷ Hen ðaaha raa, jaam-mee ke Koope yúukké af, lahuu ron di yee nonuu ron Yéésú-Kiristaa na ra, ay níid keññon a níbbën.

⁸ Leegi mi won ðon tee koy-yaayyi yeh : lah nuffon homa yii hente kaah, yii mit on cér, yii júbpé, yii lante ílí Koope, yii wunte a yii mit laas. Yii baahte mbée yii mit sím béeb, nuffon homa na. ⁹ Iña beyu ron soo na mi yéedídté ron wa ra béeb, lah pégí wë : yee won mi ron a yee olu ron mi na paŋ wa ra. Don hena' ri ðaaha raa, Koope fa na ona' jaamma ra ii ron yeris.

Símí Pool a bëy Filíp

¹⁰ Yíkëe tahte keñ so' sosse siib ndah ðon hel-laatute nuf soo na ðon híliputé sè'. Mi yúhté bití nuffon húmú tasse hílibí sè' lool ndaa ðon lahuu ílí paguun ðon ði. ¹¹ Mi homay woni bití mi húmú sohla'te yin ow na, ndah mi yoonte pesa' yii laha' mi, mi doyloh wa. ¹² Mi lah mbée mi ñak béeb, keñ so' sos. Mi hereñce pesa' yii laha' mi a tígí mín míi hom a yii mín sèe ðeef ílý, ðeefa mi lah mbée mi ñak, loo so' may mbée mi yaab béeb, ndah mi yoonte ri. ¹³ So' mi mín paŋ béeb af doolaa on so'

Yéésú-Kiristaa ra. ¹⁴ Di filibí fi baaha, ðon pagute yii ette bee bokuu ron a so' coono fi so' ðon habruute so' ra.

¹⁵ Don fi bëy Filíp, ðon yúhuté bití kola' mi Maseduwaan jamanaa anuu dal waarii Uni Neba ra, lahay ílí janii habra'te so' sohle yi so' henay bëy ílí janii ron. ¹⁶ Homa' mi Tesalonik ra, ðon kéyrúuté sè' iña sohla' mi ra, te ri teyay waal yínë. ¹⁷ So' mi homay saam bití mi habruu dé' ! Mi ham af so' bití kay Koope baat ðon mal di iña pagiru so' ðon ða. ¹⁸ Tígë homa' mi bee ra kep, mi lahte yii sohla' mi béeb níi lukusse sah aya' Epaforodit kompe so' iña yeru so' ðon ða. Mi ñakay dara. Wa man sarahi heñi baa neba'te Koope te ri tahte ri ra nen. ¹⁹ Koope fa na jaamiyoh mi te dara wooñeh ri ra ay ron on yii sohla' ðon béeb, ñeya' wa Yéésú-Kiristaa na. ²⁰ Koope laha ndam, ði fi Boffi yen laha ndam dee níi kiri fi kirih ! Démiin !

Takohi Pool a bëy Filíp

²¹ Wëddí sè' bëewë nonu Yéésú-Kiristaa na ra, wa fi bëewí Koope yi yah. Koy-yaayya funi wa homu dee ra na woduu ðon. ²² Bëewí Yéésú yë homu dee béeb rë bal, níi luka' yee na légéyú faam buur ra, na woduu ron. ²³ Yéésú-Kiristaa Yíkëe líhé rën mal !

Téerëe débpi bíníyú unna won Pool bëy Tesalonik ra Kúnsëe

Pool daa bíní bëy ílí janjii Tesalonik unni yeh. Tesalonik nék, dí húmú gin gaan, bi hom hëbís mulub te lom a yaay húmú tilté nè lool, haanoh ala ñéerë' a pagad' bos húmú caakke na bal. Aya' Pool daaha ra, dí cëgídté goomal bëewí gémúté Yéésú daaha, ndaa dí maañay na ndah lahte yëwúddí hatlute ri, dí kolohte saañce Bere (Saame Tíledí apootarra 17.1-10).

Hompe ní filoon fe, dí hom Korente, Timoote fa bani na ñéerúu légéy rë deeffe ri daaha léhinté rí yee beya' ri Tesalonik ra (3.6). Unna léhínú Pool ra sosil keeña soslo ní dí yampe na bíní unni yeh, kéyré'té wë bëy Tesalonik, na sím Koope dí dee na yeeluu bëewë hatni baaha bëy Tesalonik, bee lofuu wa pesad' ra (1.7-10). Dí nérsëhté légéyë húmú légéy rí filib fi wa ra, na won dee faha' ri waa olaat ra. Dí gínikké wë dí yee na húmú halaatu wa sun fi kolohi ow búudé rë.

Di wonte wa :

- yii lenke dee gémúu wë rë (1.2-10),
- yii lenke tíledí di Tesalonik (2.1-12),

- yii lenke tíledé faha' Koope ra (4.1-12),
- a yii lenke nimili Yíkëe (4.13 ní 5.11).

Bëyí fi janjii téeríi bee bëeb ay ot biti íña filib mín yúun bëewë lahu nuf ana dí yii lenke dúmëení pesa ra. Dí ay yúh biti bal bëewë gémú Kiristaa na ra nonu bëy nííña, wa ham híin biti fayuu raa, wani Yéésú nay home. Baa daa lukki lah solo !

Wodohi Pool bëy Tesalonik

¹ Don fi bëy ílí janjii Tesalonik fa nonu bëewí Baap-Koo a Yéésú-Kiristaa Yíkëe rë, so' mi Pool, funi Silaas a Timoote, fun na woduu ron. Koope líhë rën mal, on don jaamma.

Dee gémúu bëy Tesalonik Yéésú nè rë

² Fun na símú Koope faraaah ndah don bëeb, fun mësúy don hal filib danji fun. ³ Nuffi fun na koleeh don na biti fun home danji Koo, dí fi Boffi yen, dí íña na pagu ron ndah gémé gémú ron Yéésú-Kiristaa Yíkëe rë, a pagad'don ndah faha' fahuu ron ri ra, a yaakaara dékúu rën lah díi na ra. ⁴ Koy-yaayyi yee Koope faha'te ron yee ra, fun yúhúté biti daa ri tanis don, ⁵ ndah na waariyu fun don Uni Neba ra, húmú teyay won don, ndaa húmú ñéerë' a doole, a Ruuh-Peseñ, a ngémí híinté. Don olute dee húmú homuu fun don na, komi ron yii wunte

don na ra maan ? ⁶ Te don, don ñeyute kotti fun a kotti Yíkëe bee tahuu ron Una ra. Tahuu ron ri ra nék, don deyute coono ndaa Ruuh-Peserj tahte keeññon sosse. ⁷ Daaha, bëewë gémú te dékú Maseduwaan a Akaay ra béeb yeeluu don na. ⁸ Af don tahte unni Yíkëe teyay Maseduwaan a Akaay don, ndaa hasla'te gina béeb ndah gémë gémú don Koope ra hente lëyëj. Kon miteh fun wonle yin na. ⁹ Bëewë gonluu sun fi dee habuu don fun ayuu fun don na ra. Wa na wonu bal sun fi dee súugúu don yúullë don yíssúuté Koope na, jaamiyohi dí fa na pes te daa kaaf ka ra ¹⁰ a sehaalohi kola'i Koohi Yéésú sun cép feey ra. Di fi Yéésú fa dí kélid dí búudé rë, sëmlë'té yen ní yen ay muc neebi Koope yiin bis-këem.

2

Tílëdí Pool di Tesalonik

¹ Koy-yaayyi yeh, don yúhruté affon biti sah aya húmú ayu fun ginon da pëtih neh. ² Don yúhúte biti bal, balaa baaha fun maluute sol te fun ñeyute mok di Filíp. Ayuu fun ginon da bal, fun maluute tolof tolof caak daaha, ndaa Koope habra'te fun níi fun waariyute ron Uni Neba te fun neehuy na dara. ³ Te na waariyu fun da béeb, fun tikúy wonni fun sun fi yii lahay, fun túbúy në nuf bos, te fun saamuy na nofa' ow. ⁴ Fun kay, fun waariyuu

Uni Neba dee faha' ri Koope ra. Di otte biti fun mínú rí, daa tah dí déjéén fun dí. Fun saamuy yii neba' ow, fun saamu yii neba' Koope, dí fa na olsoh níbbí fun ra. ⁵ Don yúhúte biti fun mësúy jay ow, te fun mësúy ñeya' wonni fun fun saame yin ow na. Koope yúhté baaha ! ⁶ Fun saamuy kañ ow na : don na neh te ow kay na neh ; ⁷ te añcaj, fun mínú ron cagoh koon don pañ yee fahuu fun da ndah fun apootarriKiristaa, ndaa fun paguy ri ! Fun kay, fun sosu soso filib fon ti belii na tooppitoh koyyi nen. ⁸ Pokoha pokuu fun don na ra tahte fun húmú teyuy waarii ron Uni Nebi Koope kep, fun bokute a don pes, ndah fun fahuute ron níi faha'.

⁹ Koy-yaayyi yeh, don nérsúuté dee húmú mokuu fun níi mok da maan ? Fun húmú légéyúu yii ñamun fun légéyëe na' a elek, kaa' fun mokil ow yinë sah don na, na húmú waariyu fun don Uni Nebi Koope ra. ¹⁰ Don mínú fun díi seedeyid, te Koope mín fun díi seedeyid bal biti dee tílúu fun a don fa gémú rë lante, júbpé te tíkëhté waal. ¹¹ Don yúhúte biti dee tílúu fun a ow fi ow don na ra béeb, man hanndal baap a koyyi nen : ¹² fun líkínúte ron te fun onute ron doole, fun caguute don nda don pes pesada neba' Koope, dí fa na dëek don, don non Nguur ki a ndami ra.

¹³ Yee tah fun ay dékée símí Koope ra bití bal : liiluu ron Un Koope fa komu fun don da, don habute ri, te don habuuy ri ti di na habuu un ow kese nen. Don habuu ri bití dī Un Koope, te ri Un Koope kaah. Una ee paŋ yii wunte don fa gémú Yéésú nē rē. ¹⁴ Koy-yaayyi yeh, don ñeyute kotti bēy ílí janjii Yúdée yē gémú Koope te nonu Yéésú-Kiristaa na ra ndah di mokluu wa yēwúdfē, bēy ginon mokluu ron daaha bal. ¹⁵ Wa fi yēwúdfē hawute yonente ya húl, hawute Yéésú-Yíkēe, moklute fun nūi mokil. Wa nebuuy Koope, fahiruy ow yin wun, ¹⁶ kadduute fun waarii heetti kayya Una mín tah wa muc dē. Wa homute na baatuu bakaad rek na suu nūi bakaadfi wa mitte, neebi Koope keente sun fi wa.

Faha'i Pool nimil oli bēy Tesalonik

¹⁷ Koy-yaayyi yeh, fun nék fun húmú koluute don na fun suute, ndaa fun sayuy faraah. Fun húmú lahuy fehey saaŋi fun, ndaa keeñŋi fun húmú kolaay don na. Fun húmú kosuuy bití fun ay ron tikíl íl, tahte lahay yii paguy fun nda yii baa mín lah ! ¹⁸ Fun húmú habute bití nagajek fun ay nimil ginon, te so' mi Pool mi étídté rí i waal, ndaa Seytaane daa na yah waali fun. ¹⁹ Kon henay don moos, heneh ow kay ! Don daa yaakaari fun, don daa sēsdfú keeñŋi fun te don daa baanii ndama nay

teebee bití fun baagute nūi fun damoh fii Yéésú-Yíkēe yiin nay rii aye ra. ²⁰ Wa don kay ! Don daa ndami fun, te don daa sēsdfú keeñŋi fun.

3

¹ Sehuu fun nūi fun mínlih rē, fun olute bití yee gén dē daa ri bití funi affi fun tas Aten ndín, ² fun yeñ koy-yaafi fun Timoote don na. Di fi baa funi daa boku fun na légéyú a Koope, waarii Uni NebiKiristaa. Fun húmú yeju ri don na oni ron doole, nda don baatti híinnndēh don ham ngémē, ³ ow di don na banti yedfōh ndah mokla na moklu don da. Don yúhruté affon bití sah yaa béeβ non iña waayid yen Koope ra. ⁴ Nagajek, húmú homuu fun don na ra, fun húmú wonute don bití yen ay moklu, te don yúhuté bití daa ri yee lah woteh bee ra. ⁵ Yii baa daa tah seha' mi nūi mi mínlih rē, mi yeñce Timoote don na kénsēhí tígē teem ngémēn dē. Mi húmú sídē' bití Seytaane fiir rēn, iña légéyú fun don na ra béeβ sooy teem daaha.

⁶ Kola' Timoote ginon nimilte fun na ra, kompe fun unni neβpe keloh di yii lenke ngémēn a dēe fahuu don ow ra. Di wonte fun bití bal nuffon húmú homa' fun na faraah nūi don ñamaasee, te don húmú sesuute oli fun ti di sesuu fun olaadi ron nen. ⁷ Don fi koy-yaayyi yi yeh, yii baa tahte homuu fun filiβ súfúñ fí fun a filiβ coono fi fun béeβ dē, fun baatuutee lah doole ndah ngémēn. ⁸ Fun

lëeysírúté keeñ leegi hém daa ron habu híin Yíkëe në. ⁹ Fun ay símée Koope dí nii mit ? Don tahute keeñni fun sosse nii sos fiyí ! ¹⁰ Fun dékúu ðanji na' a elek, nda fun mín ðon tíkëet il ngëey nii fun mitsid yee tasa' ngémën dë.

¹¹ Démíin Koope, dí fi Boffi yen, a Yéésú Yíkíi yen parid fun waala yulid ginon da ! ¹² Yíkëe ona ron, ðon baatee fahanta' hanndal kon nii tígí teem fahanta', a hanndal ki ðoni bëewë béeb ti di fahuu fun ðon nen. ¹³ Hen ðaaha raa, Yíkëe ay ron on doole nii yiin nay aye Yéésú Yíkíi yen, ñéerë' a bëewí béeb rë, ðon lan ces nii ðon lëhíh yii wonun sun fon, ðon caga' wun fii Koope, dí fi Boffi yen.

4

Tílëdë faha' Koope ra

¹ Leegi nék koy-yaayyi yeh, fun teebute ron ðee waruu ron pesa' nii ðon neba' Koope ra, te fun yúhúté biti ðon pesuu ðaaha nii a ðeh. Kon fun na líkínú ron te na ðagu ron di tii Yéésú-Yíkëe biti ðon baatti ham híin, ² ndée, ðon yúhúté túuyë' yë teebu fun ðon ra, te wa ðúhë' Yéésú-Yíkëe në. ³ Koope faha' biti ðon lan, te lani baa daa ri bitih : ðon moytoh pañ yii tappe njaaliyoh béeb, ⁴ ow fi ow ðon na béeb ham afi sùtërël faani, ñéerë' a lan*, ⁵ fah-beleb ban ðii kúrëelëh

ti bëewë nënih bëewí Koope ra nen, wa fa yíih Koope ra. ⁶ Ow banay tooñ moroomi filib yee wonu baa ra ndín leb yii daa ri laha' ri. Fun húmú wonute ðon biti Yíkëe ay keen sun fi bëyí pañ mani pagadfi yah. ⁷ Koope ðëekëy yen pañ yin bos, dí túuy yen lan. ⁸ Kon bëyí faaliyaay yee wonu baa ra, ðeef dí faaliyaay won ow neh, dí faaliyaay Koope fa on ðon Ruuh-Pesen ða.

⁹ Yii lenke fahanta' hanndal kon, miteh ow won ðon yin na, Koope yeedídté ðon baaha nii wocce. ¹⁰ Daa ri yee teebu ðon koy-yaayya Maseduwaan béeb dë, ndaa kaa'eeh fun won ðon biti ðon baat ya' yon, ¹¹ ðon pañ béeb ðon pesa' jaamma, ow fi ow ðon na béeb tooppitoh iñi afi, ðon yuloh légéy ðon kúdf affon, ti di húmú wonuu fun ðon dí nen. ¹² Hen ðaaha raa, bëewë gémúy rë ii ron yap te ðon ii seh dara ow na.

Yiin nay nimile Yíkëe rë

¹³ Koy-yaayyi yeh, fun fahuu biti ðon yúh yee homuu bëewë húlúu a ngémí wë Kiristaa na ra, ðon banti tík misiga keeññon nii lukus ti bëewí kayya lahuy yaakaar ra nen. ¹⁴ Yen gémú biti neh Yéésú húlté te ri kolohte búudé ë ? Tí ðaaha nen, yen gémúté biti bal Koope ay kélid bëewë húlúu a ngémí wë Yéésú në rë. ¹⁵ Cëe fun bílid ðon yee won

* 4:4 4.4 ow fi ow ðon na béeb ham afi sùtërël faani, ñéerë' a lan :Lahte bëewí habuu ri ðeh : ow fi ow ðon na béeb koloh saam beleb raa, lah ñeyaa ri waal.

Yíkëe rë : bëewë nay lísée pes yen na nûi a baaha ra, wa fa nay maasee nimili Yíkëe rë, wa ii këllëh bëewë húlú rë. ¹⁶ Yiin fin fa, wa ay keloh uni dinke, un kélfë malaaka a un kúlúß ki Koope tiil, dî fi Yíkëe kola' sun cépé. Bín fë rëe, bëewë húlúu a ngémí wë Kiristaa na ra nay débée koloh, ¹⁷ bëewë nay lísée pes nûi a baaha ra, anti bëyrú wa ñéerë' a wa filib nérrë, wa tee'ee a Yíkëe sun. Hen dâa raa, yen fa gémú dîi na ra béeb yen hom a dî faw. ¹⁸ Kon, lah ënëntîi doole a unni yah.

5

Nimili Yíkëe sehuun a teey

¹ Koy-yaayyi yeh, di yîi lenke wahtaa a jamanaa nay nimile Yíkëe rë nék, miteh fun won don yin na, ² ndah don yúhruté affon biti yiin nay nimile Yíkëe rë ay beetiya' ti lohoh elek nen. ³ Tígë nay habee bëewë biti homuute jaamma, lahuy dara yîi sídúun wë rë, gina ay yípée bëp affi wa daaha, ti di na yíppí haba' loo belef nen. Ow ii naa mín fús. ⁴ Ndaa don fi koy-yaayyi yeh, bi homuy don ñúusë, bisi baa ii ron beetti ti di na beettiya' lohoh nen. ⁵ Nagajek don béeb, don nonu bëy nîña, don tîlúu na'. Yen nënîh bëy elga, bëy ñúusë. ⁶ Kon, yen banuy nee' ti di na nee'uu bëewí kayya nen ; yen yeelun yen teey. ⁷ Bëewë në nee'u ra nee'uu elek, yee na maniyu ra maniyuu elek,

⁸ ndaa yen fa na tîlú na' ra, yen warun teey teeyo. Yen habun ngémë, yen faha' ow wa hen búuß tûl yen na, yen haba' yaakaari mújë baane haa'aa yen na. ⁹ Ndée nagajek, Koope cagay biti dî ay kéeníd neebi sun fi yen, dî canj biti yen haal mújë nay onee Yéesú-Kiristaa Yíkëe rë. ¹⁰ Kiristaa húlídté yen. Daaha, bisa nay rii nimile ra deefa yen pesun peso mbée yen húlún húlë béeb, yen ay pes a dî. ¹¹ Kon bëetîi onanta' doole, don tojanta' filib ngémë ti di na pagantuu don dî nen.

Iña míllúu wëe túuy dë

¹² Koy-yaayyi yeh, leegi fun fahuu biti bëewë homu filib fon na moku, Yíkëe nah wa nîdí don a líkíní don ra, don yed' wa cér. ¹³ Hëbí wë, don faha' wa nûi faha' ndah légéyí wë. Pésúu jaamma filib fon.

¹⁴ Koy-yaayyi yeh, fun ee ron wonu ra ee : líkíní dëpësidë, don ben bëewë neehu ra, don habra' bëewë gooyu ra, don mújid bëewë béeb. ¹⁵ Mëytîi yíllëntë' bos filib fon ; sëemí wuna faraah hanndal kon a hanndal ki doni bëewë béeb. ¹⁶ Pésúu sos-keñ faraah, ¹⁷ don déké' dan. ¹⁸ Yîi mín don homa' béeb don sím Koope. Baa daa yee faha' ri pesi don fa nonu Yéesú-Kiristaa na ra. ¹⁹ Ngënë kée'îi pagaddi Ruuh-Pesen, ²⁰ ngënë hégiî unna léhínú kola' Koope na ra. ²¹ Kénsúu wë béeb, don ham yee wun da ; ²² yîi

hente bos béeb don moytoh ri.

²³ Di fi Koope fa na ona' jaamma ra ladla don ces ; di níirë níbbën, níid keeññon a faannon béeb níi ow laheh yii wona ri ron, yiin nay nimile Yéésú-Kiristaa Yíkíi yen da. ²⁴ Koope fa dëek don da, yii won di béeb di paŋ ri, te ri ay ron rii pagiree daaha.

²⁵ Koy-yaayyi yeh, lah dëgírí fun bal. ²⁶ Lah wëddí fun koy-yaayya béeb níi wodoh*. ²⁷ Mee ron rii won ra ee di tii Yíkëe, lah léhíni wë béeb unni yah.

²⁸ Yéésú-Kiristaa Yíkíi yen líhë rën mal !

* **5:26** 5.26 Di baahi bëewí yaaha, wa yahti wodoh bëewë mboko yi wa mbée bëewë meeru wa raa, wa fëenúu wë fëenëe.

Téeríi ana fa bíniyú unni kayya won Pool bëy Tesalonik ra Kúnsëe

Pool daa bíni bëy ílí janjii Tesalonik unni yeh. Filib unna, dí débpi gérém Yíkëe di gémë gémú bëy Tesalonik ra (1.3), dí dagidte wa, wa ham légéyë nahu wa ra. Fu ot Pool bíni wë unni yeh, nísí níbbë na yah janjii Tesalonik ra. Woni ban fi nimili Kiristaa daa baatti kúf wona filib Tesalonik, ndah lahte bëewí wonuu biti nagajek bisi baa lahte níi gétté. Lahte yi wonu tih bisi baa lahay doom ndaa lebohte. Yaa aa na waa na kaa'uute légéy, ñamuu ya' yi bëewí kayya.

Di wonte wa :

- yii lenke ayi Yíkëe yiin bis-këem (1.3-10),
- yii lenke yee nay këllée Yéésú rë (2.1-12),
- yii lenke híinndeh, ñee waali Koope (2.13-17),
- a yii lenke dee laha' légéy solo ow na ra (3.6-15).

Bëyi fi janjii téeríi bee bëeb ay ot biti légéy daa wun ow na, bëe' banti sehaa íni bëeb ya' ow, dí sehaalee nimili Yíkëe.

Wodohi Pool bëy Tesalonik

¹ Don fi bëy ílí janjii Tesalonik fa nonu bëewí Baap-Koo a Yéésú-Kiristaa Yíkëe

rë, so' mi Pool, funi Silaas a Timoote fun na woduu ron. ² Baap-Koo a Yéésú-Kiristaa Yíkëe líhún ron mal, on don jaamma !

Ayi Yíkëe yiin bis-këem

³ Koy-yaayyi yeh, fun mínih banti déké' sími Koope ndah don. Fun warutee ri sím ndah ngémën baatohte caak, te fahanta'a hom hanndal kon da baatoh baatoo na saañ. ⁴ Yii baa daa tah ílí janjii pay fun bëeb, fun sawoor won bëewë filib yii lenke don na, ndah filib mokla na moklu don da a súfúñ fën bëeb, don habute ngémën híin.

⁵ Baa daa nay teebee biti aattiya'i Koope tikë' waal, nda don habuu bëewí Nguur ki Koope wadte wa, nguur ka tah don na súfúñú rë. ⁶ Koope, dí fa júb dë ay mokil bëewë moklu don da ti di mokluu wa don nen, te nagajek baa daa kaah. ⁷ Di ay hílsíd don fa na súfúñú rë, hílsíd fun na bal. Yiin nay feeñiyee Yéésú-Yíkëe sun-Koo, ñéerë' a doolii malaaka yi ra, ínyaa ay lahee na.

⁸ Di ay ayee filib njaar kii, keen sun fi bëewë kaa'uu yúhí Koope, te kaa'uute ñeyi Uní Nebi Yéésú-Yíkëe rë. ⁹ Daana nay keene sun fi wa ra ay dékéé sanjii wa, wa wulliru tígí eta' Yíkëe, wulliru tígí eta' ndami gaani.

¹⁰ Yii baa ay lahe yiin nay nimile Yíkëe rë. Yiin fi baaha, bëewë nonu díi na te gémuté díi na ra bëeb bëyíd dí, dí neba' wa yeel. Don fi yaa don ay none bëewí

yaaha na, ndah don gémúté unna komu fun don da.

¹¹ Yii baa daa tah fun na dagiru ron faraah. Fun daguu Koope biti di on don, don yeeliyoh pesa dëek di don da. Fun dagu biti di doolii, di habra' ron don paŋ yee fahuu don paŋ di yin wun da béeb, te ri habra' ron yee na pagu don filib ngémën dë. ¹² Daaha, don baatti béyíd tii Yéésú Yíkii yen, di béyíd don fi yaa bal. Yaa ay kolee mala nay onee Koope fi yen a Yéésú-Kiristaa Yíkëe rë.

2

Yee nay këllée Yéésú rë

¹ Koy-yaayyi yeh, di yii lenke nimili Yéésú-Kiristaa Yíkii yen a négirè'í yen fíyí, fun dagu don na yin yínë : ² affon banay gaawti kúnëh te ngënë títí biti ow won don biti wahtii nimili Yíkëe lahte. Wuti ow won don biti di léhín unni kola' Koope na, mbée don keloh ri bëewë na waariyu Unni Koope ra, mbée bíníyún bíníyë wonu biti kola' fun na, ngënë gémí.

³ Di mín díi man béeb, ow banay don nofa' yínë sah. Balaa bisa nay nimile Yíkëe baa ra, ow caak ay tikë' Koope af paay, bëe' na ñeyeh woni Koope ra, bee nay sanjuye ra teekiroh.

⁴ Bëyí baa ay béyíd afi kadda' bëewë haanoh ala a yii na haanuu wa merees béeb. Ay pay níi di haal Faam fi gaani Koope took, di won biti daa ri Koope.

⁵ Don nérsúuy biti mi húmú wonte ron baaha homa' mi leeloon ra a ? ⁶ Don yúhú yee ham bëyí baa tígë homa' ri bee ra, te yii baa tahte wahtii ay lahe laho di anti dúh. ⁷ Doolaa dapoh bëewë në ñeyíh woni Koope ra ee teekiroh ra haat ; di ay lukee teekiroh biti nék bëe' lís díi ham da këllú tígí daaha. ⁸ Bëyí baa këllú tígë rëe, di fi bëe' na ñeyeh woni Koope ra ay teekiroh, te Yéésú-Yíkëe ay rii sanjku a ngilaaw mi búkí, hap ri húl a niiña nay rii ñéerée biti di nimil ra. ⁹ Di fi bëyí baaha, doolii Seytaane nay rii yeje di ac, di paŋ kawtéef gaan, kimtaan a ñni éemilè'té béeb, yi ay nofee bëewë. ¹⁰ Di ay paŋ pagad bos béeb nofa'i bëewë në suu sanjuye ra. Wa ay sanjku ndah wa tahuy kúnsí keeññi wa kaaf ka wad waa sëmle' koon da. ¹¹ Yii baa daa tah Koope yeñ wa yii ay waa múuyíd, wa gémé fel. ¹² Daaha, bëewë gémúy kaaf ka ra béeb, te oluu neb pagad bos da, Koope ay keen sun fi wa.

Hünndëh, ñee waali Koope

¹³ Koy-yaayyi yeh, fun nék fun míníh banti déké' simí Koope ndah don, don fa Yíkëe faha' don da ndah Koope daa tanis don dalaana, nda don muc. Di ñeya' Ruuha ladil don ra, a gémé gémú don kaaf ka ra, di mucélté ron. ¹⁴ Koope ñeya' Uni Neba waariyu fun don da dëkké don

yii baaha nda don mit na ndami Yeesú-Kiristaa Yíkii yen. ¹⁵ Koy-yaayyi yeh, kon hiinndii te don ham iña yeeddú fun don da : yee wonu fun mbée yee biníyú fun da béeb.

¹⁶ Koo Boffi yen faha'te yen, onte yen mal nii yen lahute miní múní na dúméh a yaakaari neŋpe. Démiin di fi Yeesú-Kiristaa Yíkii yen a Koo Boffi yen ¹⁷ on don doole, on don keeñi paguun don yin wun faraaah : yaha yii ay pagu pago mbée yii ay wonu wono béeb.

3

Naha'i Pool dagid'

¹ Leegi nék koy-yaayyi yeh, d'égirí fun nda unni Yíkée yíppí líiwělsə' gina te wa lah ndam ti di man wa don na nen. ² D'égirí fun Koope nda ri sēmlə' fun bēewē bosu nii bos ra na, ndah bēewē béeb neh daa gémú iña na wonu fun ra.

³ Te añcaŋ Yíkée daa mit gém. Di ay ron on doole, níid' d'ēn nii Seytaane ii ron leboh. ⁴ Yíkée onte fun nii fun lekuute ron : fun olute biti don ee pagu iña wonu fun don da, te don ay lúsdée daaha. ⁵ Yíkée ona ron keeñi fahuun don Koope, on don don mún ti di fi Kiristaa nen.

Dee laha' légéy solo ow na ra

⁶ Koy-yaayyi yeh, lahte bēewí d'apasute filiḅ fi yen, na ñeyíh iña yeeddú fun wa ra. Fun na nahu ron di tii

Yeesú-Kiristaa Yíkée, don wuloh wa. ⁷ Don yúhruté afon dee waḁti ñeyuun kotti fun da. Homuu fun ginon da fun mēsúy tídēh. ⁸ Fun yeekuy ow ñam. Fun húmú légéyúu yii ñamun fun légéyēe na' a elek, kaa' fun mokil ow yinē sah don na. ⁹ Fun paguuy ri biti don waruy fun pagid' yin pagiro, ndaa fun fahuu biti don ñee kotti yaaha, ¹⁰ ndah húmú homuu fun gin don da, fun wonute ron biti bēyí kaa' légéy waray ñam. ¹¹ Fun nék, fun kuluute biti lahte bēewí awu don na pesuu tídēh, nē pēgih yin gét nē haal yii waal fi wa ínih nē. ¹² Di tii Yeesú-Kiristaa Yíkée, fun túuyú bēewí yaa fun na caguu wa bitih, wa koloh affi wa yuloh légéy nda wa kúf affi wa.

¹³ Don fi koy-yaayyi so' nék, lah hēbí hiin don déké' paŋ yin wun. ¹⁴ Hena biti lahte bēyí kaa' ñee unna biníyú fun yee ra raa, lah wēní rí sun, don ban dii leboh nda ri sopoh ndín, koloh afi. ¹⁵ Di filiḅ yaa béeb nék, ngēnē hēbíi rí kaa'ohon, lah hēbíi rí koy-yaafon, don líkín dí.

Daja téy unna ra

¹⁶ Démiin Yíkée fē nē ona' jaamma ra on don jaamma faraaah, a yii mín don homa'. Yíkée ñéerēe a don béeb.

¹⁷ So' mi Pool daa mi biní unna millē' yee ra*. Mi yahti téy unni so' raa, mi

* 3:17 3.17 Bín fē, ow daa na húmú biníyíd' Pool. Unna yahti téyú rēe, Pool a faanaŋ fi daa na biní a ya'i nda bēewē yúhsə' unna biní rí rē béeb.

hena' d'eh : so' mi Pool daa
mi na b'ini a ya' so'. Hen d'aa
raa, b'ewē ay y'úhsē' b'iniyí
sē'. ¹⁸ Yéésú-Kiristaa Yíkii
yen líhē rēn b'eeb mal !

Téerí ana fa bíniyú unni kayya won Pool Timoote ra Kúnsëe

Bee daa uni ana fa bíní Pool Timoote ra. Di fi Timoote, ñani Pool daa húmú boku légéyë te Pool húmú haba' ri koy kah-kah ñii na. Una nék, Pool bíniyë' rí filib kasaa bee téyúu rí Rom ow caak súugéhté rí rë (1.15-17). Filib una, bi yúh rí biti yee talla' ri pesi ra gaanay, ñi wonte Timoote iña míllë' rí rí líkín rë (4.6-8).

Filib una, Pool ñébé' símí Koope ndah ñee gémë' Timoote Kiristaa ra (1.5).

Di nérissé rí di húmú man pesi ñi fi Pool, ñi na húmú yéeddë' rí a coono fa dey ri ndah waarii Uni Neba ra (1.8).

Di líkinté rí nda ri ñee wodi coono fa, ñi ham híin ti soldaar kah-kah Yéésú-Kiristaa na nen, ñi yéeddë' unni Koope ní ñee waal te ri ñan naa neeh dara (1.7 ; 2.3-4, 14-15).

Di wonte ri moytoh ñéewë beku wonni lahay njiriñ, a capa' sun i won kep affi wa ra, ñi ñee kotti, ñi fonko légéyí, ñi ham ngémë híin (2.16, 22 ; 4.5).

Di wonte ri :

- yii lenke waarii Uni Neba (1.8-12),
- yii lenke di wafti yéeddúun Unni Koope (2.14-19),

- yii lenke di wafti man súrgíi Koo-Yíkëe (2.22-26),
- yii lenke jamanaa míllë' rë (3.1-9),
- a yii lenke njiriñ mi iña bíniyú Téerëe rë (3.14-17).

Bëyí fi jañi téeríi bee ñéeb ay ot biti iña filib mín yúun jamanu fi jamanu ñéeb, wa mín líkínúu ow, wa mín yéeddúu ow mín múñ a ñee nay habuu ngémë híin ñë.

Wodohi Pool Timoote

¹⁻² Do fi Timoote, ño fa haba' mi koy soo na te mi faha'te ro ní faha' ra, so' mi Pool, daa mi na wodoh ro. So' mi apootari Yéésú-Kiristaa ndah Koope daa faha' baaha. Mi nahu woni ñéewë yii lenke pesa gap Koope ñéewë nay none Yéésú-Kiristaa na ra. Baap-Koo a Yéésú-Kiristaa Yíkíi yen líhún ñë mal, teeñ ño naa'-keeñ, on ño jaamma !

Líkíní Pool Timoote yii lenke waarii Uni Neba

³ Ma na sím Koope fa na jaamiyoh mi ra ti ñi na húmú paguu ri caacci so' koon nen, te mi paga' ri a afi tookke. Na' a elek ñéeb, ñagaa mi faraah mi cap tiyu ⁴ te nuf so' payte muun ma húmú yook fu na húmú takuu yen bín fë rë, tahte mi sesohte tíkëedú íl ní keeñ so' sos siib. ⁵ Nuf so' na koleeh ñee hena' ngémú kaah ñoo na ra, te ngémí baa daa húmú ciffu Léyíis a yaafu Ëníis ñë, te ri ee

doo na bal. Baa wëerté sè' kèŋ ! ⁶ Yii baa daa tah mi na nédís rë ee biti fu baatti hubis yee on do Koope, bee húmú tíkè' mí rë ya' mi falte ro ra, ndah ⁷ Koope onay yen Ruuh-Peseŋ nda yen hen bëewí neehute. Ruuha kay taha' yen lah doole, yen fahanta', yen mín ham affi yen.

⁸ Kon, ngana sopoh waarii yii lenke Yíkíi yen na te ngana sopoh bal téjè téyú mí kasu af ri ra. Do kay, habe rek yen bok coono fa laha' mi waarii Uni Neba ra, Koope ay yen on doole. ⁹ Daa ri sèmlè' yen, dëekké yen nda yen hen bëewí ladute. Pagadfi yen daa tah neh Koope dëek yen. Yee tah di dëek yen da kay, neba' ri neboo baatte biti di onte yen mal. Mali baa húmú ñéyíd dí Yéésú-Kiristaa na onte yen di deef èldúnè sakuy doom ra, ¹⁰ feeñce yen na leegi, bee aya' Sèmlèhí yen Yéésú-Kiristaa èldúnè rë. Di banke kúl kè, ñeya'te Uni Neba teebpe yen biti lahte pesi na dúméh. ¹¹ So' nék, Koope fal so' apootar nda mi waare bëewè Uni Nebi bah, mi yeedíd wè rí. ¹² Yii baa daa tah mi dey coono deh, ndaa mi sopaay na ndah mi yúh bëe' mi tík yaakaari so' dñi na ra, te wëerté sè' biti di mín níid yee déŋéen dí sè' rë níi yiin bis-këem.

¹³ Fu kelohte unni kaah ya won mi ro ra. Lah nersée wè fu ham na a ngémí híinè lahu yen a faha'a fahuu yen

ow ndah nona nonu yen Yéésú-Kiristaa na ra. ¹⁴ Lah habe ñni wunna déŋéenu fú yaa ra híin, Ruuh-Peseŋ fa dék yen na ra ay roo bedda'.

¹⁵ Do nék, fu yúhté biti sah koy-yaayya deyi Aasi bëeëb yessute so', Fisel a Her-mosen nonu bëewí yaaha. ¹⁶ Onesifoor nék, na hoñ soo toñ te homa hom mi kasaa bee ra, di sopaay na. Kon, Yíkèe démpí teeb bëy faami naa'-keëñ. ¹⁷ Di kay, hena' ri Rom cèp, di yam saami so' níi ri otte so'. ¹⁸ Yíkèe dém dñi teeb naa'-keëñ yiin bis-këem ! Do fi bah, fu luk bëewè bëeëb yúh dee habra' ri so' Efes ra.

2

Gém Kiristaa na, ñéerè' a coono

¹ Kon book, do fa haba' mi koy soo na ra, beye mala lahuu yen di yee nonuu yen Yéésú-Kiristaa na ra, hen dooluu. ² Ìña keloh fu maa yeeddè' wè fii i ow caak ra, lah yeeddè wè bëewí mitu lekoh nda wa fi yaa bal, wa mín wèe yeedíd i ow kay. ³ Beye wodu coono fa ti soldaar kah-kah Yéésú-Kiristaa na nen. ⁴ Soldaar nék, faha' biti keëñ kélfií sos dñi na raa, ay moytoh yii taway soldaar bëeëb. ⁵ Te bal, bëyí fi hom saadanta', di ñeyay unna poku bëewè rë rek, ii waafu. ⁶ Ti daaha nen bal, línèhí mokke légéyí meeyi daa wadti débèe débírèh ñña lecu meeya ra. ⁷ Lah níbé sun fi ñña won mi ro yaa ra. Yíkèe sah ay waa bek bëeëb afu.

⁸ Nérsée Yéesú-Kiristaa, dí fa kèllú búudé te coosaana' tali Dawit ti di wonuu ri filiḅ Uni Neba waare mi ra nen. ⁹ Uni Nebi baa daa tah mi dey coono níi mi téyúté kasu ti banndi nen, ndaa Un Koope ow téyëy rí. ¹⁰ Yii baa daa tah mi múñ coono yi yaa béeb ndah bëewë Koo tanis wa ra. Hen daa raa, wa non bëewë Yéesú-Kiristaa múcël wë, on wa ndami na dúméh rë.

¹¹ Woni wëerté abeh : Yen húlúté a Kiristaa raa, yen ay pes a dí.

¹² Yen múñ coono ti di nen, yen ay took nguur ka a dí. Yen taasoh biti yen yúhú rí, dí bal ay taasoh biti dí yúh yen.

¹³ Wuti yen paguy iña won dí yen da raa sah, yii won dí béeb dí pañ ri, ndah dí na lofiseeh.

Di wadti yëddúun Unni Koope

¹⁴ Lah dékée nérsí bëewë iñyaa béeb, fu cagoh fu túuy wë fii Koope biti wa moytoh capa' sun i won, ndah baa ii wa baat dara gét nēe yahi bëewë nē síkírúu rë. ¹⁵ Page béeb níi fu cañ fii Koope raa, dí laas do. Yëddée Unni kaah yi Koope níi ñee waal. Hen daa raa, fii sopoh légéyú. ¹⁶ Lah moytee wonna lahay njiriñ te won yii lenke èldúné kep ra. Bëewë na beku wonni yaa kut affi wa ra, baatuu kaañ Koope baatoo faraah. ¹⁷ Wonni wa man puuli ngal ngalo nen, baata' baatoo rek saye. Himene a Filet nonu

bëewí yaaha, ¹⁸ wa wuluute kaaf ka, na wonu biti Koope kèlídte yen búudé níi wocce. Yii baa tahte lahte bëewí ngémí wë saatate. ¹⁹ Ndaa nék, tabahi Koope daa yíp dí híinē' híinēe gíñ te unni yee daa na bíníyú sun fi tígë yípëh tabaha ra : « Yíkëe yúh bëewë nonu díi na ra » a « Bëyí won biti di non Yíkëe nē, wulaa pagad bos. »

²⁰ Filiḅ faam fi wunte nék, iñi pagaa ya filiḅ béeb úris neh mbée hélíis : Lahte na yi hente barngal mbée yugusuu a dépëh. Yaa aana hom dúhrúu bis feet, yaa aana faraah dúh. ²¹ Bëyí fi bukut afi yii na sobeyil raa nék, ay lah njiriñ, dí homid Yíkíi kep, dí man a iñi pagaa ya hom dúhrúu bis feet da. Yii hente yin wun béeb, dí fi bëyí baa sohluute na.

Di wadti man súrgú Koo-Yíkëe

²² Lah moytee yii hente pagad kúkëy, fu yulid : yii hente júb, fu ham ngémë, fu faha' ow, fu lah jaamma, doni bëewë na dagu Yíkëe a keeñi lante ra ñéeré' nē. ²³ Ngana síkírëh wonad ñakaf, yi lahay af a lúk ndah fu yúhté biti wa kúré' iñé', ²⁴ te bëyí hen súrgú Koo-Yíkëe, iñé' waray ri. Di wadti hena bëyí faha'te ow, bëyí mínté yëddé' te mín múñ coono béeb. ²⁵ Di wadti hena bëyí mín nofanta' a bëewë ñéerúuy a iña na yëddé' rí rë, nda heeyce Koope pañ níi wa lof pesad ndín, wa yúh kaaf ka. ²⁶ Hen daa raa,

affi wa ay kúnsèh, wa muc
ya' Seytaane fa ham wa fiiri,
wa na ñeyu yii faha' ri béeb
rè.

3

Jamanaa millè' rè

¹ Lah yúhé biti jamanaa
millè' rè ay misik ní misik.
² Bëewë ay tasee faha' affi
wa kep, wa tik hélíis kep
affi wa, wa gaan-gaanlee,
wa tik affi wa kep ow, wa
solee. Wa ay kaa' ñee woni
yaayyi wa a baappi wa. Wa
ay hen bëewí nē gérmi h ow,
wa ii on yii nonte Koope
na cér. ³ Wa ay súh keeñ,
wa hen bëewí híinuté, wa
ay wone bos kep sun ow.
Wa ii míníl ham affi wa, wa
ay made rabbi sohoorri yaa
nen, wa ii faha' sah yii hente
wun. ⁴ Wa ay tasee ñee loo
yi bëewë, wa hen bëewí
cëppéluté te damuute.
Iní èldúnè ay waa génèl
Koope. ⁵ Wa ay lakaata'
biti wa pokuute Koope
na, te deef wa kaa'uute
biti doolii Koope lofis wa.
Lah moytee bëewí yah.
⁶ Yaa aana waa na yootuu
yootoo haale faamma, nofee
belebba fahuuy affi wa ra,
wa fi belebba yénké biti
enuu bakaaf caak te fah
pes-neb kúrèelèh wè rè.
⁷ Wa fi belebba yah, hom
sikirúu yëeddè' yè béeb
te taheh wa yúh kaaf ka.
⁸ Di húmú kaa'uu Sanes a
Sambares* Mëyiis filoon, wa

fi bëewí yaa na yëeddúu
múuydé bëewí kayya ra
kaa'uu kaaf ka daaha kep.
Wa bëewí nuffi wa yahte,
te ngémí wè lahay njiriñ.
⁹ Nguur ki wa ii maañ, ndah
bëewë béeb ay millè' ot ñagi
afi wa ti di húmú kata' ri
Sanes a Sambares nen.

Njiriñ mi iña biníyú Téerèe rè

¹⁰ Do nék, fu yúh iña
yëedíd mí bëewë rè, dee
húmú man mi ra, a yee na
húmú saam mi na ra. Fu
yúh bal dee teem ngémí sè'
rè, dee mújè' mí rè, dee
faha' mi ow ra a dee haba'
mi híin dè. ¹¹ Fu yúh dee
húmú mokluu mi ra, dee
deya' mi coono Añcos, a
Ikoñum a Lístèr rè. Yaha
coono rek, mi deyce ri !
Añcañ, Yíkèe sèmlè'té sè' nē
béeb. ¹² Te sah, bëewë nonu
Yéesú-Kiristaa na te fahuute
pesa' pokoh Koope na ra
béeb ay moklu. ¹³ Ndaa
bëewí bossa a yee na nofuu
bëewë rè ay baatee bos boso
faraah, wa nofee bëewë ní
nofa' sah affi wa. ¹⁴ Do nék,
iña yoon fu te fu lekohte wa
ní lekoh ra, lah habe wa híin
ndah fu yúh bëewë yëeddú
rè wè rè. ¹⁵ Nagajek, fu
yúh iña biníyú Téeríi selaa
ra kúkèy kú níinén, te daa
wa mín yúun ow, bëe' muc
biti dí gém Yéesú-Kiristaa.
¹⁶ Ina biníyú Téeríi selaa ra
béeb kola' Koope na te wa
lahte njiriñ. Daa wa na
yëeddúu bëewë, daa wa na

* **3:8** 3.8 Sanes a Sambares daa tii ya húmú yeru yëwúdfè luhusoh yi bëy
Ésipè húmú kaa'uu Mëyiis rè. Saame Kolohi koyyi Israyel Ésip 7.11-12.

teebuu ow biti di homay kaah, daa wa na wëegísírúu ow kaaf ka te daa wa na líkínúu ow pes pesi júbpé, ¹⁷nda bëyí hente bëyí Koope mín mit, di hen bëyí mín paŋ yii wunte béeb.

4

Líkíní Pool Timooto di nay ri waariyee

¹ Kon, di fíi Koope a Yéésú-Kiristaa fa nay nimile hom nguur ki, nay aattiyee bëewë nay pese a yee húlú rë, mee roo won da ee faa keloh : ² lah waariye Un Koope, fu cagoh na faraah. Fu lah na neŋ mbée fu laheh na neŋ béeb lah cagee na, fu teeŋ bëewë homuy kaah ra waala. Lah wone affi bëewë në pëgih pagad ow ra, fu hünndëh fu on wa doole fu yeedid wë, ³ ndah jamanu ay lah, bëewë ii fahiil sah síkírëh kaaf ka. Wa ay tasee pesa' fah-neŋ, wa saame bëewi caakki ay yeedde wa fi yaaha iña fahuu wa keloh ra. ⁴ Wa ay dap nuffi wa kaa' keloh kaaf ka, wa síkírée wonni saku sako. ⁵ Do nék, lah teeye iña béeb, fu múñ coono ya, fu waare Uni Neba fu paŋ yee wad do di légéyë yed do Koope ra.

⁶ So' nék, mi ee jébélú Koope ra ee ti hana seeyuu saraha ra nen. Wahtaa nay mii kolee ëldúnë rë lahte. ⁷ Mi bebpe wodi so' haa'a níi mitte, mi múkëtë níi mi lahte tígë wad mii lah ra, te mi helay ngémí sè'. ⁸ Leegi nék, waafa waaydu

bëe' baŋ da, seh so' kep deh. Daa ri baanii ndama wad bëyí júbpé rë. Yíkëe, di fi aattiyoha júb dë, ay soo rii yed yiin bis-këem. Di ii teem soo na don, di ay yed waafi baa bal bëyí tík yaakaari béeb sun fi nimili di fi Yíkëe.

Unna millë' líkín Pool Timooto ra

⁹ Do nék, yípée ac fu deefid so' dee luka' ri gaaw ra, ¹⁰ ndah faha' i iñi ëldúnë tahte Demaas helte so', saañce Tesalonik. Keresan saañce Galasi, Tít saañce Dalmasi. ¹¹ Lúkkë kep daa tas soo na. Kon fu yahti ac, lah kúrëelée Marka. Di ay soo lahid njiriñ légéyí sè' lool. ¹² Tísík nék, mi yeñce ri Efes. ¹³ Fu yahti ac, lah komaaloh so' paltee ke so' húmú hel mi faam Karpos di Torowas ra. Lah komaaloh so' bal tééré yí sè', te ngana hal yee lukki lah solo yugusuu a hun da.

¹⁴ Di fi Iliksaan sísíbé nék, yaha bos rek di paŋke so' ri, ndaa Yíkëe ay rii yíníl iña paŋ di ra. ¹⁵ Do fi baa nék, lah moytee ri ndah di haa'te iña na yeeddúu yen da haa'i misikke.

¹⁶ Yiin déb míi caŋ tígë në aattiyuu maa layid af so' ra, bëyí tappe soo na aay níi habra'te so', bëewë béeb daa heguu so'. Koo baala wa ! ¹⁷ Di fi Yíkëe nék cagohte so', onte so' doole, tahte mi waarete Uni Neba níi mitte, bëewë yëwúf neh ra béeb keluute ri. Di múcëlté sè' tígí ñiin sè' mín nëe teem

koon, ¹⁸ te ri ay soo sēmlē'
yii hente bos béeb, dī sēmlē'
sē' nūi mi haal nguur ki, sun-
Koo. Di laha ndam dee nūi
kiri fi kirih ! Démīin !

*Daja taka' Pool Timooto
ra*

¹⁹ Lah wodee Pírísíl a Ak-
ilaas a bëy faam Onesifoor.

²⁰ Erasta ín tasse Korente
ra te mín helte Torofim
Milet ra, ndah faana nebay.

²¹ Page béeb nék fu ac balaa
lījē dal.

Ēbúl, Púdēnsē, Línús,
Kúlédín a koy-yaayya filib
ngémē béeb na woduu ro.

²² Yíkēe ñéerēe a ro, te ri
līh rēn béeb mal !

Téerëe bíníyú unna won Pool Tít dë Kúnsëe

Yee daa unna bíní Pool Tít dë. Di fi Tít, bani Pool daa na húmú boku légéyíri Koope. Di húmú géerté habra'i Pool lool bee laha' Pool tolof-tolof a bëy Korente ra (Saame 2 Korente 12.18). Na bíní Pool Tít unni yee ra nék, deef dī fi Tít ín Keret na habra' bëy ílí janjaa dee nay waa tilée rë (1.5).

Filib unna bal, Pool líkinté Tít biti dī lah fayda níi ow ban dīi heef (2.7-8, 15). Tít wadti yëeddë bëy ílí janjii Keret dee ñeya' Koope Ruuh-Pesëj a Yéesú-Kiristaa sëmléhé yen bakaadfi yen ra (2.4-6 ; 4.6-8). Di nahte ri woni bëewë di nay sehuu ayi Kiristaa (2.11-13).

Pool wonte ri :

- yii lenke di wadti man njíit janjii (1.5-9),
- yii lenke yëeddëh yí padfah ya (1.10-16),
- yii lenke líkíní baha ya a bitiffa (2.2-3),
- yii lenke líkíní wahambaane ya a jéegí tebteba (2.4-8),
- a yii lenke líkíní bëewë habu ñaam ra (2.9-10).

Bëyí fí janjii téerüi bee béeb ay ot biti ow fi ow béeb wadtee súgëh íñi bossi ëldúnë, dī pes pesad has Kiristaa na.

Wodohi Pool Tít

¹⁻⁴ Do fi Tít, do fa haba' mi koy so' kah-kah filib ngémë boku yen da, so' mi Pool, so' mi súrgii Koope a apootari Yéesú-Kiristaa, daa mi na wodoh ro. Mi nahu habra'i bëewë Koope tanis wa ra wa ham ngémë, mi teeß wa kaaf ka, kaaf ka ñéerë' a pesadi bëewí pokuute Koope na. Hen daa raa, ay waa wëer biti wa ay haal pesa na dúmëh, gapa' Koope deef ëldúnë sakuy doom ra, dī fa na woneh yii lahay ra. Laha' wahtaa faha' ri ra, dī fi Koope Sëmléhí yen teeßa'te yii lenke pesi baa filib Unee ke ri túuy dī sè' waare ra. Kon book Tít, Baap-Koo a Yéesú-Kiristaa Sëmléhí yen líhún dë mal, on do jaamma !

Dee wadti man njíit janjii ra

⁵ So' nék, fu ot mi hel ro Keret, faha'i biti fu lúsífi yee húmú tas légéyë rë níi iña béeb tíkëh waal, te gin fi gin béeb fu fal na i njíit janjii ti di naha' mi ro ri nen. ⁶ Njíit janjii nék, wadti hena bëyí lahay yii wonun sun fi, teem belebi na kut, koyya yahun bëewí gémúté Kiristaa*, ow ban waa haba' walañkaane, wa hen bëewí koruute. ⁷ Njíit janjii daa na tooppitoh yii lenke íñi Koope, daa tah dī wadti hen bëyí lahay yii wonun sun fi. Di waray hen bëyí gaan-gaanla' gaan-gaanloo, waray hen bëyí

* 1:6 1.6 bëewí gémúté Kiristaa :Lahte bëewí habuu ri deh : bëewí mitute lekoh.

keeña wuneh, waray hen bëyí han kep daa afa, waray hen bëyí faha'te haa', waray hen bëyí paga' yii waray, saame na alal. ⁸ Di wadti hena bëyí mínté haneel, faha' yin wun, dí hen bëyí teeyte, júbpé, dí hen bëyí lante te mín ham afi. ⁹ Di wadti hena bal bëyí pokohte híin Una mit lekoh ra ti di yëeddúu rí nen. Hen daa raa, dí ay mín yëedíí bëewí kayya kaah, dí on wa doole, teef bëewë na haa'uu ri iña na yëeddë' rí rë bití wa homuy kaah.

Yëeddëh yí padfah ya

¹⁰ Caakute bëewí fí yúhté bití faaliyuuy yii na wonu wa, níi luka' yëwúdfë haalu ngémë rë, wa anti homuu daaha nofee bëewë a wonni lahay njiriñña waa na. ¹¹ Lah feheye níi wa nís wonni yaa búkkí wë, ndah wa powute faam caak. Wa yëeddúu iñi yéñké bití waray, wa saame na alal. ¹² Húmú lahte bëyí dék Keret, bi bëy gin wa húmú habuu ri yonente. Bëyí baa húmú won tih : « Bëy Keret mësúu hen i feloh, wa bëewí bosute tí rabba luufa nen, wa bëewí dapasute te kamute », ¹³ te yee won dí baa ra kaah. Yii baa daa tah lah wonee bëewë në a unni diñke nda wa lah ngémí híinté. ¹⁴ Wa banuy síkírëh yëwúdfë na wonu wonni saku sako ra, wa banuy ñee iña na túuyú wë bëewí súgúuté kaaf ka. ¹⁵ Bëewí ladute, yin na sobeyeh waa

na. Bëewí laduy nék, yee gémúy rë, iña béef sobeya' sobeyoo waa na ndah níbbí wë na ladeh, wa na lëhíh jom. ¹⁶ Wa digiruu bití wa yúhú Koope, te pagadfi wa teeba'te bití wa wonuy yin díi na. Wa bëewí bosute bosí woneeh, faaliyuuy yii na wonu wa te wa míníh pañ dara yii wunte.

2

Di wadti man bëyí gémpé

¹ Do fi Tít nék, lah yëeddë bëewë iñi ñéerë' kaah. ² Lah wone baha ya bití wa hen bëewí teeyute, bëewí mitu yed' cér, bëewí mínú ham affi wa, wa ham ngémë híin, wa faha' ow, wa mín múñ.

³ Ti daaha nen, wone bitiffa bití wa pes pesi neba'te Koope, wa banti won bos sun ow, wa banti hen bëewí han kep daa affi wa te wa yëeddëe yin wun. ⁴ Wa yëeddún jéegí teb-teba faha'i yaalli wa a koyyi wa, ⁵ wa won wa mín ham affi wa, wa lan íllí Koope, wa tooppitoh faammi wa, wa baah, wa on yaalli wa cér. Hen daa raa, bos ii wonu sun fi Un Koope.

⁶ Ti daaha nen bal, lah wone wahambaane ya bití wa hen bëewí mínú ham affi wa. ⁷ Do fi baa nék, lah page yin wun di yii mín díi hen béef ndín, bëewë yeele doo na wa ñee kottu. Fu yahti yëeddë' rëe, lah núhée rí keeñu ñéerë' a fayda, ⁸ fu ñee kaaf ka toñ nda ow laheh dara yii wona ri na. Hen

daa raa, kaa'oh yi yen ii mín won bos sun fi yen. Tígí daaha, wa ay sopoh.

⁹ Lah wone bēewē habu ñaam ra bal biti wa on kélfē yí wē cér di yii mín dīi hen béeb. Wa paŋ yee neba' wa ra, banti capa' a wa ¹⁰ mbée lohre wa. Wa henun bēewí mitute lekoh faraah. Hen daa raa, wa ay tah bēewē on iña na yēeddúu yen sun fi Koope, dī fi Sēmlēhí yen da cér.

Di tosa' yen Yéésú

¹¹ Di fi Koope teebpe bēewē biti onte wa mal. Mali baa daa kún síd' wē béeb il múcēe, ¹² yēedídté yen yeris kaañ Koope a súugēh iñi ēldúnē, te yen pesa' ēldúnēe woteh a júb, pokoh Koope na, yen ham affi yen, ¹³ yen sehaaloh bisa yaakaaru yen, nay sosle keeñni yen da. Bisi baa daa bisa nay aye Yéésú-Kiristaa a ndam ra, dī fa daa Koope fi gaana lahuu yen na sēmlē' yen da. ¹⁴ Di yera'te ñiini tosi yen tooñni yen béeb a ladli yen, yen hen bēewí sahsah, bēewí saamuun paŋ yin wun kep.

¹⁵ Iña wad' fuu yēedíd' bēy íl í jaŋaa ra, daa wa yah. Lah wonee wa a sañ-sañi mitte, fu on bēewē nē síkírúu rē rē doole, fu won affi yee kaa'uu síkírēhú rē. Ow banay roo heef !

3

Yee wad' bēyí gémpé rē

¹ Lah nérsé bēewē biti wa warutee on njiitti gina cér

a bēewē homru nguur ka ra, wa ñee iña na wonu wa ra, wa caŋ paŋ yii hente wun béeb. ² Wa henun bēewí nē wēnīh bos sun ow a bēewí nē iñiuh. Wa henun bēewí sosute nīi sos, wa lah jaamma a bēewē béeb. ³ Yee tah mi won do yii baa ra bitih : floon, yení wa béeb hómú lahuy af. Yen hómú kaa'uute ñee yee won Koope ra, yen hómú bēewí múuyú múuyē. Fah-neb a pagad' bos hómú hampe yen ñaam, yen na tasuu pesa' bos nuf a iñaan. Ow hómú fahaay yen tík il te yen hómú fahuuy tíkentē' il. ⁴ Ndaa, teeba' Koope fa daa Sēmlēhí yen naa'i keeñi a dee faha' ri bēewē rē, ⁵ dī sēmlē'té yen. Biti yen pagu yii júbpé neh daa tah dī sēmlē' yen ; dī yérém yen yérmē. Di hosse keeñni yen sēmlē'té yen. Di ñeya' doolii Ruuh-Peseŋ yen límēetúté, yen lahute pes has. ⁶ Di ñeya'te Yéésú-Kiristaa Sēmlēhí yen na, líifídté yen a Ruuhi baaha. ⁷ Daaha, on-Koo tahte dī haba'te yen bēewí júbúté nda yen hen bēewí ay haal pesa na dúméh, na yaakaaru yen da.

⁸ Woni wēerté abah, te mi faha'te biti fu baat naa wone nda bēewē gémú Koope ra béeb pokoh paŋ yin wun. Baa daa yee wun te lahid' bēewē béeb njiriñ ra. ⁹ Ndaa nék, lah moytee capa' pētīh, cabi tii yi caacci mínéh dúm, iñē' a taasanta' di yii lenke Kootaa. Yaa béeb wonni lahay af a lúk te lahay njiriñ.

¹⁰ Lah bëyí fí yéŋké bití hom daralsa' bëewë daraloo raa, lah dëeké rí fu won dîi na. Di kaa' síkirëhú rëe, fú dëekëet dí fú wonaat dîi na. Di kaa' síkirëhú waali ana fa raa nék, lah d'uhé dîi na ní lan, ¹¹ te fu yúh bití bëyí baa helte waala wun da te bakaad'di teeɓa'te bití daan wadte ri, te daa ri koma' ri afi.

Unna mîllë' líkín Pool Tít
d'ë

¹² So' nék, may roo wola' Artemaas mbée Tísík. Ow di waa na ac d'aa, lah yípée ac fu deef so' Nikopolis, may líyée në. ¹³ Lah page yii mín fú bëeɓ sun fi ɓaaba na suu Senaas fi layoha a Apolos ra, fu waayid' wa ní iní wa bëeɓ mit. ¹⁴ Koy-yaayya filib ngémë ɓal warutee pokoh paŋ yin wun nda wa lah njiriñ, wa dímlë' bëewë homu coono ra.

¹⁵ Bëewë funi wa homu dee ra bëeɓ na woduu ro. Lah wodee kooyee ke yen filib ngémë.

Koope líhë rën mal bëeɓ !

Téerëe bíníyú unna won Pool Filemoo ra Kúnsëe

Yee daa unna bíní Pool Filemoo ra. † Di fi Filemoo húmú yíkëe alal te húmú lahte i ñaam faami. Di baahi bëewí yaa bín fë, ñaammi wa daa súrgë yée ké yen woteh. Pool waarete ri Uni Neba, † di haalte ngémë níi † di yeelte hen kooji Pool.

Húmú lahte ow di ñaammi Filemoo, hínú Onesime, fússé hegohte. Bani Pool yúhëntúu homi Pool kasaa, † di haalte ngémë.

Jamanii baaha, ñaam fús hegho níi habaatu raa, tíkúu daani misikke níi misik te húl sah na dam na.

Pool yeñ Onesime Filemoo na, bínité unni yeh tikké ya'i, komaalohi wa Filemoo. Filib unna, Pool † dagidte Filemoo, baalidte Onesime Filemoo na, wonte ri biti † di haba' ri koy-yaafi.

Bëyí fi janí téeríi bee béeb ay yúh biti bëewë gémú Yéesú-Kiristaa na ra béeb, wa i koy-yaay.

Wodohi Pool Filemoo

¹ Do fi Filemoo kooji fun, † do fa bok a fun légéy rë, so' mi Pool, so' fa téyú kasu ndah Yéesú-Kiristaa ra, funi Timoote koy-yaafi yen filib ngémë, fun na woduu ro.

² Fun na woduu Apiyaa* koy-yaafi yen filib ngémë bal, a Arkipe fa yeni boku haa'a ra, a bëy ílí janjaa na tee'uu faamu ra. ³ Baap-Koo a Yéesú-Kiristaa Yíkëe líhún rën mal, on don jaamma !

Yee † dagid Pool Filemoo ra

⁴ Filemoo, wahtii † dagaa mi níi nuf so' pay doo na rek, faraaah mi sím Koope fi yen, ⁵ ndah mi kelohte dee gémë' a dee faha' fu Yéesú-Kiristaa Yíkëe te lahidte bëewí Koope béeb njiriñ ra. ⁶ So' nék, yee na † dan mi ra daa ri bitih, ngémë boku yen baa ra lah njiriñ, nda fu yúh níi lan íñi wunna béeb lahu yen gémë gémú yen Yéesú-Kiristaa na ra, † di lah ndam. ⁷ Do fi koy-yaaso', faha'a faha' fu bëewí Koope ra, onte wa doole, sosilte keeñ so', yëellídté rí.

Layidi Pool Onesime

⁸ Daaha, Kiristaa onte so' sañ-sañi túuyëe mí rë yee nay fuu page ra sah ndaa, ⁹ yee nay mi roo † dage bee ra nék, mi fahaay biti mi túuyë rë rí túuyë. Fu pagaa ri biti fu faha' so' fahoo daa génél sè'. So' mi Pool, so' fa faan so' maan bee ra, baatte biti mi téyúté kasu abee ndah Yéesú-Kiristaa ra, daa mi na † dan † do. ¹⁰ Yee nay mi roo † dage ra nék, mi † dagid † di Onesime fa hen koy soo na, mi hente baap † di na filib ngémë di kasaa hom mi bee ra. ¹¹ Débëenë, † di lahray ro

* 1:2 1.2 Apiyaa :Di ow béeb. † 1:11 1.11 Onesime : daa ri « lahte njiriñ » di gerek.

njiriñ ndaa leegi dī lahidte yen béeb ana njiriñ†. ¹² Kon, mee roo rii nimilid dā te lah yúhé biti daa ri keeñ so'. ¹³ Mi yef ri soo na dee koon daa génél sē' nda ri légéyíd sē' iña nay fu soo légéyírē koon homi so' filib kasaa bee ndah Uni Neba ra, ¹⁴ ndaa mi fahaay pañ dara te fu ñéeréeh nē. Mi fahaay gangalu pañi yii wuni bah, mi faha' biti fu núhēe rí keeñu. ¹⁵ Mín hena dah, taka' ee ke doni Onesime baa wad' waro, nda maañeh fii fu liilaat dī faw. ¹⁶ Leegi, dī henlay ñaam kep, dī gén ñaam fap, dī koy-yaay, bi fahuute níi faha'. So' mi bee dé', mi faha'te ri níi faha', ndaa dō fu wadtee rii faha' faha'i luk bi funi af biti dī súrgúu, te ri koy-yaafu filib ngémē.

¹⁷ Yaha biti fu hampe ñéerē'í yen raa nék, lah habee ri ti biti fu ham so' nen. ¹⁸ Yaha biti dī tooñ ro tooño mbée dī lahid' dō kabut, pegoh so' wa. ¹⁹ So' mi Pool daa mi na bíní a ya' so' ee bitih : « So' mi beh, daa mi nay roo yínlé. » So' nék, mi fahaay roo won biti dō bal, fu lahidte so' kabut te kabut ka, dī pesu, dō fi bah. ²⁰ Ahanḱay, dō fi koy-yaaso', pagid' so' yii baa ndah Yíkēe, fu yēellíd keeñ so' ndah nona nonu yen Kiristaa na ra. ²¹ Wēerté sē' biti iña bíní mi ro yee ra, fay waa pañ níi fu baat na kay sah. ²² Lah saamid' so' tígí homa mi bal ndah mi yaakaarte bitih danḱi ron tahte leegi mi nimiliru ron.

Takohi Pool a Filemoo
²³ Epafaraas fa funi homu kasaa ndah Yéésú-Kiristaa ra na wodoh ro, ²⁴ bani Marka a Aristarka a Demaas a Lúkkē, yee funi wa boku légéyē rē. ²⁵ Yéésú-Kiristaa Yíkēe líhē rēn mal !

Téerëe bíní Saak ra Kúnsëe

Filib téeríi beh, Saak won a bëewë gémú Yéésú, hasлуу filib ëldúnë béëb rë.

Di wonte affi wa di yii lenke dee na pesuu wa ra, ndaa dī yëedídté wë yin caak bal.

Íña bíní Saak yee ra mín yúun ow fi ow béëb. Saak wonte sun fi :

- yii lenke múñ a ðan Koope (1.2-8 ; 5.13-18),
- yii lenke ñëkíd a yíkëe alal (1.9-11 ; 5.1-6),
- yii lenke súfúñ a fíir (1.12-18),
- yii lenke síkírëh a ñeyi Unni Koope (1.19-27),
- yii lenke génëntélë' (2.1-13),
- yii lenke ngémí teeбууу pagad (2.14-26),
- yii lenke búk (3.1-12),
- yii lenke ñaañ a neb nuf (3.13-18),
- yii lenke íñi ëldúnë (4.1-10),
- yii lenke heefa' (4.11-12),
- yii lenke gaan-gaanloh (4.13-17),
- a yii lenke nimili Yíkëe (5.7-11).

Bëyí fí janí téeríi bee béëb ay ot bití bëyí won bití dī gémépé Kiristaa wadtee rii teeba' pagadfi.

Wodohi Saak bëewí Koope

¹ Don fi talli sabboo a ana ya, ðon fi bëewí Koope ya hasлуу ëldúnë béëb rë,

so' mi Saak súrgíi Koope a Yéésú-Kiristaa Yíkëe ma na wodoh ron.

Woni Saak yii lenke múñ

² Don fi koy-yaayyi yeh, keeññon sosa níi sos bití ðon ñee coono fi mín dīi hen béëb, ³ ndah ðon yúhúté bití coono fi ñéerë' a ngém daa na kúd' múñ. ⁴ Te múñí baa homa ðon na faraaah raa, ðon ay hen bëewí lahuy síkkë te nonute, ðon hen bëewí mitute sèk. ⁵ Ndaa nék, yaha bití ow di ðon na yéeh yii paga ri raa, dī ðaga, Koope ay rii teeb yee nay ri page ra. Koope yéwénté, na oneeh ona'í lahay keeñi, dī ona' béewë béëb. ⁶ Bëe' ðaga a ngém rek, banti lah nuf ana, ndée bëyí na lah nuf ana mada' a mboowaana kísí fë baa ngilaaw ma na béyíd' dī, na jaay ri hatinna béëb rë nen. ⁷ Bëyí baa ðanay haba' bití dī ay lah yin Yíkëe në, ⁸ ndah dī laha' nuf ana. Di laba' laboo rek.

Yii lenke ñëkíd a yíkëe alal

⁹ Bëyí fí hente ñëkíd te gémépé Yéésú, damaa ndah Koope béyídté rí. ¹⁰ Bëyí fí hente yíkëe alal, bíyëe bal ndah Koope cépídté rí, dī ay muuy. Di ay made ti capussi gaaw fa luufa nen : ¹¹ na'a fetlee rek, gaaw fa tam, capussa yookoh, wuni teem daaha. Ti ðaaha nen, bëe' hen yíkëe alal ra ay muuy deefa dī takaña' légéyí.

Yii lenke súfúñ a fíir

¹² Lahte sos-keeñ, bée' nay home coono dī mún dī rē ! Di ham hūin nū dī dūh nē rēe, dī ay bēku baanii ndami pesa na dūmēh rē, bee gap Koope bēewē fahuu dī fi Koope ra.

¹³ Bēyí paŋ yin bos hom nufi banan won bití Koope daa fiir rí, ndah ow mínēh fiir Koope te Koope na fiirēh ow. ¹⁴ Yee na fiir ow ra kay, daa ri bití bēe' faha' pes-neb nū neba hécé rí. ¹⁵ Te faha' pes-neb mada' loo-koy nen te límē' bakaad, te koy ki baa hen gaan raa límē' húl. ¹⁶ Kon dōn fi koy-yaayyi yeh, dōn fa faha' mi nū faha' ra, ngēnē nēfií affon. ¹⁷ Yii wunte a yii ñeete waal bēeb kola' sun-Koo. Wa kola' Koope na, dī fa sak na'a, céyín fē a hulla ra. Di na lofiseeh, na laayah nū ñúusdē ow. ¹⁸ Di coobarii, dī ñeya'te Unee ke ri daa kaaf ka ra yen límēetúté, nda yen hen bēewē kēllúu di iña sak ri ra bēeb ti iña débpi lecu meeyya jébélúté Koope ra nen.

Yii lenke síkírēh a ñeyi Un Koope

¹⁹ Koy-yaayyi yeh, dōn fa faha' mi nū faha' ra, yúhí bití bēyí nē bēeb síkírēh wadtee rii yoob. Won mbée neeb nék waray rii yoob ; ²⁰ ndah bēyí neeb, na pageh yii júbpé fii Koope. ²¹ Kon, hégúí sobe a kaañ paŋ yin bos, dōn cépid' affon, dōn tah Una soh Koope dōn na ra. Uni baa daa mín dēn sēmlē'. ²² Uni baa nék,

ngēnē téyí síkírēhí kut ndaa lah ñeyí nē, henay bah, dōn ay nofa' affon. ²³ Bēyí fi síkírēh Una te fu ñeyay na, fu mada' a bēe' caŋ seetaan baa na olsoh afi ra nen. ²⁴ Olsa' ri afi nū wocce ra, saañce yíppée hal dee man dī ra. ²⁵ Bēyí kúnís nuffi bēeb síkírēh Kootaa júb na tah ow laha' afi te haleh iña keloh ri ra, pokoh na ñee na raa nék, bēyí baa ay lah sos-keeñ di yii paŋ dī bēeb.

²⁶ Bēyí haba' afi bití dī bēyí gémpé te dēefa dī mínēh ham búkí, bēyí baa nofa'te afi, ngémí lahay njiriñ. ²⁷ Di fii Baap-Koo, bēe' gém kah-kah te ngémí lante ra, daa bēe' nē dímlē' baayu ya a jētíddē súfúñ fí wē, te hampe afi yii na sobeyil ow ēldúnē rē.

2

Yii lenke génentélé'

¹ Koy-yaayyi yeh, dōn fa gémú Yéesú-Kiristaa Yíkēe fē líif a ndam ra, ngēnē génentéllí bēewē. ² Mín hen dōn lah teya', lah bēewí ana yi ac teya'i baaha, bēyí yínēe bekoh supí úrís a búubbí wunte, bēyí yínēe hen ñēkídf bekoh síf. ³ Don yed' bēe' bekoh búubbí wanna cér dōn won dī ac took paa' fii, dōn won ñēkdē caŋ dín mbée dōn won dī took koton feey raa, ⁴ deef dōn génentéllúuté hanndal kon. Don oluun ri dāaha raa, deef baa af neh ! Te dōn daa i wa nū sah dōn bíssée bēewē ?

⁵ Kon don fi koy-yaayyi yee faha' mi nii faha' ra, kúnsí nuffon don síkírèh ! Koope tanis bëewë henu ñëkíd èldúnë rë nda wa lah ngémí híinté hen alal mi wa neh a ? Di tanis wa bal nda wa haal nguur ka gap dî bëewë fahuu dî fi Koope ra ! ⁶ Ndaa don, don heefuu ñëkíd heefoo. Te añcañ, yíkëe yí alalla daa na moklu ron, daa na tēekdú dēn kēem. ⁷ Wa fi yíkëe yí alalli yaa daa na solu tii nebee ke Kiristaa fa don teyu dīi na ra.

⁸ Bíníyúté Téerëe bitih : « *Di fahuu ron affon, lah fēhii moroommon daaha.* » * Don ñee túuyë'ée ké Koope Buur baa raa, deef don pagute yii wunte. ⁹ Don génentélé' rēe nék, deef don bakaarute te Kootaa ay keen sun fon, ndah don ñeyuy na. ¹⁰ Bëyí ñeyay yin yínë kut di túuyë' yí Kootaa, wuti dī ñee yee tas da béeb rēe sah deef dī tooñce, daa ri bití dī ñeyay wa béeb. ¹¹ Koope daa won tih : « *Ngënë mēsii njaaliyoh.* » * Daa ri won bal tih : « *Ngënë mēsii bëem ow.* » * Kon bëyí bëem ow, wuti ri njaaliyaay raa sah, deef dī ñeyay Kootaa. ¹² Don yahti pañ yin mbée don yahti won yin raa, lah héli nuf bití Koope ay ron aattiyee Kootaa na tah ow laha' afi ra. ¹³ Bëyí nē yérméeh, ii yérmú. Yermaande daa lukki lah solo aattiya'.

Yii lenke ngém

¹⁴ Koy-yaayyi yeh, ow won bití dī gémpe te na teebeeh ri pagaddi raa, ngémí baa lahte njiriñ a ? Ngémí baa ay rii sēmlë' è ? ¹⁵ Mín hen ow di koy-yaayyon filib ngémë bekaa sif te laheh liif-loo. ¹⁶ Ow di don na won bëyí baa bitih : « Toge mbook ! Lah bekee níi fu wun, fu ñam níi lowu may, sos sib ! » Di won bëe' unni yaa te yereh ri yee waf dīi na raa, woni baa deef lahte njiriñ a ? ¹⁷ Ti daaha nen, ngémí ay teye búk ii tee buu pagaf, ngémí baa lahay njiriñ, saatate.

¹⁸ Heeyce ow ay won bití lahte bëewí gémú Koope, lahte yí paguu yin wun. Yee nay mii wone bëyí baa ra daa ri bití rek tee : ow minéh tee ba' bití dī gémpe Koope te deef dī na pageh yin wun. Iñi wanna nay rii page ra kay daa nay teebee bití dī gémpe. ¹⁹ Di gémey bití Koope yínë kut woo ? Baa yii wunte, ndaa dī yúhë bití yébitèh yë bal gémuté baaha te títuté nē níi na saaku ! ²⁰ Di yúhë bití bal dī lahay af ! Caa nék mi won dī yee tah ngémí tee buu pagaf lahay njiriñ ra, hém dī faha' yúh. ²¹ Di fi bëyí baa nérsëe bitih : Koope haba' caac Abraham bëyí júbpe bee tahra' ri ri, bebbe koohi Isaak na waay jébéli sarah sun fi tígë na hawruu

* **2:8** 2.8 Saame Tali Léwí 19.18 * **2:11** 2.11 Saame Kolohi koyyi Israyel Ésip 20.14 * **2:11** 2.11 Saame Kolohi koyyi Israyel Ésip 20.13 * **2:21** 2.21 Saame Dalaana 22.1-19

ra neh a ?^{*} 22 Kon, bëyi baa otte biti ngémí Abraham a yii wuna paŋ ri, tahidte Koope ra daa ñéerë', te yii baa tahte ngémí mitte sèk. 23 Yee húmú bíníyú Téerëe rë laha'te dah. Húmú bíníyú Téerëe bitih : « *Abraham gémpé Koope, te ngémí baa daa tah Koope haba'te ri bëyi júbpé.* »^{*} Yii baa daa tah dī na dëekúu kooji Koope.

24 Leegi, don olute biti bëe' júb fii Koo ra, dī bëe' teyay gémpé ra, ndaa dī bëe' na paŋ yin wun da. 25 Ti daaha nen, belii tilëhë hínú Rahap ra, bekke i wolu-wolu di bëy Israyel faami somepe wa, ñéyídté wë waal kay wa heguute.^{*} Yii baa daa tah bal Koope haba' ri bëyi júbpé. 26 Faan lahay coonaa raa, deef dī húlté. Ti daaha nen, ngémí ñéerëey a pagad wun, ngémí baa lahay njiriñ, saatate.

3

Yii lenke búk

1 Koy-yaayyi yeh, ngënë héní yëeddëh bééβ. Don yúhúté biti fun fi yëeddëh yí yeh, aattiya'i fun nay luke bi bëewë bééβ misik te ay yooβ. 2 Yen bééβ yen na pagu yii tikëey waal, a dī mín dīi man bééβ neh a ? Bëe' na won yii tikëh waal faraah ra nék, bëyi baa ow kah-kah, te ri mín ham afi iña bééβ. 3 Yen bekúu pënís lakaab búk, yen héc dī a daa teem dī bééβ hatni neba' yen dī ñee na neh a ?

4 Èlsii bal gaalli gaanna kisi fë, yee yénké biti ngilaaw mi gaante daa na yeñ wa ra ! Añcaŋ, wa kúruu a duud yutuud. Bina-bina waa na bééβ, bëe' nē kúf dī rē héc' duuda hatna neba' ri ra kep, gaala a daa teem dī bééβ ñee hatni baaha. 5 Ti daaha nen, yina' búk níi, miné' won yii gaante daaha.

Te don yúhúté biti kii wuti yin yin, mín tam luufa bééβ. 6 Búk man kii nen kep ! Di non faan, iñi bossa dúhë' nē ti kii kii kola' safara nen, kad cérrí yen, kad pesi yen bééβ. 7 Ow mín ílíf rabba bééβ : yee luufa, yakka, fasoh fa, a rabba kisi fë te daa ri yee lah ra, 8 ndaa búk ow mínéh rii ílíf. Búk wuneh, na hílséeh, te iña na dúh nē rē na hawa'. 9 Yen símúu Yíkëe Boffi yen a búk, yen yujuu ow fa Koope daa sak dī ti di man dī fi Koope nen ra a búk. 10 Sím a yuja' bééβ dúhë' búgë yínë. Koy-yaayyi yeh, yii baa waray laha' daaha ! 11 Mulii nebeh a mulii nebpe na dúh cula yínë è ? 12 Koy-yaayyi yeh, tal een na lím éliif è ? Tal bééñ na lím een a ? Ti daaha nen, culi na dúhíd mulii nebeh mínéh dúhíd mulii nebpe.

Yii lenke nufi kola' Koope na

13 Bëe' haba' afi biti dī bëyi ñaañce te nebpe nuf don na ra wa ? Bëyi ñaañce cépirë' afi cépirëe paŋ iñi wunte, pes pesi wunte. Don ay teebee biti don ñaañute

daaha. ¹⁴ Ndaa, yaha biti don bēewí pesuu eeñja' ow, fahiru affi wa kep yin wun raa, ngēnē dēmii biti don ñaañute, te ngēnē kēe'ii kaaf ka ! ¹⁵ Ñaañadi baa kolaay Koope na, di non iñi ēldúnē, di pagad' ow kep te kola' Seytaane na. ¹⁶ Tígí lahte bēewí eeñjuu ow, fahiru affi wa kep yin wun ra, tígí daa dara ii naa ñee waal, henay yii hente bos. ¹⁷ Ñaañada kola' Koope na ra nék, ladila' keeñ ow ladiloo nii woc, bēe' lah jaamma a moroommi, di sos, neb wonid, di naa'-keeñ nii naa', di líif a pagad' wun, di banti génentélé' bēewē, banti hen bēyí nē poos fii poos filoon. ¹⁸ Bēewē na sohu jaamma hanndal ki bēewē te paguu ri a jaamma ra, jaammaa sohu wa baa ra, pesi júbpé daa nay naa púlée.

4

Yii lenke iñi ēldúnē

¹ Haa' ya a iñē' yē filiḅ fon haala' yih ? Wa haala' faha'i pesi nebi na woy faanon neh nagajek a ? ² Don na fahuu lah yin don lēhíh yaa, don kēe'iih nē sah hap ow húl. Don na bosu il yin ow, don mínih ri lah. Hen daa raa nék don iñee, don haa'ee filiḅ fon. Don mínih lah yee fahuu don da, ndah don daguy ri Koope ! ³ Te wuti don dan Koope raa sah, don lílilh dara, ndah dee na daguu don da etay.

Don daguu yii nay neble peson kep ! ⁴ Don yégúy Koope ! Don yiih biti bēyí pokoh iñi ēldúnē, bēyí baa kaa'ohi Koope a ? Kon, yúhí biti bēyí fí faha' pokoh iñi ēldúnē, bēyí baa hente kaa'ohi Koope. ⁵ Ngēnē hēbii biti iña bíníyú Téerēe rē bíníyú pētih ee ! Bíníyuté filiḅ Téerēe bitih : « Koope fiira'te yen, fiira'te coonaa fa bek di yen da, te faha' biti yen tíkún nuffi yen dii na kut. » ⁶ Ndaa kaa'eeh biti di onte yen mali mitte sēk ndée bíníyuté biti bal : « *Koope ñeerēey a bēewē na gaan-gaanluu ra, di ona' bēewē cépirú affi wa ra mal.* »* ⁷ Kon, ñeyí yee faha' Koope ra ! Hēe'ii Seytaane, di ay ron wuloh ! ⁸ Lébii Koope, di ay ron leboh ! Don fi bakaaroh ya, bēeñjii bakaadon ! Don fa lahuu nuf ana ra, hēsí keeññon ! ⁹ Pésí pes súfúñid ! Fēgí don hawoh ! Yennon yissēe looy, sosi keeññon yissēh súfúñ. ¹⁰ Cépirí affon fii Yíkēe, di ay ron bēyíid.

Yii lenke heefa'

¹¹ Koy-yaayyi yeh, ngēnē wēnēntii bos sun fon. Bēyí won bos sun fi moroomi mbée heef ri, deef di won bosa sun fi kootii Koope te ri heef Kootaa. Bēyí heef Kootaa nék, deef di aattiya' ri aattiyoo, di ñeyay yee won Kootaa ra. ¹² Koope kut daa yera' Kootaa, Koope kut daa na aattiya', Koope kut daa

* 4:6 4.6 Saame Léeh yē 3.34

mín sèmlè' ow, Koope kut daa mín saŋku ow. Don fa na heefu moroommon yaa ra nék, don homuu biti daa ron i wah sah ?

Yii lenke gaan-gaanloh

¹³ Leegi nék, síkíríi sè' don fa na wonu biti woteh mbée kéy, don ay pay gini man nanjam, don baana-baana dín fè níi hen kíil, don lah hélíís dē. ¹⁴ Don yúhú yin kéy fèn è ? Don yíih biti peson man maal nen kep a ? Maal laha' wahtu dee rek, dī yíppí gét. ¹⁵ Don kay, don wadti wonun biti don ay pes, don paŋ yii man nanjam, hém neba' Yíkēe. ¹⁶ Ndaa, tígè homuu don bee ra, don tasuu gaan-gaanloh gaan-gaanloo a wonni dēmiiddē don na, te gaan-gaanloh ti daa nen wuneh. ¹⁷ Kon bëyí yúh yii wunte te pageh ri, deef dī bakaadte.

5

Saak a yíkēe yí alalla

¹ Leegi nék, don fi yíkēe yí alalla síkíríi sè' ! Fègí, don hawoh ndah súfúñ fè nay keene sun fon da ! ² Alal mon yahte, búubfēn maasse, ³ úríssēn a tiinŋi hélíissēn homaakke te homaagi baa daa teeŋa' biti don homuy kaah te ri ay ron saŋku ti di na muuyla' kíi gaawa nen. Don homute don na garu alal,

te èldúnē túkkíté níi wocce. ⁴ Don kaa'uute yínlí bēewē légéyírú rēn meeyon da, te hēlsē warun don waa yínlí koon da daa teeŋa' níi lante biti don homuy kaah. Bēewē légéyírú rēn yaa ra fogute, te Koo-Yíkēe Kélfíi gaana kelohte wa. ⁵ Don pesuu caakla' a neŋ feey fi beh, don na yefaluu ti júrí suu hawu hawo nen. ⁶ Don daanute bëewí júbúté, don hawute wa húl te wa hécēntúuy a don.

Yii lenke nimili Yíkēe

⁷ Koy-yaayyi yeh, lah hínndíi níi yiin nimili Yíkēe. Don olute dee na hínndē' línēh sehe iña nay rii lece meeyi ra maan ? Te añcaŋ, dī ay seh mulaa nay dēbée tap Koo feey níi yee nay míllée rē paay, dī anti lec. ⁸ Kon don fi yaa bal, lah mújí don ham híin, nimili Yíkēe wullilay.

⁹ Don fi koy-yaayyi yeh, ngēnē cēpítíi hanndal kon toñeh Koope ay ron daane. Aattiyoha aa saañ haale ra aa sah faf ! ¹⁰ Koy-yaayyi yeh, yonente ya na húmú wonu di tii Koo-Yíkēe rē deyute coono ndaa mújúté. Kon, lah mēdí ti wa nen. ¹¹ Don yúhúté biti bëewē nē mújú coono yi wa ra, yen dēekúu wē « sos-keññi yeh ». Don keluute dee mújé' Yop coono fi ra a tígè míllúu bani Koo-Yíkēe rē maan ?

* **5:11** 5.11 Saame Téeríi Yop : Yop húmú bëyí caakke alal. Koope yerisse Seytaane na yakka alal mi, happe koyya níi iña laha' ri ra bééŋ d'umpé tak, antee tik sodte ri jérí misikke, faana bééŋ paasse. Ndaa taheh dī yeris ngémí, hampe Koope na híin níi míllé' lah sos-keññi.

Don olute dfee naa'a' Koo-Yíkée keeñ a dfee baaha' ri ra maan* ?

¹² Koy-yaayyi yeh, yee lukki lah solo ra nék daa ri bitih : ngënë eñii ! Ngënë eñii ní don cap sun-Koo mbée feey fi beh. Yaha biti don ay wone « íi » rée, wění « íi » kut don teem daaha. Yaha biti don ay wone « èe-èe' » rée, wění « èe-èe' » kut don teem daaha. Ngënë eñii aňohi mín díi man béeb ! Hen daa raa, don ii daanu fayu.

¹³ Bée' hom coono don na ra daga ! Bée' lah sos-keeñ don na ra labda Koope kaňaa ! ¹⁴ Bée' jér don na ra dëekrëe njítti jaňaa, wa leef dí díw di tii Yíkée, dagid dí. ¹⁵ Daňi manna' dah, ñéerée a ngém rek sëmlée jérdë, Yíkée cëgid dí cot. Yaha biti dí bakaadte raa, Koo-Yíkée baal ri. ¹⁶ Kon, wění bakaadfon hanndal kon, don dagiranta' ndin, don wah këlëñ. Daňi bëyi júbpé hom laha' doole. ¹⁷ Éelí húmú ow ti yen nen ndaa daga' ri biti Koo banti tof húinté daňi ra, muluf taway feey fa níi hente kíil éeyë a caan. ¹⁸ Filoon fi baaha dí daňke biti Koo dalaat tof, bacala lasse, gañcaha paalte níi meeyya nonte.

¹⁹ Koy-yaayyi yeh, ow di don na hel waali, ow kay habra' ri wëegísíd dí kaaf ka raa, ²⁰ bée' wëegísíd dí kaaf ka baa ra hela nuf biti bëyi habra' bakaaroh wëegísíd dí waala wun da, deef dí

sëmlë'té rí kúl kë te ri ay tah bakaaroha baalu bakaad caak.

Téerëe débpi bíní Peer ra Kúnsée

Yee daa unna débpi bíní Peer ra. Di bíní wë kerceenni dékú ginni iippi non Aasi. Kerceenna bíní rí yee ra húmú moklu moklo di yee gémú wë Yéésú-Kiristaa Yíkëe nē rē (3.14-17). Peer bíní wë unni yee woni wa bití wa ham ngémē híin, wa múñ coono fa daβ wa ra, nda wa bok ndamee ke dī fi Yéésú na ac fayú ra (5.10). Di wonte wa dee wadti man pesi wa bee henluy wa bëewí nēnīh bëewí Koope leegi, wa nonute heeda tansu ra (2.9-10 ; 4.2-3).

Di wonte wa :

- yii lenke mújē waayid yen Koope ra (1.8-12),
- yii lenke pesad kerceen filib bëewē nēnīh bëewí Koope ra (2.11-17),
- yii lenke coono fa ñee Kiristaa ra (2.21-25),
- yii lenke di wadti pesuun yaal a belebi (3.1-7),
- yii lenke ñaŋi Kiristaa kúl kē (3.18-22),
- yii lenke lof pesad (4.1-6),
- a yii lenke di wadti pesaa ow a moroomi (4.7-11).

Bëyi fí jaŋi téerii bee béeb ay ot bití balaa tígē teem ngém ow ra olu, bëe' ay ñee misik. Di ñee misik dī ham híin ní lúsēenē rēe nék, dī ii rii réecciyēh.

Wodoha

¹ Koy-yaayyi yeh, don fi bëewē Koope tanis wa ra, don fi doha-ndéemmē tasaaruú ginna na wonuu Ponto, Galasi, Kapados, Aasi a Bítíní rē, so' mi Peer apootari Yéésú-Kiristaa, daa mi na wodoh ron. ² Koo Boffa daa tanis don ti di húmú maaña' ri ri faha' nen. Ruuhi tahte don henute bëewí, nda don ñee yee won Yéésú-Kiristaa ra ndín, ñif mi bukut don.

Koope hēpē rēn mal, on don jaamma !

Mújē waayid yen Koope ra

³ Yen sím Koope, dī fi boffi Yéésú-Kiristaa Yíkii yen ! Di naa'i keeñi, dī onte yen pes has bee kēllē' rí Yéésú búudé rē. Daaha, yen lahute yaakaari mínēh dúm, ⁴ yen na sehaaluu iña yefid Koope bëewí rē. Daa wa iña mínēh yah ra, yee na sísíbéeh rē, yee hena' has faraaah ra. Koope yefidte ron wa ín sun. ⁵ Di ñeya' gémē gémú ron ra, dī na níid don a doolii nda don múc, te yii baa ay yúhúu yiin nay dúm pesa ra.

⁶ Iña yefid don Yíkēe yaa ra daa tah keeñnon sos. Tígē homuu don bee ra kep, wuti coono fi mín dīi man béeb tah don ñee mok yutuud daa sah, keeñnon sos. ⁷ Úrís sah na yah, ndaa balaa ow yúh bití dī kah-kah, dī ay ñee kii. Ti ñaaha nen, ngémēn luka' ri úrís lah solo níi, balaa ow yúh bití dī kah-kah, don ay ñee misik. Hen daa raa, yiin nay nimile

Yéesú-Kiristaa ra, don ay yeeliyoh kañ, ndam a béyíd.

⁸ Don fahuute ri te don oluy ri, don gémúté díi na te don oluy ri doom. Yii baa daa tah don lah sosi keefi gaani ow yéeh daa teem, ⁹ ndah don homute liili yee na saamu don ngémën dē : daa ri mújí rën.

¹⁰ Merees, yonente ya húmú saamute yúhí yii lenke mújí baa níi saam, te wa húmú léhínuté bëewë mala nay ron one Koope ra. ¹¹ Ruuhi Kiristaa húmú waa na, teebpe wa bití dí fi Kiristaa ay ñee coono, te ri lah ndam filoon fi baaha. Yii baa daa tah wa fi yonente ya saam níi saam yúhí wahtaa a dee nay lahee iñyaa ra.

¹² Koope teebpe yonente ya bití iña na wonu wa ra húmú yullay wa fi yaaha na, wa yulid don na. Waariyoh yi Uni Neba komute ron wonni yaa leegi, te wa wonuu ri doolii Ruuh-Pesey fa kola' sun-Koo ra. Malaaka ya sah fahuute yúhí wë níi faha'.

Koope dëekë' lan

¹³ Don lahute mali na seh ron sun-Koo yiin nay nimile Yéesú-Kiristaa raa kay, kon kélii affon don yeel, don tik yaakaaron béeb nē. ¹⁴ Ñéyí yee naha' Koope ra, ti di na ñeya' koy yee nah ri boffi ra, don yeris iña húmú neba' ron merees na húmú yíih rën rē. ¹⁵ Yii pañ don béeb lah lédí nē ti di lada' Koope fa dëek dën dē nen, ¹⁶ ndah Koope won filiβ Téerëe tih :

« *Héni bëewí ladute, ndah so' mi lante.* »[☆]

¹⁷ Bee don homute dañ da, don hom wonuu Koope Baap te daa ri na aattiya' ow fi ow béeb di iña pañ dí ra, te ri na lúukíréeh ow. Kon yee talluu ron pesa feey fa don haneel na bee ra, pesadon teebaa neeha neehu ron ri ra. ¹⁸ Don yúhruté affon dee tosa' ri ron pesada lahay njiriñ koruu ron caacon da maan ? Di tosaay ron a yii ay yahe yaho ti tiin heliis mbée úris nen. ¹⁹ Èe-èe' ! Don sēmlúu a ñif mi cēllúuy a dara, ñif mi Kiristaa fa lahay dara yii wonun sun fi ti har fi lahay síkkē nen ra. ²⁰ Koope daa tanis ri, tíkké rí yii baaha balaa ri sak èldúnē, te ri cépídté rí feey fa nda bëewë yúh rí jamanu ya míllē' yee ra, ndah don. ²¹ Don ñee'uu díi na don gémúté Koope fa kélid dí búudé, onte ri ndam ra. Ngémën a yaakaaron, don tikúu wë Koope na daaha.

²² Don bukutuute ndah don ñéerúuté a kaaf ka. Yii baa daa tah don faha' koy-yaayyon filiβ ngémē faha' kah-kah. Kon, fēhéntíi handal kon níi fahañta' di keeññon béeb. ²³ Yúhí bití unni Koope tahte don límëetúté. Ow neh daa límëet dën, ndah ow man tal gañcahi ay hulé hulé nen. Unni Koope nék, man tal gañcahi ii húl nen. Di ee pes da te ay home na faraa. ²⁴ Ndah bíníyúté Téerëe bitih :

☆ 1:16 1.16 Saame Tali Léwí 19.2

« *Ow béeb man gaawa nen, ndami man capussi gaaw fa meeyya nen : gaawa súhë' súhëe, capus yooka' yookoo.*

²⁵ *Unni Yíkëe nék ay home na faraah. »**

Te unni yaa daa Uni Neba húmú waariyu ron ra.

2

¹ Hém unni Koope tahte don límëetúté rëe kay, kon yii hente bos béeb hégii rí, don hegoh fel, pañ yii bokaay a yee na wonu ron ra, iñaan a won yin bos sun ow. ² Di na sesa' baaker babi miis mi yaafi daa kah-kah fa ra, sésii sikirëhí unni Koope daaha, ndah daa wa kah-kah fa. Don pesa' na raa, don ay ood te don ay múc. ³ Nagajek, bíníyúté Téerëe bitih : « *Don díkísúuté Yíkëe, don olute dee neba' ri ra!* »* Don pesuu yii baa neh a ?

Tígë yípëh faam fa ra a faam fa

⁴ Èyí Yéesú-Yíkëe në, dí fa daa la'a na pes habuu bëewë biti lahay njiriñ, ndaa daa ri bee Koope tanis dí otte biti dí la'i lahte njiriñ ra. ⁵ Don fi yaa bal nënii tabahi faam fa nay déké Ruuh-Pesëñ ra ti la' yi na pesu nen. Hen daa raa, don ay hen goomali seeyoh yi jébélú Koope, don yed dí sarahi neba'te ri di nay ron rii nahee Ruuha, yi ay ñee'ee Yéesú-Kiristaa na.

⁶ Ndah bíníyúté Téerëe bitih :

« *Èlsú ! Mee yíp la' Siyoñ ra, la'i nay habe faam fa, la'i daa mi tanis dí, la'i lahte njiriñ, bëyí fí gém dí na, fii mëssi sopoh. »**

⁷ Kon don fa gémú rë, bëyí affon sun, ndaa yaha bëewë gémúy rë rëe, bíníyúté bitih :

« *La'a habuu tabahoh ya biti lahay njiriñ ra, daa millë' ham lasa. »**

⁸ Lahte tigí bíníyúté biti bal :

« *Di la'i na kabina', la'i gaani na kéendë'. »**

Don ot bëewí yaa kabino, biti wa kaa'uute ñeyi unni Koope, te nagajek, Koope daa faha' ri daaha waa na.

⁹ Ndaa don, don daa heeda tansu ra, seeyoh yi Buura, heeda jébélú Koope ra, bëewí Koope. Di tanis don nda don mín waare iñi éemilë' yë pañ dí ra, dí fa dëek dën, dúhídté rën ñúusë kúdté rën niiñee ke ri hen saw ra. ¹⁰ Don húmú bëewí neh merees, ndaa woteh don bëewí ; naa'i keeñ Koope don húmú békíh në, ndaa dí tahidte ron dí leegi.

Pesad kerceen filib bëewë nëniih bëewí Koope ra

¹¹ Don fa faha' mi nii faha' ra, don fa nëniih bëy ëldúnë fi bee don haneel kut waa na

* **1:25** 1.25 Saame Isayii 40.6-8 * **2:3** 2.3 Saame Kañaa ya 34.9 * **2:6** 2.6 Saame Isayii 28.16 * **2:7** 2.7 Saame Kañaa ya 118.22 * **2:8** 2.8 Saame Isayii 8.14

ra, mi ðaŋ ðon biti ðon moy-toh faha'i pesi-neba na yuloh yahi nuffon ti mbëri na faha' kéendí moroomi nen ra. ¹² Lah pési wun leelii bëewë nëníh bëewí Koope ra ; ðon hena' ri ðaaha raa wuti wa tík ðon yin bos, won biti ðon i pagoh bos raa sah, wa ay ot biti ðon pagu yin wun, wa kañ Koope yiin nay ri waa feëñyee ra.

¹³ Af Yíkëe taha ðon on kélfë yë cér : maanam buur fa daa ílif bëy gina béeb rë, ¹⁴ a gëernëerrë buur wol wa daani pagoh yi bossa a bëyí fí paŋ yin wun wa gérém rí rë. ¹⁵ Nagajek, Koope faha' biti ðon pagun yin wun ðon téy búkkí bëewë yíih yin ra, yee na wëníh wona ðow ra. ¹⁶ Koope onte ron ðon lahuute affon. Kon lah pési pesi bëyí daa laha' afi. Di filib baaha béeb nék, baa banay tah ðon ðap bos ðon na. Don súrgë Koope na, kon lah pési ðaaha. ¹⁷ Lah ëní bëewë béeb cér, ðon faha' koy-yaayyon filib ngémë, ðon neeh Koope, ðon on buuri gina cér.

Coono fa ñee Kiristaa ra

¹⁸ Don fi súrgë yë, lah ñeyí woni bëewë në légyíruu ron ra, ðon on wa cér. Wa wun keëñ te wa baah, wa sohoor béeb, lah ëní wë cér. ¹⁹ Ndée nagajek, ðon múñ súfúñ fí waray ðon koon ndah Koope raa, baa yin wun. ²⁰ Don tooñ ní ðon

labaa ðon múñ dí rëe nék, ðon sehu laasi bih na ? Ndaa hena biti ðon pagun yin wun ðon labaa ðon múñ dí rëe, baa yíi wunte illí Koope. ²¹ Koope ðëekë' ðen baaha, ndah Kiristaa ñeete coono af ðon, nda ðon yíid yee paŋ ri baa ra, ðon ñee kotti. ²² Di mësëy bakaad, fel mësëy ðúh búgë.* ²³ Soluu ri bín fë rë, dí yíllëey ; mokluu ri ra, dí gapaay yíllëh. Di yerisse béeb ya' Koope fa aattiya'i júbpé rë. ²⁴ Homa' ri sun fi kurwaha* ra, dí a faanaŋ fi séféhté bakaadfi yen, nda yen bísë' a bakaad yen pes pesi júbpé. Gaañ-gaañni Kiristaa daa pay yen. ²⁵ Don húmú madu harri múuyú múuyë nen, ndaa ðon nimirute níiréhée ké ron na tooppitoh ron ra.

3

Di wañti pesuun beleb a yaali

¹ Don fi belebba bal, ëní yaallon cér ! Hen daa wa ot ðon pagee ri ðaaha raa, wuti ðeef wa gémúy unni Koope merees raa, yíi baa ay tah wa ay gém te ðon ii waa won dara : ² wa ot tilëdën lan a ðee koruu ron níi koroh raa rek, wocce ! ³ Ngënë mëkí wunaaloh ðon múukée garaŋ, ðon pokee takkaayyi úrissën, ðon bekee búubbí píisë kofeelte. ⁴ Wunon kay homa filib keëññon, ðon teey ðon sos.

☆ **2:22** 2.22 Saame Isayii 53.9 * **2:24** 2.24 kurwah :Di gerek, bíníyú ðeh : kilik. Téerëe won tih : bëyí fí yéŋké biti na hawu ri húl rë keru sun kilik, bëyí baa alkohte. Saame Nérsí Kootaa 21.22-23.

Wuni baa homa' na faraah. Baa daa yee lah solo illi Koope ra. ⁵ Belebba humu gemu filoon tikute yaakaari wa ya' Koope ra, humu teebuu wuni wa daaha. Wa humu onute yaalli wa cer, ⁶ ti di humu ona' Saara Abraham cer, na deekē' ri nijaay ra nen. Don ay hen koyyi Saara biti don page yin wun te don neehih ne dara.

⁷ Don fi yaalla nek, lah kuri belebbon don homa' wun, don yuh biti doni wa maduy. Eni we cer, ndah pesa na dumeh nay ron one Koope ra, wadte wa bal. Heni ri daaha nda Koope banti kaa' danjon.

Ow nebi paga wun

⁸ Kon seyii nuf yine, don bok keeh ; fehenti filiβ fon ti i koy-yaay nen don naa'anta' keeh, don cepid' affon fii moroommon. ⁹ Beyi pañ don yin bos mbée sol ron, ngene yilli. Don kay, lah degiri ri biti Koope barkel ri, ndah Koope deekē' ren baaha. Hen daa raa, Koope barkel ron. ¹⁰ Ndee biniyute Teere bitih :

« *Beyi fi faha' lah keehi
sosse,*

*lah jaamma pesi,
wadtee moytoh won bos,
fel banti duh bugē.*

¹¹ *Beyi baa wadtee hego
bos.*

*Di wadti paga yin wun,
wadti dekēe saam jaamma.*

¹² *Illi Yikee yipēh sun fi
beewē jubu rē,*

*di kunisse nufi na sikireh
danji wa ;*

*Yikee bota' beewē na pagu
bos da botoo. »**

¹³ Daa nay ron page yin bos biti don saamuun pañ wun kep ? ¹⁴ Wuti don nee mok koon ndah biti don pagu yii jubpe ree sah, don ay lah sos-keeh. Ngene neehi beewi kayya, ngene sidii yin. ¹⁵ Don kay, beki affon biti kep Kiristaa daa Yikeen. Cegii faraah don min lof beyi meel don yee tah don tik yaakaaron Yikee ne re. ¹⁶ Don yahti rii lof raa nek, lah pegii ri a teey, don on di cer. Lah seyii nufi lante, nda beewē na yahu tii yon af pesadi wunon Kiristaa na ra sopoh wonni wa. ¹⁷ Ow mokluun pañ yin wun, te deefa Koope fahaa ri daaha raa, daa gen biti di mokluun pañ yin bos.

Bani Kiristaa kul ke

¹⁸ Di fi Kiristaa, af bakaaddi yen tahte di neete mok, te mogi baa ri moka' waal yine, teempe waali yinii baaha faw ; di fa jub de tahte hul ndah yen fa jubuy re nda ri kud' yen Koope na. Faana daa hawu hul, ndaa Ruuh-Peseñ kelidte ri, di na pes. ¹⁹ Doolii Ruuhi baa nek daa tah di pay waare coonaa ya humu kasu ra. ²⁰ Daa wa beewē humu neeruy a Koope jamanaa na humu yugusa' Nowe gaala ra, te deef di fi Koope muneltē we, na seh. Beewē humu

múcú mulii mbënë mē rē hómú caakuy, wa hómú ow peeye daa haalu gaala. ²¹ Baa daa maanam bētsée ké yen woteh ; mulii bētsí baa wonay biti hosse sísíbf fē faanni yen dé', iti fi bētsē daa ri biti yen pokoh Koope na a nufi lante*. Bētsē múcēl yen múcēlē ndah kolohi Yéesú-Kiristaa búudé, ²² dī fa saañ sun-Koo tookke hēbís Koope, hompe ya'i ñamaa fi ra. Malaaka ya, mbínéeffí lahu un a yii lahte doole sun bēébf onute ri cér.

4

Lof pesad'

¹ Koy-yaayyi yeh, hém faan Kiristaa daa ñee coono raa, tēhí ñee coono ti Kiristaa nen ; ndah bēyí faana híssí ñee coono, wocá'te a bakaad. ² Kon tígē homuu dōn bee ra kep, yee talluu ron peson dā wadti hena yee faha' Koope ra ndaa fah pes-neb. ³ Pesee ke ron filoon bēébf, na hómú dékúu dōn pañ yii neba' bēewē nēnīh bēewí Koope ra doyte dōn na leegi : dōn hómú pesuu pagad bos a fah pes-neb, maní, mbumbaay níi dōn dómēlúté mbumbaay. Don na yúulúu ala bal, pagadi sēpírē'í bah. ⁴ Woteh fee Koo bee nék, bēewē nēnīh bēewí Koope ra éemúté di yee wocuu ron a wa di pesadi bosí misigi baa ra, wa na solu ron. ⁵ Ndaa wani

Koope fa cañ aattiya'i bēewē na pesu a yee húlú rē ay naa teeya'. ⁶ Yii baa daa tah Uni Neba waariyu sah bēewē húlú rē. Wa aattiyuu iña pagu wa bee na hómú pesuu wa feey ra naam ti bēewē bēébf nen, ndaa af Ruuha tahte wa pesuu ti di na pesa' Koope nen.

Di wadti pesaa ow a moroomi

⁷ Eldúnē dómpe níi wocce. Kon téeyí dōn yeel, nda dōn mín dāñ Koope. ⁸ Yee lukki lah solo ra bēébf nék, daa ri biti dōn fahanta' hanndal kon di keeññon, ndah faha' ow daa na múur bakaad caak. ⁹ Kúnsirēntíi illí faamon, banti ñéerē' a capitoh. ¹⁰ Ow fi ow dōn na bēébf, habraa moroomi di yee on dōn Koope ra. Hen dāaha raa, deef iñi bokuuy ya on dōn Koope ra bēébf, dōn kúrúté wē kúrí wunte. ¹¹ Bēyí fi yúhté biti ay wone wono, beka woni baa waarii unni Koope ; bēyí ay habree ow, pagaa ri a mín-mínē déñéen dī Koope ra. Hen dāaha raa, bēewē ñeya' Yéesú-Kiristaa na kañ Koope di iña bēébf, dī fa laha' ndam a doole dee níi kiri fi kiri ra ! Démíin !

Ow nebpi ñeya coono fi Kiristaa

¹² Don fa faha' mi níi faha' ra, coono fi misiga homuu ron ra banay tah affon kúnēh níi dōn won biti yii baa waray dōn kat.

* **3:21** 3.21 iti fi bētsē daa ri biti yen pokoh Koope na a nufi lante :Lahte bēewí habuu ri deh : iti fi bētsí baa daa ri biti yen dāñ Koope dī on yen nufi lante.

13 Keeññon kay wađti sosa soso biti đon bok a Kiristaa coono. Hen đaa raa, yiin nay rii teebe bēewē béeb ndami ra, keeññon sos nūi sos. 14 Af Kiristaa tah đon solu raa, đon lahute sos-keeñ ndah Ruuhi Koope, đí fi Ruuha lah ndam ra ee đon na. 15 Coono fon banay ñeya' biti đon hawun ow húl, mbée biti đon lohun loho, đon pagun yin bos, mbée đon haalun yii waal fon íníh nē. 16 Ndaa hena henu ron kerceen ra đaa taha đon hom coono raa, ngēnē sēpíi nē ; đon warun naa kañ Koope kaño di yee nonuu ron Kiristaa na ra.

17 Wahtaa nay dale aatiya'a ra lahte, te ay đébuu yen fi bēy Faam Koope na. Daluun yen na raa nék, lah bēewē yējké biti gémúy Uni Nebi Koope raa, ay made đíh waa na ? 18 Ndah bíníyúté Téerēe bitih :

« *Hém mújí bēe' júb đē daa misik raa, lah bakaaroha na, đí fa kaañ Koope ra raa, ay made đíh ?* »*

19 Kon, bēewē Koope daa faha' biti wa ñee coono ra, pagun wun rek saye, wa tík pesi wa ya' Koope fa daa sak wa ra, đí fa yii won đí béeb đí pañ ri ra.

5

Njúttí jaŋaa

1 Bēewē homu filib fon te wa i njúit jañi ra, so' mi won đon na, so' fa njúit jañi ti đon nen ra. So' mi tíkké íllí sē' coono fi Kiristaa ngēey te

may non ndamee ke ri nay teebuu ra. So' mi won đon tee : 2 tēppítíi yuba déjéén đēn Koope ra. Yéelí nē, đon ban đíi paga' biti đon túuyú rí túuyē, pēgí rí đon núhē' rí keeññon, đee faha' ri Koope ra. Ngēnē pēgíi rí biti đon ay naa saame alal, pēgíi rí a sawoor. 3 Ngēnē mēklí bēewē déjéénú đon da. Đon kay, wa wađti yíirún đon na ! 4 Hen đaa raa, yiin nay nimile kélffí níirēh yē rē, đon beku baane-ndam, bi ay hene has faraah.

Ow nebpi cépirē afi cépirē, ham ngémē

5 Đon fi tunka nék, lah ēní bēewē bahayu ron ra cér. Đon béeb nék, cépirí affon hanndal kon, ndah bíníyúté Téerēe bitih : « *Koope ñéerēey a bēewē na gaan-gaanluu ra, đí ona' bēewē cépirú affi wa ra mal.* »*

6 Kon, cépirí affon fii Koope fi Sērndējē, nda wahtaa lah raa, đí bēyíd đon. 7 Héli ina na sídúu đon da béeb ya'i, daa ri na tooppitoh đon.

8 Téeyí đon yeel ! Seytaane, kaa'ohon ee yídēelēh rē, man gaynde fi na hígēh, na boorsoh bēyí ñama ri nen. 9 Hēbí ngémē híin đon haa' a đí fi Seytaane, đon yúh biti koy-yaayyon filib ngémē homu feey fa ra béeb ñeyuu coono đaaha.

10 Đon lísúu hom coono kaah, ndaa Koope fa na ona' béeb rē dēekké đon đon

haal ndamee ke ri na dùméh
rè, af biti don nonu Yeesú-
Kiristaa na. Tasse yutuud di
ay ron baatti yugus, habra'
ron, on don doole, tik don
don caga' a kotti híinté.
11 Koope laha doole dee ní
kiri fi kirih ! Démíin !

Takoha

12 Silaas* fa haba' mi koy-
yaafi pokohte Kiristaa na ra
daa habra' so' bíní don koy
unni yeh. Bedda'i ron a
woni ron biti mali Koope
kaah te don ham na híin,
daa tah mi bíní ron unni
yeh. 13 Bëy Babilonna† dee
nonu jaŋaa ra, yee Koope
tanis wa ti di tansa' ri ron
nen ra, a Marka fa haba'
mi koy kah-kah soo na ra
na woduu ron. 14 Wëdëntíi
hannal kon ní wodanta'‡.

Koope ona ron fa nonu
Kiristaa na ra béeb jaamma
!

* **5:12** 5.12 Silaas :Di gerek bíníyú dfeh : Silwee. Daa ri tii yíní Silaas. † **5:13**
5.13 Babilon :Rom daa na léehúu dah. ‡ **5:14** 5.14 Di baahi bëewí yaaha, wa
yahti wodoh bëewë mboko yi wa mbée bëewë meeru wa raa, wa fëenúu wë
fëenëe.

Téerëe débpi bíní Saŋ ra Kúnsëe

Saŋ fa na suu yen wonee bee ra, daa ri Saŋ fa non bëewí iniilla bíníyú Uni Nebi Yéésú-Kiristaa ra. Di bíníyílté un éeyè kay, yulidte wa bëewí bokuuy. Bee déb dë nék, bëewë dī bíní wë unna ra capuy. Bee ñee na ra, bíníyú bëy il jaŋi hom filiḅ gin, dī wona'te jaŋii baaha yaa-ow. Bee millé' rë, bíníyú bëyí hínú Gayus. Di fi Gayus fi baa nék daa na húmú habra' koy-yaayya filiḅ ngémë, níi luka' yee ri yéeh wë rë sah, ndah gémë gém dī rë.

Jamanii Saŋ bín fë, lahte bëewí húmú kaa'uute biti Yéésú-Kiristaa acce feey hente ow. Wa tíkuté wonute biti ḅal yii neḅa' ow mín paŋ, Koope ii rii haba' yin.

Yii baa daa tah Saŋ bíní bëewë gémú Kiristaa na ra, na ḅaat waa teeḅ wa daa Yéésú, na won wa biti wa pokoh kaaf ka.

Di wonte wa :

- yii lenke tílé' níiñ (1 Saŋ 1.7, 2.9-11),
- yii lenke túuyë'í hasa (1 Saŋ 2.3-8),
- yii lenke kaa'ohi Yéésú-Kiristaa (1 Saŋ 2.18-23),
- yii lenke di wadti pesuun koyyi Koope (1 Saŋ 2.28 níi 3.3),
- yii lenke di wadti fahaa ow koy-yaafi filiḅ ngémë (1 Saŋ 3.11-18),

- yii lenke dëe faha' Koope ow ra (1 Saŋ 4.7-21),
- yii lenke di nay faasuu pesi ëldúnë (1 Saŋ 5.1-5),
- yii lenke iña seedeyiru Yéésú-Kiristaa ra (1 Saŋ 5.6-12),
- yii lenke pesa na dúméh rë (1 Saŋ 5.13-21),
- yii lenke kaaf ka a fahanta' (2 Saŋ 1.4-11),
- yii lenke pesa'i Gayus kaaf ka (3 Saŋ 1.1-6),
- a yii lenke di madu Joteref a Démétíríyús (3 Saŋ 1.9-12).

Bëyí fi jaŋi téeríi bee bëeb ay yúh di nay rii tíléé filiḅ ëldúnë fí beh, a di nay rii pesee a moroomi.

Una na ona' pes da

¹ Koy-yaayyi yeh, mi bíní ron unni yee teeḅi don yii lenke Una na ona' pesa ra. Dalaana, Una húmú në. Fun keluute ri filoon fe, fun tíkuté rí il ngëey, fun yee-lute ri te ya' yi fun tíkëhté sun fi.

² Pesi baa feeñiyoyhte, fun olute ri. Fun homu seedeyidi, fun na wonu yii lenke pesee na dúméh baa ra. Di húmú hëbís Boffa, te ri feeñiyoyhte fun. ³ Yee olu fun, fun keluute ri ra, fun homu woni don fi yaa ri, hen daa raa, don non fun na yen hen yínë, don non Boffa a Koy ka Yéésú-Kiristaa na ti di nonuu fun waa na nen. ⁴ Don ot fun bíní ron unni yeh, fun saamu biti sosi keeññi fun mit sëk.

Tíl neba' níiñ

⁵ Una liilu fun Yéesú-Kiristaa, fun na wonu ron ri ra daa ri beh : « Koope niñ koceec, yii ñúussé ínih díi na. » ⁶ Yen won biti yen nonu díi na, yen anti pesuun ñúus rée, deef yen felu felo, yen ñeyuy kaaf ka. ⁷ Yen pesuun niña ti di homa' dí fi Koope niña nen raa nék, deef yen henute yíně hanndal ki yen, ñif mi Yéesú Koohi hosse bakaadfi yen béeb.

⁸ Yen won biti yen lahuy bakaad daa, deef yen no-fuute affi yen, yen yíih kaah. ⁹ Hena biti raa nék yen tahute biti yen bakaarute, yen dúhíd dí búkkí yen raa, yii bosí hom yen na béeb, Koope ay yen díi baal, ladil yen. Koope júbpé te yii won dí béeb paŋ dí. ¹⁰ Yen won biti yen bakaaruy raa, deef yen tíkuté Koope feloh, te unni haalay keeñni yen.

2

¹ Don fi koyyi so', don ot mi bíní ron unni yeh, nda don banti bakaad. Ndaa til níi lah bëyí bakaad don na raa, yen lahute bëyí nay yen layre fii Boffa : daa ri Yéesú-Kiristaa, dí fa júb dē. ² Di fi Yéesú-Kiristaa fi baaha daa yera' afi sarah nda yen baalu bakaadfi yen. Af yen neh kep daa tah dí yera' afi sarah, ndaa af bëewě ildúně béeb.

Túuyě'í hasa

³ Yii bee daa teeb yen biti yen yúhuté Koope : ñeya ñeyu yen túuyě' yí Koope ra daa teeɓa' baaha. ⁴ Bëyí won

biti yúh Koope te deef dí na ñeyeh túuyě' yí rée nék, bëyí baa feloh, yéeh kaah. ⁵ Bëyí ñee woni Koope raa nék, deef faha'í bani Koope mitte sèk. Yii baa daa teeb yen biti yen pokuute Koope na. ⁶ Bëyí fí won biti pokohte Koope na, wadti pesaa dee pesa' Yéesú rē.

⁷ Don fa faha' mi níi faha' yee ra, túuyě'ě bíní mí ron bee ra has neh ; dí túuyě'í maañce, bi don liilute ri dalaanin. Túuyě'í baa daa una mèsúu ron keloh ra. ⁸ Di filib fi baaha béeb, lahte yin has filib túuyě'ě bíní mí ron bee ra. Kaaf ka hom na ra feeñce Yéesú nē, feeñce don na bal. Yee teeɓa' ri ra daa ri biti ñúusé hompe gét te niñi kah-kah fa acce níi wocce.

⁹ Bëyí fí won biti pesa' niña te deefa faheeh tík koy-yaafee ke ri filib ngémě il, deef dí lís ñúusé. ¹⁰ Bëyí fí faha' koy-yaafee ke ri filib ngémě nék, deef dí pesa' filib niña, te lahay yii mín díi bek bakaad. ¹¹ Bëyí fí fahaay tík koy-yaafee ke ri filib ngémě il nék, deef dí aa ñúusé ; dí tilě' ñúusé, yéeh tígě nē saañ dí ra, ndah ñúusé búumilté rí.

¹² Don fi koyyi so', don ot mi bíní ron unni yeh, biti bakaad don baalute ron ndah Yéesú-Kiristaa.

¹³ Don ot mi bíní don fi baappi yeh, biti don yúhuté bëe' húmú nē dalaana níi a dee ra. Don ot mi bíní don fi wahambaane ya a cafayyi yeh,

biti don bagute Seytaane.

¹⁴ Don ot mi bíní don fi tunjki
yeh,

biti don yúhúté Boffa.

Don ot mi bíní don fi baappi
yeh,

biti don yúhúté

bée' húmú nè dalaana ní a
dee ra.

Don ot mi bíní don fi wa-
hambaane ya

a cafayyi yeh,

biti don maanute filib
ngémé :

Unni Koope ee don na,
te don bagute Seytaane.

¹⁵ Ngënë fēhii ēldúnē ní
luka' iña filib. Bēyí fī
faha' ēldúnē, mínéh faha'
Baap-Koo, ¹⁶ ndah iñi ēldúnē
daa wa yeh : paŋ yii bosí
meela' faannon, faha' yii fu
ot dī, a gaan-gaanloh af iñi
feey fī beh. Te iñyaaha
béeb kolaay Boffa na, wa
kola' ēldúnē. ¹⁷ Ēldúnē a
iña neba' ow filib da béeb
hompe dúm, ndaa bēyí fī
paga' yii neβ Koope ay pes
faraah.

Kaa'ohi Yéésú-Kiristaa

¹⁸ Don fi koyyi so', yen ho-
mute millēen jamanu ! Don
keluute bití kaa'ohi Kiristaa
ac ayo maan ? Tígē ho-
muu yen bee ra kep, caakke
kaa'oh yi Kiristaa yi ayute.
Yii baa daa teeβ yen bití
yen homute millēen jamanu.

¹⁹ Wa fi yaa koluu yen na,
ndaa nagajek wa nēníh yen
na. Wa nonun yen na koon,
wa tasun yen na. Ndaa míntí
hena daaha, nda lan bití ow
yínē sah waa na noneh yen
na. ²⁰ Don nék, don liilute
Ruuh-Pesēŋ Bēyí selaa na,

daa tah don béeb don yúh
kaaf ka. ²¹ Don ot mi bíní
ron nék, bití don yíih kaaf
ka yúhē neh. Yúhē yúhú ron
kaaf ka ra kay daa tah mí
bíní ron ! Don yúhúté bití
bal fel a kaah mínih ñéerē'.

²² Kon daa feloha ? Daa ri
bée' kaa' ra, bée' won bití
Yéésú Buura Koo fal ri ra
neh. Bēyí baa daa kaa'ohi
Kiristaa ! Di boolla' Boffa a
Koy ka béeb kaa'a'te, ²³ ndah
bēyí kaa' Koy ka, kaa'a'te
Boffa, te bēyí tah Koy ka deef
tahte Boffa bal.

²⁴ Daa tah mi won don tee :
pēkíi iña keluu ron dalaanin
da. Don pokoh iña keluu
ron dalaanin da raa, don bal
don ay pokoh Boffa a Koy ka
na. ²⁵ Kiristaa gappe yen bití
nagajek dī ay yen on pesa na
dúméh rē.

²⁶ Bēewē na fahuu
múuydí don ra daa tah mi
bíní ron iñyeh. ²⁷ Ndaa
don nék, mi yúhté bití
Ruuha liilu ron Kiristaa na
ra pokohte don na, tahte
níi sohlaay ow teefle ron.
Ruuha daa na teeβ don yin
béeb. Di teeβa' yii hente
kaah, na yēeddēeh yii hente
fel. Kon pēgí yee nah ri ron
ra : hē mí don pokoh Kiristaa
na.

*Dee wadti pesuun koyyi
Koope ra*

²⁸ Mi won don tee koyyi so'
: hē mí don pokoh Kiristaa
na, nda yen lēhíh dara yii
sídúun yen bití ri nimil. Hen
daaha raa, yen ii húl a sopoh
fíyí yiin fī baaha. ²⁹ Don
yúhúté bití Kiristaa júbpé,
kon don wadtee yúh bití

bëyí fí tíl kotti júbpé, ðeef ði koy Koope bal.

3

Koyyi Koope

¹ Koy-yaayyi yeh, ëlí ðee faha' yen Boffa ra kan ! 'Di faha' yen fahoo ní tahte yen na ðeekúu koyyi Koope, te yen koyyi bal ! Bi bëy äldúnë yíh Koope, daa tah wa yíh yen. ² Don fa faha' mi ní faha' yee ra, yen henute koyyi Koope ní wocce. Di nay yen made fayu nék, feeñiyuy yen ní lante doom, ndaa yen yúhún biti yiin nay feeñiyee Koy Koope ra, yeni nay made ndah yen ay ot di man ði. ³ Te bëyí fí tík yaakaari yii baa Koy Koope na, bukuta' afi bukutoo, déké' lan ti di lada' ði fi Koy Koope nen.

⁴ Bëyí fí bakaad' nék, ðeef ði kaa' ñee woni Koope, ndah bakaad' daa ri kaa' ñee woni Koope. ⁵ Don yúhúte biti Yéesú-Kiristaa ac hosi bakaad' ði yen, te ði fi baa bakaad' ínih ðii na. ⁶ Yii baa tahte ní bëyí fí pokoh-te ðii na, na bakaareh ; bëyí fí déké' bakaad' nék, ðeef teeþa'te biti olay Yéesú-Kiristaa te yéeh rí.

⁷ Don fi koyyi so', ow banay ron múuyíd ! Bëyí fí paŋ yii júbpé, ðeef bëyí baa júbpé ti di júbë' Yéesú-Kiristaa nen. ⁸ Bëe' déké' bakaad' ða non bëewí Seytaane, ndah Seytaane dal bakaad' dalaanin ní a ðeh.

Koy Koope nék ac yahi légéyí Seytaane !

⁹ Bëyí fí hente koy Koope, na dékéeh bakaad' ndah yee hom Koope na ra daa hom ðii na. Koope daa Boffi raa kay, ði mínéh déké' bakaad' ! ¹⁰ Yii bee daa na teeþa' bëyí hen koy Koope a bee hen koy Seytaane na ra : bëyí na dékéeh paŋ yii júbpé mbée fahaay koy-yaafee ke ri filib ngémë, noneh koyyi Koope.

Ow wadti fahaa koy-yaafi filib ngémë fahoo

¹¹ Nagajek, una keluu ðon dalaanin ra daa ri beh : yen fahantuun hanndal ki yen. ¹² Yen ðanuy mada' Kayeŋ* múk ! 'Di húmú non bëewí Seytaane bëempé koy-yaafi. Yi tah ði bëem ði nék ? Biti pagad' ði wuneh te yi koy-yaafa húmú júbpé daa tah ði bëem ði.

¹³ Koy-yaayyi yeh, dara waray kún affon biti bëewë feey fi bee kaa' ðon. ¹⁴ Faha'a fahantuu yen ða daa teeþ yen biti yen koluute kúl kë, yen ayute pesa. Bëyí fí fahaay koy-yaafee ke ri filib ngémë, ðeef ði pokoh kúl kë. ¹⁵ Bëyí fí fahaay tík koy-yaafee ke ri filib ngémë íl bëeþ, ðeef ði bëemëh ow. Te ðon yúhúte biti bëemëh ow lahay pesa na ðúmëh rë. ¹⁶ Yii bee daa teeþ yen ðee wadti fahaa ow koy-yaafi ra : Yéesú-Kiristaa yera'te ñiiní ndah yen. Kon yen warutee yera' ñiinní yen ndah koy-yaayyi yen. ¹⁷ Lah

bëyí caakla'te anti ot koy-yaafi laheh yin, dī faaliyeeh ri raa, bëyí baa ay mínúu won biti dī faha'te Koope dīh ? ¹⁸ Mantee don fi koyyi so', yen fahanta' hanndal ki yen : won a búk rek teeŋaay faha' ow ; koloh paŋ kep daa mín teeŋa' faha' ow kaah.

¹⁹ Yen hena' ri daaha raa, yii baa daa nay yen teeŋe biti yen nonu bëy kaaf ka, te affi yen ay took biti yen home daŋ Koope. ²⁰ Wuti affi yen tookay ndah pagadfi yen raa, yen yúhún biti Koope luk yen lah yermaande, te ri yúh bééŋ. ²¹ Don fi yee faha' mi ní faha' yee ra, affi yen took raa nék, yen ii sídè' biti yen dage Koope. ²² Di ay yen on yii yen daŋ dī ri bééŋ, ndah yen ñeyuu túuyè' yí te yen paguu yii neba' ri. ²³ Yee túuy dī yen da daa ri beh : yen gém Yéésú-Kiristaa Koohi na, te yen fahanta' hanndal ki yen ti di naha' ri yen Kiristaa nen. ²⁴ Bëyí fí ñee túuyè' yí Koope, deef bëyí baa pokohte Koope na te Koope pokohte dīi na. Yii bee daa teeŋ yen biti Koope pokohte yen na : Ruuh-Peseŋ fa on dī yen da daa teeŋa' baaha.

4

Yonente yi padfah ya

¹ Don fa faha' mi ní faha' ra, ngèné gëewí gém bëyí won don biti Ruuh-Peseŋ ee dīi na. Lah síkíríi rí a nuf, don ay yúh nda Ruuhi Koope ee dīi na mbée íníh dīi na, ndah yonente padfah caak

tasaaruute feey fa. ² Yii bee daa na teeŋa' bëyí Ruuhi Koope ee dīi na : dī won biti Yéésú-Kiristaa acce hente ow raa, deef Ruuhi Koope aa bëyí baa na. ³ Ndaa bëyí fí kaa' yii baa Yéésú nē, Ruuhi Koope íníh bëyí baa na, bi kaa'ohi Kiristaa daa dīi na. Don húmú keluute biti kaa'ohee ke Kiristaa baa ac ayo neh a ? Tígè homuu yen bee ra kep, dī ee èldúnè nék.

⁴ Ndaa don fi koyyi so', don nonu bëewí Koope te don bagute yonente yi padfah ya, ndah Ruuha hom don na ra luk bee hom wa fi yaa nonu bëy feey fi bee ra doole. ⁵ Wa fi yonente yi padfah ya, wa bëy feey fi beh. Yii baa tahte gonli wa bééŋ yulla' yii neŋa' bëy èldúnè te bëewè nonu èldúnè rē daa na síkírúu wē. ⁶ Yen nék, yen nonu bëewí Koope. Bëyí fí yúh Koope ay yen síkírèh ; bëyí noneh bëewí Koope ii yen síkírèh. Yii baa daa nay teeŋe Ruuhi Koope fa na yeñ ow kaah ra a Seytaane fa na múuyídf ow ra.

Di na fahuu

⁷ Don fa faha' mi ní faha' ra, yen fahantuun hanndal ki yen, ndah faha' kola' Koope na. Bëyí fí faha' moroomi, deef dī koy Koope te ri yúh Koope. ⁸ Bëyí fí fahaay moroomi nék, deef yéeh Koope ndah faha' ow teem Koope na. ⁹ Koope teeŋa' biti ri faha'te yen dēh : dī cépídté Koy ka laha' ri yínè kut da feey fa, nda yen

ñeya' dīi na, yen lah pesa na dūméh rē. ¹⁰ Faha' gétēy beh : yen neh daa fahuu Koope faha'a gén dē. Di fi baa kay daa faha' yen faha'a gén dē, wola'te yen Koohi hawute sarah nda yen baalu bakaadfi yen.

¹¹ Don fa faha' mi ní faha' ra, Koope daa faha' yen daaha raa, yen warutee fahanta' hanndal ki yen bal. ¹² Ow ellēy Koope ! Ndaa yen fahanta' hanndal ki yen daa, daa ri biti Koope pokohte yen na, te faha'a faha' ri yen da feeñce yen na ní mitte sēk.

¹³ Yii bee daa teeḅ yen biti yen pokuute dīi na dīi pokohte yen na : ona on dīi yen Ruuha ra daa teeḅa' baaha. ¹⁴ Te fun olute, fun seedeyute biti Boffa wolte Koy ka sēmlē'í bēy ēldúnē. ¹⁵ Bēyí fí won biti Yéésú Koy Koope, deef Koope pokohte dīi na, te dīi pokohte Koope na. ¹⁶ Yen nék, yen yúhúté te yen gémúté biti Koope faha'te yen. Ahanḅkay, faha' ow teem Koope na ! Bēyí fí faha'te ow pokoh na, deef bēyí baa pokohte Koope na te Koope pokohte dīi na.

¹⁷ Faha'i yen ow mit sēk rēe, yiin bis-kēem, yen ay wēeliyēh affi yen, ndah deef dee pesuu yen feey fi bee ra a dee pesa' Yéésú-Kiristaa ra daa madu. ¹⁸ Faha' na ñéeréeh a neeh ; faha' mit sēk rēe, bota' neeh botoo. Bēyí fí neeh, deef séentēh daan, te faha'a faha' yen

Koope ra feeñay dīi na ní mitte sēk.

¹⁹ Yen nék, Koope daa déḅ yen faha' daa tah yen faha' bani bēewē bēeḅ. ²⁰ Bēyí fí kaa' koy-yaafee ke ri filib ngémē anti won biti faha'te Koope deef bēyí baa fel felo, ndah bēyí fahaay koy-yaafee ke ri tík dīi il rē, mínéh faha' Koope fa dīi tikēy rí il rē. ²¹ Túuyē'ē helid' yen Kiristaa ra daa ri beh : Bēyí fí faha' Koope wadtee faha' koy-yaafi bal.

5

Di nay faasuu pesi ēldúnē

¹ Koy-yaayyi yeh, bēyí fí gém biti Yéésú daa Buura Koo fal ri ra, deef bēyí baaha koy Koope ; te bēyí faha' baap deef faha'te koyyi. ² Yii bee daa teeḅ yen biti yen fahuute koyyi Koope : faha'a fahuu yen Koope, yen na ñeyu túuyē' yí rē daa teeḅa' baaha. ³ Nagajek, yen faha' Koope raa daa ri biti yen ñeyuu túuyē' yí. Túuyē' yí misikay, ⁴ ndah bēyí fí hente koy Koope rek, fu faasse pesi ēldúnē. Yee tah yen faas pesi ēldúnē rē nék, ee ngémí yen. ⁵ Kon daa faas pesi ēldúnē henay bēe' gém biti Yéésú Koy Koope ra ?

Iña seedeyu sun fi Yéésú-Kiristaa ra

⁶ Yéésú-Kiristaa daa bēe' aya' muluḅ a ñif ra. Di ayay a muluḅ doḅ, ndaa dīi aya' muluḅ a ñif. Ruuh-Peseḅ seedete yii baaha, te dīi fi Ruuh-Peseḅ daa kaaf ka.

⁷ Kon seede ya henute éeyë :
⁸ Ruuha, mulaa a ñif ma, te wa fi éeyë yë bééɓ daa boku una yínë. ⁹ Hém ow daa na won iña ot dī, yen gém rí rëe kay, assumaa wonni Koope neh, yee seedeyid dī Koohi ra ! ¹⁰ Daaha, bëyí fi gém Koy Koope na, kúdté seedii baa dī na ; ndaa bëyí gémëy Koope, deef yampe ri fel ndah dī gémëy yee won Koope sun fi Koohi ra. ¹¹ Yee wonu ra daa ri beh : Koope onte yen pesa na dúméh rë, te pesi baa ee Koohi na. ¹² Bëyí fi non Koy Koope na, lahte pesa ; bëyí fi noneh Koy ka na nék, lahay pesa.

bakaad bééɓ neh daa na kúɗ ow safara.

¹⁸ Yen yúhuté biti bëyí fi hente koy Koope na bakaareh saye, ndah Koy ka kola' Koope na ra daa na níid dī ní Seytaane mínléh rí yin. ¹⁹ Yen yúhuté biti yen nonu bëewí Koope te bëy éldúníi bee Seytaane laha'te wa. ²⁰ Yen yúhuté biti Koy Koope acce te daa ri on yen afa tah yen yúh Koope fi kah-kah fa ra. Yen henute yínë a Koope fi kah-kah fa af Koohi Yéesú-Kiristaa. Daa rii Koope fi kah-kah fa, daa ri pesa na dúméh rë. ²¹ Mantee don fi koyyi so', mëytíi ala ya !

Pesa na dúméh rë

¹³ Don fa gémú Koy Koope ra, don ot mi won don unni yah, nda don yúh biti don lahute pesa na dúméh rë. ¹⁴ Wëerté yen biti yen daŋ yii ñéerë'té a yee faha' Koope raa, dī ay naal nufi yen na. Yii baa daa tah yen yahti daŋ Koope raa, yen na sídíih dara ! ¹⁵ Kon wëer yen biti dī naalte nufi yen na raa kay, yen yúhún biti rek yen ay líil yee dāgu ri yen ra.

¹⁶ Bëyí ot koy-yaafi filib ngémë paŋ bakaadi kúréh ow safara raa, dī dagira ri, Koope ay on koy-yaafee ke ri baa pesa na dúméh rë. Baa wonuu bëyí paŋ bakaadi kúréh ow safara. Ndaa yaha bakaadi ay kúré ow safara raa, mi wonay biti bëyí baa daa nay dagiru ! ¹⁷ Yin ɓos bééɓ bakaad naam, ndaa

Téerí ana fa bíní Saŋ ra Kúnsée (Saame : Kúnsée 1 Saŋ)

Wodoha

¹ So' mi njidí jan̄aa dé', mi na wodoh do fi Belaa* Koope tanis ro ra doni koyyu, don fa faha' mi kah-kah ra. Funi af so' neh kep daa fahuu ron, ndaa bëewë yúhú kaah ra béeb fahuute ron, ² ndah kaaf ka ee yen na te ri ay home na faraah.

³ Koo Boffa a Yéesú-Kiristaa Koy Boffa ay yen lih mal, teeḅ yen naa'-keeñ, on yen jaamma yen fa na pesuu filib kaaf ka ñéerë' a fahanta' ra.

Kaaf ka a fahanta'

⁴ Keeñ so' sosse níi sos ola' mi biti filib fi koyyu, lahte na yi pesuu kaah ti di túuyë' rí yen Boffa nen.

⁵ Leegi daa mi na daŋ do yii bee Yaa ow : yen bokun béeb yen fahanta' hanndal ki yen. Yee bíní mí rë baa ra nék dī túuyë' has neh ; dī bee liilu yen dalaanin da. ⁶ Fahanta', daa ri pesa' túuyë' yí Koope, te túuyë'ë yoodu don dalaanin da naha' biti don pesuun fahanta'.

⁷ Don ot mi won don yii bah, biti i feloh caak tasaaruute feey fa, wa

kaa'uute biti Yéesú-Kiristaa acce hente ow. Wa fi yaa i feloh, wa kaa'oh yi Kiristaa. ⁸ Kélii affon toñeh don ay ñake iña légyú yen da. Don wadti liilun waafon liilo níi mit sèk !

⁹ Bëyi fi pokaay yeeddë' yí Kiristaa ñeya yin kay raa, noneh Koope na. Bëyi fi pokoh yeeddë' yí nék, non Boffa a Koy ka na. ¹⁰ Ow ac don na yeeddī ron yin kay raa nék, ngënë hëbí rí faamon, ngënë tēhí dīi na sah, ¹¹ ndah bëyi tah dīi na deef habra'te ri iñi bossa na paŋ ri ra.

Takanta'a

¹² Lahte iñi caakki mi mín don waa won koon, ndaa daa mi fahaay waa bíní kéet. Mi lahte yaakaari biti may ac ginon, yen olanta' yen won, hen daa raa keeñni yen bok sos níi soḅ.

¹³ Koyyi koy-yaafee† ke ro Koope tanis ri ra bal na woduu ro.

* **1:1** 1.1 Belaa :Belaa na wonuu dee ra, bëewë habuu ri biti dī jan̄ii hom filib gin. Koyya daa wa bëy ílí jan̄ii baaha. † **1:13** 1.13 Koyyi koy-yaafee na wonuu dee ra daa wa bëy ílí jan̄aa non Saŋ ra.

Téeríi éeyë fë bíní Saŋ ra Kúnsëe (Saame : Kúnsëe 1 Saŋ)

Wodoha

¹ So' mi njiidi jaŋaa, daa mi na wodoh do fi Gayus fa faha' mi kah-kah ra. ² Kooja, daa mi na dagid do nda yii koloh fu paŋ béeb Koo ñéerë' në, faanu sos lah jaamma, ti di laha' keeñu jaamma Koope na ra nen.

³ Lahte i ow di koy-yaayya filib ngémë ayute, bíllúté sè' dee haba' fu kaaf ka te fu pesa' ri ra. Keeñ so' sosse yii baaha ní sos. ⁴ Lahay yii lukki sosil keeñ so' bee mi kelohte biti koyyi so' pesuu kaah toŋ ra.

Pesa'i Gayus kaaf ka

⁵ Kooja, fu paŋke béeb fu hompe fa na habra' koy-yaayya filib ngémë, ní luka' yee fu yéeh wë rë sah. Yii baa daa teebe' biti fu gémpé. ⁶ Wa seedeyute dee faha' fu ow ra fii bëy ílí janii fun. So' mi daŋ ro biti fu baat waa habra' habra'i neba'te Koope, wa lúsídf waali wa. ⁷ Wa fi yaa nagajek, wa koluu légyíri Yéesú-Kiristaa, kaa'uute tah yin ya' bëyí noneh bëewí Koope. ⁸ Kon wadte yen biti yen habra' mani bëewí yah. Hen daa raa yen bal, yen bok légyéyë nay tahe kaaf ka baatti líiwëlsë' rë.

Di man Joteref

⁹ So' mi kéyrë'té bëy janii ron un, ndaa bi faha' Joteref kèllëh, kaa'a'te kelohi woni fun fi njiitti jaŋaa. ¹⁰ Mi ac daa raa, may won íni bossa paŋ dí ra, dí fa na yakka tii yi yen na felid yen da. Teyay baaha doŋ : dí kaa'a'te koy-yaayya na waariyu ra haal faami, kadda'te bëewí kayya fahuu waa kúdf faammi wa ra, líkké wa fi bëewí yaaha jaŋaa.

¹¹ Mantee kooja, ngana mëllë' pagad bos, lah mëllée pagad wun. Bëyí fí paga' wun, non bëewí Koope ; bëyí fí paga' bos nék yéeh Koope.

¹² Di fi Démétíríyús nék, bëewë béeb seedeyute biti dí paga' wun, pesadi kaaf ka homa' ri ra sah teebe'te ri. Fun fi yee sah fun seedeyirute ri, te fu yúhté biti fun wonuu kaah.

Takanta'a

¹³ Lahte íni caakki mi mín don waa won koon, ndaa daa mi fahaay waa bíní kéet. ¹⁴ Mi lahte yaakaari biti len mi olaat ro yen won.

¹⁵ Koope ona ro jaamma ! Kooyya dee na woduu ro. Wodiid fun kooyyee ke yen daaha, ow fi ow waa na béeb di tiyi a símíi.

Téerëe bíní Yúf rë Kúnsëe

Yee daa unna bíní Yúf rë. Unna nék helay ow, wa bíníyú ílí janjii ow yéeh rí, te wa na sampi mada' a yee hom filib uni ana fa bíní Peer ra.

Unna won sun fi yëeddëh yí padđah ya, wa fa kaañu Koope te fahuu pes-neb kep yaa haalu filib fi bëy ílí janjaa ra. Daaha, filib unna, Yúf teebpe bëy ílí janjaa dee nay kéendëe Koope neebi sun fi bëewí yaa ra, ti di húmú paga' ri bëy Sodom a Gomoor ra nen.

Di wonte wa fi bëy ílí janjaa biti bal, wa ham ngémë híin, wa dage Koope faraah, wa habra' bëewë yíih yee nay waa gémë rë.

Bëyí fí janjii téeríi bee béeb ay ot biti unna dínke naam, ndaa wa mín bedda' ow, nda bëe' baatti ham ngémí.

Wodoha

¹ Don fa dëek Baap-Koo ra, so' mi Yúf súrgíi Yéésú-Kiristaa, so' mi koy-yaafi Saak, daa mi na wodoh ron. Baap-Koo faha'te ron don fa yefru Yéésú-Kiristaa ra. ² Koope teeba ron naa'i-keeñi mínéh dúm, hëp rën jaamma, faha' ron faha'i mínéh dúm !

Yii lenke yëeddëh yí padđah ya na

³ Don fa faha' mi níi faha' yee ra, mi húmú sawoorte bíníi ron yii lenke mújë boku yen ra lool. Ndaa lahte yii tahte leegi mi mínéh ron banti bíní, mi cagoh ron, don haa' don ham ngémë on Koope bëewí rë híin. Ngémí baa daa ri bee ona' ri waal yínë kut teempe waali yíni baa faw ra. ⁴ Ndah lahte bëewí kaañute Koope haalute filib fon ndanka, na wonu biti mali Koope tahte ow mín pañ yii bosí neba' ri béeb. Wa kaa'uute yúhí Yéésú-Kiristaa, dí fa kut daa Kélffii yen a Yíkíi yen da. Húmú maañutee bíníyú Téerëe biti Koope ay daan wa fi bëewí bossi yah.

⁵ Yee nay mi ron wone bee ra, don yúhúté rí níi lante naam, ndaa mi faha' biti rek mí nérís rën dí. Nérsíi biti Koo-Yíkëe húmú sëmle'té bëewí dúhidté wë Ésip. Filoon fi baaha, dí happe yee kaa'uu gém díi na waa na ra húl. ⁶ Nérsíi bal yee kat malaaka ya húmú heefu sañ-sañ yed wa Koope ra níi wa koluute tígë húmú tikú wë rë. Koope hampe wa pokalsa'te, bekke wa tígí ñúussé túđ yeffe wa na níi yíin bisi gaana nay rii aattiyee ëldúnë rë. ⁷ Nérsíi bal yee húmú kat bëy Sodom a bëy Gomoor a ginna húmú hatni baaha ra. Wa húmú pesuu bos ti malaaka yi yaa nen, wa húmú saamute fanoh a i mbínéeffi bokuuy a wa.* Tígë homuu wa bee ra, wa daanute bekute kíi kí në

yíméh níi kiri fi kiri ra. Baa daa teef bēewē yee nay kate bēyí paga' bos ra.

8 Bēewē haalu filib fon yaa ra madu ti bēy ginni yaa nen kep. Wa níbúu iñi saku sako, wa ñeye pagadfi bossa na sobeyil faanni wa ra, faaliyuuy Koope anti sole mbíneeffē sun. 9 Añcañ Misel a faanañ fi, di fa daa kélfií malaaka ya ra sah, húmú poo'uu bani Seytaane filoon di yii lenke búudé fi Mēyíis rē, di kaañay sol Seytaane. Di won di wono rek tih : « Yíkēe démpí bēp afu ! » 10 Ndaa, bēewē haalu filib fon yaa ra soluu yii wa yíih rí. Yee yúhú wē rē, wa yúhú wē yúhéd raf, wa na níbih, te iñyaa daa nay tahe wa sañku. 11 Wa torohute ndah wa ñeyu kotti Kayeñ* ; wa helute waala wun da ndah hélíis, ti di na húmú paga' ri Baalam* nen ; wa tikúu Koope af ti di húmú tikē' Kore Koope af nen. Yii baa daa tah wa sañkuyute ti Kore* nen. 12 Ayi wa ndaje ílí jañaa koma' gace, ndah wa yípírúu yípírēe hécé fii yí wē te nē sēpiih nē dara. Wa madu nérrí lahay mulub ngilaaw ma na kúdf wē nen. Wa kilikki na líméh koy ! Wuti wahtii wa lah raa sah, wa líméh koy ! Hen daa raa, wa lecuu tal-tal ka, wa húlē' yínē faw. 13 Bēewē haalu filib fon yaa ra madu a mboowaanni gaanna kisi fē

nen. Iñi sēpirē' yē na pagu wa ra mada' a lossa na bet mboowaanna tíñ kisi fē rē nen. Wa madu a hulla na hēmíh ílíy yínē rē nen. Hulli yah, Koope helidte wa tik tígē lukki ñúus dē, wa hom daaha faw.

14 Henok* fa non jamanii paana fa dala'te Aadama ra húmú maañcee won yii lenke bēewí yaa na won tih : « Síkirií ! Yíkēe ac ayo a malaaka yi sela yi, yi caakute níi caak, 15 di aattiya' bēewē bēeb. Di ay daan bēewē tikúu rí af ra bēeb ndah pagadfi kaañ-Koope ya bēeb na paguu wa a kaañ-Koo ra. Wa fi bakaaroh ya kaañu Koope yaa ra, Koope ay waa daan ndah solla solu wa ri ra bēeb bal. » 16 Wa fi bēewí yah, keeññi wa dékē' haay, wa dékúu wonaaloh. Wa fahuu pes-neb, nebute búk, te wa laas ow deef séentúu nē yin.

17 Don fa faha' mi níi faha' yee ra nék, nérsii unna húmú wonu apootarri Yéesú-Kiristaa Yíkíi yen filoon da. 18 Wa húmú wonu ron tih : « Millēen jamanu, ay lah bēewí ay ayee ñaawla' te wa ay pesee fah pes-neb ndah kaañ-Koo. » 19 Wa fi yaa daa daralsuu koy-yaayya filib ngémē. Wa níbúu iñi èldúnē kep, Ruuhi Koope ínih waa na. 20 Ndaa, don fi yee faha' mi níi faha' yee ra, pēgí bēeb don pokoh yee gémú ron te kola' Koope na ra, don saye. Lah dēgí

* 1:11 1.11 Saame Dalaana 4.1-16 * 1:11 1.11 Saame Kíni bēy Israyel 22.1-35 ; 31.16 * 1:11 1.11 Saame Kíni bēy Israyel 16.1-35 * 1:14 1.14 Saame Dalaana 5.18-24

Koope faraah, Ruuh-Pesen bedda' ron na. ²¹ Pëkii faha'a faha' ron Koope ra, ðon sehe Yéésú-Kiristaa Yíkii yen, ði fa nay yen teebe naa'-keeñ biti wahtaa lah, on yen pesa na ðúméh rè.

²² Lah yérmí bëewë lahu nuf ana yee nay waa géme ré, ðon habra' wa. ²³ Lahte na yi fi yúhté biti pagadfi wa saañ waa beke sanjku. Kon, fúulí wë në. Yaa aa na nék, lah yérmí wë, ndaa lah héli nuf waa na. Ngënë lébí sah yii daa wa lahuu ri ní luka' búubfée ké wë sobe ndah pagadfi bossi wa ra.

²⁴⁻²⁵ Koope laha ndam, ði fa daa mín ðon kaa' keen bakaad, cëgíd ðën fii ði fa líif a ndam ra, ðon lëhíh síkkë, keeññon sos. Di fi Koope, ði fa yínë kut ða, ði fa ñeya' Yéésú-Kiristaa Yíkii yen na sëmlë'té yen ða laha ndam, lah doole, katan a sañ-sañ dala'te bín fë, a dee ní kiri fi kirih ! Démíin !

Téeríi feeñiyoha bíní Saṅ ra Kúnsée

Téeríi beh, Saṅ daa bíní rí. Di won tih : iña won dī na ra béeb, dī tíkké ilí nē te kelohte wa a nufi. Di won te biti bal Ruuhi Koope daa cép sun fi, dī na an waa bíní.

Jamanaa na waariya' ri deef buuri Rom na mokil kerceenna bín fē mokli misikke ra, dī habute kúrúte gin filib muluf hínú Patmos, helute dín fē. Homa' ri daaha ra, Ruuha cépē' sun fi na, dī na bíní iña feeñal ri Yéésú te d'uhē' Koope na ra. Unna bíní rí rē, yulid' wa il jañi paana di Aasi ti di wona' ri ri Yéésú filib feeñiyoha feeñiyoh ri ri ra. Di won te :

- yii lenke dee yeeliya' Yéésú ndam ra (5.6-14),
- yii lenke Har fa yera' Koope sarah ra, dī fi Yéésú (7.9-17),
- a yii lenke aattiya'i Koope a bëewē béeb (20.11-15).

Bëyí fí jañi téeríi bee béeb ay ot biti iña wonu filib ra saamu toñi yen fi kerceenna nda yii mín yen dab béeb, yen ham ngémí yen híin ndah bëyí fí ham níi d'umēenē rēe, tiyi ay bíníyú filib téeríi pesa na d'uméh rē.

Iña feeñal Yéésú Saṅ da

* 1:5 1.5 múcēlté yen bakaadfi yen a ñif mi :Bëewē húmú ñeyaatu unni yee bín fē wora'i wa bëewē rē, lahte na yi húmú bíníyú yii beh : hosse bakaadfi yen a ñif mi.

¹ Téeríi bee ëmbē iña feeñal Yéésú-Kiristaa te kola' Koope na ra, teebi súrgē yí yee na saañ lahe te wulay wulay ra. Yéésú nék wol malaakii Saṅ na, Saṅ fa súrgíi rē, teebi baaha. ² Di fi Saṅ nék seede seede yo dee biti iña ot dī ra béeb Unni Koope, te ri won te biti Yéésú-Kiristaa seedete ri. ³ Kon bëyí jañi téeríi bee a bëyí síkiréh rí béeb te tik dī nufi, ay lah sos-keeñ ndah iña wonu filib ra len' lah.

Unna bíníyú jañi yi paana ya ra

⁴ So' mi Saṅ, daa mi bíní don fi bëy ilí jañi yi paana ya deyi Aasi unni yeh : Koope fa húmú nē, ee na, te ac ayo ra líhē rēn mal, on don jaamma ! Ruuh yi paana yi, yee hom fíi ñaani nguur ki ra líhún rēn mal, on don jaamma ! ⁵ Yéésú-Kiristaa, dī fi seedii kah-kah fa d'ébpi koloh búudé rē, te ri buuri buurra feey fa ra líhē rēn mal, on don jaamma !

Kiristaa faha'te yen te ri múcēlté yen bakaadfi yen a ñif mi*. ⁶ Di panke níi yen henute bëewí nonu Nguur ki Koope, yen henute seeyoh yi Koope, dī fi Boffi. Di laha ndam, dī lahe doole dee níi kiri fi kirih ! Démiin !

⁷ Èlsíi, dī ee ac da, ñéerē'té a nérre ! Bëewē béeb ay rii ot níi luka' bëewē jabu ri ra. Bëewē feey fa béeb ay

fonj, hawoh af ri. Ahanƙay !
Démíin !

⁸ Koo-Yíkëe won tih : «
Daa mi Alfaa daa mi
Omegaa†, daa mi húmú nē,
mi ee na, te mi ac ayo, so' fa
mín béeb rē. »

Feeñiyohi Yéésú a Saŋ

⁹ Daa mi koy-yaafon Saŋ
fa bok a don, yen henute
yínē Yéésú nē rē di coono,
nguur a múñ. Mi húmú
kúrú kúrē gina na wonuu
Patmos hom filib kisi fē rē
mi betute daaha, af waaraa
na waare mi Unni Koope ra
a yee na seedeyid mi Yéésú
rē. ¹⁰ Bisi Yíkëe ín, Ruuh-
Pesen haalte so', mi kelohte
un dofohte filoon so' saleet
man kúlúb kí na lúub nen
won tih : ¹¹ « Bíníyé iña
ot fu ra, fu kéyrē' wē bēy
íllí jaŋi yi paana yi yeh :
bi Efes, Simirne, Pergaam,
Catiir, Sardes, Filadelfi a bi
Lawodise. »

¹² So' mi heeltoh oli bēe'
na won soo na ra, mi ot
lampa úris paana. ¹³ Lahte
mbínéefi mada' a ow húmú
leelii lampa ya, bekoh
sabidoor, pokohte geñu úris
kinohi. ¹⁴ Fen fa afa naa'
dúr, naa' ti lékít nen, íllē na
ñah ti kii nen ; ¹⁵ kotta man
pèrémí teyute, séewísuté
nii lante, moosute nii na
tiriñ nen, una man di na
tiila' mboowaanna kisi fē
nen. ¹⁶ Di hampe hul paana
ya'i ñamaa fi, jépíli laha'
kañaa ana yi dahasute na
dúh búgē. Kanama man
ndiñ-ndiñ na' nen taac.

¹⁷ Ola' mi ri ra, mi yíppée
keen kotta ti húlid' nen. Di
tikké ya'i ñamaa fi sun fi so'
tígí daaha, won so' tih : «
Ngana tíit ! Daa mi déb te
daa mi millé'. ¹⁸ Daa mi bēe'
na pes da. Mi húmú húlté,
ndaa mi ee pes da ee, te may
pese peso faraah. Daa mi
lah sañ-sañ sun fi kúl kē a
sun fi gin bēewē húlú rē.
¹⁹ Kon bíníyé iña ot fu ra :
yee lah yee ra a yee na ac
fayu ra béeb. ²⁰ Síkirée mi
won iti fi hulli paana ya ot
fu ya'i ñamaa fi so' ra, a iti
fi lampa yi úrissí paana ya :
hulli paana ya daa malaaka
yi jaŋi yi paana ya, te lampa
yi paana ya daa jaŋi yi paana
ya. »

2

Unna bíníyú yulid' bēy ílí jaŋii Efes ra

¹ Bēe' won so' tih : «
Bíníyé malaakii jaŋii Efes
fu won bēewē tih : so'
mi bēe' ham hulli paana ya
ya'i ñamaa fi so', ma na til
hanndal ki lampa yi paana
yi úrissē rē, mi won tee :
² so' mi otte yee pagu ron ra,
légéyí ron, a míní múñēn.
Mí yúhté biti don mínih dék
a bēyí bosse. Bēewē nē
wonu biti wa i apootar te wa
apootar neh ra, don seman-
talute wa nii don yúhuté
biti wa i feloh. ³ Don
lahute múñ : af so' tahte
don ñeyute coono, te don
yedduuy. ⁴ Di filib yaaha

† 1:8 1.8 Daa mi Alfaa daa mi Omegaa :Alfaa daa koy una déb di gerek ra,
omegaa daa millé'. Iti fi wa tígí dee daa ri bitih : Koope daa déb te daa ri millé',
mbée daa ri dalaana te daa ri dúmēnē.

béeb nék, so' mi otte yin don na : di húmú fahuu don so' débëenë daal, henlay dfaaha ! ⁵ Èlsíi di daluu ron wun a dee míllúu ron ra, don lof pesad don nimil di na húmú pesuu ron merees nen. Henay bah, may ac mi pah lampaa mi kélid dí tígë hom dí ra. ⁶ Di filib yaaha béeb nék, mi otte yii neba'te so' don na : don wonuy yin iña na pagu bëewí Nikol ra dalaa ti so' nen.

⁷ « Bëyí lah nuf, kelaa yee won Ruuh-Peseñ bëy ílí jañaa ra. Bëewë nay bage ra, may waa on wa ñam na di koyyi kilka na ona' pes hom filib meey Koope ra. »

Unna bíníyú yulid bëy ílí janjii Simirne ra

⁸ Bëe' wonil so' tih : « Bíníyé malaakii janjii Simirne fu won bëewë tih : so' mi bëe' déb te daa mi míllë' rë, so' fa húmú húl mi nimilte ma na pes da, mi won tee : ⁹ so' mi otte súfúñ fon a ñagon, añcañ don lahute kat ! Mi kelohte iñi bossa na wonu bëewë sun fi ron ra, bëewë na damuu biti wa i yëwúf, wa bëewí Koope, deefa kaah neh. Wa goomal bëewí Seytaane don ! ¹⁰ Yee na sayu ron súfúñë rë, ngënë néehí yin na. Síkiríi, Seytaane ay bekroh i ow don na kasu olsohi ron, don moklu níi hen waal sabboo. Hébi hín níi húlën. May ron bek baani ndami pesa na dúmëh rë.

¹¹ « Bëyí lah nuf, kelaa yee won Ruuh-Peseñ bëy ílí jañaa ra. Bëewë nay bage ra ii ñee húlí ana fa. »

Unna bíníyú yulid bëy ílí janjii Pergaam ra

¹² Bëe' wonil so' tih : « Bíníyé malaakii janjii Pergaam fu won bëewë tih : so' mi bëe' laha' jépilé laha' kaañaa yi ana ya dahasu ra, mi won tee : ¹³ so' mi yúh tígë dékú ron ra. Don dékú tígë yípë' Seytaane nguur ki ra, kaa'eeh don habute soo na hín. Don taasuuy biti don gémúté së', níi luka' na húmú hawu Antipaas, dí fa húmú seede kah-kah soo na, húl ginon ra, gina dék Seytaane ra. ¹⁴ Di filib yaaha béeb nék, mi otte yin don na : lahte bëewí ewu filib fon ñeyuu iña yëeddë' Baalam ra, Baalam fa húmú bek Balak nuf na fiir bëy Israyel, tah wa ñame bo' yúul, wa na njaaliyuu ra.* ¹⁵ Lahte bëewí ewu filib fon bal ñeyuu iña na yëeddúu bëewí Nikol ra. ¹⁶ Kon léfi pesad, henay baa mi ac ayo waalli yee mi haa' bëewí yaa a jépilé na dúh búk së' rë.

¹⁷ « Bëyí lah nuf, kelaa yee won Ruuh-Peseñ bëy ílí jañaa ra. Bëewë nay bage ra, may waa naa on maana* dapoh ra, mi yed' wa la'i naa'i bíníyú tii hasi ow yéeh rí henay bëe' nay rii liile ra. »

* 2:14 2.14 Saame Kíní bëy Israyel 25.1-2 ; 31.16 * 2:17 2.17 maan :daa ñama on Koope bëy Israyel homuu wa luufa ra. Tikki fi maan daa : « Yee yi bal ! »

*Unna bíníyú yulid' bëy íli
janjii Catiir ra*

18 Bëe' wonil so' tih : « Bíníyé malaakii janjii Catiir fu won bëewë tih : so' mi Koy Koope, so' fa íllí sè' na ñah ti kii nen te kotti so' man përemí moosu mooso nii na tiriñ nen ra, mi won tee : 19 so' mi otte yee pagu ron ra : dee fahuu ron ow ra, dee gémúu ron so' ra, iñi wunna na pagiru ron morommon ra a míní múñën. Mi otte biti dee sawooruu ron légéyé leegi ra luk bee débëenë.

20 Di filiḅ yaaha béeb nék, so' mi otte yin don na : don yeddfute belaa na wonuu Sesabel tik afi yonente ra, na múuyid' súrgë yí sè'. Daa ri bek wa njaaliyoh a ñam bo' yúul. 21 Añcañ mi onte ri, mi yerisse heeyce dī lof pesad, ndaa dī kaa'a'te yeris njaaliyoh. 22 Sikirée ! May rii fënid, dī hen misikid ; te bëewë fanuu a ri ra, may waa tik coono fi misikke hém wa lofuy pesadi bosa na bek wa belaa ra. 23 Mii teem daa kep, may hap koyyi belaa húl, hen dāa raa bëy íli janjaa béeb yúh biti yii hom nuf a yii hom keeñ ow béeb, so' mi yúh rí ; te yii pañ ow don na béeb, may ri rii yíníl. 24 Don fi bëy Catiir nék, don fa bekuy affon iñi bossi yaa na yëeddúu yaa ra, te don yooduy yee na wonuu bëewë "iñi lakoh yi Seytaane" ra, mi won don tee : mi tikëy ron yin kay.

25 Mi won don biti kep don

ham yee habu ron ra híin nii mi nimil.

26-28 « Bëewë nay page yee faha' mi ra nii millëenë rë, bëewí yaa daa bagu. May wa yed sañ-sañ kola' mi Baaso' na ra, mi tik wë sun fi heetti kayya wa kúdf wë kúrí híinté, wa dakaya' wa ti yaad' nen.* May waa yed hula na niiñ hagam dā bal. 29 Bëyí lah nuf, kelaa yee won Ruuh-Peseñ bëy íli janjaa ra. »

3

*Unna bíníyú yulid' bëy íli
janjii Sardes ra*

1 Bëe' wonil so' tih : « Bíníyé malaakii janjii Sardes fu won bëewë tih : so' mi bëe' kúdf Ruuh yi paana yi Koope a hulli paana ya ra, mi won tee : mi otte yee pagu ron ra : bëewë habuu biti don homu pes deef don húlúté. 2 Kon yúuníi don ham yee na waay húl don na ra híin, toñeh don ñak dī faf, ndée mi otte biti iñi wunna pagu ron ra tasa'te fii Koope. 3 Nérsii iña hómú yëeddú don a dee hómú keluu ron Unni Koope ra ; hëbí në te don lof pesad. Don yúunúuy, so' may ac bis don ii yéñ, mi beetti ron ti lohoh nen. 4 Di filiḅ yaaha béeb, i ow ewu filiḅ fon Sardes dee sísíbilúy búubbí wë. Wa fi yah, funi wa ay ñéerë' bani búubbí naa' yi wa, ndah wa mitu ri mito.

5 « Bëewë nay bage ra ay bekee búub náa' ti dāa

* 2:26-28 2.26-28 Saame Kañaa ya 2.8-9

nen. Mii nís tii yi wa téerëe bíníyú tii yi bëewë nay haale pesa na dúméh rë, mi won fii Baaso' a fii malaaka ya biti wa nonu soo na.

⁶ « Bëyí lah nuf, kelaa yee won Ruuh-Pesëñ bëy ílí jaŋaa ra. »

Unna bíníyú yulid' bëy ílí janjii Filadelfi ra

⁷ Bëe' wonil so' tih : « Bíníyé malaakii janjii Filadelfi fu won bëewë tih : so' mi bëyí selaa te daa mi kaaf ka ra, so' fa ham céebíi Dawit buura, mi kúnís dëe ow mínéh téy, te mi téy dëe ow mínéh kúnís rë, mi won tee : ⁸ so' mi otte yee pagu ron ra. Mi yúhté biti dón lahuy doole níi, ndaa dón habute unni so' híin, dón kaa'uute súgëhí sè'. Síkíríi ! Mi kúnísídté ron íl fíiyën abah, bi fí yúhté biti ow mínéh ríi won.

⁹ Bëewë nonu goomal bëewí Seytaane ra nék, feloh yi yaa damuu biti wa i yëwúf, wa bëewí Koope te dëefa kaah neh ra, may paŋ níi wa ac yek fíiyën, wa yúh biti mi faha'te ron. ¹⁰ Hémm dón daa habu unni so' híin ti di naha' mi ri nen, wahtaa nay mii cépiré loola ëldúnë béeb olsohi bëewë feey fa ra, so' bal may ron sëmlë'. ¹¹ Mi leŋ nimil, hëbí yee habu ron ra híin toñeh ow ay aye beb baani ndamon.

¹² « Bëewë nay bage ra, may waa yíp filíif Faam fi gaani Koope fi so' ti cip nen, te wa ii naa koloh ta'. May bíní tii Koope fi so' sun fi wa, mi bíní tii gin Koope fi so' na

bal, gini baa daa Yerusalem fi hasa kola' sun, Koope fi so' cépíd dí feey ra. May bíní tii hasi so' sun fi wa bal.

¹³ « Bëyí lah nuf, kelaa yee won Ruuh-Pesëñ bëy ílí jaŋaa ra. »

Unna bíníyú yulid' bëy ílí janjii Lawodise ra

¹⁴ Bëe' wonil so' tih : « Bíníyé malaakii janjii Lawodise fu won bëewë tih : so' mi bëe' në wonuu Démíin dë, so' mi seedii kah-kah fa mit wëelíyëh rë, so' fa iña sak Koope ra béeb ñeya' soo na ra, mi won tee : ¹⁵ so' mi otte yee pagu ron ra. Don madu muluβ nen : dón sosuuy dón woyuy. Don sosa' mbée dón woy koon daa nay géné ! ¹⁶ Ndaa dón sosuuy dón woyuy, dón homu leelaa te yii baa ay tah may ron hok feey ! ¹⁷ Don habuu affon biti dón lahute yin, iñon béeb ee tíl rë, dón ñakuy dara ; dón anutee yíih dëe mokuu ron a dëe súfúñúu ron ra ! Don i ñëkíd, dón i búumíd te dón lahuy yii bekun dón faanon ! ¹⁸ Yee nay mi ron wone ra daa ri biti ndék tee, dón ac dón lom úris kah-kah soo na, dón caak yin. Don lomaaloh yéré naa' bal dón bekoh, dón banilti hen faan holoŋ fii bëewë dón sopoh. Don saamaloh kilki ay paye íllën, dón yeel. ¹⁹ Mi hom wona' affi bëewë faha' mi ra mi tík wë waal. Kon kélii, dón lof pesad. ²⁰ Síkíríi, mee caŋke ílí faam fa ra ma na lab ílë ; bëyí keloh un so' te

kúnsíd sē', may haal faami, funi bok loon.

²¹ « Bēewē nay bage ra, may waa yeris wa took hēbís sē' ñaani nguur ki so' ti bee baga' mi, mi payte mi tookke a Baaso' ñaani nguur ki ra nen.

²² « Bēyí lah nuf, kelaa yee won Ruuh-Peseñ bēy ílí jañaa ra. »

4

Koope a ñaani nguur ki

¹ Filoon fi baaha, lahaatte yii feeñiyoh te so' : Hom homo níi mi otte íl kúnsēhté sun-Koo. Una na húmú won soo na man kúlúf kí na lúuf nen ra won so' tih : « Lawe dee mi teeḅ ḁo yee waḁ naa tikēh rē. » ² Dee a deh, Ruuha haalte so', mi otte ñaan nguur sun-Koo daaha ow tookke sun. ³ Bēe' na tak ti la'i miriñ luum a hilil nen. Kud' ki Koo na tak ti la'i na miriñ nen bal, gíwuté ñaani nguur ka. ⁴ Ñaan sabay ana a ñaan iniil (24) kay gíwuté ñaani nguur ka, yi fí yúhté bití baha sabay ana a baha iniilli (24) bekúu búuf naa', bekuute baane úrís daa tooku sun. ⁵ Lahte héléyyí ḁofa' ñaani nguur ka néeré'té a i un a pilliñji na tiil. Lampa paana na njaaroh fiyí, daa wa Ruuh yi paana yi Koope. ⁶ Yii manti kisi, helen ti pilaatu nen hompe fii ñaana. Mbínéeffí iniilli faanni wa béeḅ líiffé íl ow, homute leelaa gíwuté ñaana. ⁷ Bee ḁéḅ ḁé man gaynde nen, bee tikēh nē rē man yuuh fana nen, bee ñee na ra kúḁ kanam ow, bee

míllē' rē man njaan fi hom pún nen. ⁸ Mbínéeffí iniilla, bina-bina waa na béeḅ lahte paḁ pēenē yí líiffé íl. Wa ḁékúu yeek na' a elek wone tih :

« Fu pesen ! Fu pesen ! Fu pesen

ḁo fi Yíkēe, Koope fa mín béeḅ rē,
ḁo fa húmú nē,
fu ee na,

te fu ac ayo ra. »

⁹ Wahtii homuun mbínéeffí iniilla kañe, wa béyré, wa símé bēe' took ñaani nguur ka na pes faraaḁ ra, ¹⁰ baha yi sabay ana a iniilla (24) yek fii bēe' took ñaana ra, jaamiyee bēe' na pes faraaḁ ra, wa bet baane yi wa fii ñaana wone tih :

¹¹ « Yíkēe Koope fi fun, daa fu yeeliyoh ndam, daa fu mit béyíd, daa fu yeeliyoh doole di yee saka' fu iña béeḅ rē. Daa fu faha' ri, daa tah wa hen. »

5

Téerēe ya' Har fi Koo

¹ Filoon fi baaha, mi otte téerii túlúñú túlúñē hompe ya'i ñamaa fi bēe' took sun fi ñaani nguur ka ra ; hatinna béeḅ ana biníyuté, ḁí an-tee túlúñú siitḁuté sondeel, leewute leew paana. ² Mi otte malaakii mitte, béyíḁté uni sun won tih : « Daa yeeliyoh kécisi leewwa, kúnis téerēe ? » ³ Ndaa sun-Koo neh, feey fa neh, filib feey fa neh, lahay bēyí mín kúnis téerēe, olsoh yee filib.

4 Ola' mi biti lahay bëyi yeeliyohte kúnsí téerëe ol-soh yee filib ra, mi looyte looyi misikke. 5 Ow di baha ya won so' tígí daaha tih : « Ngana looy yaal ! Ole, gaynde fa tali Yudaa, sédí Dawit daa ßaŋ ; dí nay kécísé leewwi paana ya, kúnís téerëe. »

6 Filoon fi baaha, mi otte Har caŋke leelii ñaani nguur ka, mbínéeffi iniilla a baha ya giúwuté rí. Har fa man oolu oolo nen, lahte wic paana a íl paana yi daa Ruuh yi paana yi Koope, yee wolu feey fa béeb rë. 7 Har fa acce bebpe téerëe ya'i ñamaa fi bëe' took ñaana ra. 8 Beya' ri téerëe rë, mbínéeffi iniilla a baha yi sabay ana a iniilla (24) yípútée yek fiyí. Ow fi ow waa na béeb hampe kora a i annda úrís yi líffé a cuuraay. Cuuraayi yaa nam daa maanam ðaŋŋi bëewí Koope. 9 Wa na anuu yeek yeekaa has tabuu tih :

« Daa fu yeeliyoh beyi téerëe,
daa fu yeeliyoh kécísí leewwa.

Daa fu húmú hawu sarah,
ñif mu tosidte Koope ow,
bëewí koluu talla béeb,
wonadfa béeb,
heetta béeb,
ginna béeb.

10 Fu tahte wa nonute Nguur ki Koope
wa henute heet seeyoh yi Koope fi fun,
wa hen buur feey fa béeb. »

11 Mi homilte maa yeel, mi keloh i un malaaka caak giúwuté ñaani nguur ka,

mbínéeffë a baha ya. Wa madu pep feey nen caak, 12 béyruté unni wa sun na yeeku, tabuu tih :

« Har fa húmú hawu sarah ra
yeeliyohte doole,
yeeliyohte alal,
yeeliyohte hereñ a katan,
yeeliyohte béyíd,
yeeliyohte ndam a kañ ! »

13 Mi keliilte mbínéeffë béeb : yee sun neh, yee feey fa neh, yee filib feey fa neh, yee filib kísí fë neh ; mbínéeffë éldúnë béeb na yeeku, tabuu tih :

« Bëe' took ñaani nguur ka ra a Har fa
daa ron mitu kañ,
daa ron mitu béyíd,
daa ron yeeliyuu ndam,
daa ron yeeliyuu sañ-sañ
dee níi kiri fi kirih ! »

14 Mbínéeffi iniilla tabuu : « Démíin ! » Baha ya na yeku na jaamiyuu rek.

6

Har fa kécíssé téerëe

1 Homilte níi mi ot Har fa kécíssé leewa déb dë, mi kelohte un mbínéef yínë di mbínéeffi iniilla ðofohite ti pilliñ nen won tih : « Aye ! » 2 Mi hen ðeh, mi ot pënís naa', bëe' yaagoh ri ra hampe hél kas, dí yerute baane bagoh, saañce a ndam, saañ bagaat.

3 Har fa kécíssé leewi ana fa, mi kelohte mbínéefi ana fa fonke won tih : « Aye ! » 4 Pënís kay yíppée dúh, luum cuy ti yuy kíi nen ; bëe' yaagoh ri ra yerute sañ-sañ dí lík jaamma feey fa,

bëewë bëemëntée filiḅ fi wa. Di yeru jépíli gaante !

⁵ Har fa këcíssé leewi éeyë fë, mi kelohte mbínéefi éeyë fë fonke won tih : « Aye ! » Mi henil dëh, mi ot pënís kay yíppée düh, dī súul ; bëe' yaagoh ri ra hampe peeseyaa. ⁶ Mi kelohte yin ti un nen dōfohte leeli mbínéeffi iniilla na won tih : « Kílë súuné yínë daa ganjarma légéy ow bis múlgús, kilë bésí éeyë daa ganjarma légéy ow bis múlgús, yii lenke dúuléenë a bééñë nék, ngana leb na ! »

⁷ Har fa këcíssé leewi iniil fa, mi kelohte un mbínéefi iniil fa won tih : « Aye ! »

⁸ Mi olilte pënís kay yíppée düh, dī hilil ; bëe' yaagoh ri ra dëekúu kúl kë, gin bëewë húl rë ñeete filooni. Wa onute sañ-sañ sun fi hatin yínë di hatinni iniilla feey fa, wa hap bëewë dékú në rë béeb húl a jépíl, a yaab, a jér bos a rabbi sohoorute.

⁹ Har fa këcíssé leewi iip fa, mi otte i coonaa fëgërëh fi tígë na hawruu ra, coonaa yi bëewë húmú bëemú ndah Unni Koope a yee húmú waariyuu wa Unna bëewë rë. ¹⁰ Coonaa ya na fogu sun wonu tih : « Koo-Yíkëe, dō fa sela te daa fu kaaf ka ra, fu seh yi aatiya'i bëewë feey, fu yíllid fun di yee kéendúu wë ñif mi fun feey ra ? » ¹¹ Tígí daaha, ow fi ow waa na béeb yerute sabidoor naa', wa wonute biti wa sehaaloh yutuud' nūi koy-yaayyi wa, bëewë wani wa húmú boku

légéy rë hawu húl ti wa nen paay, ac mitsid wa.

¹² Mi henil dëh, mi ot Har fa këcísilté leewi pëenë fë, feey fa yíppée hégíyëh hégíyëhí misikke ; na'a súulté kúk ti bílëes nen, di teem céyín fë béeb luumpe cuy ti ñif nen ; ¹³ hulla sun na keen feey ti koy eenni hililli ngilaaw gaan hégíy tala nen. ¹⁴ Sun-Koo hente fur saañce ti téerii túlúñú túlúñë nen ; danja a ginna kisi fë béeb dōfute ílíyyë húmú wë rë. ¹⁵ Buurra feey fa, njiittë, kélfë yí soldaarra, yíkëe yí alalla, jammaarra, ñaamma a bëewë lahuu affi wa ra, bëewë béeb na dapuu filiḅ killa, na lakuu la' yi gaanna danja, ¹⁶ wa na wonu danja a la' yi gaanna tih : « Bëpí sun fi fun, don dap fun fun lakoh illí bëe' took ñaani nguur ka ra, fun wuloh haayi keeñ Har fa, ¹⁷ ndah bisi gaana lahte, bisa haaya' keeñi nūi haay ra ! Daa nay naa múcé ? »

7

Bëewë tinnúu rë

¹ Filoon fi baaha, mi otte malaaka iniil cagute hatinni iniilla feey fa, fútúté ngilaaw ma na haala' ílíyyi iniilla ra, kaa' ri laḅ sun fi feey fa, sun fi kisi fë a sun fi kilikka. ² Mi otte malaaka kay bal, bi kola' waal púlëen na' na ac. Di kúdté tiinj ñaasaa, bee Koope fa na pes da hom tinné' rí rë, béyídté uni sun na won

malaaka yi iniilla yeru sañ-sañi yahun wa feey fa a kísí fë rë tih : ³ « Bëyít, cëgi ! Ngënë lébí feey fa, ngënë lébí kísí fë, te ngënë lébí kilikka te ðeefa yen ñeesíh súrgë yí Koope púk, yen tínddë' wë. » ⁴ Tígí daaha, mi kelohte ðee teyu bëewë ñaasu púk tínddúuté rë : wa henute ow júnní tíméer a ow júnní sabay iniil a ow júnní iniil (144.000). Tal fi tal di talli sabboo a ana ya Israyel béeb, ow júnní sabboo a ow júnní ana tínddúuté (12.000) : ⁵ ow júnní sabboo a ow júnní ana di tali Yudaa ; ow júnní sabboo a ow júnní ana (12.000) di tali Ruben ; ow júnní sabboo a ow júnní ana (12.000) di tali Gaat ; ⁶ ow júnní sabboo a ow júnní ana (12.000) di tali Aseer ; ow júnní sabboo a ow júnní ana (12.000) di tali Neftali ; ow júnní sabboo a ow júnní ana (12.000) di tali Manase ; ⁷ ow júnní sabboo a ow júnní ana (12.000) di tali Simewoñ ; ow júnní sabboo a ow júnní ana (12.000) di tali Léwí ; ow júnní sabboo a ow júnní ana (12.000) di tali Isakaar ; ⁸ ow júnní sabboo a ow júnní ana (12.000) di tali Sabuloñ ; ow júnní sabboo a ow júnní ana (12.000) di tali Suseef ; ow júnní sabboo a ow júnní ana (12.000) di tali Bensame.

Bëewë bekuu búubbi naa' ya ra

⁹ Filoon fi baaha, mi otte dúukéli bëewí ow yéeh ðee teyu wa ra caak, dúukéli bëewí dúhúu ginna béeb,

talla béeb, heetta béeb a wonadða béeb. Wa cagute fii ñaani Nguur ka, fii Har fa yera' Koope sarah ra, bekuute búub naa', habute soor-soor ya' yi wa. ¹⁰ Wa béyrúté unni wa sun na wonu tih :

« Múc kola' Koope fi yen na, ði fa took ñaani Nguur ka ra, muc kola' Har fa yera' ri sarah ra ! »

¹¹ Malaaka ya béeb gíiwuté ñaani Nguur ka, gíiwuté baha ya a mbíneeffi iniilla, yedduute líhúuté kíp feey fii ñaana na jaamiyuu Koope ¹² na wonu tih :

« Ahan kay ! Koope fi yen daa mit kañ,
daa ri yeeliyoh ndam,
daa ri yeeliyoh hereñ,
daa ri mit sím,
daa ri mit béyíd,
daa ri yeeliyoh doole a katan
dee níi kiri fi kirih !
Démíin ! »

¹³ Ow di baha ya meelte so' won tih : « Bëewí yee béeb bekuu búub naa' ra, fu yúh daa wa i wa a tígë koluu wa ra a ? » ¹⁴ So' mi won ði tih : « Daa fu gisa' so' na kat bahaa ! » Di won so' tígí daaha tih : « Yee daa bëewë ñeyu mogi misiga ra ; wa hosu búubbi wë hoso, wa bukutu wa bukuto a ñif mi Har fa yera' Koope sarah ra níi naa'te. ¹⁵ Yii baa daa tah wa hom fii ñaani Nguur ki Koope, wa na jaamiyuu ri na' a elek filib Faam fi gaani Koope. Bëe' took ñaani Nguur ka ra ay waa uuf. ¹⁶ Wa wocute yaab a sifiroh ; na' wocce tami wa, op wocce

mokli wa, ¹⁷ ndah Har fa yera' Koope sarah hom sun fi ñaani Nguur ka ra daa nay hene níirèhí wë, kúf wë culli mulaa na ona' pesa na dúmèh rë. Te Koope ay moos muun ma íllí wë ní lan. »

8

Leewi paana fa

¹ Har fa kécíssé leewi paana fa, sun-Koo hente tid ní mitte genwal wahtu. ² Mi otte malaaka yi paana ya na homu fii Koo ra ; wa yerute kúlúb paana.

³ Malaaka kay acce canjke hëbís tígë na hawruu ra, hampe annda cuuraay, bi tífúu úrís. Di yerute cuuraay caak, yi dí ay waa yeree sarah sun fi tígë na hawruu ra fii ñaani nguur ka, ñéerë' a ñañji bëewí Koope. ⁴ Dúukii cuuraaya hom ya' malaakaa ra béyrèhté na saañ Koope na ñéerë'té a ñañji bëewí Koope. ⁵ Filoon fi baaha, malaakaa toffe na kii kë sun fi tígë na hawruu ra túmpé anndaa, bette ri feey fa. Tígí daaha, pilliñña tiilte, i un ðofohste, héléyyë takke, feey fa na hégíyèh.

Kúlúbbë

⁶ Malaaka yi paana ya kúrú kúlúbbí paana ya ra cagute na waayu fiisi kúlúbbë.

⁷ Malaakaa dëb dë fiisse, i ñañ galaas a kii ñéerë' a ñif na keen feey fa : hatin yínë di hatinni éeyë yë feey fa tampe ní muuyte, hatin yínë

di hatinni éeyë yí kilikka tampe ní muuyte, gaaw fi hilila béeb tampe ní muuyte bal.

⁸ Malaakii ana fa fiisse, yin jündëñ ti ñañ njaaroh kii nen betute filib kisi fë, hatin yínë di hatinni éeyë yí kisi fë yíssëhté ñif. ⁹ Hatin yínë di hatinni éeyë yí mbíneeffë na pesu kisi fë rë húlúté, hatin yínë di hatinni éeyë yí gaalla filib kisi fë yahte.

¹⁰ Malaakii éeyë fë fiisse, huli gaani na kañ ti njaar kii nen kola'te sun keente feey : dí keen sun fi hatin yínë di hatinni éeyë yí laah ya, a culli mulubba. ¹¹ Hula wonuu Beedok. Hatin yínë di hatinni éeyë yí mulaa hente haay, te ow caak di bëewë hanu na mulaa ra húlúté ndah haayi mulaa.

¹² Malaakii iniil fa fiisse kúlúb kii, hatin yínë di hatinni éeyë yí na'a labute, hatin yínë di hatinni éeyë yí céyín fë labute, hatin yínë di hatinni éeyë yí hulla labute ní hatin yínë di hatinni éeyë yí ñiñi wa béeb yimpé : hatin yínë di hatinni éeyë yí ñiñi na'a a elga béeb yimpé.

¹³ Mi homilte maa yeel, mi kelohte njaan fi na pún sunaa-sun, una hente sun ñañ won tih : « Mas ! Mantee mas ! Mas bëewë feey fa nay maasee fiisi malaaka yi éeyë yë tasu fiisi kúlúbbí wë rë ! »

9

Kúlúb kii iip fa

¹ Hompe nii malaakii iip fa fiisse kúlúß kí. Tígí daaha, mi otte huli kola' sun keente feey, yerute céebii ngaara mi nunji nooda. ² Di kúnissé ngaara ma, dúukii man dúukée njaar kii nen dfofohte na, na'a a deyi baa béeb ñúussé. ³ Lahte payyi dúhúté dúukée, hasaluute feey fa béeb ; wa onute doole tawaa ti dagal nen. ⁴ Wa túuyúté biti wa banti leß gaaw fa feey fa, gañcaha, a kilikka ; wa túuyú yejohi bëewë púkkí wë tiinndúuy a ñaasii Koope ra kut. ⁵ Wa nahuy biti wa ay waa hawe húl, wa nahu biti wa ay waa page iñi misikke nii hen céyín iip. Te yii misiga nay wa waa page ra, ay made biti dagal tap ow nen. ⁶ Waalli yaaha, bëewë ay faha' húl, wa ii rii ot ; wa ay saam kúl kë ndaa kúl kë ay waa hegee hegoo !

⁷ Payya madu pënissí cagute saañ haa' nen. Mante ti baane úris nen hompe affi wa, kanammi wa man kanam ow nen ; ⁸ fen fi wa man fen ow beleß nen, síssí wë man síß gaynde nen ; ⁹ búub tiin daa húun araalli wa, yodadi pabbi wa man yodad sareetti pënis caakki homu múkë na suu haa' daa na héçú wë nen. ¹⁰ Wa lahuu lúk, ñéerë' a suut ti dagal nen, te wa onute sañ-sañ wa mogle bëewë a lúkkée ké wë yaa nii hen céyín iip. ¹¹ Malaakii ngaara mi nunja daa buuri payya. Di hínú « Abadon » di ébrë, mbée «

Apoliyon » di gerek, daa ri « bee na yah ra ».

¹² Daaha, loola déß dë gétté, lool ana kay ee ayil ra.

Kúlúß kí pëenë fë

¹³ Malaakii pëenë fë nampee fiis kúlúß kí bal, mi kelohte uni kola' wicci iniilla tígí hawraa yugusuu úris hom fii Koope ra. ¹⁴ Una won malaakii pëenë fë kúd kúlúß kë rë tih : « Pëkisé malaaka yi iniilla pokalsuu hébis Efarat, laahi gaana ra. » ¹⁵ Daaha, malaaka yi iniilla pëkísuté. Daa wa malaaka ya húmú waaydu kíilí baa koon da, di céyín fi bah, bisi baa a wahtii baa koon da kep, wa hap hatni yínëe di hatinni éeyë yí bëewë feey fa ra. ¹⁶ Goomali soldaarra yaaguu pënissé ñéerúu a wa ra henute ow miliyon tíméer ana (200.000.000). Dee teyu wa ra, mi wonuu ri daaha. ¹⁷ Yii lenke pënissé a soldaarra nék, wa feeñiyuu so' dëh : wa bekku búub tiin luum cuy ti yuy kii nen, yi tappe búlëh ti sun-Koo nen, mbaasaante ti pëndël tuutaabi dúukísírú dúukísirë nen ; wa fi pënissé nék, affi wa man af gaynde nen, búkkí wë na dúh kii, dúukée a gélkii. ¹⁸ Daaha, hatin yínë di hatinni éeyë yí bëewë húluté loolli éeyë yí yah : kii kë, dúukée a géle dúh búkkí pënissé rë. ¹⁹ Doolii pënissé dúhë' búkkë ndaa na dúh në lúkkí wë bal, ndah lúkkí wë man goñ nen te kúdté af.

Te wa mokluu bëewë a affi yaaha.

²⁰ Di filib yaaha béeb nék, bëewë fúsú loolli yaa ra kaa'uute lofisoḥ di iña yugusuu wa a ya' yi wa ra. Wa habute na jaamiyuu ala ya, a ala yi tífúú úris, tiinj héliis, përem, yee peluu la' a kilik ra : ala yi na élih, na kéliih te na tílih. ²¹ Wa kaa'uute woc bëemëntë', pagaddi luunni wa, pañ yii tappe njaaliyoh béeb, a loh.

10

Malaakaa a téerü yutuuda

¹ Mi henil deh, mi otte malaakii mitte kola'te sun na cép, lambohte nér, kuḥ ki Koope hompe afa ; kanama man na' nen, kotta man cíp kii nen. ² Di hampe tééré yutuud, bi kúnsuté ya'i, tíkké kodi ñamaa fi sun fi kísí fë, kodi sugu fa hompe sun fi feey fa. ³ Di béyídté uni sun na daañjoh ti gaynde fi na foñ nen. Una na lús, pilliñji paana ya na tiil. ⁴ So' mi saañ bínii yee won pilliñja ra koon, mi kelohte un kola'te sun won so' tih : « Yee won pilliñji paana ya ra banay dúh búkú, te ngana bíní ! »

⁵ Tígí daaha, malaakaa ot mi cañke sun fi kísí fë a sun fi feey fa ra, béyídté ya'i ñamaa fi sun, ⁶ na añoh di tii Koope fa na pes faraah, sak sun, sakke feey, sakke kísí fë a iña hom filib fi wa béeb rë, won tih : « Leegi seha doyte ! ⁷ Malaakii paana fa fiise kúlúb kë rek, Koope page

yee nufi, ti di húmú wona' ri súrgë yí, yonente ya ra nen. »

⁸ Filoon fi baaha, una na húmú keloh mi dúhë' sun ra wonil so' tih : « Paye fu beḥ téerëe kúnsú hom ya' malaakaa cañ sun fi kísí fë a feey fa ra. » ⁹ Mi lebohte malaakaa mi meelte ri téerëe, di won so' tih : « Beye fu ñam, ay made kúum nen neḥ búkú ndaa lah lowu raa ay haay dé' ! » ¹⁰ Mi tahte téerëe ya' malaakaa, mi ñampe ri. Di man kúum nen neḥ búk sé', ndaa hona' mi ri ra, loo so' béeb na haaya'.

¹¹ Tígí daaha, mi wonu tih : « Fu wadtee waareyaat di tii Koope yii lenke heet caak, gin caak, wonad caak a buur caak. »

11

Seede yi ana ya

¹ Filoon fi baaha, mi yerute duud bëhëer, bi saamu nataa, una won so' tih : « Paye fu nat Faam fi gaani Koope a tígë na hawruu ra, fu kín bëewë në jaamiyuu filib ra. ² Ndaa ngana nat baylii éssi Faam fi gaana, ndah di yedduute bëewë nënih bëewí Koope ra. Bëewí yaa nay togisee Yerusalem gini selaa nii hen céyín sabay iniil a céyín ana (42). ³ So' may wol seede yi ana yi so', wa ay bekee saaku ti jétid' nen, wa léhín unni so' nii hen bis júnní a bis tíméer ana a bis sabay pëenë (1.260). » ⁴ Seede yi ana ya daa talli éliiffí ana

ya a lampa yi ana ya hom fii Yíkíi èldúnè rè. ⁵ Bëyí fí nar waa paŋ yin bos, kii nay dúhé búkkí wè muuyil kaa'oh yi wa. Ahanjay, bëyí nar waa paŋ yin bos rek ay húlée daaha. ⁶ Wa lahute sañ-sañ wa téy sun-Koo, Koo banti tob wahtaa nay waa léhinee unni kola' Koope na ra. Wa lahute sañ-sañ wa yídís mulubba ñif, wahtii neba' wa wa cépíí loolli caakki bokaay feey fa.

⁷ Wa woc seedii wa raa, raba nay dúhé ngaara mi nuŋa ra ay wa yejoh, baŋ wa, hap wa húl. ⁸ Búudé yí wè ay tase kéemí gini gaana sèeddúu « Sodom » mbée « Ésíp », tígè daayuu Yíkíi wè kurwah ra. ⁹ Ay hen yii mit bis éeyè a caan, búudé yí wè ay home daaha, heetta béeb, talla béeb, wonadfa béeb a ginna béeb ole wa, kaa' biti wa hacu. ¹⁰ Keeñni bëewè feey fa ay sos di húlè húlú wè rè, wa ay yeranta' kuun ndah yonente yi ana yi yaa moklute wa.

¹¹ Ndaa filoon fi bissi éeyè yè a caan fa, Koo wolte coonaa, bekke ri búudé yí yonente yi ana ya, wa koluute. Bëewè olu wa ra béeb títú títè nii tít ! ¹² Yonente yi ana ya koluute uni béyrèhté kola'te sun won wa tih : « Lèwí sun dee don ! » Tígí daaha, lahte nérí húunté wè, wa na lawu sun, kaa'oh yi wa na tíkú illí wè nè ngèey. ¹³ Dee a deh, feey fa hégyèhté hégyèhí misikke ; hatin yiné di hatinni sabboo yi

gina bëppé, ow júnnee paana (7.000) tíkké húlúté nè. Bëewè múcú nè rè títúté, wa na kaŋu Koope fa sun.

¹⁴ Daaha, looli ana fa gétté, éeyè fè leŋ ac !

Kúlúb kí paana fa

¹⁵ Malaakii paana fa fi isse kúlúb kí, lahte unni béyrèhté koluute sun-Koo na won tih : « Nguur ki èldúnè ee ya' Yíkíi yen leegi a ya' Buura dí fal ri ra, te ii naa koloh ta' ! » ¹⁶ Tígí daaha, baha yi sabay ana a baha yi iniilla (24) tooku ñaanni nguur ki wa hébis Koope ra yedduute líhúuté kíp feey na jaamiyuu Koope ¹⁷ na wonu tih :

« Koo-Yíkèe fè mín béeb rè do fa ee na te fu húmú nè rè, fun na símú rè di yee millè' fuu caŋ
fu beŋpe dooluu fu yíppé nguur ku ra.

¹⁸ Heetta húmú dee na haayluu,
ndaa daa fu haayloh woteh. Wahtaa nay fuu aattiyee bëewè húlú rè lahte, wahtaa nay fuu waafe súrgè yú,
wa fa yonente yu ra, wahtaa nay fuu waafe bëewú,
wa fa bëewè neehu ro ra, wa yahun ow gaan mbée baadoole béeb ;
daa ri wahtaa nay fuu dakayee bëewè rè,
bëewè yahu èldúnè rè. »

¹⁹ Tígí daaha, Faam fi gaani Koope sun kúnsèhté, wahandii Kootaa feeñce filib. Héléyyè tiilte, i un na

won, pilliŋŋa na faad, feey fa na hégíy'eh, dī na bacal i diŋ galaas.

12

Bëyi belaa a niŋkinaŋka fa

¹ Filoon fi baaha, lahte yii éemil'eté feeñiyohite sun : yaa ow beleb, dī bekoh na'a, céyín fē hompe kotti feey, baanii laha' hul sabboo a hul ana hompe afa. ² Belaa húmú loo. Bi ham lowa nék, dī na foŋ ndah misik.

³ Tígí daaha, yin kay feeñiyaatte sun : niŋkinaŋka gaan, luum cuy, bi laha' af paana a wic sabboo. Affi paana ya béeb bekute baane-buur. ⁴ Hatin yínē di hatinni éeyē yí hulla sun béeb lúk niŋkinaŋka fa padte wa, lasse wa feey fa. Di fi niŋkinaŋka fa nék, hompe fii belaa na saaŋ bēslé rē na woh biti dī bēsíl rēe ndín, dī ñam baakera. ⁵ Belaa bēsíilté, lahte koy yaal. Koy ki yaali baa daa ri bee nay kúré heetta béeb kúrí hínté rē. Bi hom niŋkinaŋka fa na seh, límúu kúkēyē, dī yíppée pahu kúrúte hompe hēbís Koope a ñaani nguur ki. ⁶ Di fi belaa nék, hegohte saaŋce luufin, deef Koope liiltee rii saamid' tígí homa ri daaha, dī tooppituu níi hen bis júnní a bis tíméer ana a bis sabay pēenē (1.260).

⁷ Tígí daaha, haa'a takke sun-Koo : malaakii gaana na wonuu Misel ra a kēewí na haa'uu a niŋkinaŋka fa

a kēewí. ⁸ Misel a kēewí bagute niŋkinaŋka fa a kēewí. Baguu niŋkinaŋka fa a kēewí rē, wa d'émlih sun-Koo. ⁹ Puŋkal mi niŋkinaŋka fa líkúté. Di fi goŋ fee kíilē na húmú wonuu tuumaloh mbée Seytaane ra, dī fa na húmú nofa' bëy éldúnē béeb rē líkúté betute feey, bani kēewí.

¹⁰ Mi yíppée keloh uni béyréhté kola'te sun-Koo won tih :

« Wahtu múc lahte leegi, wahtaa teeŋa' Koope fi yen doolii ra,

wahtaa teeŋa' ri nguur ki ra, wahtaa haala' sañ-sañ ya' Buura dī fal ri ra lahte leegi,

ndah tuumalohi koy-yaayya filib ngémē líkúté betute feey,

dī fa na húmú tuumal wa na' a elek fii Koope fi yen ra.

¹¹ Koy-yaayya daa míllúu rii baŋ,

daa míllúu rii baŋ yúfēhē yúfēh ñif mi Har fa ra, Har fa yera' Koope sarah ra, a di yee seedeyuu wa Unni Koope ra.

Wa húmú kaa'uuy na dara pesi wa,

kaa'uuy na dara níi húl deef wa na sah.

¹² Mi won tee bal :

bíyíi bëy sun-Koo, bíyíi don fa dékú nē rē !

Ndaa mas don fi bëy feey fa, mas don fi bëy kisi fē,

ndah Seytaane céppé don na a ŋaŋ,

céppé don na a ñaṅ ndah
dī yúhté bití dī talla
yutuud dúmèl. »

¹³ Ola' niṅkinaṅka fa bití
dī betu feey fa ra, dī yampe
na boorsoh belaa húmú lah
koy yaal baa ra. ¹⁴ Ndaa
belaa saamdute paḅ ana ti
paḅ dúut nen, yi nay rii
kúré tígè saamid' dī Koope
luufin, dī hom daaha toop-
pituu níi hen kíil éeyè a
caan, wuloh niṅkinaṅka*
fa. ¹⁵ Niṅkinaṅka fa púussé
muluḅ caak ti húlbí na
bas nen filoon belaa, na
faha' bití mulaa pah ri.
¹⁶ Ndaa feey fa hílippé belaa,
haaṅke, hante mulaa púus
niṅkinaṅka fa ra bééḅ. ¹⁷ Bi
haay keeñ niṅkinaṅka fa
belaa níi haay, dī saañce
yejohi koyyi kay yi, yee na
ñeyu túuyè' yí Koope ra te
dékúu seedeyidi Yéesú rē.

¹⁸ Kola' niṅkinaṅka fa dah,
dī payte caṅke búk kısı na
seh.

13

Rabbi ana ya

¹ Filoon fi baaha, mi otte
raḅ dúhté kısı fē. Di lahte af
paana a wic sabboo. Baane-
buur sabboo hompe wicca ;
tii yi soluu Koope bíníyúté
affa. ² Raba ot mi ra man
baade nen, kotta man kot
raba na wonuu úrsè rē nen,
búgè man búk gaynde nen.
Niṅkinaṅka fa déṅéenté rí
doolii a nguur ki, onte ri sañ-
sañi gaante. ³ Af yínè di
affi raba gaañohte gaañohti

misigi fí yúhté bití man ay
rii hap húl nen, ndaa gaaña
yíppée wah. Bëewè feey
fa bééḅ éemúté, wa ñeyute
tal raba. ⁴ Wa bééḅ na
jaamiyuu niṅkinaṅka fa di
yee ona' ri raba sañ-sañ ra.
Wa na jaamiyuu raba bal na
wonu tih : « Bee raḅ lahay
man kan ! Daa mín dīi tíkè'
af ? »

⁵ Di fi raba onute bití dī
gaan gaanloh dī sole Koope ;
dī ay homee sañ-sañi baaha
níi hen céyín sabay iniil a
céyín ana (42). ⁶ Daaha, dī
yampe na sol Koope, na won
yin bos sun fi tiyi, sun fi tígè
dék dī rē a sun fi bëewè
dékú sun da. ⁷ Di onute sañ-
sañi haa'aa ri bëewí Koope
dī baṅ wa ; dī onute sañ-
sañ sun fi bëewè bééḅ : talla
bééḅ, heetta bééḅ, wonad'ḍa
bééḅ, a ginna bééḅ. ⁸ Bëewè
feey fa bééḅ ay jaamiyee
ri : bëewè tiyi wa bíníyúy
dalaani pesa filib téerèe
bíníyú tii yi bëewè nay haale
pesa na dúmèh rē, téerée
ké Har fa yera' Koope sarah
hawute húl rē.

⁹ Bëyí lah nuf, kelaa na
! ¹⁰ Bëyí Koope won bití
ay habu ñaam, ii fús ; bëyí
Koope won bití nék ay húlée
jépíl, ay húlée nē. Yii baa
daa tah bëewí Koope waru-
tee múñ, wa ham ngémè.

¹¹ Filoon fi baaha, mi olilte
raḅ kay na dúh feey. Di
laha' wic ana man wic koy
har nen, ndaa ri wona'
wonad' niṅkinaṅka. ¹² Sañ-
saña laha' raba déḅ dē

* 12:14 12.14 niṅkinaṅka saari beh, a saar 15 : Di gerek, bíníyú dēh : goṅ.

béeb, dī laha' ri te ri paga' ri hēbísí, anti túuyé feey fa a bēewē feey fa bēeb jaamiyohi dī fi raba dēb hómú gaañoh gaañohi misiga nīi wahte ra. ¹³ Di fi rabi ana fa pañke i kimtaan gaan ; dī na kala' njaar kīi sun-Koo, cépid dī feey illi bēewē bēeb. ¹⁴ Daaha, dī hompe na nofa' bēewē feey fa kimtaanna na pañ dī ra fīi raba dēb dē. Di luk waa nah yugus netli raba dēb dē hómú gaañoh a jépilē, te millē'tée koloh ra. ¹⁵ Di fi rabi ana fa onute sañ-sañi bekaa ri netli raba dēb dē coonaa dī pes nīi wone ndín, hawroh bēewē nay kaa'ee jaamiyohi netla ra húl. ¹⁶ Di túuycé bēewē bēeb samdu tīnndēe ya' ñamaa mbée púk : ow gaan mbée baadoole, yíkēe alal mbée ñēkíd, fu laha' afu mbée fu ñaam bēeb fay tīnndúu. ¹⁷ Ow waray lom mbée yaay te laheh tīnndē'í bah : tīnndē'ē, dī tii raba mbée síifērē ñēerē' a tiya ra.

¹⁸ Tígí dee nék, meela' ñaañ : bēyí fī hereñ raa, fay mín kín síifērí raba, ndah síifērē ñēerē'té a tii ow, te daa ri beh : tímээр пeenē a sabay пeenē a пeenē (666).

14

Yeekii bēewē tosu ra

¹ Mi homilte maa yeel, mi otte Har fa yera' Koope sarah ra cañke sun fi dañi Siyoñ, ñēerē'té a ow júnñi tímээр a ow júnñi sabay iniil a ow júnñi iniil (144.000), yi fī yúhté biti tii dī fi Har fa

a tii Boffi daa bíníyú púkkí wē. ² Mi kelohte un kola'te sun-Koo tiilte man pagad mboowaanna kísí nen, man hínđíjí bídí baa nen. Una keloh mi ra man un kora, bee i bēelú homute típ rē nen. ³ Bēewē homute fīi ñaani nguur ka a fīi mbínéeffi iniilla a baha ya, na yeeku yeekaa has. Yeekaa mínéh haal af ow kay gét nēe wa fi bēewí júnñi tímээр a júnñi sabay iniil a júnñi iniilla (144.000) Koope tos wa feey fa ra. ⁴ Wa fi bēewí yaa daa wa yee mēsúy leb beleb nīi wa sobeye ra ndah wa yíih beleb. Daa wa yee fī yúhté biti tígí ñee Har fa bēeb wa ñee na ra. Bēewí yaa daa wa yee tosu filib fi bēewē henute yi Koope a yi Har fa ra. Daa wa maanam iña dēbúu lec meeyya jébélúté Koope ra. ⁵ Fel mēsēy dúh búkkí wē, wa lahuy síkkē.

Yii lenke bis-kēem

⁶ Filoon fi baaha, mi otte malaaka kay feeñiyohite na pún sunaa-sun. Di kúf Uni Neba na dúméh rē. Di ay rii waareye bēewē feey fa bēeb : ginna bēeb, talla bēeb, wonadđa bēeb a heetta bēeb. ⁷ Di bēyídté uni sun won tih : « Néehí Koope don kañ dī, ndah wahtaa nay rii aattiye bēewē rē lahte ! Jēemíyíi bēe' sak sun-Koo, sakke feey fa, kísí fē a culli muluḅba ra ! »

⁸ Malaaka kay feeñiyohite filoon bee dēb dē won tih : « Babilon dakaya'te ! Babilon fi gaana dakaya'te, dī fa bek

heetta béeb pagaddi bossi ra, di fa bek wa hani gullii njaaliyohi misiga homa' ri ra ! »

⁹ Malaakii éeyë fë feeñiyohite filoon fi ana ya déb dë, béyídté uni sun won tih : « Bëyí fi jaamiyoh raba a netli, bëyí fi lah tünndë'ë púkí mbée ya'i, ¹⁰ di fi bëyí baaha ay naa han béeeñi neebi Koope, yi fi yúhté biti rahay dara yíiduté gullii neebi. Bëyí baa, Koope ay rii bek filiib kii a gé. Di ay pítípee misik daaha fii malaaka yi sela ya a fii Har fa yera' Koope sarah ra. ¹¹ Te dúukii kii ké nay rii tame ra ay kolee koloo faraa. Bëyí fi jaamiyoh raba a netli, bëyí fi lah tünndë'ë biniyú tiyi ra, na' neh elek neh, bëyí baa wocce hílsëh. »

¹² Yii baa daa tah bëewí Koope, yee na ñeyu túuyë' yí te gémúté Yéesú rë, waruttee múñ.

¹³ Henil dëh, mi kelohte uni kola'te sun won so' tih : « Biniyé unni yee fu won tih : "Dala'te woteh, lahute sos-keen bëewë húlúu ngémí wë di Yíkëe në rë ! Ruuh-Pesëñ won tih : Ahañkay, wa lahute sos-keen, leegi wa mínú hílsëh légéyí misigi wa, ndah wa kúreelúuté ñni wanna pagu wa ra." »

Wahtu lec

¹⁴ Mi homilte maa yeel, mi otte nér naa' lahte yii tookke sun man ow nen. Yaa bekoh baane úris afi, hampe sarcii kaañce ya'i. ¹⁵ Malaaka kay dúhté Faam fi gaani Koope béyídté uni

sun won bëe' took sun fi nérë rë tih : « Beye sarcuu fu lec, wahtaa lahte : tooka nonte gina béeb, tas lec. » ¹⁶ Tígí daaha, bëe' took sun fi nérë rë beŕpe sarcii labpe héccé, tooka feey fa béeb lecce.

¹⁷ Malaaka kay dúhté Faam fi gaana sun, di fi baaha bal hampe sarcii kaañce ya'i.

¹⁸ Malaaka kay bal, bi daa lah sañ-sañ sun fi kii ké dúhté tigé na hawruu ra fonke af bee ham sarcii kaaña ra won tih : « Beye sarcuu fu lec goññi reseña meeyi béeeñë feey fa, wa nonte. » ¹⁹ Malaakaa beŕpe sarcaa labpe héccé, lecce goññi reseña meeya feey fa, yíinté wë ndoñi neebi Koope na lopotuu ra, ²⁰ goññi reseña dúhruté gina lopotute, ñif na dúh ndoña na húp na lap níi lahte pënis búk, na laf níi mitte kilomet tíméer éeyë (300).

15

Malaaka yi paana ya a loolla millë' rë

¹ Filoon fi baaha, mi otte yin kay, yii gaante te éemilë'té sun-Koo : mi ot malaaka paana yi kúru lool paana, loolli paana ya millë', teeba' Koope bëewë neebi ra. ² Mi olaatte yin ti kisi fi mulaa helen ti pilaatu nen ñéerë'té a kii. Bëewë bagu raba, bagute netli a sífëri tiyi ra cagute sun fi kisi fë na tiriñ ra, wa habute koraa yi Koope daa yed wa wa,

³ wa na yeeku yeekii Mëyíis súrgíi Koope a yeekii Har fa yera' Koope sarah ra na wonu tih :

« Do fi Koo-Yíkëe fë mín béeb dë,

fu gaante pagad,

fu éemílë'té pagad.

Do fi Buuri heetta,

waallu júbpé,

waallu kaah.

⁴ Daa kaañ roo neehéh Yíkëe ?

Daa kaañ roo kañeh ?

Do kep daa fu sela !

Heetta béeb ay ac fiyú,

heetta béeb ay ac jaamiy-ohu.

Iña pañ fu ra júbpé,

iña pañ fu ra teeba'te affi wa. »

⁵ Filoon fi baaha, mi otte Faam fi gaani Koope, bee ëmbë taantaa na nédís bëewë bití Koope ee leelii wa ra, kúnsëhté sun-Koo.

⁶ Malaaka yi paana ya kúru loolli paana ya ra dúhúte Faam fi gaana ; wa bekúu búub naa' peyeb, yi yugusuu piísí kofeelte, pokuute geñu úris kinoh yi wa. ⁷ Mbínéef yínë di mbínéeffí iniilla yedte malaaka yi paana ya guluñji úríssí paana ya túm neebi Koope ra níi lííffé, Koope fa na pes faraaah ra.

⁸ Faam fi gaana yíppée líif a dúukëe, teeba'i ndami Koope a doolii. Te ow mínéh haal Faam fa te deefa loolli paana ya kúru malaaka ya ra labeh níi gét.

¹ Filoon fi baaha, mi kelohte un béyrëhté sun kola' filíß Faam fi gaani Koope na won malaaka yi paana ya tih : « Pëyí don yíin guluñji paana ya túm neebi Koope ra feey fa ! »

² Malaakaa déb dë payte yíinté gullii feey fa. Bëewë húmú lahuu tünndë'i raba, na jaamiyuu netli ra béeb faanni wa lecce puulli bosse te misikke.

³ Malaakaa tíkëh në rë payte yíinté bii kísí fë. Mulii kísí fë yíppée yíssëh, man ñif búudé nen. Yii na pes kísí fë béeb húlté.

⁴ Malaakii éeyë fë payte yíinté gullii laah ya a culli mulubba béeb. Mulubba béeb yíssëhté ñif. ⁵ Tigi daaha, mi kelohte un malaakaa lah sañ-sañ sun fi mulubba ra na won tih :

« Do fa Sela ra,

do fa júb dë,

do fa húmú në aa',

daa fi na woteh ra,

daana daan fu wa ra ñeete waal.

⁶ Fu onte bëewë han,

bëewë kéendú ñif mi bëewú rë,

bëewë kéendú ñif mi yonente ya ra,

fu onte wa han.

Fu on wa ñif wa hanute,

te wa yeeliyuu ri ! »

⁷ Filoon fi baaha, mi kelohte uni kola' tígë na hawruu ra na won tih :

« Ahan'kay do fi Koo-Yíkëe,

do fa mín béeb rë,

fu aattiya' kaah,

te aattiya'u júbpé. »

⁸ Malaakii iniil fa yíinté gullii sun fi na'a, na'a onute

16

Guluñji paana ya

sañ-sañ fetlohte na bërëb bëewë. ⁹ Na'a tampe bëewë tami misikke, wa na solu Koope fa na cépíď loolla a sañ-sañi ra. Bëewë kaa'uute lof pesad, kaa'uute kañi Koope.

¹⁰ Malaakii iip fa yínté gulii sun fi ñaani nguur ki raba, nguur ki yíppée ñuus túď. Bëewë na pataayuu misik, ¹¹ wa na solu Koope fa sun di misiga homuu wa a puulla faanni wa ra, wa kaa'uute súugëh pagadďi bossi wa.

¹² Malaakii pëenë fë yínté gulii filiď laahi gaana na wonuu Efarat ra, mulaa filiď síiñcé, heliď buurra koluu púlëen na' ra waal.

¹³ Filoon fi baaha, mi otte yébitëh éeyë yí madu mbook nen : yínë dúhté në búk niñkinanĵa fa, kay dúhté búk raba, lahte bi dúhë' búk yonentii padďah fa. ¹⁴ Wa yébitëh yí Seytaane daa wol wa, yi na hoñuu pañ kimtaan. Wa na payu buurra feey fa béeb, négirée wë nda wa waay haa'a nay lahe bisi gaani Koope fa mín béeb rë.

¹⁵ Yíkëe won tih : « Síkirée, so' may ac mi beetti ron ti lohoh nen ! Bëyi nee'ay, yeffe búubi kaa' biti tilë' faan holon toñeh ay sopee, bëyi baa lahte soskeëñ. »

¹⁶ Daaha, yébitëh yë négirúuté buurra iliy, tígë në wonuu Armagedon ra di ébrë.

¹⁷ Malaakii paana fa hasalte gulii sun, un béyrëhté sun dúhë' Faam

fi gaana, kola' ñaani nguur ka won tih : « Iña béeb paama'te ! » ¹⁸ Tígí daaha, héléyyë a i un a pillinĵa ñéerë'té a hégíyëhí feey fi misikke takke. Hégíyëhí feey fa misikke misigi fi yúhté biti lëhirëy hena' ow pot ëldúnë níi a baaha. ¹⁹ Gini gaana lecsa'te éeyë, ginni heetta feey fa béeb bëppé. Koope halay Babilon, Babilon fi gaana : ďi hëndíďté ri në gulii, gulii neebi misigi ! ²⁰ Ginna hom filiď kisi fë rë béeb sooyce, ow mínléh olil dañ. ²¹ Diñĵi galaassi gúussé kola'te sun na tof sun fi bëewë. Bëewë na solu Koope di yee na tofa' ri diñ galaas ra, ndah yee lah ra misikke níi misik.

17

Tilëhí gaana

¹ Filoon fi baaha, malaaka di malaaka ya habu gulunĵi paana ya ya' yi wa ra acce won so' tih : « Aye mi teeď do daana na saañ keene sun fi belii tilëhí gaana ra, daa ri gini gaana hom búk laah yi caakka ra. ² Buurra feey fa fanuute a ri, te bëewë hanute na gulii njaaliyohi níi maniyute. »

³ Ruuh-Pesen haalte so', malaakaa yíppée sëe kúď luufin. Dee a deh, mi otte ow beleď yaagohte rab luum cuy bi faana béeb biniyú tii yi soluu Koope. Raba kúďté af paana a wic sabboo. ⁴ Belaa bekoh yéré yi kofeelte ot, luum cuy, pokohhte takkaay úris a jamaa, a

feme. Di hampe gulonj úris ya'i, bi lííffé pagad bos, a sobii njaaliyohi. ⁵ Tiyi léehúu léehée bíníyúté púgë. Tiya daa ri beh : « Babilon fi gaana, yaafi tiléh yë a iñi bossa feey fa. » ⁶ Mi otte biti belaa han ñif mi bëewí Koope níi dí manite, ñif mi bëewë hawu húl af yee seedeyuu wa Yéesú rë.

Ola' mi di man dí, af so' kúnëhté. ⁷ Malaakaa won so' tígí daaha tih : « Afu kúnëh yi deeha ? Síkirëh sè', may roo teeb iti fi belii beh, a iti fi raba kúf dí, laha' affi paana ya a wicci sabboo ya ra. ⁸ Raba ot fu bee ra húmú yéelíd, ndaa ri peslay. Di leñ dúhé ngaara mi nuña, ndaa dí saañ sañkuye sañkuyo. Te bëewë feey fa tii yi wa ínih téerëe bíníyú tii yi bëewë nay haale pesa na dúmëh rë dala'te dalaani pesa ra, wa fi yaa nay éemé biti wa ot raba. Ndée naga-jek, raba húmú yéelíd, ndaa peslay, te ri ay nimil pes káy.

⁹ « Tígí dee nék, meela' ñaañ a hereñ : affi paana ya daa danji paana ya took belaa ra. Wa buur paana bal. ¹⁰ Filiñ fi buurri paana ya, iippa keenute, lahte bi líssí took, paana fa aay doom ; te ri ac daa, toogi ii maañ. ¹¹ Raba húmú yéelíd te peslay ra, dí fi baaha daa ri buuri peeye fa ; dí non buurri paana ya bal te ri saañ sañkuye sañkuyo.

¹² « Wicci sabboo ya ot fu ra, wa buur sabboo yi tookuy nguur doom, ndaa

wa ay yeru sañ-sañi tookuun wa a raba nguur ka níi hen wahtu. ¹³ Yee níbú wë rë béeb yínë : wa yed doole yi wa a sañ-sañni wa raba. ¹⁴ Wa ay yejoh Har fa haa', ndaa dí ay waa ban ndah daa ri Yíkëe fë lukki gaan da, daa ri Buuri buurra ; dí ay ñéerée a bëewë dí tanis wa dëekké wë rë, bëewë gému rí rë, dí ban wa. »

¹⁵ Malaakaa wonil so' tih : « Mulaa ot fu yee ra, tígë took belii tiléhë rë, wa i heet, wa dúukël i ow, wa i gin a i wonad. ¹⁶ Wicci sabboo ya ot fu ra nék a raba, ay millé' kaa' belii tiléhë : wa ay beb iña laha' ri ra béeb níi luka' yéré yë dí hen faan holonj, wa ñam dí, wa tam caan fa kii. ¹⁷ Koope daa sof wa nufi paguun wa yee faha' ri ra : wa négírë' sañ-sañi nguur ki wa légyíd raba níi yee won Koope ra lah.

¹⁸ « Belaa ot fu ra nék, daa ri gini gaana ílíf buurra feey fa ra. »

18

Looli Babilon

¹ Filoon fi baaha, mi otte malaaka kay kola' sun na cép feey. Di lahte sañ-sañ gaan te ndami hawaante feey fa béeb. ² Di béyídté uní sun won tih : « Babilon dakaya'te ! Babilon fi gaana dakaya'te ! Di tas gin yébitëh leegi, dí tas dapaa yébitëh, dí tas gin yakki bossa wúnih hawid da, dí tas gin rabbi bossa wúnih hawid da. ³ Ginna béeb hanute na gulli njaaliyohi

misiga homa' ri ra : buurra feey fa fanuute a ri te yiikoh ya líífrúté nafa yi wa, af biti bēewē míníh doyloh neb. »

⁴ Mi keliilte un kola'te sun won tih : « 'Dúhí gina, don fa henu heedi so' ra, toñeh don ay bakaare ti wa nen, loolla na ac da lab don na. ⁵ Bakaaddi caak caako nii lahte sun, te Koope halay pagaddi bossi. ⁶ Yínlí rí iña pañ dī bēewí kayya ra, yínlí rí wē ana. Éfí rí guluj lífíd, éfí rí hani luk yee yed dī bēewí kayya ra dah ana, don yed dī han. ⁷ Tíkí rí coono, don tík dī sáfúñ ti di hómú lahuu wa neb a ndam, ndah dī hómú won nufi tih : "So' mi buur. So' mi jétíd neh te mii mēssí yúh luuy." ⁸ Yii baa daa tah loolla waaydu ri ra ay keenee sun fi waal yínē : jérí misikke, luuy a yaab ; dī tam ní muuy. Koo-Yíkēe fē aattiya' ri ra gaante doole. »

⁹ Buurra feey fa ñéerúu a ri njaaliyoh a yin neb ra ay looy, te wa ay hawoh biti wa séen dúukēe biti gina tame. ¹⁰ Wa ay tít ní wa cañ, wa wuloh af yee kat gina ra, wa wone tih :

« Wēey looli yaafi !
Looli yaafi kan taan !
Wahtaa yíníi baa kut,
Babilon, dī fi gini gaana aat-
tiyuute haat ! »

¹¹ Tígí daaha, yiikoh ya feey fa na looyu na capituu bal ndah ow lomlay iña na yaayu wa ra : ¹² tiññi úrissē, tiññi hélissē, jamaa ya a feme ya ; píissí kofeella, cúuppē a píissí suwaa ya

; kilikki heeñce, barngalli kofeelte, pērēmmē, tiñña, iñi yugusuu a luk caa', a la' yi marbe ya ; ¹³ liibbi kilikki heeñce, laakkoloñña, cuuraayya a iñi heeñlaa ya bēeb ; hanna, dúuléennē, múnnē a bele ya ; fañnja a harra, pēnissē a sareetta ; ñaamma a bēewē habu ra bēeb, ow lomlay wa. ¹⁴ Ay wonu tih : « Iña na yaakaar gina koon ra bēeb sooyce teempe daaha. Di ñakke alal mi a iñi wunni bēeb te ri wocce oli wa ta' ! » ¹⁵ Yiikoh ya na hómú yaayu te caakuu yin daaha ra ay tít ní wa cañ, wa wuloh af yee kat gina ra. Wa ay looy wa capitoh ¹⁶ wone tih :

« Wēey looli yaafi !
Looli yaafi kan taan !
Di fi gini gaana hómú beka'
búubbí yugusuu píisi
kofeelte, a cúup lum
cuy,
pokoh takkaay úrís, la'i na
miriñ, a feme,
¹⁷ wahtaa yíníi baa kut
alal mi yaa bēeb hente
dureet ! »

Bēewē nē kúrú gaalli gaanna kísí fē rē a bēewē sayu baab homu filiñ ra bēeb, yee na légéyú filiñ a yee na légéyú kísí rē bēeb cagute, wuluute ¹⁸ bee séenúu wē dúukēe gina na tam ra, na fogu wonu tih : « Gini teemma' gini bee gaan lēhírēy kan ! » ¹⁹ Wa homute na túmú affi wa feey, na looyu, na capituu, na fogu wonu tih :

« Wēey looli yaafi !
Looli yaafi kan taan !

Moo yíkëe yí gaalla kísí fë
caakuu yin gini gaana ee !
Wahtaa yíníi baa kut
gin hente dureet ! »

²⁰ « Kélii ñon bíyëh ñon
fa sun, yaha yah gini gaana
ra ! Bíyíi ñon fi bëewí
Koope, bíyíi ñon fi apootarra
a yonente ya, ndah Koope
daa aattiya' ri di ñni bossa
pañ ri ñon ra ! »

²¹ Tígí daaha, lahte
malaakii mitte, bebpe la'
gaan bette filib kísí fë na
won tih : « Dee keena'
la'i bee filib mulaa ra, ño
fi Babilon fi gini gaana fay
henee daaha jummúy, te ow
ii roo ollil ta'.

²² Un koraa yi na típ, un
yeekoh,
un kiis a un kúlúb,
ow wocce waa keloh ñoo na
ta' ;
bëyí hereñce yugus yin
a di mín ñni hen béeb,
ow wocce rii ot ñoo na ta' ;
un kud' wocutee keloh ñoo
na ta'.

²³ Lampa wocce ñiñ ñoo na
ta' ;
yeekaa kílëek wocutee
keloh ñoo na ta',
ndah yiikoh yu
daa húmú lukuu lah tii
ëldúnë,
te pagaddi bonnu
kúrëelëhtë heetta béeb.

²⁴ Ñif mi yonente ya,
yi bëewí Koope
a yi bëewë hawu feey fa ra
béeb
keena' ya' yu. »

19

Alleeluyaa !

¹ Filoon fi baaha, mi kelo-
hte uni béyrëhtë man un
dúukël i ow nen, kola' sun-
Koo na won tih :

« Alleeluyaa* !

Koope fi yen daa na sëmlë',
daa ri yeeliyoh ndam,
daa ri yeeliyoh doole !

² Aattiya'i kaah !

Aattiya'i júbpe !

Di keente sun fi belii tílëhí
gaana,

belii tílëhí gaana na húmú
yah bëewë feey fa ra,
na húmú yah bëewë feey fa
a njaaliyoh yi ra ;

ñi yíllídtë súrgë yí,
yíllídtë wë ñif mee ke wa
keen ña. »

³ Una tíkëettë won tih :

« Alleeluyaa !

Dúukíi gini gaana kolohte !

Dúukíi gini gaana tamu ra
kolohte faw ! »

⁴ Baha yi sabay ana a ini-
illa (24) a mbíneeffí iniilla
yekute na jaamiyuu Koope
fa took ñaani nguur ka ra,
na wonu tih : « Démíin !
Alleeluyaa ! »

⁵ Tígí daaha, un ñofohte
ñani nguur ka na won tih
:

« Njëebí Koope fi yen ñon fi
súrgë yí béeb ;

njëebí rí, ñon fa neehu ri ra

!
Njëebí rí, baadoole neh ow
gaan neh ! »

⁶ Mi henil ñeh, mi keli-
ilte un man un dúukël i
ow nen. Una man di na
laba' mboowaanna kísí fë
nen, man di na tiila' piillin
nen, na won tih :

« Alleeluyaa !

* 19:1 19.1 Alleeluyaa wona' ébrë. Iti fi daa ri : njëebí Yahwee.

Koo-Yíkëe fí yen fa mín béeb
rë

cëgídté nguur ki !

⁷ Yen lahun sos-keeñ

yen bíyëh,

yen kañ dí

ndah kílëegí Har fa lahte

te belaa canke na seh,

⁸ onute biti dí bekoh yéré,

bekoh yéré yí dñisúu píisi

kofeelte,

dñisúu píisi na miriñ-miriñ,

dñisúu píis naa' peyeb, hente

pesen. »

(Píisi kofeeli baa teeɓa' iñi
júbbë pagu bëewí Koope ra.)

⁹ Filoon fi baaha,

malaakaa won so' tih : «

Bíniyé yii beh : lahute

sos-keeñ bëewë gapu ñami

kílëegí Har fa ra. » Di tíkké

won tih : « Unni yaa Unni

Koope sah-sah ! »

¹⁰ Mi yedfohte kotta ma

na saañ jaamiyohi, ndaa dí

won so' tih : « Bëyít ! Ngana

pañ dí ! So' mi súrgë ti

ɗo a koy-yaayyee ke ro fliɓ

ngémë nen, yee na seedeyu

unni Yéesú rë. Fu wadti

jaamiyaa Koope kep, ndah

iña seede Yéesú rë daa baat

yonente ya nuf. »

Bëe' yaagoh pënís fí naa'a

ra

¹¹ Filoon fi baaha, mi otte

sun-Koo kúnsëhté, pënís

naa' feeñyohte. Bëe'

yaagoh ri ra wonuu Bëyi-

mit-wëelíyëh a Kaah ; dí

aattiya' júɓ, te júɓ daa tah

dí na haa'. ¹² Íllë na ñah

ti kii nen, afa béeb baane-

buur ! Tiyi daa ri yúh rí

kut bíniyúté faana. ¹³ Di

bekohte paltii liífé a ñif

; dí hínú : « Un Koope

». ¹⁴ Jammaarra sun-Koo

bekuute yéré yí dñisúu a

píisi kofeelte, naa' peyeb

hente pesen, yaaguute pënís

naa', ñeyute tala. ¹⁵ Jépíli

kaañce na dúh búgë, jépíle

nay laɓe ginna ra. Di ay waa

kúɗ kúri hínté, dí lopot wa

ti reseñi lopotuu ndonji neebi

misigi Koope fa mín béeb rë

nen. ¹⁶ Yii bee daa bíniyú

sun fi paltii a koti : « Buuri

buurra a Yíkëe fë lukki gaan

ɗa. »

¹⁷ Filoon fi baaha, mi otte

malaaka canke na'a, béyídté

uni sun dëekké yakka na

njuñkaanu sun-Koo ra won

wa tih : « Èyí don tee'a'

ñami ndaje mi Koope ! ¹⁸ Èyí

don ñam bo' yi soldaarra, yi

kélfë yí wë a yi buurra ; èyí

don ñam bo' yi pënissë a yi

yíkëe yí wë, bo' yi bëewë

béeb : bi laha' a fi a yi

ñaamma, yi baadoole ya a yi

bëewí gaanna béeb. »

¹⁹ Mi henil deh, mi otte

raba, buurra feey fa a

soldaarri wa tee'uute, ay

yejee bëe' yaagoh pënís

fí naa'a a soldaarri ra

haa'. ²⁰ Tígí daaha, raba a

yonentii paɗɗah fa habute.

Yonentii paɗɗah fi baa

daa pañ kimtaana fii raba,

múuydí bëewë kúru ñaasi

raba faanni wa, na húmú

jaamiyuu netli ra. Raba a

yonentii paɗɗah fa betute

fliɓ laahi géle yéelíɗ.

²¹ Soldaarri wa béeb hawufe

a jépíle dúh búk bëe' yaagoh

pënís fi naa'a ra, yakka

béeb ñamute bo' yi wa níi

beniyute.

20

*Kíillí júnনী (1.000) yí
nguur ka*

¹ Filoon fi baaha, mi otte malaaka kola'te sun na cép feey. Di hampe céebíi ngaara mi nuja a níh tiinji guussé ya'i. ² Di hampe niñkinan̄ka fa, goñ fee kíilē, tuumaloha daa Seytaane ra, pokalsa'te ri yulidte ri kíil júnনী fii (1.000). ³ Malaakaa bette ri ngaara ma, kúnté rí, téycé a céebí, leewte sun nda ri banti bet heetta níi kíillí júnনী (1.000) yé mit. Bín fē rēe, dī pēkísú yeddu yutuud.

⁴ Filoon fi baaha, mi otte i ñaan nuur. Bēewē tooku na ra onute sañ-sañ aattiya'. Mi otte coonaa yi bēewē hómú hawu húl di yee hómú seedeyuu wa Yéesú rē, a di yee na hómú waariyuu wa Unni Koope ra. Daa wa bēewē hómú jaamiyuy raba a netli ra, bēewē hómú kúrúy ñaasi raba púkkí wē mbée ya' yi wa ra. Bēewí yaa daa nimilu na pesu, tookute a Kiristaa nuur ka, na suu kíil júnনী (1.000) fii. ⁵ Yaa daa bēewē débúu koloh búudé rē. Bēewí kayya húlú rē nék ii koloh dee níi kíil júnনী (1.000) fii. ⁶ Lahute sos-keen bēewē débúu koloh búudé yaa ra ! Wa bēewí Koope te húlē'í ana fa mínléh wē dara. Daa wa nay hene seeyoh yi Koope a Kiristaa, wani Kiristaa hom nuur ka yulid dī kíil júnনী (1.000) fii.

Daani Seytaane

⁷ Kíillí júnনী (1.000) yé gét dēe, Seytaane ay yeddu dúh ngaara mi nuja, ⁸ dī saañ nofee heetta ginna béeb, ginna na wonuu Gok a Magok ra. Di nēgírē' wē wa caak níi ti peppi feey fa kísí nen, wa saañ haa'. ⁹ Wa hasluute filib gina béeb, wa gíiwúté tígē homu bēewí Koope ra, gina faha' Koope ra, ndaa lahte kíi kíi kola' sun-Koo, muuyilte wa. ¹⁰ Te Seytaanaa nofa' wa ra betute laahi gélē, tígē hom raba a yonentii padfah fa ra. Wa ay home daaha wa pítípee misik kíi kē, na' a elek níi kiri fi kirih.

Bis-këem

¹¹ Filoon fi baaha, mi otte ñaan-nguur naa' gaan, a bēe' took sun da. Feey fa a sun-Koo yípútée hegoh, wuluute ri, te ow ollilay wa. ¹² Mi henil deh, mi ot bēewí gaanna a baadoole ya húlú rē béeb cagute fii ñaana, lahte téeré yí kúnsúté. La-haatte téeríi kúnsúté kay, daa ri téerēe bíníyú tii yi bēewē nay haale pesa na dúméh rē. Bēewē húlú rē aattiyuu di iña pagu wa ra ti dee bíníyúu rí téeré yí yaa ra nen. ¹³ Kísí fē hokke búudé yé filib fi, kúl kē a gin bēewē húlú rē kúrúté yi wa bal, ow fi ow waa na béeb aattiyuu iña pañ dī ra. ¹⁴ Tígí daaha, kúl kē a gin bēewē húlú rē betute filib laahi kíi kē. Laahi baaha nék daa húlē'í ana fa. ¹⁵ Bēyí tiyi homay téerēe bíníyú tii yi bēewē nay haale pesa na

dúméh rē béeb betute filib laahi kii kē.

21

Ēldúnē fi hasa

¹ Filoon fi baaha, mi ot feey has a sun-Koo has. Feey fa déb dē a sun-Koo fa déb dē sooyce, kisi fē múkkē nē bal. ² Mi hen deh, mi otte gini selaa, Yerusalem fi hasa kola'te sun na cēp feey. Koope daa wol ri. Di man kilēegē yugusoh nū wunte baa saañ téebilēhí yaali ra nen. ³ Mi kelohte un béyrēhté sun kola' ñaani nguur ka won tih : « Ēlí kan ! Koope dék filib fi bēewē leegi ! Di ay déké a bēewē, wa hen bēewí. Di fi Koope ay déké waa na, dī hen Koope fi wa. ⁴ Di ay moos muun ma illí wē béeb : húl wocce, luuy dūmpé ; hawoh wocce, misik dūmpé. Iña déb dē béeb dūmpé ! »

⁵ Tígí daaha, bēe' took ñaana ra won tih : « Olsee, mi yugusse iña béeb hente has. » Di antee tík won so' tih : « Bíníyé yii bah, ndah unni yaa wēerté te wa kaah. » ⁶ Di tíkilté won so' tih : « Iña béeb paama'te ! Daa mi Alfaa daa mi Omegaa*, daa mi dalaana daa mi lúsēenē. Bēyí fí sifira' han, may rii on dī han di culi mulaa na ona' pesa na dúméh rē, te mi sehay na yin. ⁷ Bēewē nay bage ra ay liil waafi baa soo na ; te may hen Koope fi wa, wa hen koyyi so'. ⁸ Neehoh ya nék, yee gémúy Yéesú rē,

pagoh yi iñi bossa, bēemēh yí bēewē, yee na pagu yii tappe njaaliyoh béeb dē, lunna, bēy yúullē a feloh ya béeb ay mǐllēe laahi gélē daa húl'í ana fa ra. »

Yerusalem fi hasa

⁹ Filoon fi baaha, malaaka di malaaka yi paana ya habu gulunñi paana ya líif a loolli paana ya mǐllé' rē acce won so' tih : « Aye mi teeβ dō kilēegē, kilēegí Har fa. »

¹⁰ Ruuh-Pesēñ haalte so', malaakaa kúdté sē' jibi danj utte, teeβpe so' gini selaa, Yerusalem fi hasa Koope wol ri, kola' sun na cēp rē. ¹¹ Gina na ñah a ndami Koope ti la'i na miriñ nen ; dī helenñ ti pilaatu nen, na tak wiriñ wiriñ ti jamaa hilil nen. ¹² Di wērúte a mírí udi laha' il sabboo a il ana yi malaaka sabboo a malaaka ana daa na wohu wa. Sun fi illē bíníyú tii yi talli sabboo a ana yi bēy Israyel. ¹³ Íllē dúhrúu deh mírē : il éeyē hompe waal púlēen na', il éeyē hompe waal yuunñ, il éeyē hompe waal haalaan na', il éeyē hompe waal feey-feey. ¹⁴ Mírí gina tíkēh sun la' sabboo a la' ana yi tii yi apootarri sabboo a apootarri ana yi Har fa daa bíníyú nē.

¹⁵ Malaakaa na won soo na ra hampe duud' úris, bi ay natuu gina, mírē a íllē. ¹⁶ Gina koñ-kaare, utaa fa a haggaa ka daa teyu. Malaakaa yampe na nat gina a duuda : utaa fa hente

* 21:6 21.6 Daa mi Alfaa daa mi Omegaa :Alfaa daa koy una déb di gerek ra, omegaa daa mǐllé'.

estaat† júnní sabboo a estaat júnní ana (12.000), haggaa ka daaha, caggaa ka daaha bal. 17 Di beyaatte duuda natte míirē bal : utaa ka hente sunj tímээр a sunj sabay iniil a sunj iniil (144). Di nata' daaha ti di na nata' ow nen. 18 Míirí gina tabahuu a jamaa, gina tabahuu a úris kah-kah, helenj ti pilaatu nen. 19 Yii hente la'i wunte te kofeelte rek daa wunaaluu íliyyē yípēh míirí gina ra : bee déb dē jamaa hilil ; ana fa man sun-Koo nen, wonuu safiir ; éeyē fē hilil, wonuu kalseduwaan ; iniil fa hilil na tak, wonuu émērēet ; 20 iip fa luum, wonuu sardonikse ; pēenē fē luum cuy, wonuu sarduwaan ; paana fa mbaasaan ti tutaab nen, wonuu kirisolit ; peeye fa hilili tappe búlēh ti kísí nen, wonuu béril ; payniil fa mbaasaan ti tutaab nen, wonuu topaas ; sabboo fa hilil, wonuu kirisoparaas ; sabboo a yínē fē búlēh, wonuu yasente ; sabboo a ana fa luum luumađ feey tagu, wonuu ametiste‡. 21 Íllí sabboo a ana ya, wa i koy suumi. Íl fí íl béeb yugusuu koy suumi yínē kut. Kēemí gina nék yugusuu úris kah-kah, helenj ti pilaatu nen.

22 Mi olay Faam Koope gina nék, ndah dī fi Koo-Yíkēe daa ri Faam fa, Koope fa mín béeb rē, bani Har fa. 23 Gina sohlaay na' sohlaay

céyín niñlaa, ndah ndami Koope daa na niñil ri te Har fa daa lampaa. 24 Heetta ay tilée niñi, te buurra feey fa ay kúf ndami wa gina. 25 Íllí gina ay wērsée wērsēe bisa béeb, wa ii lukki wodlu wodlo sah ndah elek wocce. 26 Ndami heetta a alal mi wa ay kúrú daaha. 27 Yin ii haal gini bah : yii sobete neh, bēyí na pañ yin bos neh, bēyí na fel neh. Bēewē nay naa haale ra daa wa yee tii yi wa hom téerēe bíníyú tii yi bēewē nay haale pesa na dúmēh rē, daa ri téeríi Har fa.

22

1 Filoon fi baaha, malaakaa teebpe so' laahi mulaa na ona' pesa na dúmēh rē, bi hente helenj ti pilaatu nen, kola' ñaani Nguur ki Koope a Har fa, 2 na hūt kēemí gina. Hanndal ki salli laaha, tal kilka na ona' pesa na dúmēh rē hompe na, bee na límē' waal sabboo a waal ana kúilē rē, lahaa céyín béeb dī lah koy ra. Saaffa daa na pay heetta. 3 Alkoh wocce, ñaani Nguur ki Koope a Har fa ay home filib gina, súrgē yē jaamiyee ri. 4 Wa ay ot kanama, te tiyi ay bíníyú púkkí wē. 5 Elek wocce, wa ii sohliil lampii nay waa niñle, sohluuy na'a, ndah Koo-Yíkēe ay waa niñil, wa hom nguur ka faw.

Nimili Yéesus

† 21:16 21.16 estaat :Di húmú nataa. Estaat yínē wađti hena ganjarma jaak tímээр ana (200). ‡ 21:20 21.20 Kúlēerrí la' ya bíníyú dee ra, fun oluu wa deeha, ndaa dēe man la' ya ra tasa'te lan af.

6 Filoon fi baaha, malaakaa won so' tih : « Unni yaa wëerté te wa kaah. Koo-Yíkëe fë nê sod yonente ya Ruuhi ra daa wol malaakii teebi súrgë yí yee na saañ lahe te wulay wulay ra. »

7 Yéésú won tih : « Síkíríi ! So' may nimil te ii maañ ! Lahute sos-keenñ bëewë helu nuf unnee ke Koope filib téeríi bee ra ! »

8 So' mi Sañ, mi kelohte te mi otte iñyaaha. Filoon fi bee kela' mi wa mi otte wa ra nék, mi yedfohte kotti malaakaa teeb so' wa ra, ma na saañ jaamiyohi, ⁹ ndaa dí won so' tih : « Bëyít ! Ngana pañ dí ! So' mi súrgë tí do a koy-yaayyu yonente ya, a bëyí fí helte nuf unna filib téeríi bee ra nen. Fu wafti jaamiyaa Koope kep ! »

10 Malaakaa baatte won tih : « Ngana d'ap yin unnee ke Koope filib téeríi beh, ndah wahtii wa ee saañ lahe ra. ¹¹ Bëyí bosse haba pañ yin bos ; bëyí sobete homaa a sobii ; bëyí júbpé haba pañ yin júb ; bëyí selate, súhë nê. »

12 Yéésú won tígí daaha tih : « Síkíríi ! So' may nimil te ii maañ, mi yíníl ow fi ow béeb yee légéy rí rë. ¹³ Daa mi Alfaa daa mi Omegaa*, daa mi déb daa mi millé', daa mi dalaana daa mi lúsëenë. ¹⁴ Lahute sos-keenñ bëewë na hosu búubbi

wë rë, wa ay mín ñam na koy kilka na ona' pesa na d'uméh rë, wa ñeya' íllë, wa haal filib gina. ¹⁵ Bëewí bossa nék : wa fi luunna, bëewë na njaaliyuu ra, yee na bëemú ow ra, bëy yúullë a bëewë fahuu fel te dékúu nê rë homun èssín.

16 « So' mi Yéésú, daa mi wol malaakii so' teebi don fi bëy ílí jañaa iñyeh : So' mi sédí Dawit, te daa mi hula na niiñ hagađ da. »

17 Ruuh-Peseñ a kíleegí Har fa wonu tih : « Aye ! »

Bëyí fí keloh uni baa rek wona : « Aye ! »

Bëyí fí sifiroh aya !

Bëyí fí faha' na mulaa na ona' pesa na d'uméh rë meeluy na dara !

18 So' mi Sañ, mi won a don, don fi bëewë keluu Unni Koope filib téeríi bee ra béeb nê : bëyí fí baat na yin, Koope ay rii baat loolla wonu filib ra. ¹⁹ Te bëyí nís nê yin, Koope ay rii nísíd wodi di koyyi kilka na ona' pesa na d'uméh rë, nísíd dí tígí di gini selaa na wonuu filib téeríi bee ra.

20 Bëe' won biti iñyaa béeb kaah ra won tih : « Mantee : So' may nimil te ii maañ ! »

Démíin ! Aye Yéésú-Yíkëe !

21 Yéésú-Yíkëe líhë rën béeb mal !

* 22:13 22.13 Daa mi Alfaa daa mi Omegaa :Alfaa daa koy una déb di gerek ra, omegaa daa millé'.